

Cheldecheduch er a Belau

Ongeru el Hong



Collection of Palauan Legends edited by Masaharu A. Tmodrang

June 2017

OMESODEL TIA E BABIER

Aika el cheldecheduch el beldukl er a eou a mlengai er a kakerous el babier me a hong. A uldasu el uchul e ak mlo meruul er tia el hong a melasem el oldak a betok el cheldecheduch el di mo chimo el hong me ng mo sebechir a rengalek el menguiu a cheldecheduch er a Belau el di ngar er a chimo el hong. Ng kmal betok a cheldecheduch er a Belau e ng di aika a llechukl er a betok el kakerous el babier me ng meringel er a rengalek el osiik a lebo el sorir el menguiu.

A irechar e a remeklou el chad a blechoel el mengedecheduch a cheldecheduch el mo er a rengalek el mellach er a rengalek. Me aika el cheldecheduch a suobel el mo er a rengalek me a ngii di el chad el soal el mo medenge cheldecheduch er a Belau.

Ng kmal betok a cheldecheduch el diak lsebeched el chemudel el rokui el mo chimo el hong. Me aika el ngar er tia el hong a kuk di bebil er aike el betok el cheldecheduch el mlo sebechek el metik e chemudel e lmuches el mo chimo el hong.

Ak olengit er a rechad el menguiu er tia el hong me a lsekum ng ngar er ngii a ko er a mo cheleuid er aika el cheldecheduch e ak kmal lolengit me leme me desmechokl el mo ungil.

Kom kmal mesaul,

Masaharu A. Tmodrang

BELDEKLEL A CHELDECCHEDUCH


<u>CHELDECCHEDUCH</u>	<u>Pages</u>
Omesodel tia el babier.....	1
Beldeklel a Cheldecheduch	2
1. Uchelel a Belau.....	6
2. Uchelel a Ngardok.....	8
3. Beachedarsai	10
4. Bekai Er a Okerduul.....	12
5. Belas.....	18
6. Beltikerreng.....	21
7. Beriber Me a Emaredong.....	29
8. Bersoech Er a Elechui.....	30
9. Biib Me a Matkerumes.....	33
10.Bkais Chemrungel.....	35
11.Bukitang el Delal a Ralm Er a Ngardok.....	37
12.Chedengal a Matukeoll.....	39
13.Cheldechedechal a Malsol.....	45
14.Cheldecheduch Er a Beliliou er a Irechar.....	46
15.Cheldecheduch Er a beluu er a Oikull.....	48
16.Chubechub Me a Kedung.....	51
17.Dechedech Er a Ngeraod.....	55
18.Dildaob.....	60
19.Dilmellomes.....	64
20.Diong Er a Ikeam.....	69

21. Dirrabakerus.....	72
22. Ereallbtil Me a Rrusbedengel.....	77
23. Iluochel Me a Mesei.....	79
24. Ius me a Uel.....	81
25. Kaeb Er a Oreor el Llel a ngklel.....	84
26. Katuu Me a Mengerenger.....	85
27. Kedungelchebud Me a Dengerengerelchebud.....	87
28. Kemedukl Me a Maml.....	89
29. Kim Er a Murael.....	91
30. Klengar Er a Medechiibelau.....	94
31. Kodellel a Ngelekel a Rdechor.....	98
32. Ksau me a Ius.....	99
33. Matermeliik Me a Kiuesall.....	100
34. Mechutedil.....	106
35. Medachelbai Me a Uchulachetiu.....	108
36. Medechiibelau.....	110
37. Melamitoi.....	113
38. Meluadeangel.....	116
39. Mengidabrutkool.....	120
40. Merengel a Sechesebal.....	121
41. Meruk Me a Bechars.....	124
42. Mesumech e Dmanges.....	126
43. Mlechei.....	128
44. Ng di Rengud e Ngusek.....	130
45. Ng Meral di ua Ulekerdeuiil Me a Chibaselel.....	132

46. Ngeleketbudel Me a Ngeleketchelsel.....	134
47. Ngera me a Chum a Ngar er a Kai.....	137
48. Ngerchokl.....	138
49. Ngerengelecheluu.....	142
50. Ngermelei.....	145
51. Ngemelis.....	146
52. Ngibtal.....	147
53. Ngirailemesang.....	149
54. Ngiramelengoes.....	151
55. Ngiratumerang.....	153
56. Ngirengchesar me a Odalmelech.....	156
57. Ngirngemelas Me a Obirrir.....	158
58. Okiuamechuu.....	160
59. Olbed e Kall.....	161
60. Olchiaol.....	162
61. Olik Er a Idabeluoche.....	164
62. Olik me a Beab.....	170
63. Ongael Er a Ngerchemel.....	171
64. Osilek Me a Oreng.....	172
65. Oungoaol.....	174
66. Rechuluchel.....	175
67. Redil el Mlo Mesekiu.....	178
68. Ruebet Er a Okediul.....	180
69. Sechou Er a Keanges.....	181
70. Sechou Me a Deroech.....	182

71. Sechou Me a Tukidolech.....	184
72. Siangeldeb Me a Keong.....	185
73. Teb Me a Luk.....	188
74. Tebang Me a Demal.....	190
75. Tebruchel.....	192
76. Tucheliaur.....	193
77. Tulei Me a Surech.....	197
78. Tutau Me a Remerang.....	199
79. Tuterngeraod.....	201
80. Uchelbeluu Me a Ngetngod.....	203
81. Uel Er a Ngellil.....	205
82. Ungilreng Me a Mekngiterreng.....	207
BELKUL A TEKOI.....	208

NGEAUR



A uchelel a Belau a ulemuchel er a Ngeaur el mei. Ng ulemuchel er a Chuab el mlo beluu er a Babeldaob.


UCHELEL A BELAU

A Kim el mla er a Lukes el delongelet a Beliliou me a Ngeaur a milechellii a Latmikaik. Ngika el Latmikaik a milechellii a Uchererak el sechal me a Chuab el dirrek el sechal me a Iluochel el redil. A Uchererak a mlo Uchelianged. A Chuab a mlo metongakl el chad me te dmul a ochil me ng muukel el me beluu er a Belau. A Kiukl a delel me a Desbedall a ulkel. Tia ikid a ua luchul e a chelmoll er a Kiukl a cheroid e a chelmoll er a Desbedall a kmeed. A Renged a ua leblo lechiklel e a Ngerchelong a bdelul, iseit a uchul me ng Euidrechelong.

A Iluochel er a lengar er a Ngeaur e ng mle Dililebuu a ngklel e me er a Ngeriab er a Beliliou me ng mlo Dilidechuu e mlo er a Ngibtal er a Ngiwal me ng mlo Dirrachedebsungel (mesa Meduuribtal) e mlo er a Ngerchebukl er a Ngchesechang me ng mlo Dirrabkau.

Ngika el Dirrabkau a dimlak a ngelekel. A ta er a klebesei e ng mlo omus a such e metik er a ngais, me ng kildmeklii e nguu el me er a blil me ng medechel el leko ngodimel. Ngika el mechas a ulebes er tia el ngais me ng medechel el mlo meketeket. Tia el ngais a ulemeu el ngalek el sechal me ngika el mechas a milengklii el Ngiselacheos.

Tia ikid er a lengar er a Ngerchebukl e a rechad er a Ngerchebukl mlo melai er a redil er a Eanged e metom el dimlak a lenguu me te ngmai a buuk e mechit a medal a Temedokl el mengkar er a siseball er a Eanged. Tia a mlo uchul e a rechad er a Eanged a di diak lodengelterir a rechad e te me soiseb er a Eanged. Tirka el chad er a Eanged a mlo ko er a rrau a rengrir e a lebo lesa Temedokl e ng diak a medal. Te ngoura a cheluchouch e merema osiik a medal a Temedokl. A le kirel a Ulechong e ng obuu a cheluchouch me te mocha medenge el kmo a remlo er a delengerenger a ngar er tia me te mocha er a Ngerchebukl. Te miltik er a rechad el mla er a chei me te ullengit a odimir. A lomes er a blil a Dirrabkau a ngar er ngii a chat er ngii me te ngmai a odimir el ngikel el lullengit er a remla er a chei el mo e dmu er ngii el mechas el kmo, “Chedil mdul aika el odimam me a kime e kimngai.” Te merael e ngika el mechas a merakl a kukau e tmiud e ngmai aika el ngikel el locha er a chelsel e mekesiu e smaur e smuk er a oruikl e mechei. E tir a kuk merema tirka el chad er a Eanged me ng ngmai el mesterir. Te ngmai e merael el mocha er a melengel a rael e mocha omengur. A bo lekedekedii a oruik e ng di kukau e diak a ngikel me ng kmal ngilasech a rengrir. E a bo lekedoked a kukau e a ngikel a ngar er a chelsel el kmal ungil mark me ng ungia a rengrir. Te mlo merek el omengur e lueta el mo subedii a Dirrabkau el kmo, “A lemei a ngelekem er a Ngiselacheos e ke dmu er ngii me ng mo sotkii a olechutel e le ng mo er ngii a ieleb el blals e le rechad er a Ngerchebukl a ngilai a medal a Temedokl. A lebo er ngii a ieleb e kau me a ngelekem a mo er a olechutel me ng diak komad.” A lemerema a Ngiselacheos e a delal a dilu er ngii me ng sotkii a olechutel. Tia er a lebo lemerek a olechutel e ngii a mlo er ngii a ieleb me ngika el mechas me a ngelekel er a Ngiselacheos a mla er a olechutel el mo er a Ngeruach el rois er a Ngeremlengui e ng mocha cheraches me ng metongakl er tia el rois. Tia er a lebe metongakl er a rois e ngika el mechas a mlad. A rechelid a mle metengel e metik er ngii me te rullii el lmuut el me chad. Tia ikid a uchul e ng mlochu Milad a ngklel.



NGARDOK



Uchelel a Ngardok

A irechar e tia el Ngardok a mle mesei me a remechas er a Melekeok a uluumesei er ngii. Te mle betok el mechas el uluumesei er ngii. Tia el mesei a dirrek el mla er ngii a mekllel. A mekllel a ua se, a lsekum a mechas a mo er a mesei e se el lebo lemerek el ngar er a mesei me lorael el me ngmasech er tia el kedadai el tkul a mesei e ng diak lekirel el lmuut el omes el mo bedul a mesei. Me tia ble lodengelii a rebek el mechas el oumesei er a Ngardok me ng dimlak a mechas el meruul er ngii.

E ng di ta er a klebesei e ng mla er ngii ta el mechas me a ngelekel el mlo er a mesei er tia el mesei. Te mla er a mesei el mo merek e merola el me ngmasech er tia el kedadai er a bita er a mesei el merael el mo remei. E ngika el mechas a ko er a kmal mlo ungil a rengul er a meklechel el mla mo merek me ng ulebult el mo chemau a mesei el omes er a meklechel. Tia ikid er a lobult el omes er a chelsel a mesei e a ralm er tia el mesei a mlo merael el me er a bab e mlo mengiterbis. A dait me a dellomel er a chelsel tia el mesei a di miltecheb e mlechiterbis. E a

ralm a milrael el me er a bab el mo el mocha diong el di kea lemesei. Ngika el mechas a chiloit a sualel me a ngerkel me a rengor er ngii er tia el tkul a diong e merael ngii me a ngelekel. Tia ikid e tia el mesei a mocha diong el Ngardok a ngklel el me lmuut er a chelechang.

A ngar er a mong, e se el deme er a Ngardok e ng mle sebeched el mesa a ngark, me a sualo me a rengor er tia el tkul a ked. Ng di chelecha e ng mla mo diak deues.

Tia el cheldecheduch a lulengedecheduch er ngii a Collin Joseph e ak meluches er ngii

BEACHEDARSAY

A Beachedarsai a cheldecheduch el mlengai er a beluu er a Ngerdekus er a Ngardmau el lolecholt er a belkul tia el tekoi.

A Beachedarsai a mle merreder er a beluu er a Ngerdekus er a Ngardmau. E a Ucheltmel a rubak el mle merreder er a Ngetmel. Ngika el Ucheltmel a mle bechiil er a Reaos er a Ollei. A bechil a milechellii a ngelekir el sechal. A Ucheltmel milechire a ngelekel er a Reaos e ngii a mlo er a Ngetmel me ng melechotech a suld. Ng kmal mlo meketeket me a ngelekel el ngar er a Reaos a klunga el chad. Ng mlo oldingel er a demal er a Ngetmel. Tia er a lebo loldingel er a demal me lorael el mo er a blai, e ng dimlak lebkisii a ulitech e bai ulemotk el engelakl er a ulitech. Tia el omerellel a mlo ta er a belkul a tekoi, e le longedecheduch er a demal e a demal a dilu el kmo, “Rungalek, kau a mo Betbokulitech, e le kau tia el di ulemotk el engelakl er a ulitech.” Me a lebo el merek a demal el dmu er ngii aika el tekoi, e ng mocha oker er ngii el kmo, “Ng ngera a chised me ke mlei?” Me ng ouchisa er ngii el kmo, “Ak mle olengit a otilech, e le ng soak el mo melobech a kerrekar er se el bkul a keburs el ungil el domes er ngii a dengar er a Ollei. Me a demal a mocha nguu a otilech el msang.

A Betbotkulitech a ngiluu tia el otilech e omekella el mocha er a bkul a keburs er a Ngerdekus. Ng mlo tmaut el melobech a kerrekar. Ng di millobech a kerrekar, e a lluut el mo er a teluo er a kerrekar el oba otilech el mo melobech er ngii e ng mo dibus tia el otilech. Tia ikid, e ng mocha osiik er ngii er a uchul a kerrekar me a chelsel a ilachetomel. Ng di ulsiik er ngii el mocha kebesengei e diak lebetik er ngii me ng luueta el mo er a Ngetmel. Me a lebocha er a Ngetmel e ng uluchais er a demal el kmo ng mla oridii a otilech. Me a demal a dula el kmo, “Becherei e bo debad me a klukuk e bo dosiik er ngii e ng mla mo milkolk.

Tia el tutau er a bo el kukuk e a demal me ngii el Betbokulitech a mlo osiik er ngii el otilech er tia el bkul a keburs. Te di ulsiik er tia el otilech el mo kebesengei e di diak lebetik er ngii. A ta el rubak a dumia e okere er tir el kmo, “Ko mekera er tia el bkul a keburs?” Me te mocha ouchais er ngii er tia el ririid el otilech. Ngika el rubak a dula el kmo, “Bechere a skel a otilech e bai debo er a blai me domesoil.” Me te merola el ongalek el obengkel ngika el rubak el mocha er a blil el ngar er a Ngerdekus.

A lebo er a blai e tirka el ongalek a medku er a klengerenger e le ng ta el sils el diak leblengur e di ulsiik er a ririid el otilech. Te rireboreb e milengiil er a belsoil. A leme a belsilir e a belsilel a Ucheltnel a di mle telbached el kukau me a telbodech el ngikel me a belsilel a Betbotkulitech me ng mle ua ise. A Betbotkulitech a milengelulau er a demal el kmo, “Chedam aika ng mekera a dongang. Ngak a bai menga el mo songerenger a kunga aika el belsiled.” Me a demal a dilu er ngii el kmo, “Di deluk e domengur e ng kuk blekeradel er tia el blai.” Me a bocha lomengur e lomodech e lenguu a teteloech el me er a ngerir e a teteloech a kuk mo er ngii er a chelsel a buk el telbached el kukau me a telbodech el ngikel. Ng di mle ua ise me te medngesang.

A bo lemerek a belsoil e te di mle bad er a blil ngika el rubak. A tutau me lebekiis e a Beachedarsai a mocha nguu a otelechir el mesterir e dmu el kmo, “Kemiu a uchul e ng mlo dibus tia el otelechiu. Ng dimlak molturk e mo omukel a kerrekar er se el bkul a keburs. A chomluut el me melobech a kerrekar e ko me olturk.” Tirka el ongalek a ngiluu a otelechir el milrael e mileneklii tia el bkul a keburs el Bkulachelid. Elecha e a kerrekar er a Bkulachelid a dirk chedaol me ng diak lsebeched el di diak dolturk e melobech. A lsekum e ng diak molturk e mo melobech a kerrekar el mo blai e ng di medechel el mo mechut me a lechub e ng dirkak lebo el klalo e meterakl. Se ikid el Bkulachelid el ngklel se el keburs me se el ngakl el Betbotkulitech, me kelel a Beachedarsai a belkul a tekoi el mlengai er tia el cheldecheduch.

BEKAI ER A OKERDUUL

A Bekai me a Uel a teru el odos. Te mle ngelekel a mechas er a Iromel er a Ngetmel. Ng bek el sils a Bekai a omuut er a ongiang er a medal a tuangel e a Uel a melebek er a chemrungel. A derrir a di mlengedmokl me ng obisa a rengul. “Ngera ak tilemelli! A rechad omechell er a rechad, e ngak a omechell a charm! Ng turka renguk er a omengedmokl!”

A Bekai me a Uel a rirenges aika el ngerrelel a derrir e mocha katekoi, “Ng mo diak dobengkel a delad. Kede mo osiik a delengchokl.”

Me a ta el tutau e te milrael el mo er a taoch. A lebo e a Bekai a uleker er a Uel, “Ngera mo mlid el dengar er ngii?” “Ng diak dousbech a mlai. Ak mo metengel e ke me ngmasech er a ulkek e kede mrael,” a Uel a dilu er ngii.

A Bekai me a Uel a iliu a bek el beluu er a Babeldaob e mlo er a kekere el iungs el Okerduul a ngklel. A Uel a dilu er a Bekai, “Bo mkerd. Tia ia chobomkiei er ngii, e ngak a mo er a chelebacheb. Ak mo e mengiil er kau er a ta er a klebesei.”

A Bekai a kmal mlo mekngit a rengul. Ng dilu er a Uel, “A lsekum ke mocha e mo omechell, e ke mo omechell er a beluu me ng diak lemekmad a rengelekem.” (Sei a uchul me a uel a me omechell er a chelechol.)

A Bekai a mlo kie er a Okerduul. Ng mlo er ngii a ngelekel el ta el sechal el Remusei a ngklel. Ng di uleba e omekeroul er ngii el mlo klou el chad.

Ngar er a Imul el beluu er a Imeliik e a ta er a klebesei e a Secharraimul a uledurech er a rengelekel el tede el sechal el mo merad a bub er a Okerduul. A lorola el tede el odam e a derrir a silekur a teluo el kukau er a chelasir el okurir.

Te millikes el ngar er a melengel a taoch, e a kot el klou a kmo, “Kede mo e ngike el mo mereched el rodir a chimo el bub el me er a mlai a di ungil a lekelii a okuid.” A kot el kekere a mlo belalk a medal. Ng mle medengelii el mo diak lsebechel el kolii a telkib er a okurir e le ng mle mechitechut e meoud el merad.

Te mlo er a Okerduul e mlo kerous a leblo er ngii. Tirka el teru el meklou a dilak el mo merad. E a kekere a milrael el di ngii el ta el di medidelangel a rengul. Ng mlo motngeong er a Remusei el dilechor. “E rrang, ngera me ng di belalk a medam?” a Remusei a uleker er ngii. Me ng ouchisa a ldilu a obekul. A Remusei a chubrang me ng kmo, “Ak ngosukau el rodir a bngem. Me bo mngai a teblo el ulekngel a kikoi el mei me bo dechur.”

Te riredir a mlo sebechel a chimo el bub e a Remusei a cholngii el mlo ongesechii er a mlai. Ng dilu er ngii, “Momengur e mongiil er a rubekum, e ak merolung.” Me ngika el buik a ulemengur el kollii a okurir.

E tir a tirreka a rubekul e mesenge el di kea a okurir. “Ngera me ak di ulengelakel e kau a mla kolii a okuid e dimlak molatk e kemam?” Te chileklii a ochellelir.

A lebocha lrei, e te di tiluu er a blai a rubekul el olengit a kall. “Ng ko er a mla er ngii a okumi” derrir a uleker. Me te dmu, “Aki ulengelakel er a ochellam e ngii a kolii a okumam.” “Ngera me ng di kau el ta e kolii a okumi?” demal a uleker er ngii. Me ng mocha mengedereder a tekingel a kot el klou er a lolikes. “Ke milekera e kmal mle mereched el rodir a bngem?” A demal a liluut el oker er ngii. Ngika el buik a ulenger er a demal el kmo, “Chedam, ng mla er ngii a sechelik el ngilsukak.”

A bo el kukuk e tir el odam a mlo dmachel a bngir. A lemerema er a blai e a demerir a liluut el dmu er tir, “Kom lmuut el mo merad a bub er a Okerduul. E kau el kekere a nguu a sechelim el me me ak mesang.”

Te liluut el mo er a Okerduul el odam, e a kekere a mlo omes er a Remusei. Ng mlo dmu a tekingel a demal er ngii. Me a Remusei a dilu er ngii, “Mada kbo ksbebii a delak.” A Remusei a mlo mesubed er a delal me ng kilengei. Ng dokngei ngii me tirka el odam el mlo er a Imul.

A Remusei a mlo kie el obengkel a telungalek er a Secharraimul. Ng bek el sils el lolikes el mo oldingel er a delal. Ng mlo meketeket e ng mocha tuib a ilao e mocha melenges. A ilotel a mle blechobech er a tkul a rael. A ulebongel er ngii a mla er a tebedall er a Imul er a mo bedul a Ngetpang.

A ta er a klebesei e ng mlo melenges. Ng mla er a chetebtel a se el kmal ulebongel er a ilotel, e milsa a Tkud. Ng mle telechull a cheritel e chelebill er a til el ngar er a omerolel er a Ngetpang el mei. A Tkud a dirrek el milsa a Remusei. Ng milrael el imiu er a uchul a ilao el lebla er ngii a Remusei a mlo dechor. Ng chilusii a chemelel a Remusei e uldersii er ngii. Me ng metengela a Remusei el nguu a chemachel. Ng millamech er ngii e uleker, “Ke mle mekera me ng di tutau e ke meremang?” “Ak mle osiik er kau el melekoi a tekingel a chebechiil,” a Tkud a ulenger.

Me a Remusei a dula, “Bo er a uche e dorael.” Te milrael el mochu er a blai e a Remusei a dmu er a Tkud me ng mo dechor er a tmuil e ngii a mlo mesubed er a Secharraimul.

“Bo mdu er ngii me leme er a blai. “ a Secharraimul a dilu er a Remusei. A lemerema e a Secharraimul a di milsang e dulang, “Ng soak a chobo mkaubuch.” Me a Remusei me a Tkud a mlo kaubuch. E tia el sils er a bo lekaubuch e ng medechel a eim el klebesei e ng mo merengel a bechil a demal a Tkud er a Obakratkedesau.

Ngika el Obakratkedesau a mla er ngii a teim el ngelekel redil. A Tkud a mle kot el kekere e dimlak lebechiil. Ng mle kot el mekngit el dil er tir el rokui. Ng mle kerkertall a medal me a bedengel. A remechudelel me a rebuchelsechal me a redi chad er a blai a mle mekii er ngii. Ng mle omengedakl e blil a ngerroel. E aike el mekngit el oderuchel er a blai a di leblo er ngii. Ng di kilie er a olisall.

A Tkud a mle kot el cheleoch er a demal. Ng di ngii a menga a derengel a demal. A demal a mle chubur el kot el kekere e kikiongel a medal e diak lebechiil. Me ng ulemeklsiberreng er a remechudelel. A lekeda a merengel a derrir, e a remechudelel a mocha dmak e melaes er ngii. “Ngika ng di mesobil e ngera a mo bleketelel er a merengel a delal.” E a rebebil a kmo “Becherei e ngika kmal mengelengalek a medal me ng diak lsebechel el metik er a bechil. Kede bai di olderedurech er ngii me ng meruul a urerel a blai.” Tia ia uchul me a Tkud a tilobed er a blil. Ng mle blak a rengul el merael el mo osiik a chebechiil. Ng mle merur a lebo er ngii a mur e lak a bleketelel el udoud.

Me tia ikid el sils er a bo lekaubuch e te mlo bad er a ulengang e a Tkud a subedii a Remusei er a belsechel a mur er a delal. Me a Remusei a dilu er ngii, “Ke mo remuul a chilted el beumk e mo dobechii a ta er a dui e chousii a tik el chelititouch.” A Remusei a ulemkokl er itia el tutau el mlo melenges e mlo mesubed er a Secharraimul er aika el tekingel a bechil.

“Ng oingera a mur?” a Secharraimul auleker er ngii. “Ng medechel a eua el klebesei e ng mo er ngii.” a Remusei a silebedii. “Olekoi! Tia a kmal kmedang.” A Secharraimul a dilu e tilobed el mlo omed a udoud. Ng ileueklii a beluu er a Imul e dimlak a lebedir el udoud. Ng mlo er a Ngerkeai. Te dirrek el silemesmechii er a Ngerkeai. Ng mocha er a Elechui er a blil a Rebluud. Ng mlo sebechel el medir a chimo el kluk. A Rebluud er a lenguu el msang e ng dilu er a Secharraimul el kmo, “Tia el udoud a sechal klikes.”

A omerolel a Secharraimul el merema er a blai me a Remusei a merema el melenges. Ng dilechor er a kliu er a blai el melecherakl a omilel e rirengesii a bechil a Secharraimul el kmo, “Ngika ng ngelekel a terruaol el dil er ker el loretia a Secharraimul me ng di kea bo lekie er a kingellel.”

Ngika el mechas a ulemes er a bechil el di mededudeu ku er a klengerenger el merema er a blai. Me ng ngilasech a rengul e dmu el ua isei. A Remusei a di liluk e mle tmuu er a blai. Ng di mle ungil a osengel el ua bek el sils.

A bo lekukuk e ng tebedel a mur. Me a Remusei a dilu er a Secharraimul “Ak mo songes a ilotek e mei e mo er a Ngetpang.” Ng mlo er a ulengang me ng bad ngii me a bechil. E a metuda a klebesei e ng dula er a bchil el kmo, “Mchielak e kbo kisa a delak er a Okerduul me ak mei.” A Remusei a mlo mesubed er a delal er tia el mur me a delal a ngilai a teblo el ngais el mui er a udoud el msang. A delal a childereder a tebedel ngii el udoud, e dilu er ngii, “aika a kloklem. E a chobo e ng di kea mluut el mei. Chelecha el morael e kede mo kebii. Ak mo merael er a chereomel el omechell a kelir a remeteet e mo er a chelebacheb el mo osiik er a ta er ngak.” A Remusei a ngilai ngii el ngais e milrael.

Ng di mle tutau e ng mo songes a ilotel, e te mocha mengedmokl er tir el mo er a Ngetpang. A Secharraimul a milsa tia el kluk e te merolang. Te ngar er a omerolir el mo er a Ngetpang e mlo er a chimo el omoachel me te melechong e mengilt er tir er a beumk e a Remusei a nguu a sis el dobesii a bechil. Ng di ririid aika el kertall er a medal me a bedengel el di mlo meaiu. Ng mocha meu aika el ngais e ngilai a udoud er a chelsel. Ng ngiluu a chimo er a klou el bachel el kobsii er a chiklel a bechil. “A debo er a blai e ke mkisii a ulitech er a Obakratkedesau e kede mo tmuu er ngii e ke dmu, “Mdertii tia el udoud.” A Tkud a mlo er se el klungiaol el dengdengechel ku er a rechad. E a Remusei a mle klebokel el sechal milengal el kmal mlo klebokel.

A Tkud me a Remusei a di dilum er a tmuil e tia el meseked el mekesokes me a chelsel a blai a chilsngekl el ulemes er tir. Ng mlo mechas a rengrir er a klungiolel a Tkud me a bechil, me a klou el bachel el ngar er a chiklel a Tkud. A Tkud me a Remusei a di iliu a bek el tuangel e mlo er a tungelel a Obakratkedesau, me a Tkud a silebeklii a ulitech e dilu, “Mdertii tia el ngar er a chiklek.”

Me a Obakratkedesau a dilertii e dmu, “Bemtuu er tia kau me a bechim.” Me te mocha tmuu el terung.

Te di mlo merek el omengur e a Remusei a okere a belsel a mur e dilu, “Ak orreched e le ilotek a cheloit el diak a chad el omes.” Me a Obakratkedesau a ulecholt a blals. A Remusei a kilekad el rokui, e ngiluu a ta el bachel el msang e dmu er ngii, “Tia a chetul a mur.” Tia el seked er a rechad a mlo mechas a rengrir er a ilttel a Remusei. Te di ullab aika el derta el

ududir e di kea loltobed. E a Remusei a mileltii er a bechil e dmu, “Ke kie e ngak a merael.” “Ak kie e mekerang? Ak obengkem el merael,” A Tkud a dilu er ngii. A Obakratkedesau a dula er tia el seked, “Aika el kelel tia el mur a chomtuchel el rokui el mo ngederel a Tkud. Ko mo ngoderii er a Imul ngii me a bechil.”

A ta er a klebesei e a Remusei a mocha chuib a omilel e mlo diak lolenges. Ng mlo nguu a ta er a bachel el msa Secharraimul e millemesumech er ngii, “A kurael e ng di kea kluut el meu.” Ng ullutii a kluk el lebildir a Secharraimul er a Rebluud e milsa a ta er a kldait e dilu, “Tia el kldait terekel tia el kluk. Me mluut el mo ngoderii er a Rebluud.” A Secharraimul a melulucha er ngii me ng dula, “Becherei me kurael. Ak ngelekel a terruaol me ak kie e ak di mengesang er kau.” Ng di dilu el ua ise e te remiid ngii me a Tkud.

A Remusei me a Tkud er a lorael e te millikes el me er a taoch er a Ngerusar me a lengar er a taoch er a Ngerusar e a Tkud a dmu, “Ng kmal merengela bdeluk er a sils. “Msebechii a chimo er a rechelel a kerekur me lomderngek.” Me a Remusei a silebechii e ngiluu el msang.

A Remusei me a Tkud a mlo kie er a Ngerusar er a blai er a Klai. Te ngiluu tia el kerekur el dolemii er a medal a blai. Ng mlo meketeket e ng mocha er ngii a ngelekir el sechal. A Remusei a milengeklii el Ochit. (Chelecha e kede omekedong aike el mekekere el ngelekel a bekai el Ochit a ngklel.)

A Ochit a di lmangel a lellomes me a klebesei. Me a Remusei a dula er a bechil, “Kede mo er a Desbedall. Debo e desa ngeleked el kmo ng mo diak llangel?” Me ng mocha melmesumech er a Tucheremel. Ng ngiluu a chimo el bachel el msa a Tucheremel e kmo, “Ke kmal mesula er kemam, e kimo merael el mo er a Desbedall.”

A lorolang, e a Remusei a ngiluu tia el kerekur. Ng uluusbech er ngii a Tkud me a ngelekel el omtilou er a sils. Te mlo er a Melekeok er a beluu er a Ngerang me te ngar er ngii e liluut el dolemii tia el kerekur. A Ochit a dirrek a lengelel. Me a ta er a klebesei e a Tkud a ngiluu el tuobed el mlo er a bita er a kerekur me ng mengesekes er ngii. Ng dirrek a lengelel. A lomes er a buil e ng kmal klou. Me a Tkud a mocha mengesekes el kmo “buil, buil be mnguu a ngelekem.” A Remusei a rirengesii a Tkud me ng uluungeroel el kmo “Ngera me ke mengesekes er a ngalek el ua ise?” A Tkud a uluumechad er ngii e di ulemelekl er a kesakesengel, “Buil, buil, be mnguu a ngelekem.” A lechisngekl a Tkud e a buil a meremang. Ng di mle el nguu a ngalek me a Tkud me tia el kerekur el lebla er a uchul me a Remusei el merael. Me chelecha e

se el domes er a buil e ngar er ngii a Tkud me a bechil me a ngelekir er a Ochit el ngar er a eungel a kerekur.

A Bekai er a okerduul a milrael el osiik er a ta er ngii er a uel el mlo el mo metik er ngii er a chelebacheb. Me a lesenge a ta er ngii er a uel e ng mlo ungil a rengul e le ng dimlak lemekesakl. A uel se el lomechell el tebedu ngelekel el mo er a daob e a bekai a mo mengkar er tir e obetiterir el mo ngoderterir er a daob e merael.

BELAS

Tia el cheldecheduch a cheldecheduch el mo er a Irrai er a blai er a Ngerngas. Tia el blai a blai el mo soiseb er a kebliil er a Esuroi el bita el blai se el lemetiud a beluu er a Irrai er a irechar. Tia a tekoi er a kmal rechuodel er se el taem er a dirk lengar er ngii a mekemad er a delongelel aika el beluu er a Belau.

Tia el blai a lekiliei er ngii a Ngirngengas me a bechil er a Elong. A Belas a kilie er tia el blai obengkel obekul. Tirka el teru el odam a ulechell er a Ngermechau el beluu er a Ngiwal. Te kilie er a Ngiwal el mo meklou el chad, e ng mad a demerir me te doklii e remiid el me reme er a kotir e le te kmal chad er a Irrai.

Me te kilie er a Ngerengas e ngika el obekul a Belas a mlo Ngirngerengas. Ngika el Ngirngerengas a mle chad er a omelenges.

A Ngiwal a kmal mle merael a chisel er a klisich me a blekeu er a mekemad e le te mle obtois a rechedal. Me a mekemedil a Oreor a me nguu a Irrai el beluu er a Oreor me te dmak e dmanges el mo oumekemad er a Ngiwal. E a rechad er a Irrai a medengelii a Ngirngerengas me a ochellel er a Belas el kmo te ulechell er a Ngiwal me ng diak lolai er tir el mo er a mekemad le te ko er a melengmes er tir. E a Ngirngerengas a kie e remenges el kmo te merael er a klukuk el mo er a Ngiwal. Ng ulemkokl el mo songes a ilotel el me me ng mart e ngii a ngmai a lidel e remurt er a ked el mo er a Ngiwal e ngmai a irratel el lochetii e oldechelakl. Me ng di mle ua ise el bek el lebo er ngii a mekemad e ng ua ise me ng ko er a kmal di blosech er a rengrir a rechad er a Irrai. Me a lleta el mo el mo menged e te mocha kerekikl el mo omditm er a ko er a bluchellel a Ngirngerengas el chad, e dongchii el Ngirngerengas. Me a lluut a mekemad el mo er a Ngiwal e ng tilobed a klekerengel a Ngirngerengas me te kmal mlo ungil el medengelii el kmo ng kmal ngii. Me te mocha katekoi e a Ilabsis el Ngiraked a oderchii a oderchelel el mo er a Ibedul el kmo, “Aki mla mo medengelii el Ngirngerengas.” Me a Ibedul a ngiluu a chelebuchebe el msa oderchelel el me er a Ngiraked el kmo, “Mokodir a Ngirngerengas.” E a lebo e ng beluu er a Irrai el melasech er a sob me a Ngirngerengas a obengterir.

Me a lemerekko el di chedool ku e a Ngiraked a ulderchii a oderchelel mo er a Ibedul el kmo, “a ngiaos er a tutau e ke orrenges a chais.” E tir a bad er a bai e merasm, e a bo el kukuk e ng omengado. Me te choduii a sob el rokir el mo merek e di mle bad er a bai. A bo el tutau e tir a ilbelbii a bai e tmuu el mekodir a Ngirngerengas. E a ochellel er a Belas a chemiis el tuobed,

me te nguu a budel a ukall el teleber el mechelii a bita el beluu er ngii me ng delebechel e chemiis el tuobed el me er a Klai el blai er a Ngerusar e kmo, "Ngak oteiill me mosebelak." Me te nguu el mertii er a reakl me ng berrotel er a reakl. E ngii a merema a urrurt el oker el kmo, "Ng dimlak leme a Belas?" Me te kmo "Ng dimlak lemei." Te kie el mo klebesei e te mocha otekir el mo okerdii er a Ngermid me ng milrael el mo er a Chouang el blai el mo er a kebliil er a Ngerengas er a Irrai. Me ng kie er ngii e mocha melekoi er a Ibedul el kmo, "Ng soak a dolai er a Irrai." Me a Ibedul a dilu er ngii el kmo, "Irrai a diak lengiuul er a Oreor. Me kau di bo morrenge a tekingek e a Irrai el beluu a mo sebechel el mo melanges er kau. Berekii osengem el mo ungil el mengui a chelebulir a remechesil a Ikelau e bo bekokuii el mo er tir er a chelebulir e tir a mo tutkau el mo er a ungil derechuall el bo mokodongall er ngii." Me ng kilengei, e mlo melemolem el meruul a lullekoi er ngii a Ibedul. Me a lebekiis er a tutau e ng nguu a chelasel e mo tuobed er a Idederach e olengimes el me tmuu er a Sechemus el mo remei. Ng mlo omibii aika el cheldil ngimes e olengukes er a bek el blirir a remechesil a Ikelau el diak a chimo el lechitii. Me aike el rokui el omengedil a Oreor el lebo er ngii. E mlo er a Ngeseksau me ng chodesii a beng er ngii e oldingel er ngii. E tia el beng a kmal melai a ngikel, me se lebe lturk e ng ua lekerreomel e ng mo chusuch e ouderse chimo el chelsuch el merous er aike el bla lorael el blai el rokui. Me ng kmal klunga urungulel er a rechad el rokui. Me ngii me ng di ngii lorrenge a chetengakl el mo er ngii.

Ng kie e ngii a mede a Ngiraikelau me te mengemeldiil e mocha doklii. E a tekingir a Rengarameketii a mocha oker er a mo Ngiraikelau. Me a remechesil a Ikelau el mla er a blai a di dilu el kmo, "Ng mo rubak a Belas el Ngirachouang." Me tia er a letetkii er a kebekuul e ng kmal mlo ungil e dmeu a rengul e kmal mlo ungil el mtab a osisecheklel a Ibedul el mo er ngii. Me a lemede a Ngirmengiau e lebo loker el mo er a blai, e te dirrek el kmo, " Belas el Ngirachouang." Me ng kmal mlo ungil mela telmukl (osisechakl, llechul) er a Ibedul me ng mlo diak er a rengul a ngma udoud el mereked er a chimal. Aike el techiau er a klobak el mo er ngii di bo leues e msa ngike el kldorolel se el klebesei.

A ta er a klebese e ng tilobed el oldengelengel er a cheraches el mo metik er a Ngiraibuuch er a Ngerbeched el merrars a choalech. Me ng kmal chubra me ng dula ngii el kmo, "Ngiraibuuch, bechere me me dedak." Me ng ngiluu me te dilak me ng milekekii a mlil er a ngikel, e nguu a mlil e meius el nguu el me tungii er a tochel a Ngiraibuuch er a Tuchedesang. E ngma cheldil el kmal mlo betok e mocha merader er ngii er a blil, e me melikes el mo reme me

ng remous a cheldil el dirrek el di oltirakl omerellel er a bek el klebesei. E mocha blechoel el lebo er a chei e ng me melecha a odimel a Ngiraibuuch. E a Ngiraibuuch a mechitechetong, me ng di kie er a ulaol e di oldmedium a medal er a Belas. Se el lebo er a chei el me me le ngii el ta, e ng mecholo a ngikel e remuul a odimel el di bo lolengoes, e merael el mo remei. Me ng di mle ua ise me a lemede a Ngiraibuuch me bo losiik er a mo Ngraibuuch, e a remechas a di dilu el rokui el kmo, “Ng diak a mong, ng di Belas el Ngirachouang a mo rubak.” Me se ikid e ng mocha rubak. Me aike el urrerel er a lengar er a Chouang el mekudem el meruul me te omes e nguibes a rechad el mo tmuu er a kebliil er a Ikelau, me a dirrek aike el lekaukebliil a Ikelau er a Ngeremlengui me a Ngetpang me a Irrai me a Ngermid me a Ngerchemai me a Ngerkebesang me a Beliliou. Me te cheroid e ng di te di kaukebliil el mo er a Ikelau. A le kakerker e ng kmal di mo Belas el Ngirachouang a lolatk el mo bedul ngii. E le ng kmal ngii a ngila telmukl er a Ibedul a uchul me ng ngeltengat. Me ng rokui el klobak el di blo loluchel e di mle sebechel lolab er se el beluulechad le ng mle subed e le ng sorir a remechesil a Ikelau me a ruretengel a Ikelau el rokui me a rubak me te di kilengei el di uleltirakl er a tekoi er a kebliil. Me ngika el chad a di ta el chad e mlo teruich a dial. Me aika el teruich el dui a mlo ulengokllel er a letechela aika el teruich el dui el dirir er a Ngerengas.

Ng mlo bechil Ebil el rubak el dil er a Irrai e kobsii a bachel me ng oubiungel er ngii, e te kmo ng mekull er a chelid el Medechiibelau. E ngii a kmal lullecholt er ngii er a Irrai me ng milecherar olbiungel me ng mlo subed el loubiungel a bechil. Me aika lomerellel a di rokui el lulemekrael er ngii a Ibedul a uchul me ng mlo ua ise. Me a cheselsel el ulengoklel a ngar er aike el leblo ltuchel a dui er ngii el beluu. Me ng di ngii el ta a mlo teruich a dial me ng ngii a mlo okodongall er aika el teruich el dui el lulluchel. Me ngii a dokodongii el kmo, “Ngiluu techemo el chad,” el belkul a kmo, ng merael el mo er bab el chad.

BELTIKERRENG

A Ngetmel a ngar er a diluches er a Ngerchelong er a mo bedul a Desbedall er a Ollei. Tia a mle ta er a beluu er a rechuodel e chelecha e ng diak a delengchokl er ngii. Tia el cheldecheduch a cheldecheduch er a Ngetmel el me er a beluu er a Ngerair er a Ngiwal me a dirrek el beluu er a Llecholech el ngii a Ngerbekuu er a chelecha el sils el beluu er a Ngiwal.

A Ngetmel a mla er ngii a ta el rubak el Otebadel a ngklel. E ngika a kmal mle kaubeltikerreng ngii me a bechil er a Dilsurech el kmal mle budech e mekekeald a delongelir. Ng mlo er ngii a ngelekir el sechal me te mengklii el Omkar. A Omkar a kmal mle mesisiich a bedengel er a lekekerei e kmal di mle ta el ngelekir. Ngika el Otebadel a dirrek el kmal di mle ngii el ta er a blil el diak a ochedal me a rubekul el mla er a diil. Me ng mellatk el kmo, ngika el ngelekek a diak lokor el mo er ngii a ochedal me a lechub e ng ta er ngii e le di lekid el ta rechad e kede chebuul. Me ngika el bechil me ng mellatk el ua ise, le ng dirrek el di mle ngii el ta er a blil. E ng di lechub e aika el ulrungulir a dimlak lemoresenges er a rebeldekir.

A kltekotel a delengcheklir e ng di diak ldubech a bebil er a rengalek me a Omkar a di mle ngii el tang. Me a bekord ngar er a eua ku rekil e a klou el kerior me seblobel a miltik er tia el budech el delengchokl me ng sochera a bechil a Otebadel. Tia el rektel a di omeka klebesei, me ng di mlo kebais a rokui el kar er ngii. Me a Dilsurech er a bocha lolechesuar el kmo ngak a kele ng di kea ksobel, e tia lemlad er ngii el sils e ng milkodongii a Otebadel e dilu er ngii el kmo, “mnguu a ngelekem er a Omkar e me er a bita er ngak.” Me tia ikid e a Otebadel a ngiluu a Omkar el mo tmuu er a chebill el mlo er a bita er a Dilsurech el ngii a kmal milechellii a Omkar. Me a lebocha er a bita er ngii e a Dilsurech a mlo orkedii tia el kekere el chimal a Omkar e mellanges a medal a Otebadel. A Dilsurech a mle metengetengel a chiuosech er a medal er a bita me a bita el kemril a medal le ng mle medengei el kmo, tia ia ulebongel ku, e mle ta el loutekangel el kilungii a ngerel el “ourungalek Omkar” e mo nguus tia el kekere el chimal a Omkar el nguus el mocha orkedii a chimal Otebadel. Me a Otebadel er a lesenge tia el omeruul e lesenge a bechil e ng kmal mlo medidisii a rengul me a bedengel er a klou el klengiterreng me ng mlo ongemngumk a rengul me a chelsel a isngel a mlo dekmekimes e mlo olecherechars a ralm er ngii e mengedengader a chiuosech er a medal. Me a Dilsurech a dula el kmo, “Otebadel! Otebadel, a Omkar ak uterkeklii er kau me ke nguu me ng ngelekem e ochellel e mo kldemem e

le ak medengei, kom chebuul el teru el ongalek el di kemu el ta e ngak a mo remiid er a bita er kemu el mo dibus. E chomko ngii el omerael a ua bek el omerael e ak ngoikemu me kede dmak me kede chachelim el tedei el ongalek el mo er a omerael e ng di ngii el omerael a diak leua ise, me a kurael er a chelecha e a kmal rutechii a renguk er kau me a Omkar el di mo kemu el tang. A lta e ngar er ngii a ulebongel el me el kuk kau me a Omkar a mo kesaod el ua chelechang.

Ngika el sebeksechal el Otebadel a di mlo ko er a chemlol el blaol a rengul er a klengiterreng e onger el langel a ngerel el kmo, “Ak kongei el kmo Dilsurech, a rokui el tekoi a di mo ungil besul e msisichau e aki chebuul.” E ng di Dilsurech a ngiluu a medal er tir e chilsngekl el bedul a bitang, itia ia mle ulebongel er ngii. A Omkar er a lesenge a demal el lmangel e ng dirrek el di lilangel. Me a Otebadel a lomekedo e lolekiis er a Dilsurech e ng di mle kea lluut el onger me tia e te merema er a telia el blai ngii me ngelekel me te reboreb el rusersa er a klengiterreng e a Omkar a di ulungengetii el mocha ultuil er a ochil a demal e ieta medal. Me a Otebadel a kmal mlecheseb a rengul e rirebet er a klou el klengiterreng e le ng dibuse ngika el medemedemek el kldemel er tia el beluulechad.

A Otebadel a di mlo ngii me a ngelekel er a Omkar a kie e mengeiung el ngar er a kemanget el klengiterreng. Ngika el rubak a mle kengbokl e le ng mle meses e bekerekongel me ng mla er ngii a ududel me ng betok el oderuchel er a redil er a Ngetmel a mlo er ngii el melekoi a chebechiil e le te ulemes er ngii el mengebuul el kie ngii me a ngelekel. E ng di a Otebadel el ngar er a klou el klengiterreng a mellatk el kmo, a bo kbechil a ta er a redil e ng locha mo meterkakl er ngika el di ta el ngelekek er a Omkar. Me ng di silmesumech a rokui el ongit er a chebechiil el mo er ngii e di uluutekangel el omekeroul er a ngelekel.

Me ng ua ise e ng di a Omkar er a loikab el klunga el chad me lteloi er a resechelil er a omenged me a omilik e ng mle bechoel el suokl er a resechelil el kmo ng diak a delal me ngika el buik a kmal mle chetil me ng uleker er a demal el kmo, “Ngera a uchul e chedang me ng diak a delak me ak suokl er a resechelik?” Me a demal a kmal mlo mekngit a rengul er a tekingel a ngelekel me ng uluuchais er ngii er a bo el secher a delal me di bo el tir el teru el ongalek, e ngii lak lebo lebechil a kuk ta er a redil el me lmuit er a chelecha e le ng mellatk el kmo a bo lebechil a kuk ta er a redil el diak lengii a ulemechell e ng mo mekngit er a ngelekel.

Me a ngelekel er a Omkar er a rengesia tia el cheldecheduch e ng kmal mlo mekngit a rengul el kirel tia el cheldecheduch le ng kmal mlo melechesuar a beltkil a rengul a demal el mo

er ngii. Me a le bekord ngar er a lluich a rekil a Omkar e ng kmal uluubeltik el reng er a demal, e dirrek el kmal meses el buik el di ua sesengel a demal. Me ng mocha kldemel a demal er a omelasech. E ngii el buik a dirrek el mlo melenges el obengkel a demal e dirrek el obengkel a demal el mengereel a suld a le klebesei. Me a kerreel el suld a kmal mlo betok er tia el blai me te olterau me ng kmal mlo betok a meklou me a mekedere el ududir. Me a chisel a urerir me a kerreel a oberka er a Belau el rokir el me lmuut er a beluu er a Llecholech er a Ngiwal. Me a le me er a Llecholech e ngii a kirel mo chedool a bai er a rubak er a Llecholech me a Rechelmang el kot el rubak er tia el beluu a mocha oderchii a chad el mo omuus a kerreel er tirka el teru el ongalek er a Ngetmel el Omkar me a demal. Me a belsechel a omengado el ledillii er tir a mle orakiruu, me tirka el teru el ongalek a kildmeklterir er a uche er tia el sils e te ngmai a kerreel el mo msa Rechelmang er a Llecholech.

A le merma a belsechel a omerael el olab a kerreel el mo er a Llecholech e a Omkar a mlo ngmai aika el kerreel el uluokl e mo melikes er a Ngetmel el me er a Llecholech. Me a lolikes me lengar er a medal Ngerair e ng mechede a chei me a Omkar a di mle rengul e kmo kbo kultab er a tia me a keriik er a kebesengei e kulikes.

Me ng ngoura mlil el mo otebengii er a chelechol e ngii a kmerd el mo osisiik a imelel el ralm er a tkul a chelebacheb. Me a omerolel el mo bedul tia el tkul a chelebacheb e ng ulsiueklii a ta elkekere el dil el bekord ngar er a teruich me a eai el mo er a teruich me a etiu a rekil. Ngika el dil a ta er a klebokel er a chelsir a reklebokel el dil el lesenge a Omkar. Me ng ko er a mlo oltebetab a omerolel le ng mechese a rengul er ngii el dil e ngii el dil a di ollechelech el bedul ngii e telkib el kilmir a cheril. Tia el leua ise e a Omkar a ko er a ngilasech a ngera er a bedengel e mocha ko er a terrob e le ngika el dil a ta er tirke el dedul kmo, te kliou el chelid el dil e ngii a melekinga ngika el dil el kmal mle medemedemek a omelekingel el kmo, “Ke mla er ker el mei?” E ng di Omkar a dimlak lemereched el onger er ngii e le uldesuel a mle dibus er a bdelul el meketeket le ng mellatk el kmo ngika kele lechelid el kisengei. E ng di ngika el dil a liluut el choisisii a keril me ng ko er a kibetekla me ng mocha onger er ngii el kmo, “Ak mla er a Ngetmel el me e mechede a chei me a kumkeriik e mo er a Llecholech el mo omeche aika el uluokl el kerreel.” Me ng dmu el ua ise e choisisii el kmo “Ekebil ng diak modengelii a ngar er ngii a ralm?” Ngika el ekebil a dirrek el kmal ngilanged er a omelekingel ngika el buik el medemedemek me a blekerdelel e klamiokel el sechal. Me ng mocha ochotii a ralm me ng mocha nguu a imelel el ralm e meremang. Me a le merema e ngika el dil a dula er ngii el kmo

“Kau se el mengiil er a keriik me ke dirk meoud me debo er a rriil el mechuu me a le keriik e morolung.” Me te doknge el teru el mo er a teluo el otaor el ultechakl er a cheungel a chimo el mechuu a eungel el btaches me te mocha kie er ngii el teru el ko er a kmal chiloit bedengir e omeseues er a ngoaol me a kerek er a Belod el mo lmuut er a Bkulatab me a charm a mesebesebek er a melidiul el mengitakl el chemat er tir e ng kokil a cheluut el ngar ongos el me simesim a llel a btaches.

E ngika el dil a melekinga el kmo, “Ngak a Dermel a ngklek e a delak a Dirruchel, e kemam a olab a dereder er tia el beluu e ngak a kmal di ngak el ta er a delak el diak a ochedak el diak a remerrengek el diak a rebebil er ngak me a delak me ng ua isei. E ngak a di mle kekere e a demak a mo oungoaol ngii me a rechad er a Ngibtal e di mlo e di mle kea lluut el me el me lmuut er a chelecha el sils, me a uchul e ak blechoel el me mededechor er a tkuk a kederang se el le ua itia a sils. Ng kmal mekngit el chelebuul a kimngar er ngii ngak me a delak e le ki meruul a ureor el sechal me a redil er tia el beluu e diak sechelengam me se el lebo er ngii a omeius er a cheldebechel el sechal e te me engelakl er a blimam el kmo “Mnguu a besos el me e bo doius e a bechedem a teleu.” Me tia a blechoel el lolengelii a delak el tekoi me ng omechar er a rechad e te mo melinget a kiram er a buai. Chelecha e ng dirrek el mocha kiram el oleitel er a chedeuel a bai, me rebek el chad a mla mosiik a kerreel el kirel a ngelsechir e ngak me a delak kmal diak a uldesuam el di ua kimcheloit er a delechil a ngoaol e di kea ta el ududam me kimoderchii a chad el mo tingetii oua tia el omeruul.”

Me a ldela el ua ise e ngika el buik a kmal mlo ko er a merael a chiuosech er a medal le tia el cheldecheduch a di ua cheldechedechal ngii me a demal e dula er ngii el dil el kmo “Ngak a ngklek a Omkar e di ngak me a demak a kie e a demak a Otebadel a ngklek e a delak a meketeketa er a lemad. Me ng ua ise e ng di tekingem el kirel ngerchelem er a blim a diak kukor el mo ngosukau er ngii. Me ak bo er a Llecholech me a luut er ngak e ng soak el me mesekau kau me a delam e merolu el mo remei. Me a bo krei e ak mo ouchais aika el blekeradel er a demak e olengit er ngii me ng mo sebechel el meskid a kerreel el mo rokir a ngelsechem kau me a delam er a bai.” Ngika el sechal a dirrek el kmal mle medemedemek el mengedecheduch e belsebasech a cheldechedechal me ngika el dil a ko er kmal mlo ouedikel a rengul e mekdekudem el melim a cheklul el kirel a tekingel ngika el buik.

A dolech a merema er a ungelel a chelechol me ngika el buik a melmesmecha er ngika el dil e merola el mocha doiderekl er a mlil me ngika el dil a melmesumech e ko er a kmal oita

bedengel e merael el bedul ongesecheliil. E a eanged a silal ungil me a sils a mullekla me a eolt el ubebeab er a bebul a daob e a buik a melekesa el mocha er a cheroid me ng melikes el mengelechall er a dekelel el mesesisaik a rengul el melebedebek er a Dermel e mocha ieuekl er a Bkulatab. Me a ekebil a di ulemes er ngii e mocha mekekokil el merael el mo reme e di meltelatk a ungil el tekingel ngika el buik el mo er ngii.

Ngika el buik a mlo er a Llecholech me ng meche aika el kerreel el ulemuus a Rechelmang e nguu a cheral el medal a kluk e di liluut er tia el kebesengei. Me ng melikes e meltelatk a tekingel el mo er ngika el dil me ng bekord omekerdu a olbidel e ngii a merema er tia el kerodel el lemala er ngii er a Ngerair. E tia el kesus e ng kmal mle ungil a buil me ng mle mellomes a delul a kerrekar. A charm er a rriil a mengchechitakl me a dersechimo el rekung me a chesechuul a kaiuetoir er a chelechol me ng ombiblaoch e korda me ng mengedmokl er a mlil. E a lengelel a daob er a ongesecheliil a mlo modak er a kekere el medemedemek el ngor el ko er a ngor el omengiil el ngar er a rriil el kmo, “alii ke meremang?” el ngerel a Dermel el di milrael el oldingel er ngii, me te kasesengei e dokngei el me er a blil a Dermel.

Me a leme e ng mera el ngar er ngii a delal a Dermel er a Dirruchel el di ngii el tang, me te mocha mekerdii a olbidel e ngika el buik a di mirreko el kie er tia el blai e te omesilang. E ng okere er ngika el mechas el Dirruchel el kmo “Chedil ng mera el ko er a tetelemall a ngercheliu er a buai el kirel a tekoi el sechal, le ng mera el diak a ngosukemiu el chedemiu el sechal?” Me a ledela el ua ise e ngika el mechas a mlo metetenget a rengul e kmo, “Ng mera e rungalek e ngak me a ngelekek a mera el chebuul e le ng meaot uche me a uriur er kemam. Me ngika el ngelekek el dil a ko er a sechal e redil er tia el delengcheklam me ng betok el chad a mla me el meleko a chebechiil er ngii e ng di ngak a di ulerreked er ngii e lebo lebechiil e ng kmal mo mekngit a chelebulek me ngii me ng mo chebuul e le ng diak a chad el mo mesa er a blil a chebechiil.” Me ng dmu el ua ise e mo chisbii a demok el me meldoim er ngii le tia el blai a diak a di ta el odoim er ngii e luumeta el mo melemolem er a cheldechedechal el kmo, “Me ng ua ise e ng di a ngelekek a lsekum me ng metke er a soal el chad e ngii el chad a mo sebechel el redemelel tia el chelebulek ngak me a ngelekek me ng mo bechil e ng di ungil besul le ng mla mo kirel el bechiil le ng klunga el dil.

A Omkar a milsa tia el delengchokl e rirengesii a cheldechedechal ngika el mechas me ng liluut el kmal mlo mekkuu a rengul er a klengiterreng e le ngika a dirrek el kmal mle chubechubechad el chad.

Me a lemerko a belsilir a reblai me ngika el mechas, e a Dirruchel a ulemdasu el kmo a ngelekek a ke le ng metke er a soal el chad, me ke le ng mo bechil. Me ng telkib el milengeteket er a cheldecheduch el mlengiil el kmo a ngelekek er a Dermel ke le ng subedak el kmo ak mo bechil ngika el chad. E a le di kea e ng mlo ousumengiil el kmo ngika el chad ke le ng subedak el kmo ak mle le ng soak el mo bechil a ngelekem.

Me ng ua ise e di merael el mo bedul a metuda klebesei me a Omkar a olenkte a bar me ng kudmokl a berul el msa e mellatk el kmo ke le ng di bad er a blai me ng mo er ngii techellel el chadecheduch ngii me a Dermel e ng di lechub e ng chobla a berul el mo er a bai er a cheldebechel me ng mlo bad. Me a Dermel a kmal mlo rrau a rengul le ng mellatk el kmo chomko ng melekoi a chebechiil er ngak e ak di merched el kongei. Me ng oldedechelakl er a rengul e mocha mesumech ngii me a delal el ua le mlecheseb a rengul.

Me a bo el kukuk er a tutau e a Omkar a ulemkokl el me er a blai me ng melmesumech er ngika el mechas me a ngelekel. E ng di Dermel a kildmeklii a ta el suk el ngellitel el kukau el leko ng okuil ngika el buik me ng mlo tuchelii e oeah ullel el me merader er ngii er a kederang. Me a le kasmesumech er a kederang a Dermel me a Omkar e a Dermel a dula er a Omkar el kmo, “Kau a kmal medemedemek e kmal ungil el chad el soak a blekerdelem. Me a chuleku me kede mekur a delongeled el mo ochad me le kea e ke di mo kmu ngera er ngak el me kmeed er ngak me ak mo ousbech er kau el kldemek,” e mocha nguu tia el ta el suk el kukau el nguu el msang e kmo, “Tia a okuim e ke di ouedoim a dechil a cheluch le ng kmal diak a odoim.” A Omkar a kmal mlo ngodech el ko er a obengbangel a basech er a chelsel a btelul er a ungil el tekingel a Dermel e melekesa el mo er a belual er a Ngetmel.

Me a lebo e ng kebesengei me a demal a kmal di mle mad el tmuil el mengiil er ngii el me remei. A Omkar a ngiluu a cheral a kerreel el msa demal e a bocha el klsus me lomesila ngii me a demal e demal a okere er ngii er aika el okeuil el lullab el me el di ngellitel el di ungil kukau e kmal mle betok, le rengul ng ngilai er a Llecholech. E ng di a Omkar a mlo lmuk el telkib e le tia el mlo touchakl er a Ngerair a dimlak el ngar er a telbilel ngii me a demal me ngulemai er a rengul a ouchais er a demal a blekerdelel tia el omerolel el mlo tuab er a Ngerair. Me ng ua ise e ng di Omkar a kedung el buik me ng diak lsebechel el metingolii a demal me ng di milrech er a uldesuel el telkib, e a kmal mle uchul e ng ouchisa er a demal a ko er a mle mengemais a tekingel a Dermel er a le kasmesumech er a tutau er a rriil el ngar er a mocheuekl er a Ngerair. Me ng mlo nguu a deseklel a chisel a omerolel e a oumesingd er ngii a chisel a

chelebulel a delengcheklel a Dermel me a delal er a beluu er a Ngerair e ulenger er a demal el kmo, “Aika el kukau a mle okuik el kngilai er a Dermel er a Ngerair.” Me a demal er a rengesa aika el chisel a omerollel a ngelekel e ng dirrek el kmal mlo mekngit a rengul er a Dermel me a delal er a Dirruchel el ngar er a Ngerair.

E a Omkar a olengtei a kerreel el mo kirel a ngelsechir tirka el teru el ongalek, me a demal a mellatk el kmo a ngelekek a metke er a soal el dil er a Ngerair el ousbech a kerreel me ng di mle mereched el kongei er tia el ongit. E ng di ngelekel a dilu el kmo, “Se el lebo el belsechel el kulab aika el kerreel el mong, e kau me ngak e chedam a mong.” Me a demal a dirrek el kmo a lta e ng ousbech er ngak a ngelekek er a okul a chebehiil me ng di mle mereched el kongei er ngii.

Me te kiliei el teru el ongalek el mocha er tia el belsechel er a rengul a Omkar a mo er a Ngerair el olab a kerreel e te mocha mengedmokl er a omerollir el mo er a Ngerair. Me te mocha ngmai a kerreel me a bekai el ilaot me a bebil er a telechull me te ultak e mocha er a Ngerair.

Me a lebo er a Ngerair e te di mlo ulturk er a kederang e ngika el buik el Omkar a mo er a blai el mo mesubed. Me a lebo e ng doknge ngii me a Dermel el mermang, me ngika el ekebil a nguu a demal a Omkar el me er a blai e a Omkar a olengakt a telechull me a ilaot me a kerreel el me er a blai.

Me a bocha el kebesengei me bocha el lomesoil e tirka el teru el ongalek el Dermel me a delal a kmal mle dmeu a rengrir er tia el ungil el omerellel a Omkar me a demal. A Dirruchel el delal a Dermel a mellatk el kmo, ke le tia ingii a sils el bocha lebechiil a ngelekek le Omkar a ke le ng merma el lta e a Otebadel a mlengelim er a ngelekel el me olsiseb er ngii er a blai. Me a Dermel a dirrek el mlo mekdekudem el melkedukem a chaidirengul er a chelsel a ulul le ng mellatk el kmo ngika el soak el chad el Omkar a ke le ng merma omak er a chebechiielam. E a kuk demal a Omkar a kuk milsa ngika el mechas el dela a Dermel el dirrek el kmal klebokel e medemedemek a omelekingel me a ngelekel er a Dermel me ng ua ise e ng di mellatk el kmo a ngelekek a ke le ng millatk a chebechiil me a uchul e ng millai er ngak el mei. Me a Dirruchel a dirrek el milsa a Otebadel el klebokel el sechal e mlengedecheduch el ko er kmal ulserechakl a omelekingel me ng di mle rengul remel a oureng er ngii e ng di millatk el kmo ng kuk ksel a ngelekek er a Dermel er a chelecha el kesus, me ng ko er a di ulekemet er a urungulel er a chelsel a berrotel el chaidirengul.

E a lechub a Omkar a melekinga el kot e ng “uluchedil el mo er a Dirruchel e ouchedadam” e dula el kmo, “Ngak a uchul ak mle ngak me a demak a mle omak a klechedao. Me a dita el rolel a ungil el okul a klauchad er ngak me a Dermel el mo ua kimera el teru el ochad, a kau me ngika el demak a omkenge er ngak er a chelecha el kesus el kmo, ke mo mera el delak el delal a renguk e le ke mo bechil a demak. Me a ngelekem er a Dermel a mo mera el ochedak le ng mo nguu a demak el mo mera el demal er a chelsel a rengul. Me aki mo mera el kerenged el ochad er a chelecha el mong.

Ngika el mechas di lilangel er a klungiolel a rengul me a demal el dimlak lodengei a telngachet e metke er a ua tia el tekoi er tia el kesus a di mlo kedechedechor a bsechel a bedengel er a deurreng. A Dermel me ng dirrek el mlo mechulii ngika el rubak e ouchedadam er ngii er tia el kesus le ng kmal mlo dmeu a rengul. Me ng mlo ua ise e ng di uldesuel a Dermel me a Omkar me a mekeald el beltikerreng er tir er a klungeasek me a ultoir er a delongelir a ulebult el mo rengedel a klauchad, me te mlo teru el ochad el ua le mla er a chimo el diil el ngelekel a ta el chad. Me ng di dimlak lodengei a chiuosech er a mederir e ng mengedengader er a deurreng. Me a deurreng er tia el blai a kmal mlo klou el ngar er a eungel a mengibilei el olbidel.

Me te mla er a Ngerair el sese el buil e a Dermel a mocha bechiil me a bocha el bechiil e a ochedal er a Omkar a mo oldingel er ngii er a blil a bechil. E kuk dirrek el di mle sese el buil e ng mo bechiil a Omkar e nguu a bechil el me er tia el blai me ng mesiou er a delal me a demal.

Me te mlochu ta el chelechad me a Omkar a mlo tuchelii a dui el merreder er a beluu er a Ngerair, e kmal mle ungil a kelulul me te kmal mlo oumera er ngii a rechad er a Ngerair el rokui. Me a chetengel a dirrek el uleberk er a beluu er a desbedall el mo er a Ngetmel me a resechelil el mellius er ngii er a ngar er a mo a di mle mikoik le ng kmal miltechui a chelsel a rengrir er ngii.

Me bocha lomechell a Dermel er a ketengel e bocha lomengat e lebo losurech a ochil a resechelil me a rechedal tia el beluu er a Ngerair e te milngituuk e ouengurs el kmo, “Ng di telsakt e smakt aike e remuul aikang.” Me a suobel el mengai er tia el cheldecheduch a beltikerreng er a rungalek.

Me a utebengall el mengai er tia el cheldecheduch a dmolech el omelatk me a beltikerreng el mo er a kldemaol me a beltikerreng el mo er a rechad.

A omesodel tia el ongurs el kmo, “ng di telsakt e smakt aike e remuul aikang,” a mlengai er se el delongelel a Omkar me a Dermel el silektii a deleuill er a chelsel a blai me a keblil me a beluu.

BERIBER ME A EMAREDONG

Tia el cheldecheduch a cheldecheduch er a Oikull el cheldechedechal a teru el chad a kilie er a chimo el ii e dimlak el kaodengei. A ngklir a Beriber me a Emaredong. A Beriber a mle chad er a chei e a Emaredong a mle chad er a omelenges me ng milruul a lilaot. Se el tutau e tirka el teru el chad a di du el lomkokl el merael el mo er aike el lebo er ngii el meruul a urerir e diak lebe lrei el mo milkolk.

Te kilie e a Beriber a omdesua e sokol el menglou er a chelsel tia el ii el lekie er ngii le ng ua bla bo lekekere er a rengul. Me ng mocha nguu a ulekngall el mesib er a chelebacheb el menglou er a chelsel a ii el lekie er ngii. A Emaredong a kuk ngar er a bita e dirrek el omdesua el menglou er a chelsel tia el ii el lengar er ngii. Me ng dirrek el ngiluu a ulekngall el mo tmaut el mesib er tia el chelebacheb el lengar er ngii. Tirka dimlak lekaodngei. A le keberuul el moiubek er a bita e a Beriber a kilebetiek er a lesa a Emaredong me ng kmo, olekoi kau ke mede el kie er a telia e ngak a renguk e ng di ngak el ta me ak mengoit a uasech. Me a Emaredong a kmo, olekoi kau ke mede el kie er a telia e ngak omdasu el kmo, ng di ngak el ta me ak mengoit a iong er a ilao. Me tia ikid er a bocha lekaodenge e te mocha kaiuedingel e merous a kelir e mengang. A suobel er tia el cheldecheduch a dekaiuekeed el blai e ker dirrek el kaiuedingel.

BERSOECH ER A ELECHUI

Ng mla er ngii a chimo el beluu er a Imeliik el ngklel a Elechui. Ng mla er ngii a klou el bersoech el kilie er a ked er ngii el beluu. Tia el ked a diak lsa el cheroid el me er a chelsel tia el beluu el kie er ngii a rechad.

Ngika el bersoech a di kie er tia el ked e se lesa a chat e ng me metengel er tia el ked e merael el mo er a chelsel tia el beluu el mo osiik a kelel. Ngika el bersoech a menga er a rechad.

Tia ikid e a rechad er a Elechui a kmal mlo medakt me ng mlo diak lsebechir el meliokl a kelir me te di menga a chemadech el kukau. A ta er a klebesei e a merreder er tia el beluu a mocha kidebeterir a rechad er a beluu e dmu er tir el kmo, “Kid a mo mengedmokl er kid e merael el mo osiik er a ta er a beluu me kede mo kie er ngii e le lak e kede nguemed er ngika el bersoech er tia el beluu.” Tia ikid e te kilenge a rebek el chad me te mlo mengedmokl er tir e oketa merael.

Tia ikid er a lorael e a ta el mechas er tia el beluu el mle mesobil e diak loungalek a mlo er a taoch el mo melidai a mlai. Tirka el chad er tia el beluu a lolekoi er tir e te di kmo, “ng diak el sebecham el ngoikau e le aki kmal ruumk.” Tia ikid e ng dimlak a ta el chad el mlo chubur me lotekir. Tirka el chad a ulemekall el mo tmuu er a taoch el ta er a beluu er a Imeliik el ngar er a delongelet a Mechebechubel me a Medorm. Aika el beluu a ngar er a mo bedul a diluches er a Imeliik.

Ngika el mechas a liluut el mo er a beluu me ng di kie er a uchul a kerrekar. Ng di menga a mechemadech el kukau er a bek el klebese me a berdel a ngerel a di mlo el mo mekebekabes. Ngika el mechas a mle medakt el meliokl e le lebo er ngii a chat e lesa ngika el bersoech e ng me metengel el kolii.

A ta er a klebesei e ng ko er a mlo merengeringel a delel me ng ulemdasu el kmo ng locha smecher er a tereter. Ng dimlak lodenge el kmo ng dioll me ng rengelel a cheroll. Tia ikid e ng di mlo el mechell. A le mechell e te kebtot el teru el sechal. Tirka el ngalek a kmal di omeka a klebesei el merael a meklungir el mo meklou.

Tia er a lebocha lemklou e te okere er a derrir el kmo, “chedei ngera me kerdi menga a chemadech el kukau? Me tia el ngerem ngera me ng ua ise?” Tia ikid e ngika el derrir a mocha ouchais a chisel er a lekot el meriim a rechad er tia el beluu e lechitii.

A rengelekel ngika el mechas a kmal mlo chubur er aika el blekeredelel. A ta er a klebese e te mocha mengudel a bad. Te chiludel el mlo euid el beluotel e mocha menguml a ngau er ngii. A derrir a kmal mlo medakt me ng di lilangel e meluluuch er tir el kmo, “lak monguml a ngau e a leues a chat e ngika el bersoech e ng me el kolid.” Tirka el ngelekel a di dimlak lorrengees e le te dimlak lemedakt er ngika el bersoech.

Tia er a bocha el kard a ngau er aika el euid el beluotel el bad me di bla bo lengau a bad el rokui me a chat lsa el klunga e ngika el bersoech a oldengelengela el me menga er tir. Tia er a lorael el me e tirka el buik a ngar er a kot el beluotel er aika el bad el olab ocheduir. Tia er a lsa el kmeda e lomok er a ngerel e te mocha omechadu a bad e omidokl me ng mengang. Ngika el bersoech a killii tia el kot el beluotel el bad el mo merek e tirka el buik a kuk chemiis el mo er a ongerung. Ngika el bersoech a di oltirakl er tir me ng di milenga me a lengar er a ongedei el beluotel e ng ko er a telkib el mechitecheton g a lebocha er a ongeim e ngika el bersoech a di omerrikel e medei.

Tia er a lemad e ng kmal mlo ungil a rengul ngika el mechas. Tirka el ngalek me te kmal mlo ungil a rengrir.

Tia ikid e a derrir a dula er tir el kmo, “kom nguu a delebekul el nguu el loia er a ongolel a merreder er tia el beluu e nguu el mei.” Tia ikid e te mlo me te nguu, e nguu el mo msa a derrir. Ngika el mechas a ngiluu el mo er a taoch e chudechedechar el kmo, “ak mecheklau me ke merael me a lsekum ke mo motechakl er a beluu me loker er kau el kmo kedelbekul a bersoech er a Elechui e ke obkuuk.” Tia ikid er a bo lemerek el mengedecheduch er ngii e ng milecheklii. Tia el delebekul ngika el bersoech a milrael el mo tmuu er a taoch er a ta er a beluu.

A lebo e te ngar er ngii a rechad el merrau me te milsa me te mlo nguu el me e oker er ngii el kmo, “ke delebekul a temekai” e omesebasech a rokui el ngikel e di diak lobkuuk e a ldu el kmo, “kedelebekul a bersoech er a Elechui” e ng di ulebkuuk. Tirka el chad a kmal di mle mereched el mo kaokedong e mo mesubed er a merreder me a lebo e a merreder a merola el mo er a taoch el mo omes er ngii.

Ng di milsa tia el ongolel e mocha oumera me ng dula er a rokui el chad el kmo, “kid a mo remei er a beluad.” Tia ikid e te luueta el mo er a Elechui.

Tia er a lebo e tirka el buik mla sorsii a taoch e klechall a lidir e oldik er tir e sorir el omekoad er tir. Tia ikid e a merreder a di milluluuch er tir e tir a kmal di dilu el kmo, “ng diak kemi a chilitii a delemam me ng kmal di milengebuul.”

Ngika el merreder a dula er tirka el buik el kmo, “aike el bek el meklungel a kukau a mo onguli me kemi a mo omngar er a bai a bo le mechut.” Tia ikid e te mocha kongei me tirka el chad a luueta el mo me te kie er tia el beluu er a Elechui.

BIIB ME A MATKERUMES

Tia a cheldechedechal a Biib er a Ulong. Tia el Ulong a ngklel a chelebacheb. A kmal rechuodel e ng mla er ngii a ta el mechas me a ta el rubak el mle kaubuch e milechellii a ngelekir el redil el kmal diak a ungil redil el ua ingii. Me a delal me a demal a mengeklii el Biib. E a di osisiu el taem er a le mechell a Biib er a chelsel a di osisiu el buil, e ng mlechell a Matkerumes er a Ngeanges el dirrek el kmal ungil el sechal.

A omerolir el mo meklou e ng di tir el mocha kaodenge el kmo kemam mlechell er a ta el buil, me klungiolir a di mle tir el mocha medengei. Me a Matkerumes a mocha melikes el mo er a Ulong el mocha er a blil a Biib me a demal me a delal a kmal mlo sorir er a klungiolel a Matkerumes, me ng kmal mlo ungil a rengir er a rrenges a demal me a delal a Biib.

E te kie el mo meketeket me ng kmal klunga a Biib, e a Osilek el merredel er a Ulong a mocha dmu er a oderchelel el mo er a demal me a delal a Biib el kmo, “Kom kutmeklii a Biib e nguu el me ngoderii er a blik e le aki mo kaubuch.” A demal me a delal a Biib a mle sorir a Osilek e le ng meteet me a ududel a meklou, me ng kengbokl a blekerdelel me a ilttel. E ng di bedengel a kmal chuodel el chad. Me a lolekoi er a Biib e ng kmal di diak er a rengul me te di melekoi er ngii e kmal diak lebong. E a demal a Biib a mocha smecher me te oba, e a Osilek a omub er a Biduul me ng melai a meklou el uel me a chedeng el chebul el mo er itia el seked er tia el lesecher a demal a Biib.

Me ng di mle ua ise el kmal mesaul me a lemedei me le bocha lekemeldiil me ng dirrek el kmal beteknga a cheldil. E a delal a di ngii el ta me ng di kea cheldechulel er ngii me ng dula er a Biib el kmo, “Rungalek, a demam a kiliei me ng mla er ngii a telkib el ultekenged er tia el tekoi, e chelecha lemedei a demam, me di lekau me ngak el teru el redil, e ngera a ultekenged er tiang, ke le kerdi oltirakl a lolekoi a Osilek me msemesmechii a Matkerumes e desa tiang.”

Me a Biib a silbedii a Matkerumes. Me a Matkerumes er a lsbedia e ng dilu el kmo, “Choi, ka bechere el telkib e dongiil er a rsel tia el chebechieliu.” Me ng mlo ua ise me a delal a Biib a mocha konge a tekingel a Matkerumes, me te mocha kaubuch a Biib me a Osilek. Me te kaubuch el kmal mocha meketeket el kie e a Biib a di diak lebo lungil er a Osilek e le ng kmal chuodel el chad me ng bechil el di bechil a ududel, e a rengul me a bedengel a di ouketui er ngii er a rokui el klebesei.

Me te kie e a Biib a mocha smecher el chebedes a bedengel me a Osilek a mocha mengeroid er ngii er a bita er ngii. Me a delal me ng dirrek me ng di ulemeka er ngii er a blai me ng di keang, e te rullii a blil er a ulis er a mekesong e omeka er ngii, e a Osilek a mla mo diak lebong. A bedengel a mla metemall el mengebangabek me ng diak lsoal a delal a lokerker er ngii a rechad. E a chisel a mocha er a Ngeanges me a Matkerumes a rongesang. Me ng kilie e a ta er a klebese e ng mocha melikes el mo me ng kmerd e mekur a mlai e mocha er a blil a Biib. Me a lebo e loker er a delal e ng dilu el kmo, “Becherei e lak kobong,” e a Matkerumes a kmal meluluuch e olengit er ngii el kmo, “Di kbong.” Me a delal a kmal di kea telekengelel me ng dula el kmo, “Mada di bo mesa e mrael.” E a Matkerumes a uleba ditmechei er a lebo me ng ngiluu a Biib el mo er a diosech me ng tochelbii el kmal di mlo diak aika el chebedes er a bedengel el ua lliliut el milechell el di mlo diak. E te mocha katekoi er a kmo, “A dorael el mo engelakl er a blai, me loleker a delam e kede mong, me lechub e kede mo dechor e orringes er ngii.” E a Biib a kmo, “Ng diak bodetab me a diak doleko er ngii e di mrael el mo melikes.” Me ng mlo ua ise me a belengelakl e a delal oleker er tir, e tir a okor e di mrael. Me a delal a tobeda el okiuellir. Me a bo lediderek el a mlai e ngii a mo metengel er a daob e obengterir el mrael, e a lechisngekl a Biib e a dolech a merema er a chiklel me ng sobeka rengul a Biib me ng dula er a Matkerumes el kmo, “Ka deluut el mo kmeed er a delak,” e a delal a dula el kmo, “Di lebo er tia e mesekak e ak tuchelbakl el mo kim me a omechell e ng diak monga kim.” Me a Matkerumes a oltia mlai e a lolikes el mo e lomes er ngii e ng di tilechelbakl el mo er eou e obult el mo kim. Me a lebo e ng mla mo kim me a Biib a dula er a Matkerumes el kmo “Ak mo obengkel a delak.” Me a Matkerumes a kmo, “Ak mo kerrekerul tia el bkul a chelebacheb.” Me ng mlo ua ise.

Me a doucharm a Biib e ng diak donga kim le ng delal a Biib. Me a leme er a blai e ng mad.

BKAISCHEMRUNGEL

Tia el belkul a tekoi el bkaischemrungel a mlengai er tia el cheldecheduch. A Delumumu a merredel er a Ngerair el mle bechiil er a blai er a Ilangebong er a Ngarchelong. Ngika mle chad er a omenged me a bub, me ng blechoel el melemed er a ngikel er a bek el sils. Me se el lengai a cheldil el mo remei, e te meruul er a ungil blengur e diak lomdasu er a uriur el klebesei.

A Delresuuch a chad er a Iluang e mle er a Ngerair el me meleng a lisel a Delumumu e le ng mle chad er a omelenges. Tia ikid e ng mlo ua el teru el chad er a beluu, me ta a chad er a omenged me a ta a chad er a omelenges. E ngika el chad er a omelenges a kmal mle blak a rengul el melenges e mengedmokl a ilotel me a bo lolterau e ng milkeek a olbedabel, e omart a udoud e le ng mle blechoel melatk uriur. Ngika mle kereomel el chad e le ng millebedebek el kmo, lak ksa el mo cheleleu a medak a ldum a ko er a mereched el chelsang er a bita er ngak.

Me te mle kie el meketeket, e a ta er a klebese e ng klou el kerrior a dilubech el mo er a Delumumu. Ng mle a mlai er a Ngarchelong el melai er ngii me a bechil el mo er a kodall el kodellel a delal a bechil el di mle mereched el mad. Me a lebocha losubed er ngii, e a Delumumu a ua lulebechakl el ngar er a delechil a ngoao. Ng melengedanges e le ng di dellemelel e diak, me a ka el uduel, e ng di kmal oba ngika el kmal soal e ungil el redil e diak a ngodech. Ng di mla er ngii a klengoes er a idelsebel el medechel e merkong. Ng ko er a di melengedanges ku e a Delresuuch a rongesa me ng mlo omes er ngii, me a lebocha er a blil a Deleumumu me lebo lodengelii a chelebulel a Delumumu, e ng nguu el mo er a blil me ng dortii a kebui el me er eou e mo otengel a edeiuong el buuch el mechei e mo ngmai a kldei el bekai el ilaot el mei. E te somosem a telechellel e ngmai el mo ongasech er a mlai. E a Delumumu a mocha mades a ngeltel er ngii el ko er a meleng e olengit a udoud, me tia ikid e a Delresuuch a kmal chubrang me ng nguu el mo er a blil e dmu er ngii el kmo, di lekau el mo mkisii se el tab el ulaol er a bluuldang, e mnguu a olbedabel el ngar er ngii, e momes e di lekau melilt a udoud, e mo telkib el dmolech a chimam el melilt a udoud, e le ke kuk mla er tia e mocha er a Ngarchelong el belual a bechim. Me se el chobo el oba ngika el meringel chad el dil, e ng diak lebo lemedilech a chimam er a ureor me a diak mongitetengtik, e le ng mekngit a rengul a bechim. Me ng mlo ua ise, me ng ultobed aike el mla er a olbedabel e ngilai aike el mo

er a kluk el udoud e te merola el mo er a taoch me ng mocha doiderekl a Dulumumu me a bechil e merolang.

Me a lebo er a Ngerchelong, e ng ulebekebek a medal a Delumumu. Me a lebocha e ng mera el mlo klebokel el oba a bechil el me er a klengitelreng. Ng kildmokl aike el rokui el ruoll me a belsel a kemeldiil me ng kildmokl el rokui, e mo oumeder er a udoud. A leta el me reme er a Ngerair e a Delresuuch a okere er ngii el kmo, “E Delumumu, ng mlo ua ngerang?” Me ng ouchisa el kmo, “Ng di milkedmokl a rokui el tekoi.” Me tia el cheldecheduch a ua losaod el kmo, ng kirel ngar er ngii a melatk er a uriur er kid. Me ng diak debo deua Delumumu el derrebokel el chad el diak a omech uriul er ngii. A Delresuuch a blechoel el kereomel el chad me a belkul tia el tekoi el “bkais chemrungel” a ngika el Delumumu a ulemkais a ulolel a Delresuuch me ng ua el ulemkais el mo mesa chemrungel. Me a tekoi el denguu er tia el cheldecheduch a kired el mo kldmokl el lomech er a uriul er kid.

BUKITANG EL DELAL A RALM ER A NGARDOK

(IMETMELLASECH)

A irechar e ng mlo diak a ralm er a Belau me a rechad a mlo mela a imelir a ralm er a Ngardok me te merael el mela a ralm er a Ngardok er a bek el sils. A rebebil el redil er a Ngerchebetang a mlo mela a ralm e a ta el mechitechut el mechas a lomesterir a olmelel el mo mela a imelel el ralm e ng chetirir. E a ta el kekere el redil a milechere a ngelekel e dirrek el milrael el lorreched el mo mela a ralm, e ngii el mechas a melekoi er ngii el kmo, “Rungalek mnguu tia el kualuk el mo ngma a imelek.” Me ngika el redil a mocha oteklii a kualul ngika el mechas e merael. Me a lebo el mo er a Ngardok e ng mlo el mo sochesebii a olmelel e mocha sochesebii ngii el kualul ngii el mechas. Me a bo lesechesebibii e a ngelekel a bukitang a tmuu er a chelsel e ng nguu el merael el me er a ked. Tia el kual a ko er a di olsibes me ng dmu “tia el kualul ngika el mechas ng chemars? Bechere e ng di ungil, ngii di kurael e a kmal lorreched.” A le me e ng ngiluuu el msang e dmu, “Chedil tia kid a kualum.” E mocha turecheklii e merolang. Tia el kualul ngika el mechas a mlo mechelii e olecherchars el melekimes er a ulaol. Ngika el mechas a kmal mla mo rrau a rengul e omadesua el kmo a kualuk a chemars. Me ng mocha nguu a orsachel el mo loia er a eungel e a lebekiis er a tutau e ng mla mo mui. Me ng mocha omes er ngii e a bo lomes er ngii e ng dirrek a iul. Me ng kuk mocha nguu a chimo er a orsachel el mo loiang, me ng di mle ua ise lokngemed a orsachel er a blil el mekeek el rokui. Me ng mocha omes er tia el kualul. A lomes e ng ngar er ngii el kekere el charm el ngar er a chelsel tia el kual.

Ng di mle telkib e a lorrenge er a ngalek e ng lmangel. Me ng oleker er ngika el ngalek el redil e le ng di mle kaiuekeed a blirir. “Rungalek ngera me ng di lmangel a ngelekem?” “Ng diak e chedei ng locha dirrek el meched a rengul e kekeringa a rengul er a kleald.” Ngika el mechas a dula er ngii el kmo, “Morechedau el nguu el mei me mtechelbii e lolim a ralm.” Ngika el redil a dula el kmo, “Bechere e chedei e ng diak leua tia el kmal diak a ralm e domngim er a ngalek er a ralm.” “Runglek ng kmal mla mo betok a ralm.” Me ngika el redil a mocha nguu a ngelekel el mo er a blil ngika el mechas me ng tochelbii a ngelekel el mo merek e ng melim a ralm e ngika el mechas a dula er ngii el kmo, “Bo er a blim me mongakt a orsachel el me me domekeek er a ralm e rungalek e tia ng ngera el klalo el msilechesebibii el loia er a kualuk me ng kmal miong.” Ngika el redil a mocha ngmai a orsechelel el rokui el mocha er a blil ngika el mechas me te mocha omekeek e mocha meliokl a kelir el teru el ongalek. Me ngika el redil a

tmuchel a ralm el mo er a blil me ng ngiokl a kelir e me me ng tmuchel a imelir, e me me ng melecho ngii me a ngelekel el di mle ua ise el mo el mo el di kea a blil ngii el ralm. Me te okor e mocha katekoi e mocha kiesii a chutem e nguu tia el kual el ochebelii er a chelsel. Me a lochebelii er a chelsel tia el chutem e tia el chutem a ngar er a eou me ng merael a ralm el me ngmasech er tia el kandidai el chutem el oldengelengel er a bita el mo tuobed er a daob me te mengklia el ua se “Imetmellasech.” E ngika el bukitang a kie er a chelsel el mo el mocha klou e tuobed. Me a ltobed e a baoch a merusii el nguu lotebedii er a taoch me ng mo me ng mengkekebelung er a delul a raod e le ng diak lodengelii a daob. E a rechad er a Ngcheangel a ngar er a Ngcheangel el me soiseb e metik er ngii me te mrechii e nguu el me te smongosii e kolii me te di kilii el mo merek e mo chachiuai el rokui.

E mereko e ngika ikid el bukitang a dela a ralm er a Ngardok E a cheldecheduch a Imetmellasech. Se el ralm a oungakl er a Imetmellasech.

CHEDENGAL A MATUKEOLL

Chedengal a Matukeoll me a (Kerreel er a Muikotmel) a eru el belkul a tekoi el mlengai er tia el cheldecheduch.

A Muikotmel me a ochellel er a Ngirailulk a chad er a Ngetmel el beluu er a Ngerchelong. A Ngirailulk a ngelekel a ochedal a Muikotmel a mlo ulechell er a Ollei, e kmal mle kedung e ungil omerellel me ng mlo kie er a delengcheklel a demal er a Ollei. A oktemelet er a Muikotmel a di mla er a Ngetmel el mlo bechiil me ng mo er ngii a retru el ngelekel el sechal. Me ngika el chad a kmal mle bekerrekerongel er a lekekere el chad e dirrek el siluk a chelbechiielel a ochedal me ng mlo ngar er a belsachel el ta er a ngar er ngii a ududel el chad er a chelsel a beluu er a Ngetmel. A lechudela el chad e ng mlo smecher er a rakt el ringelmad, me tia ia mlo uchul e ng mlo muiko me ng mlo diak lsebechel a bek el ureor e ng di ta el omengereel el suld a mlo sebechel lultab er ngii el ureor. A chelsel a delengcheklir ngii me a rengelekel me a dirrek a ochellel e a kmal mle klou el tekoi el lekerkikl er ngii me te ulemekiai er ngii, a delsechir er a rechuodel el me el matukeoll. Me a Muikotmel er a bocha el muiko e ng dirrek el ulemeklatk er a rengelekel el kmo, “Alii a matukeoll a diak lekall le ng mo uchul a kerrior me a kodall el me er a delengchekled.” Me ng ua ise e ng di ngii el Muikotmel a kmal soal el menga chedeng. Me ng blechoel el oureng a omengelel a chedeng er a delongelir a rengelekel. Tia el cheluiko el rakt el mlo er a demerir a mle meoud el lebo lodengelii a rengelekel el mo lmuut er a lesenge demerir el mengereel a suld el oduker er ngii er a seblel el ngau el ngar er a ullel. Me tia ikid el omengereel el ngar er ngii a Muikotmel el loduker er ngii er a ngau a mlo belkul a tekoi el kmo, “Kede ko er a Muikotmel el di mengereel el osiu er ngii er a ngau.” Me ngii el belkul a tekoi a mo er tirke el chad el bekerrekerongel el diak a ududir el ulatek.

Me a rengelekel a Muikotmel a lesenge a demerir el di mengereel a suld el olduker er a ngau e te mocha medenge el kmo ngika el demmam a muikoa el ua letiu a kermerem er ngii er a chelechang. Me te mocha katekoi tir me a derrir e mocha outingaol er ngika el chebuul el demerir. E a ta er a klebesei e a derrir a dula er a rengelekel kmo, “Ngika el demmiu a kmal omerollel el mo meringel a omesiungel el di kea el ua ingii er a ngar er a mo el bekerrekerongel me a dosiou er ngii el mo lmuut er a lemad e domtab e ng di kea ngodech el rolel a udoud el mei. E aike el udoud el lolab a kmal sebechek el chudechuul e ngmai er a chelecha el lemuiko me di

losisiu a klebesei me a llomes er ngii me lak a ngera el lodengei. Me a kot el mereched el rael a desiik a rolel e lemad ngika el demmiu e ng bai ongesa ku, e dengai a udoud.” Me a ldela derrir el ua ise e a rengelekel a uleker el kmo, “Me ng ngera ungil rolel e ng mad ngika el demmam el diak lebo lemserasech a chimad er ngii?” Me a derrir a kilmir a cheril e onger er tir el kmo, “Rengelekei, a demmiu a oudelasech a matukeoll e oureng a omengelel a chedeng. E a matukeoll me a chedeng a diak lesa el kakerous a telemtemul me a omokngemedii a matukeoll el me me leka a demmiu, e ng mereched el mad. Le delseched a rechad a deka e kede mad. Me a kumdasu e tia ikid a beat el rolel e a demmiu a kmal mo chemat a omerelliu el rengul ko momeka er ngii er a chedeng me ng dmeu a rengul el mo er a kodall.” Me a rengelekel ngika el mechas a silechedekl er a rengrir aika el tekoi e mlo tmaut el ngar er a che a matukeoll el omeka er a demerir. E liluut el kmal mlo chedechedoi er a bita er a demerrir me te omngar er a sebelel e meleakl er a klongosel a demerir el matukeoll. Me a demerir a omengur el menga er tia el klongosel e kmal loureng a sulir a rengelekel. E ngilititerir a rengelekel el mo ngelekel a rengul me ng millatk a mo olterkokl er tir er a ochellel er a Ngirailulk.

A ta er a klebesei er a lungia a techellel a sils, e a Ngirailulk a mla er a Ollei el me oldingel er a oktemelel. Me a leme e ng diak a chad er a blai e a sebelel a oktemelel a ko er a mekmad ku, me ngii a oba teluo el skors el ko er a orrik a charm er a ulaol a lorekerukem, e omad a suld er a telia el ko er a mesesilkolk. Me a ltuu a Ngirailulk er a blai me lorekerukem, e ng nguleriik er ngii el oba itia el skersel. Me ng ulenger el kmo, “ngak a Ngirailulk e okdemang.” Me a ledela el ua ise e ngika el Muikotmel a silal oitii a telil e kmo, “mereched el me me kulekoi.” Me a lebocha er a bita er ngii a Ngirailulk e ng dula er ngii el kmo, “Tirka el ngelekek a diak a rengalek el ua itir e le te kmal ngelekel a renguk. Me ke mo medengelterir e le tirka di ngar er a chei a odimek er a bek el sils e kmal chedechedoi el orrenge a tekoi el ngalek. Me chelecha me te liluut el mo er a chei el mo osiik a odimek el chedeng. Me me bo mngai eruo er a idungel el me me lsebelek me a leme e kuk lolengull e te kmal choremang.” Me a Ngirailulk a tobeda el mo omngar a mo sebelel a okdemelel. Ng dimlak a kmal rat er a kerrekar el lebetik e a lorael mo bedul a taoch e tia otaor el ultechakl e ko er a ungil lidungel a lomes er ngii. Me ng mocha machel a bebil er ngii e ngmai el merema er a blai me ng ngoduker er a sebelel ngika el okdemelel.

Tia el otaor a kmal chetuul me ng chilat a medal ngika el Muikotmel. Me ng mengedengader a chiuosech er a medal me a ngertel a di omebaoch me ngii a di oumismisk

kung. E ng di uriul e a lomelechesiu er ngii e ng di ua lulebiich a cherou er a medal el mlo mellomes a chelsel a blai el mo rrikl e le ng ngungia el omes. Me ng di mle kea loungeroel er a Ngirailulk e bai dula rengil el kmo, “Ng diak ledi lekau eI mo smiik kelem e mousueleb e morael, e ke mo kebesengei?” A Ngirailulk a millemesumech er a blengur er ngii me ng dula Muikotmel el kmo “Ngak a ungia el omes e ng di ngar er ngii a meringel el suches el rakt el ngar er ngak el bebil er a sils e ng di mo ko er a mengesbocheb a uluk. Me a kumelechesiu er ngii el rakt e ng soal tomellak er a mereched el klebesei, me ke di mo e mereched el me me ak melekoi.” Me a Ngirailulk a mocha melemesumech er a okdemelel e riiedang. A kuk bo lehib a sesei el klebesei, e a chedil me a rengelekel a mocha berrotel e katekoi me a rengelekel a dulal kmo, “E chedei ngika el okngameda delsechel e di diak lemekesakl, ng mekerang.” Me a derrir a ulenger er a rengelekel el kmo, “A demmiu a mla mo er ngii a rektel el ko er a di mengesbocheb a ulul me ng olekeda a kodellel. Me se el olbedabel el blil a ududel a di kuba el omerbart er ngii, e ngii a diak lodengelii e le ng muiko. Me bo lemeklou a rengmiu el ngar er a chei e molemolem er a ngeiul a matukeoll, e lak lsebek a rengmiu e a udoud a ngar er a chimad er a chelechang. Le ak medenge el di kesai el klebesei ku e ng mad a demmiu.” Me a rengelekel a liluut el mo oumenged a matukeoll el di ua bek el sils. E diak lodenge el ongalek el kmo ngika eI demerir a mla mo ungil osengel. Me a ta er a tutau, e a rengelekel a ngmai a okurir e mo er a chei. E a derrir a mocha nguu tia el blil a ududir el obekel, e nguu el mo dechor el leko melechebekl er ngii er a chado er a bebul ngika el rubak. E a lechub e ng merereek er a chado er a bebul a Muikotmel e kmo, “Se blil a udoud me ak loia er tia el chado e mo er a mesei e mo telkib el meoud el mei.” Me ke di omad a suld e mengkar er ngii me ng diak lemekesakl.” Me ng dmu el ua ise, e nguu ngii el blil a udoud el ollamet el mo doklii er a uchul a ingukl er bita er a ngemokel el chab, el belkul a kmo, ak meruul ua ise e a bechik a diak lodengelii tia el omerollek. E a lechub e ngika el bechiI er a Muikotmel kmal ungil lomes aika el omerellel a bechil me ng dilmuk le ng kmal mechese a rengul er ngii. E ngii el mechas a tuchelii a oltatel e mo er a mesei. Me a lebo er a mesei, e ng mIo mechelaod er a rechurird el omechesakl er a rektel a bechil tekoi el cheliuis, me ng di mla er a mesei el mo irecherech.

E tia ikid el sils, e ke le te bladek a ulerrael me a lemullekla sils e ng merma duum a Ngirailulk. Me a leme e ng di mle el ounqed er a okdemelel e mo er a taoch me ng lmuut el machel a sebelel el otaor e ngmai el me er a blai. Me a leme, e a okdemelel, a luueta el

melekinga blengur er ngii me ng mekisa el mo osiik a kelel ngii me a okdemeIel el leko te chachelim el omengur. Me ng mo otebedii a oruklel a okdemelel, e mocha nguu itia el ileakl el klengosol a okdemelel me me ng mo mkisii e a lomes er ngii e ng di uldeod er a oisal me a bekellel me a delechil a di uldeod er ngii el di chimo el klengoes. Me ng okere er a okdemelel kmo, “Tia ia klongosem?”. Me a okdemelel a kmo, “Choi, tilecha ikid a klongosek er a irechar el me er a chelecha er a rengelekek el loleakl er ngii e oba el omechuus er ngak.” Me a ldela el ua ise, e a ochellel er a Ngirailulk a mocha kiderii ngii el klengoes el mo er a medal a okdemelel, me ng kilebetiek e ko er a mlo oltirakl a telil e mretechii a ulul e kmo, “Aika chedengal a matukeoll.” E dula er a ochellel kmo, “Mluut el mekedeldar el mo nguu el kudmeklii e ng klengoes el delengerenger. E kau bom nguu ta er a lius el me dousueleb e aika delasech. Tirka te mede el ngeleked el ngau.” Me a lemerko el ousueleb, e a okdemelel a dula er a Ngirailulk el kmo, “Bo er se el ingukl er a bita er a ngemokel chab, me bkiisii e mnguu a olbedabel er a udoud el mei.” Me a lengura el merema e a okdemelel a mlo dulodel aika el udoud el rokui el locha er a chimal a Ngirailulk e ongeasek a meklungel me a ngerel a udoud er ngii e kmo, “ke ngmai e mo er a Ollei e diak omei. Ng di mereko se el mrenxes a chisek el kmo ak medei e ke me me ke doklak.” Me a ochellel a ngmai ngii el udoud e remiid er a Ollei.

A lemerma er a blai er a kebesengei, e a bechil a mocha nguu tia el olbedbel. Me a lenguu el me me lesang e ng di bechachau me ng kmal mlo merat a rengul, e mocha mesubed er a bechil er a Muikotmel el kmo, “A olbedabel a di bechachau e mocha oukerrekeriil er a bechil el kmo, “Ng tech a mle er a blai?” Me a Muikotmel a kmo, “Rrang ng diak a ngera el kudengei e ng di lebo er ngii a merereek er a ulaol, e a kuba tia el skersek e merroaech e ng di dimlak a rereek er a chado.” E liliut e loker er ngika el mechas el kmo, “Ng mera el di bechachau tia el olbedabel er a udoud?” Me a mechas a kilengei. Me a Muikotmel a dula el kmo, “Kede ousang, e aika Chedengal a Matukeoll.”

Me a lsechera ngika el rubak el medei e a ochellel er a Ngirailulk a mermang. Me a leme e te oumekikngiterreng el mesubed er ngii er a chisel tia el olbedabel er a udoud el di bechachau.

Me ng dula el kmo, “Eii, ngika el Muikotmel ng dimlak mokelii er a delsechel el matukeoll?”

Me a ldela el ua ise e a chedil me a rengelekel a di mlo chebecheb e deuall, e belalk e ua le mlengam a ualech el di mle mikoik er a chelebuul me a seblobel me a klengiterreng el bliull er a chelebechobel, me te di kollang er a udoud me a blai me a chutem me a delengchokl.

CHELDECHEDECHAL A MALSOL

A Malsol a mle chad er a Ngeremlengui er a irechar. Ngika a mle bekeu e mesisiich el chad e mle mekngit a omerellel. Ng mla er ngii omerellel el mekngit el riruul el kirel a mle Dirrengulbai el meteet el mechas er a Imeliik. Ng ngiluu a chiklel a ngelekel a Dirrengulbai. Ng dirrek el diluchii a ochedal a Dirrengulbai el tia a mle cherresel a Rengulbai el mo er ngika el ochellel, me ng chilemur a rasm e ulduruklii el mlo er a Ngirturong er a Imeong.

Me a longado er a diangel a recheldebechel er a Elsechei er a Imeong e a Malsol a ulsiueklia er a bab ngika el ochedal a Dirrengulbai e diluchii me ng ruebet el me er a eou el mad. Aika mla er a rengul a Dirrengulbai e ng mlo merael a beluu el osiik er a chad el mo nguu a medal me a lechub e ng biil er a Malsol. Ng mlo er a Melekeok el mlo er a Udes el mlo bechil a Reklai. Me ng bechiil e di ulechem a cheritel e bad el delbard er a bebul a Reklai. Me a ta er a tutau e a Reklai a okere er ngii el kmo, “ng ngera a telemall?” Me a Dirrengulbai a ouchisa aika el omerellel a Malsol. Me a louchisa er a Reklai ngika el mechas e a Reklai a mocha meduch er ngii.

Me ng dula er ngii el kmo, “bechere e ng ngerechelek.” Me ng milsmechokl a cheliuau. E a Reklai a ultebedii a tekingel el mlo er a Bekeuelbechab er a Ngchesar me ng mlo omekoad er a Malsol er a Ngeremlengui. Me a Bekeuelbachab er a bocha lolai er a Malsol e ng uldelecheklii el choitechetur e ngiluu el mo msa a Dirrengulbai el ngar er a Elechui el mengiil er ngii. Me a lemerema a Malsol er a Elechui e a Dirrengulbai a mlo olecholt er a klsbengel a rengul el kirel a Malsol. Me ng ultebedii a tekingel el mlo er a rokui el redil er a Imeliik me te mlo ngmai a otechir el bad e “**Rodir a Chosm**” e mo er a Elechui el mo ometech er a Malsol el olab aika el bad el di mlo medechel el debellel. E tia el Rodir a Chosm a belkul a tekoi el kmo a rebek el dil a mo oubiungel a udoud el bo lolab a Dirrengulbai el mo tiklel a Bekeuelbachab. Tia a omeruul el milkedmokl a ua lolechotel a mle klisichel me a kldachelbil ngika el meteet el mechas el mle merredel er a Imeliik er a irechar. Tia el mle ua ise el omeruul a dirrek el utebengall e le ng kot el mle klou el chitel a udoud er a beluu er a Imeliik er a irechar. A tiakl el tekoi a belkul a kmo ng omechar.

CHELDECHEDUCH ER A BELILIOU ER A IRECHAR

A rechad er a Oikul a mle kie er a Metukrikull e ngar er a che e a Obirrir a mochang. E ngii a kmal merengela a mekemad er a Beliliou e le rechad er a Ngchemiangel a di ngar bab e a loliokl a remechas er a Bililiou e te di metengel el ngmai a ngeliokl e merael mo ngmasech e oumekemad er tir me te kmal mlo chebuul.

A ta er a klebesei e a Obirrir a mocha er a Metukerikull e mocha olengit a ngeseu er a Aderdei. Aki kmal chebula e le Rengarangchemiangel a di ngar er a bab e olengkangk a bad e se el kimoliokl el mo marek e te di mo medenge el ua se a ngeliokl a mla mo mark e me ngmai el merael. Me aki kmal chebula me aki olengit a ngeso.

A Aderdei a dilu er a Obirrir el ua se ke mo e choilemam er a chelecha el me el orakiruu. Me tia er a lorael ngika el mechas e ngii a melekoi er a rechedal el ua se, kede melasech a kerrekar me a klokled e chelecha el me el orakiruu e kid a mo mesa ngike el mechas el mle el olengit a ngeso. Me a rechad er a Metukerikull a mocha orakiruu me te mong. A lebo e te mlo er a Ngchemiangel, e a lebo e te mocha olengkangk a bad el me me ng ua se molchirch e mtakl e molengkangk me tongkangk. E ng kuk merma bebil, molchirch e mtakl a klokliu e ng merema me te olengkangk e di mle ua ise el mo me te ngmasech el mo se er bab e oldechelakl el mekodeterir. Me a lemerema e a Obirrir a dmu el ua se kemi a kmal mesula, me chelecha kemi a rechad er a Oikull a sebechiu el di ngar er a chei el me er a medal a Beliliou el diak a choungeroel er kemi le kom kmal mesula el mla ngosukemam. Me aki sobelang. Me chelecha a rechad er a Oikull er a chelecha el taem a di ngar er a chei el mo er a medal a beluu er a Beliliou e diak a ngelroel el mo er tir.

A ta er a klebesei e ngika el Obak el mlad a mla er a Oreor e merael mo er a Beliliou e a lebo er a Ngerchong e te ngar er ngii a rubak er a Oikull el ngar er a chei e ng torebengii tia el bilas e oderchii a choderchelel el mo e oker, kom ngera el ngara chei er tiang. Me a lebo e a Aderdei me a Dingelius a ua se bo mdu er a Obak el dmu el ua se te rechad er a Oikull a ngar er a chei er sei. Me ng me a oderchelel a Obak e mocha smuk a blauang me a milk me a sukal me a bek el bedengel a kall er a ngebard e a Obak a dmu, mngai el mo e bsa a Aderchei me a Dingilius e mdu el ua se ng oingera el sils e aki mengiil er kemi el me er a Beliliou. E ng di subed a chom ngar er a chei el me er a medal a Beliliou e a renguk a kmo kom reua techang. Me a chelecha a Obak a merola el mo er a Beliliou e tir a ngar er a chei. A ta er a klebesei e te ua se,

se el dengemedii a ngikel e kede mo er a Beliliou me chelecha te oderechii a oderchelir el mo e dmu er a Obak el ua se rechad er a Oikull a eko er a klukluk.

Me te ngar er a chei el mengesokes el mo el mo e a bo lekukuk e te mla er a chei e ullab a ngikel el mo er a Beliliou e a lebo e te mla remuul a kelir el di ngar baks me a okurir el kmal mle ungil kall. Me te omengur e merola me te kasmesumech e a Obak a dmu el ua se ko kmal mlo mesaul e le kemi a uchul me aki silobel. Me chelecha kede di mereko el di ta rengud el mo er a ulebengelel a beluulechad. Me kom di ngar er a chei el mera medal a Beliliou e diak a oungeroel er kemi.

CHELDECHEDUCH ER A BELUU ER A OIKULL

A ta er a klebesei e a ruchellel a Ngirachitei a mlo er a chei er a Ngerdesolech. Me a lebo e ng kmal Dirk Klou a dolech me te mocha me te ulak er a uchul a chelebacheb. A lomes er a daob e te mesa a llechul a redil me te ko er a kmal mlo rrau a rengrir, e a lechisngekl el bedul bab e ngika redil el telongakl er a metengal a kesiil el kmal mera el ungil el redil. A denguu el me er a chelecha el taem e a osengir er ngika el redil a bekord el ngar er a teruich me a eloem el mo er a teruich me a euid a rekil. Me te omes er ngii e ko er a medekta, me te okor e luueta el di kea le ngar er a chei e melikes el mo er a Oikull. Te mocha er a Oikull me te mekur a mlirir er a taoch e mereko e ngmai a chelasir e mrael el mo er a blai el di omiroi aika el chelasir el diak a ngikel er a chelsel. A lebocha er a blai e a Ngirachitei a kmo, “Sechelei, ngera me kom ko er a di mlo e lmuut el diak a cheldmiu.” Me te ua se, “Okdemaol, msall e kimeko e kimouchais, e kemam a miltik er a kmal kdekudel el tekoi.” E mocha tmuu er a blai me te mo reboreb e ouchisa er a Ngirachitei. “Kemam er se er a kimtobel e aki millikes el mo el mo er a Ngerdesolech e ko er a kmal Dirk Klou a dolech, me aki ko er a ulak e omekched er a chei e aki momes er a daob e ng ngar er ngii a llechul a redil, aki momes er a bab e ng ngar er ngii a ta el kekere el redil el telongakl er a metengal a kesiil el mera el kmal ungil redil. Me a Ngirachitei a dula er tir el ua se, “Ruchellei, mluut el mo me mnguu el mei e a lechad e ng chedak me ng chelid e ng cheduk me a lechesiu e ng chesungek e a itemamuu e ng temamungek. Me kemiou moutekangel el mo mesa e mnguu.”

Me te okor e lmuut el mo er a taoch e mocha oldiderek e melikes e katekoi el kmo, “Chobo e a debo e kede mekerang.” Me ngika el kuk chimo er a rechad a kmo, “A debo e kede omekedo er ngii.” “E a lechetil e kede mekerang?” “E kede mdechemii.” Te okor e melekesa el mo er tia el ble el lulak er ngii me te ulak. E a lomes er ngii e ng kuk telongakl er tia el metengal a kesiil el melai a redechel el me me ng mengang. Me te okor e omekedo er ngii el kmo, “A rrach, mei.” Ng ko er a di chetil ngika el redil e tir a di omekedo er ngii me ng merola el me metengel el mocha er a mlai me te okere er ngii el kmo, “Ke mla er ker el mei?” Me ng dula er tir el kmo, “Ak kie er tiang.” “Kau me a tech a dmak el kiei?” E ng kmo, “Ng ngak me a delak.” Me te ua se, “Me ng ngar er ker a delam?” E ng dmu, “Ng ngar er a beluu el ngar tia er bab.” “Kemam a uchul aki mlei a mle oltak er kau el mo remenges er a Ngirachitei.” Me tia ikid e ng ko er a diak Isa el ungil er a rengul ngika el redil, e tir a mocha otekir e melikes. Me a

lolikes e te melikes e a delal a ulemes er tir e mocha melidab aika el kerrekar el ko er a oltetirakl er tir, e mereko e meleko el kmo, “Iarei, kau ke merael me ngak me tech a kilei. A Iarei, Iarei kau ke merael e ngak me tech a kiei.” E tir a di ua ngera el merola el mo cheroid e ngii a dirrek el di melidab a kerrekar el ko er a di mengiloil er tir e di meleko el ua se “Iarei, Iarei kau ke merael e ngak me tech a kiei.” E di milleko e tir a di melikes el mocha cheroid el mocha soiseb er a taoch el mocha er a Mengederaol. Me tia er a lebocha er a taoch er a Mengederaol e te mekur a mlai e nguu ngii el redil el mo er a blai. Me a lebo er a blai e a Ngirachitei a kmal mlo ungil a rengul er a lesa ngika el dil e le ng mera el ungil el redil. Te dilak el kiei er a chimo el blai el kmal mlo meketeket me a Ngirachitei a mocha nguu me ng ngoubuch er ngii. Te kmal mlo meketeket el kaubuch e ngii a dillang ngika el dil. A bocha el belsechel a cheroll e ng milechellii a ngalek el sechal. Ng kmal klebokel a medal el tolechoi. Ngika el redil a kmal mle blak a rengul el mengedmokl er ngika el tolechoi me ng kmal mle mesisiich a bedengel ngika el ngalek. Ngika a kmal mle mereched el mo klou me ngika el delal a mocha omais el ngar er a mesei.

A kltekotel a taem el bechiil a Iarei e a delal a mle er a Ngerdesolech me ng kie er a chemrungel er a blirir. A Iarei a mlo medengei el kmo a delal el milechellii a kie er a chemrungel. Me se el loruul a ongraol e ng omechebached a derstelkib er a ongraol el orrebet er a chemrungel el kelel a delal. Me a lechub e ng melidel a odoim e aike el ko er a cherrad el ngar er a olekall a lorrebet er a chemrungel el odimel a delal. Me ngika el beab el delal a Iarei a ngar er a chemrungel el kmal di medinges e le ngika el ngelekel a kmal kerekikl er ngii.

A ta er a klebesei e a Iarei a sokol el mo er a cheliuis me ng merola el mo er a bechil er a Ngirachitei me ng dula er ngii el kmo, “a rrach kau tia el diak chobo er ngii me molasech er a ordemelel a ebeklem er tilecha el mekesong e di morrenge er a ngalek a llangel e bo mesang.” Me a Ngirachitei a kmo, “choi, bechere e morael e ak di kie me a kumes er a ngalek.” Me a Iarei a mocha kudmeklii e merola el mo er a cheliuis.

A Ngirachitei a melasech er a ordemelel a ebeklel e a lorrenge er a ngalek e ng kmal doroakl el kmal tuobed a cheril. Me a Ngirachitei a kmal mla mo rrau a rengul me ng dula el kmo, “eang ng tech a ngar er a blai el oltobed er a cheril ngika el ngelekek me ng kmal doroakl.” Me ng mocha nguu tia el ordemelel a ebeklel el mechere e ngii a nguu ebeklel e merola el mo omes er a ngelekel. A bo lultom er a tuangel e ngika chimo el beab el ngar er a bita e ridekekl el mo er a bitang, e kuk mo er a bitang. Me se el ua ise el merdekekl e ngika el ngelekel a kmal tuobed a cheril. Me a Ngirachitei a ua se “sechelei ngika el beab ngara me ng ua ise er ngika el

ngelekek.” Me ng nguu tia el ebeklel el nguu el mengelebed me ng di mlad ngika el beab. Me tia er a lemad ngika el beab e ngika el ngelekel er a Iarei a ngar er a cheliuis e ko er a mlo klsakl a chereuel a chimal e a lechisngekl e a rasech a metebetobed er a chereuel a chimal. Me ng di mle se ikid e ng mo medengei el kmo a tekoi a mla metemall. A delak a locha mla mad. Me ng okor e mocha remiso a bedengel e okor e ngmai aika el klebngel e tmuchel el me er a blai. A leme er a blai e a Ngirachitei a reboreb el melasech er a ordemelel. Me ng mocha oietii a klebngel e mocha oleker er a bechil. “Ka morael el me e dolekoi.” Me a Ngirachitei a merola el mong. “Ng diak a ko er a mla dubech el tekoi?” “Ng diak. Ngak itia er a kreboreb er tia el melasech er a ordemelel a ebeklek. Ng ko er a diak a ngarang?” “Ka mouchais ng diak a ko er a ngara el dilubech?” “Ng diak.” E ko er a mocha lotkii ngika el beab me ng dula er a bechil el kmo, “Ng di ta el beab.” “Ng diak a tekoi e ng di ngar er ngii a chisel a chimo el beab. Ak melasech er a ordemelek e rrang e ngii a ko er a mekedkat a cheril a ngelekedded e a bo kultom e ng chimo el beab el melechesokl el mo er a bita e kuk mo er a bitang, me se el ua ise ngika el beab e ng kmal locherechur a ngeleked me ak mlo suebek a renguk a lekeskelii a ngalek me ng di mle ta el kungelebed el oba tia el ebakl e ng di mlad me ak nguu el mo choitii.” “Me ng cheloit er ker?” “Ng cheloit er a rebai.” Me tia er a ldu el ua ise e a Iarei a tmuchel a chimal e lmangel el kmo, “Chedil a delak, a chedil a delak.” Me ngika el Ngirachitei a ko er a mocha nglengael e merrengang, e a Iarei a di lmangel el mocha obiou er bita er ngika el beab. Me a Ngirachitei a mocha orkedii ngika el bechil e dula er ngii el kmo, “E rrach bechere e ng kmal di kea cheldechulel e ng dimlak kudengei le ng dimlak msbedak me bechere e bo lungil a rengum e a delam a mo delekull er tia el odesongel er tia el blai er a Urrak melak el mekngit a rengum.”

Me te mocha er a blai e mocha nguu ngika el beab e a Ngirachitei a mocha mechar a betok el babii me tia a mlo klou el kemeldiil el di ua kemeldillir a remeteet. Me a bocha el merek el mengemeldiil e te mocha nguu a bar el me me te mocha medekii e kiesii a olbed e doklii.

Me chelecha el sils e se el debo er se el blai er a Urrak e ng ngar er ngii a debellel a beab me a rechad er se el blai a kmal medengelii el kmo, tia ikid a debellel a beab el di ua klungel a debellir a rechad.

CHUBECHUB ME A KEDUNG

A irechar e ng mla er ngii a ta el mechas el kilie er a Ngesuas. A Ngesuas a beluu er a Irrai. Ngika el mechas a mle smecher el cheseches e rekidel. Tia el secherel a rirelili e ng kmal mlo chebuul. Ng mlo diak lsebechel el di ngii el osiik a kelel. Ng mle blechoel el di olengetngit a kelel er a rechad er a beluu er a Ngesuas.

A ta er a klebesei e a merreder er a Ngesuas a mocha mengideb er a rokui el chad er a beluu. Te mlo dmak e melib er a mo oldik er ngika el cheseches el mechas. Te kmal mla tmurk a rengrir er a omerellel el di olengit a kall er a rechad er a bek el sils.

A uriul e a merreder a ulderechii a Derbai el mlo oldik er ngii. Tia er a lebo loldik er ngii e ng mocha kirel ngika el mechas el dmik er tia el beluu er a Ngesuas.

A bo lekukuk e ngika el mechas a mocha kudmokl a ilekemellel e merolang. A lorael e ng mlo duum er a beluu er a Ngeraod. Ng mle soal el mo osiik er a mo beches el delengcheklel.

A rechad er a beluu er a Ngeraod a meketeket er a lrenges amekngit el chisel ngika el mechas. A lemerema er a Ngeraod e a rebek el chad a ko er a di melai a mederir er ngii. Ng dimlak lsorir a bo el lemeketeket a delengcheklel er a beluu er a Ngeraod.

Ng dimlak lemeketeket e a rechedal Ngeraod a kuk mocha melib er a mo odikel. Te silektii a brer e dobechii a cheseklked el mo dekelel e ngoura el mo er a bill ngika el mechas. Ngika el mechas er a lesa tia el brer e ng kmal el mlo mekngit a rengul me ng kuk mocha meriim. Ng ngeltengetel ngika el mechas e a reteru el odam a mlo duum er a blil. Tirka el odam a mla mad a derrir me a demerir. A ngklel a klou a Chubechub e a kekerei a Kedung. Te ullengit a mo ngelekel ngika el mechas. Ng kmal mekngit a rengrir er ngii el di chetirir a rechad ku el rokui.

Ngika el mechas er a lesterir tirka el teru el buik e ng uleker er tir, “Ng ngara a chised e rengelekei?” A Chubechub a ulenger er ngika el mechas, “Kemam a mlei el somam el mo ngelekem.” Ngika el mechas a dulang, “Rengelekei, ng kmal el soak a klengelakel e lekemuia tia el omes er ngak el kmal mekngit el chelebuul ak ngar er ngii. Ng mekngit a rektek, e diak a ngara er a ngak. Ng ka el kelek me a ka el ududek e ng diak a mo sebechek el meskemuia er a ta er a klebesei. Bechere e bo mosiik er a ta er a ungil besul el mechas me bo el delemiu. A lta e a ta er a klebese e ng mo er ngii a belkul a suliua el mo er ngii. Ngak a chobo mesaul er ngak e ng diak a ngara el bo mngai e le kmal chebuul.

Tia el dela ngika el mechas el ua ise, e tirka el odam a di mle ta a ngerir el melekoi, “Mechas kemam a kmal di somam el me ngelekem. Aki kmal chubkau se el kimomes er kau el smecher e di kau el tang. Ng mla mad a demmam me a delemam e somam el mo ngelekem.” Tia el ledela el ua ise tirka el odam, e ngika el mechas a kilenge er tir me te mocha ngelekel. Tirka el odam a mlo chemol a ilekemellel ngika el beches el derrir e te merolang. Te dilak el ongalek el merael el osiik er a mo beluu el sebechir el mo kie er ngii.

A lengar er a Olouch e ngika el mechas a kmal merengela aika el cheseches el ngar er a bedengel e mesulang. A rengelekel a mocha oleiit e ullengull e mocha rullii a delidui e ngoura derrir el mo me ng mechiuaiu. Ng mechiuaiu e tir a mocha ngmai a mertul a bkau el me me te chumlii a ngau el oseblel a derrir.

A bo el kukuk er a dirk moais e tirka el odam a ulemkokl el mo er a ked. Te mlo omalech a belochel el melatk er a derrir. A omerollir el me e te ngila a chemadech el kaiul a chebouch.

A leme e a derrir a mla mekiis me te mocha orreched el mengedmokl er a mo rolel a blengur. A ta a chilemlii er a ngau, me a ta a chiluum aika el belochel er a keai. Te dilul a odimir el belochel e omengur tir me a derrir.

A lemerko el omengur e te dula er a derrir, “Kid e chedei a bai outekangel el merael el mo er a Ngermecheruang. Se ikid a locha bai mo sebeched el mo metik er a bo dekie er ngii.” A derrir a kilenge er tir.

Tirka el ongalek a milrael. Te mlo er a Ngermeskang me te olenguul e a derrir a melim a ralm e te lmuut el merael. A lengar er a Ongaitong e a derrir a kmal el merengela a bedengel me tirka el odam a mocha rullii a ongelungel e mocha mengol er a derrir. Te milrael me a lengar er a uchul a rois er a Ngermecheruang e ngii a mechebela a ilkolk. Te mlo oiietii a derrir mlo rullii a delidui. Te mocha mekedusii a derrir er a chelsel e chumlii oseblel me ng meseb.

Ngika el mechas a olderecha er a rengelekel me ng dilu, “Bo er a blil a merreder me mouchais er ngii el kmo, aki uleba a delemam el me osiik a delengchokl.”

Bo lekukuk e ng kmal el dirk moais e te merael tirka el odam el kuk mo omalech a odimir el belochel. A leme er tia el mla mo cheldecheos e te kmal ngilemedii. Te mileche chelderir e dilul a bebil me te omengur tir me a derrir. Aika el mle medechel el chelderir el belochel a lengilai el mo er a blil a merreder er a Ngermecheruang. Te mlo me te meche a odimel ngika el rubak, e mocha olterekokl er a derrir me tir er ngii. Ngika el rubak a dilu, “Ruchellei, kemi me

a delemiu a mo chedak. A klukuk e ak melekoii er a rechedal tia el beluu me te mo melasech er a mo blimiui.”

A bo lekukuk e ng di mle tutau e ngika el merreder er a Ngermecheruang a omekedo er a recheldebechel er a tia el beluu el me kldibel. Ng dula er tir, “Kemiu a tuobed el mo melasech er a ta el klbael a medal el blai el mo blirir tirka el beches el chedak el mle er a eliseb.” Tirka el cheldebechel a kilenge e tobeda el mocha mengedmokl er tir el mo melasech er tia el blai. Te dilsechii e ngiluu el me er a beluu me te mekedecherur. Te mocha kie er ngii tirka el ongalek.

Tirka el buik a mle blechoel el mo omalech a belochel e se el leme e te omeka a bek el obliil er tia el beluu.

A lengar er ngii a ureor el beluu me tirka el teru el buik a ngar er a ureor el obengterir a bek el chad. A lureor el dil me a lureor el sechal me te di mong. Te dirrek el olengeseu el meruul a urerir a rederta el chad. A lebetik er a mechas el meluchel a klebngel me te ngosuir el nguu a telechellel el mo ngoderii. Tirka el buik a kmal el mlo sorir a rokui el chedal tia el beluu.

Tirka el buik a mle ko er a mengeluch er a delengcheklir er tia el beluu. Te dirrek el ko er a kmal mle chetirir a rechad er tia el beluu a bo lemekngit er a ngika el derrir. Tirka kmal mle blak a rengrir el olsiseb er tir er tia el beluu el okiu a ungil el omerellir. A rokui el chad er tia el beluu a ulebult el kmal mlo oubeltikereng el mo er tir. Te dirrek el kmal mlo ko er a ouchelid er ngika el derrir tirka el odam. A lebebil e a rechad a mo duum el olengit a kall er ngika el mechas.

A uriul er a betok el rak e a delal a Chubechub me a Kedung a mlo smecher e mad. A rechad er a Ngermecheruang a ngilsuterir tirka el teru el odam el kudmeklii a kemeldillel a derrir e nguu el mo doklii.

Tirka el teru el odam a mlo kie el obengkel a merreder er a Ngermecheruang e kmal el mle ungil a omerellir e mekedung. Te kmal el mlo utebengall el chad er a rengrir a rourot er tia el meteet el kebliil me te mlo olab a ngerachel er a blai me a beluu.

A lsal el chudela ngika el merreder er a Ngermecheruang e ng mocha omekedo er a ruchellel me a rourrot er a keblillel. Ng dilur er tir, “Ngak a kmad e a Chubechub a mo rubak e a ochellel er a Kedung a mo ongingil er a ta er a klebesei. Tirka a kmal sebechir el mo mtebechelii a beluu me a keblilled. A remengeteklel tia el kebliil a kilenge el rokui e mle medenge el kmo a rubekul tia el beluu a di mo kongei.

Tia er a lemede ngika el merreder er a Ngermecheruang e ng mlo er ngii a kemeldillel.

A uriul er a omeluosu e a rourot er tia el meteet el blai er a Ngermecheruang a mocha tibir el di oltirakl e melisiich a tekingel a mede el rubak.

A Chubechub a mlo nguu a dui el mo bdelul a beluu e a ochellel er a Kedung a mlo chemachel. Tirka el teru el odam a kmal mlo ungil beserir el chad e mlo orengesall a tekingir er a beluu.

DECHEDECH ER A NGERAOD

Irechar er a kmal irechar er a dirk lengar er ngii a delengchokl er a beluu er a Ngeraod e solae e ng mla er ngii a ta el mechas me a teuid el ngelekel el dechedech. Me te kie er a beluu er a Ngeraod e ngika el mechas a omekeroul er a rengelekel el mo el kmal meklunga e ngii a kmal mechitechetong. E solae a ta er a klebesei e te mocha kldibel el omesoil e ngika el kot el klou el sechal a melekinga er a delal me tirka el ochellel el dmu el kmo, ngak a bai mo siekii a ta el metat el dil el me me ng mo melechelel a klebngem er a mesei e kau tia el ko er a kmal mechitechut me ke chebuul a di le kau el meluchel a klebngem. Me a dela el ua ise e a delal dula kmo bechere e ke mo osiik er a ta el metat el dil me obetik er ngii ku e mnguu el me e ng mera el ko er a mechitecheto a bedengeth me ak ousbech er a chad el meluchel a klebngek.

Me te omesoil el mo merek e sola e mocha chachiuai me a lebocha er a dukllir e ngika el kot el klou el sechal a mechiuai e ko er a melebedebech er a uldesuel el kmo, ak ko er a mla tmengii a ngerek er a delak me tirka el ochellek, ak mo siekii a metat el dil er ker. Ng mechiuai e omdasua er a Reklai er a Melekeok, bechere e ng bai di tutau e ak omkokl el mekiis el mo er a Melekeok me ak mesa Reklai. Ng mechiuai el mo el mo e kmal di mle tutau e ng mekiis e merola el mo er a Melekeok. Me a lebo er a Melekeok e a rubak er a Melekeok a kldibel er a bai el ngar er ngii a cheldecheduch me ng mrael el mocha er a bai e a lebo e tirka el rubak a mechesa el chadecheduch e ngar er ngii ta er a rubak el kmeed er a medal a tuangel me ng mocha er tia el telia er a odesongel e olechau er ngika el rubak. Ngika el rubak a kuk di chisngekl el mesa e nguu a medal e kuk mo orrenges a cheldecheduch er a bai. A ongede er a lluut el omes el bedul iikr e lomes bedul a chelsel a blai e a Reklai okere er ngii el kmo, errang, ngera ngar er ngii er rikr me ke ko er a di mechechisngekl el bedul ikr. Me a ldela el ua ise e ngika rubak a dula er a Reklai, Reklai ng ngar er ngii a dechedech el ngar rikr el leko ng soal el omes er kau. Me a ldela el ua ise e a Reklai a ua se olekoi e rrang a lekero ng dechedech me a le ngii di el ngera me ngak a kirek el mo medengeth. Me ng tobeda ngii el Reklai el mocha rikr el mocha omes er ngii el dechedech e a lebo ngika el dechedech a mocha mengedecheduch er a Reklai el kmo, Reklai ngak a mle el me osiik er kau. Le kemam a teuid el odam el kie er a Ngeraod el obengkel a delemam el kmal mechitechut me ak mlei el me osiik er ta el redil el ko er a mo olengeseu er a delak el melechelel a klebngel er a mesei. Me tia el dela el ua ise e a Reklai a kmu el ua se, ka bechere e bong me a chelsel a ta el Sangdei e mluut el mei. Ngika el dechedech

a merola e kmal ungia a rengul. E sola a Reklai a mocha tmuu er a bai e mengedecheduch er tirka el rubak e ng meterekla a ongedibel. Me a lmeterekla a cheldecheduch e a Reklai a millebedebek er a ngelekel a ochedal el di ta el redil. Me ng ua se, bechere e ak bai mo melekoi er ngii le ng ngelekel a ochedak me ng mo bechil ngika el dechedech. Ng ngelekel a ochedak me ng sebechel le klungiaol e ng mo er a ochedak me a leklengit e ng sebechel a ngelekel a ochedak el mart a ua ise el klengit me a lechub e ng ko er a terached el me er kemam. Me ng merola el mo er a blil ngika el chebedel a kesol er ngii me ng mocha tmuu. E a lebo e a delal a ngar er a blai me ng dula er ngika el ngelekel el ua se bo msiik a kelel a Reklai el me me lomengur. Me ng mocha ngmai a kall el me er a medal ngii el rubak me ng dengchokl el omengur e mocha mengedecheduch er ngii el ngalek el ua se, ngak a mle el me osiik er kau le ng ngar er ngii a dechedech er a Ngeraod el mle melekoi a chebechiil me ng soak a chobo bechil. Tia el ledu el ua ise e ngika el ngalek a kmal di ngilai aika el blatong el ngmai el chemoit er a ulaol e ngii a tuobed el merael e kmo ng diak kbo kbechil a dechedech. Me tia er a ledela el ua ise e sola e a Reklai a ko er a kmalmekngite a rengul le ng ua se cholebo ngika ng kmal ngelekel a ochedak me ak ko er a melatk er ngii e ngii a di chemoit ku tekingek. Ng ua se bechere e ak ko er a mla tmengii a ngerek er ngika el dechedech, me ak mo melekoi er a di ta el ngelekek el redil. Me ng merema er a blai me ng mocha melekoi er ngika el ngelekel el redil el ua se rungalek ngar er ngii a chad el mle osiik chebechiil me ng soak a chobo bechil. Me ngika el ngelekel a dula er a demal el ua se chedam bechere e a lechetik me a lsoak me ngak a di mo bechil e le ke demak me ke merreder me aike el bo mdung a di bo doltirakl. E solae e ngika el ngelekel a ochedal a tuobed ngii me a resechelil el mo meruu a miich e sola e ng ouchisa er tir el ua se a Reklai a mle oldurech er ngak me ak mo bechil a dechedech e ngak a diak lsoak me ng locha mo omekbuch er a ngelekel er ngii. Ng ua ise ikid el ko er a mededenguul er ngii, mededenguul er ngika el ngelekel a Reklai me se el lebo loruu a miich e te ko er a mo kldibel e melekoi er ngii, e ngii a okor e di lmuk e di meruu a miich. Me te kie el mo el mocha tia el belsechel el kirel el me ngika el dechedech me te dengchokl e mocha belsechel a belsoil me te omesoil e ngii a ongoll a chad er a tkul a kliu er tia el blai me a Reklai a dula el ua se rungalek ka bo multom e mesa e ng locha ngilecha ikid a locha a chesmechelek el merema me mokerir el me tmuu me domesoil. Me tia el lebo lultom e ng okerir me ng merema tmuu me ng ko er a di rirdekekl el me reboreb er a medal a tuangel e a Reklai a ua se bemtuu e domesoil e kau tia el merema e mocha temel a belsoil me domesoil e bo er tilecha el kekere el ulenga me bo bad me a tutau e dechadecheduch. Me te

omesoil el mo merek e ko er a chadecheduch e a Reklai a dula er tir el teru el obekel el ua se morael el eko er tilecha el ulengang me mchadecheduch e ngak a millasech me ak ko er a telkib el mesaul a bedengek me ng soak el ma mereched el mo mechiuai.

Me te mocha er tia el ulengang e mocha mesumech a berrir e mo mechiuui e sola e ngika el ngelekel a Reklai a dirrek el ko er a diak lsa el soal kmeed er ngika el dechedech me ng dmu er ngii el ua se ke mo mechiuui er aika el bar e rrang e ngak a mo er tia el medal a tuangel me ak melai a cheluut e aki ko er a milruu a miich me ng kmal mengeald a bedengek me ng soak el melai a cheluut. E a lechub e ng telkib el ko er a chetil mechiuai el kmeed er ngika el dechedech me ng mo er tia el medal a tuangel me ng ko er a mo mechiuai el melai a cheluut. E sola e ngika el dechedech a mechiuai el mo el mo e a lorrenge er a bechil e ng ko er a mla mo mengurs er a nglil me ng locha ia kmal ieta medal me ng okor e mocha mekekokil el mekiis el mo dechor e mocha omedobed er tia el bilel el bilel a dechedech. Ng mekekokil el omedobed er ngii e ko er a kmal mlo klou el merereek me ngika el bechil a milekar. Me ng mekar e a lebok a medal e a lomes er ngii el melai er tia el bilel a dechedech me ng omes er ngii e kmal mechese a rengul er ngii er tia el lenguu tia el bilel a dechedech e ng diak a klebokel el sechal el ua ngii.

E ngii a mocha mekekokil el nguu tia el bilel a dechedech el mo turecheklii e mereko mocha mechiuaiu . Ngika el bechil a omes er ngii me ng okor e mocha melitai el mo kmeed er ngii e te mechiuaiu. E solae e a bo el tutau e ng kmal di mle tutau e ng ko er a kmal ungil a rengul ngii el ngalek e tuobed e merael el mo er a blil el di mlo el okerir a ochedal e te mo meruu a miich. E solae e ngika el dechedech er a Ngeraod a kuk merola el mo er a Ngeraod. Te meruu a miich e ko er a kmal ungil a medal ngii el ngalek el ko er a klikmechur me ngika el ngelekel a ochedal a Reklai a melekoii er tirka el sechelil el ua se a debechil a decheded me di lobengked el di merdekekl e ngera a kede ko er a kmal nguibus er ngii me kede meruu a kelel e ometech a miich el omeka er a di melechesokl er a bita er kid. Ngii a okor e kmal di lmuk e meruu a miich. Ng mengesureor aika el miich el omech er ngika el bechil se el lemei. E solae e ngii el dechedech a mocha er a Ngeraod me ng subedii a delal e mocha kudmokl a klokkel e merema er a blil a Reklai. Me a leme e te kie el mocha meketeket e solae e a Reklai a dula er ngii el ua se errang ng mo er ngii a ocheraol er a bai me ng soak a chobo msbedii a delam me bo lodengei. Me ng kongei e okor e di kiei. Me te kie el mo el mocha a belsechel a ocheraol er a bo el kukuk me tia el kebesengei me bocha lomesoil me te mocha obangel a kelir e a Reklai a okere er ngii el ua se errang ng ko er a ocheraol er a klukuk e ke mla mo subedii a delam. Me a ldu el ua ise e ng kmo

choi ng di medengei. Te omesoil el mo merek e a Reklai a ua se ng ocheraol er a klukuk me ak orreched el mo er a bai me ak mo mechiuaiu e kau me a bechim bo er tilecha el ulengang e mengedmokl er kemu e bo mechiuaiu e mengedmokl er kemu me a tutau e debo er a bai. Me ng mo mechiuaiu a Reklai e tir a mo er tia el ulangang me te mocha mechiuaiu el mo el mocha tutau. Ng di mle tutau e a Reklai a mengedmokl er ngii el mocha er a bai. E ngika el dechedech me a bechil a dengchokl el chadecheduch. Me te kie el mo el mo e solae e ng dula er a bechil el ua se ka bo multom er a rael e momes el ua se ng di kea chad el merael. Me a bechil a mo ultom e a lomes e ng kmal di kea rechad el merael. Me ng ua se ng di kea a rechad el merael. Me ng okor e ngmasech er a telia el kliu er tia el blai el souchii a ta er a kmal berikt el buuch e nguu el me me ng dmu er a bechil me ng mengib er ngii el omekeek er ngii er a til. Me ng chibngii tia el buuch el mekekii a til e mereko e ngii a mocha nguu tia el sualel el me e mo tmaut el olab a udoud el mengesuch aika el ulengebingel er a buuch me ng chusechar el mo el mo merek e mocha mengedmokl er ngii. E solae e a Reklai a dengchokl er a bai el mengiil er tir el ko er a kmal meudang. E a tirka el ko er a kmal meudang e mochu tmaut a ocheraol e ko er a di diak lebe ldum. Ngera a ko er a mengeteket er tir. E a lechub e ngii okor e mengedmokl er ngii el kudmeklii el kmal mo ungil e dmu er a bechil me ng mengtii a bdelul e solae e ngii a mocha oteklii tia el til el ngar er ngii tia el klemngel a buuch er a chelsel e ngoura el merael e te mo er a bai. Me a lorael el dum e te kmal di dilum e a Reklai a lomes er ngii e ng diak a klebokel el sechal el ua ngii me ng ko er a kmal klou a ngerel el melekoi er a bechil el ousulecholt er ngii. E a rrach ngika kid a chesmecheled el meremang. A lorael el mo er a bai e ng di milrael el mo e a Reklai a ua se, tie kid a kingeliu el ngar er tie me bemtuu el me dengchokl. Me te mocha tmuu el mo dengchokl e solae e a Reklai a mocha omechur a nglosech er a bai me ng mo mengimd er tia el klemengel a buuch el omechar er ngii el mo el mecherar. Me tia er a lebocha el merek a ocheraol e te mocha mengedmokl a kelel el kirir el mocha merader er ngii er a Ngeraod. E sola e ngika el ngelekel a chebedel a kesol er a Reklai a kmal merenga aika el tekingel se el lomes er ngii el klebokel el diak a ungil sechal el ua ingii me ng mocha ouuchel er a rengul el kmo kuldengei e krienges a tekingel a okdemelek. Tia ng ko el mle lusech el me er ngak me a delak e ngak a di mlo ikriii. E di kea a cheldechulel me ng ua se chere e ak ta er a mo melechelel a klebngel a ngelekel a Reklai me a bechil el mo merader er tir er a Ngeraod. Tia el bocha leketmeklterir e te mo blechobeb e merola el mo er a Ngeraod. Me te mocha er a Ngeraod. Me a lebo er a Ngeraod e tia el bad el lorael er a bebul a di berredeckel er a udoud. Me a lorola el mo e

te mo meche aika el kall e a luut er tir e a ta er tirk a redil er a Melekeok a mo terrob el mechetir a ta er a udoud el mla er aika el bad e nguu el loia er a saelengel e te merael el mo er a Melekeok. Tia el lorola e sola e ngika el bechil a ngelekel a Reklai a oderchii a oderechel el ua se mruut el mo otireklerir tirke el redil e mnguu se el udoud me te mocha otireklii e mocha nguu e lueta el merema er a Ngeraod e ngika el redil a kmal mlo merur. Me a lenguu el me er a Ngeraod e ng okere er tir el ua se, ko milekera e mo medengei el ua se a udoud a mla mengai. Ngika el buik a dula el ua se, aika el udoud a medal a bad me se el mnguu a medal e ng oleker el ua se tie medak el bla lenguu me a uchul e aki mo medengei. Me te merema er a Ngeraod me te kie e solae e ngii a dmu er a bechil el ua se becherei e rrang e ak lmuut el mo ngoderau er a Melekeok me ke ngar er a Melekeok el telkib le tia a bo le mekudem a omerael er a Melekeok el me er a Ngeraod e ng mo diak a bedul a Ngeraod. Me ng ngiluu el mo ngoderii er a Melekeok e ngii a ngar er a Ngeraod el telkib e lueta el merema er a Melekeok me ng nguu ngika el bechil e te mlo er a Ngeraod me te kiei. E ngika el redil a mocha olengeseu er a delal el meluchel a klebngel er a mesei e olengeseu er tir er a delengcheklir.

DILDAOB

A beluu a milrael a chisel. A chisel a milrael e ng di dimlak a medengelii el kmo ng ngar er ker tia el beluu. A rebetok el chad a milrusii a llechul me te mlo osiik er ngii el oeak a berrusir e dimlak a metik er ngii. A klemengetel a taem e a rechad er a Desbedall a omerrous er tia el beluu me ng mlo sorir el mo osiik er ngii. A rubekul a rokui el beluu er a Desbedall a mle blechoel el kldibel er a birir e orrenges er a rumerrous se el losaod er a llechul tia el beluu el di ngar er a berrusir. Se er a lekot el omuchel aika el kldibel e tirke el milechell a mla mo sebechir el bechiil. Me a Omart Ngiramerang a di mlo omakes e a demal a oba el mo er aika el kldibel. Ng kmal mle betok a lerirenges el berrous el milsaod er a chelsel tia el beluu. Ng ngar er ngii a mla merrous el ngar er a chelsel ngii el beluu. E ng di Omart a dirkak a ta el leberrusii.

E solae e tia er a lebocha er a rekil a mo bad er a bai a Omart e a demal a ulduruklii el mo meleboteb e le ng ulemdasu el kmo a ngelekel a bo loleboteb e ng locha mo sebechel el metik er tia el beluu el kmal milrael a chisel el di lomerrous er ngii a rebetok el chad. Me ng milrael el mo meleboteb er a beluu er a Ongos. Me ng mlo meketeket el dibus er a beluu er a Desbedall a Omart e a lemerema e a resechelil a di mla mo bechiil el rokui. Te betok er tir a mla mo oungalek el kmal mla mo meklou a rengelekir. Me ng di mle er a beluu er a Desbedall e mlo merek a orengodel er a ongos e a Omart me a demal a mlo er a chelebacheb el mlo er a ngesechel a uel. Te di mlo er a chelebacheb el rullii a kekere el delidui el lebo lebad er ngii e mengiil er a ngesechel a uel. Ongeua er a klebesei e a demal a di mle kekesus e ng mo bad, e le uel el luleliakl a klsel a dirkak lebe lengasech. Ng ulemdasu el orreched el mo bad me a tutau e ng sebechel el omkokl el me er a Belau. Tia er a lebo lebad a demal e a Omart a tilobed el me er a kederang e a buil a kmal mle ungil me ng di mle ua lecheldecheos. A omerolel me er a kederang a Omart e ng milsa ta er a kedeb el lius me ngmasech el nguu a omail el mla er ngii. E mlo er a kederang me ng reboreb e omes er a ngoaol e melim er tia el chemadech. Me ng dengchokl e ko er a omdasu a betok el tekoi e ko er a kilebetiek尔 er a ko er a ngor el dil el mla er a ullen el me el oker er ngii el kmo “ng diak a ungil?” Me a Omart a chisngekl e dula el kmo me e tia omail el dirk mui. Ngika el dil el milengedecheduch a milrael me e chilitii el mo dengchokl er a chelechol e mocha melim er tia el chemadech el obengkel a Omart. Tia el lengilmii tia el chemadech el mo merek e a Omart a uleker er ngii el kmo, “Ke songerenger? Me ngika el dil a ulenger er ngii el kmo, “choi, ak telkib el songerenger.” Me a Omart a dula er ngika el redil el

dmu el kmo “ke di ngar er tia el chelechol e choielak.” E sola e mekiis e merola el mo bedul tia el delidui. Tia el lebekiis e lorael e ngika el redil a mlekiis e dula er a Omart el kmo, “Ak obengkem.” Me te dokngei el merola el bedul tia el delidui. Ng dimlak lsa el mo kmeed e ngika el dil a mo dechor e a Omart a merola el mo er a delidui el mo melai a kall. A lleta el merema e ng olab a cheltuul el ngikel me a telkib el belsiich. Tia el lorola el bedul a kederang e a Omart a liluut el ngmasech er tia el kedeb el lius e lmuut el ngmai a teblo er a omail. Me a lebocha er a kederang e te mocha dengchokl e omengur e melim aika el omail. Me te omengur e solae e ngika el dil a di metetekeel me a Omart a mocha kmeed er ngii e melaiu er a ulkel me ng mocha sebechel el soiseb a kelel. E solae e a chiul ngika el dil a mle mekekemanget el me metengel el me er a btekel a cheritel e a bedengel a mle ua riamel e solae e a bedengel a berdel a ngerel ngika el redil a mle ua bedengel aike el bekard el keremal e a bedengel a mle ua bedengel a chelechol. E solae e te omengur el mo merek me a bocha el merek e a Omart a okere er ngii el kmo, “kau ke techang e mla er kelta el mei? Me ngika el dil a dula er ngii el kmo, becherei e ng diak a belkul el bo modengei e le chobo modengei e ke mo lmangel er a uriur. Ng di dilu el ua ise e mekiis el mocha merael el mo er a ungelel a chelechol me a Omart a di mle merched el mekiis el orkedii e dula er ngii el kmo ng soak el mo medengelkau e bechere uriur e ng kuk ta er a tekoi. Me te mocha dengchokl el teru er a chelechol e ngika el dil a ouchisa el kmo, “ngak a Dildaob. A ngklek a Dirrameiblosech.” E ngak a mla er a omerolek el mo er a Ngertoachel e rirenges a oach er a chelechol me ak mle touchakl e metik er kau. Me a Omart a kuk dimlak lomdasu e dula er ngika el dil el kmo ak obengkem. Me a Dirramei a dula er ngii el kmo, ng diak lsebechem el obengkek e le Ngertoachel a kmal cheroid me ngak a mo meoud el lmuut el mei. Me a Omart a okor e mocha oremelii ngii el redil e dula er ngii el kmo ak di obengkem. Me ngika el dil a dula er ngii el kmo mnguu tia el ngisek a kedarm el mo doklii er a medal a delidui er a uche er a dorael.

A klebekelel ngika el Dirramei a rirelii a Omart me ng dimlak loker e di mle merched el nguu tia el ngisel a kedarm el mo doklii er a medal a delidui. E a lleta el me er a kederang e a Dirramei a dula er ngii el kmo kede mo dibus el eloem el buil. Me a Omart a mocha rullii a teliakl e a Dirramei a olisech er a rael el mo er a Ngertoachel. A lorael me lengar er a belngel a merangd e a Dirramei a soudii a cheritel. A Omart a uluchiisb e ngiluu a medal er a Dirramei.

E solae e a Omart er a lleta el mesa a Dirramei e ng dengchokl er a risel a miich el mesongd er a bdelul. Me ng okere el kmo “tia ng ker?” A Dirramei a dula er ngii el kmo “tia

ikid a Ngertoachel". Me ng merola el mo ngmasech er a chelechol. Me a lebocha e a Dirramei a mocha ouchais er a cheldechedechal tia el beluu er a Ngertoachel. A Omart a dimlak lesa el soal el orringes e ng di riruul a medal el leko ng orringes. E a kmal mera el mla er a uldesuel a Omart a milengeseches a llechul tia el beluu er a btelul me a rengul er a Dirramei. A lorola el mo er a beluu e a Omart a ulemtab aike el rokui el ko er a mle ngodech er a rengul. E tia el beluu a kmal di mle ua beluu er a Desbedall a teletelel. A blai er ngii me ng kmal di mle ua teletelel a blai er a Desbedall me a blai er a Belau. Ng di mle eru el tekoi a mlo ngodech er a rengul. Ng mle rolel a klengar er tia el beluu me a omeruul el di mle osisiu ngii me aike el mla er a berrusir a rechad er a belual. A lorola el mocha er a blai e te di mlo el telkib e ulemengur e a Dirramei a nguu el mocha er a blai el kirel mo kie er ngii a Omart. A Omart a kmal mle mechas a rengul el merael er a chelsel tia el beluu er a Ngertoachel el omtab aike el rokui el tekoi er a chelsel. Me se el lebe lrei e ng kmal mesaul e ng di outekangel el mo er a blil a Dirramei el mo oldingel er ngii.

E solae e a ta er a lebo lomes er a Dirramei er a chelsel a ongeua er a buil e ng mocha mengedecheduch er ngii. Me te mle chadecheduch e merael el mo bedul a chelechol. A lebocha er a rriil e a Omart a ulrekedii a chimal a Dirramei e ngii a kmal di mle mereched el mo mekelekolt a bedengel a Dirramei e le ng ko el ta el sechal el mla rullii a ua ise el omeruul el mo er ngii. A Omart a dilu er ngii el dmu el kmo "ng kmal betik a renguk er kau." A Dirramei a ulenger er ngii el kmo "lak molekoi e ua ise." Ng di millekoi el ua ise e mesngii a chimal e mechib el merael el mo er a daob. A Omart a mle dechor el telkib e ulemes el mo er a Dirramei el ngar er a daob e luumeta el merael el me ngmasech. A Omart a ulemes er a Dirramei el di olecherechars er a daob me ng mocha melai a llel a lius el me mesuld er ngii.

Solae e tia el kebesengei e a Omart a mlo smecher a rengul me ng di ulemekellok el mo tutau. Ta el kesus el lolebedebek el kmo ngera ak mlo mekngit er ngii me ng mlo kesib a rengul a Dirramei. E solae e a bocha el kukuk e ng di mle tutau e a Omart a milrael el mo omes a sers. Me ng ngar er a delul a dekool e a Dirramei a meremang. Ng di mle el odersii a cheleuikl el chemachel el mo er a Omart. Me ng di liluk e nguu e mocha er a uchul a ongor me ng mo dengchokl. E a Dirramei a kmal di mlo olengeng e merola e mo dengchokl er a bita er ngii. E dula er ngii el kmo Omart kau a ta er a kot el soak el chad e ng di diak Isoak el mo sechelim. A Isoal a rengum el kmeed er a renguk e ng di ua ia chad el soal el merael el mo er a chiloil el ngar er a chelemoll. Ng kmal mo kmeed e ng di ulterkokl el mo meksoks er a daob.

Aika el mlo eru el buil el lulengiil a Omart a kmal mlo meringel er ngii. Le ng mlo bek el sils el omes er a betik er a rengul er a Dirramei. Ng mle ungil a rengul se el lesa e ng di mle medenge el kmo a ulebongel a kmedang. Tia er a lokngemeda aika el teliakl e ng mocha melekoi er a Dirramei el kmo ng mla mo kirek el mrael el mo er a Belau. A Dirramei a dilu er ngii el kmo a omerolem a bechere e ng mo ngiaos.

Tia el lebocha lekebesengei e a Omart a rirecherechii a mlai e osiik rolel er a eungel a btuch el lulemtab er a lengar er a Ngertoachel e chiliis e le ng mle chetil el mo kemanget el melemesumech er a Dirramei. Me a ltebeda me lengar er a ikrel a chelemoll e ng ngiluu a mlil el mridii er a chelemoll. E a bocha lodengelii a rengul e ng ngar er a bita er a belual el di telebtabt el ta el chad. A remle kldibel er ngii el chad a uleker er ngii el kmo “ ng ngar er ker a demam?”

Tia ikid e a Omart a mocha mengesols el kmo “a demak a ouchiuull er a ngisel a kedarm e ngak a melim a chemadech ngak me a Dildaob e mlo er a Ngertoachel el ngar er ngii a bebil er kemiui.

A berrous a derstedeb e klemerang. A llechul a beluu a mle tuab e mla tuobed e ng di Dildaob a medengelii a rael el mo er a Ngertoachel.” Tia ikid a kuk mlo ulebongel er tia el cheldecheduch.

DILMELLOMES

A Dimellomes a mle klamiokel el redil er a blai er a Omengiil el blai er a Ngeruikl. Tia el Ngeruikl a beluu er a Ngchesar el ngar er a ulebengelel er a mo bedul a Melekeok. Ngika el redil a di mlechell e ngar er a teletelel a mo kedung e ungil el ngalek a bo leklou el redil. Ng di mle kekere e kmal ultebechel a osengel e uldellomel a rengul. Ng mle meduch el melanges a mad e mle blechoel el olengeseu er a remechuodel. A demal me a delal a Dilmellomes a kmal mle ungil a rengir er a lebo er ngii a ngelekir, e kmal ngeltengat el mlo oungalek er a ungil el ngalek. A omerollel a Dilmellomes el mo klou el redil e ng kmal mlo ungil el mosisechakl er a rokui el telengtengil a osisechakl el mo er a rengalek el redil. Ng mle blak a rengul me ng siluub a ulekerreuil a delengchokl me a mesei, me a lmut el bebil er a ngerachel el kirel a ngalek el redil el mo medengei.

A Dilmellomes a millemolem el ungil a omerellel el mo klou el redil el mocha sebechel el milil e teloi er a recheldebechel. Se el taem e a remengol er a Ngeruikl a mo er a Ngiwal, me a Dilmellomes a ta er a ulebasech a ngklel el mo obengterir a remengelngel a Ngeruikl el mo er a Ngiwal. A kot el sils er tir er a Ngiwal, e tirka el mechas er a Ngeruikl a ulerreched el mengedmokl er tir el mo er tia el omengerek e le se el taem e a omengol a ta er a mle klou el osisebellel a udoud el mo er a remechas me a beluu.

A rebek el mengol el mlo er a Ngiwal a mle selbechakl er a Uong el merreder me a lemetemall a ngera er a beluu e ng diak lobals me a diak lemechelebed. A lsekum me te metemall me a lechub e te mechelebed e ng obals a Uong. Tirka el mengol er a Ngeruikl a mle medengelii tia el llechul a beluu er a Ngiwal me te kmal mle metetoech a mederir e ko er a mle ulekeangel a blekerdelir. Te omibais el mengerodech er a beluu e olengemengamech er a rebikel a Ngiwal, e a le kebesengei e te medmedium a obliil el olengit a kall. A remechas er aika el obliil er a Ngiwal a dirrek el mle medengelii oua itia el tekoi me te di milengisngull e mengeremrum er tirka el mengol e diak lsebechir elmekera er tir.

Klemengetel a sils el lengar er a Ngiwal tirka el mengol e te mlo chemur a resongir. Me ng bek el tutau el lorrechereched el mengedmokl er tir e merael tir me a resongir el mo er a kederang me a remo er a ked el osiik a ungil el mo ngaos. Te ua ise el omais a le mellomes e a le kebesengei e tirka el rubak er tir a mo meradel er tir er a bai. A Dilmellomes a kuk mle ngodech

er a le dilak el mengol er a Ngeruikl. Se el lorrechereched tirka el mengol el mengedmokl er tir se el tutau, e te di mridii a chelsel a bai e mechere me ng ulechetekl e tir a tuobed el merael. Me a Dilmellomes a mlo bek el tutau el longedmokl er a chelsel a bai e tuobed el me er rrikl me ng dengchokl er a tkul a odesongel. Ng dengchokl e melachel er a remechas el me engelakl el mo er a mesei. Ng mle bek el sils el leua ise, me a ta el tutau e a ta el mechas el mle blechoel el mo er a mesei a lultucheklii e oker er ngii el kmo, “Chedil, ke mo er ker?” Me a mechas ulenger er ngii el kmo, “Ak mo er a mesei. E rungalek, ngera me a resechelim a mla merael el mo milil e kau a di kau el ta el dengchokl er tiang, ke smecher?” Me a Dilmellomes a melmesim er a bdelul e kmo, “ng diak ksecher. Ng soak el mo oldingel a mesei. Chedil, ng sebechek el obengkem el mo er a mesei?” Me ngika el mechas a kilenge me ng obengkel el mo er a mesei.

A Dilmellomes a ulerreched el mo tmuu er a bai me ng ngmai a klekedellel e te doknge el merael. Te di milrael el telkib e ngika el mechas a dmu er a Dilmellomes el kmo, “Rungalek molengull e mchuskau er a tik e mchielak e bo ktouch a remekek me ak me e dorael.” Me a Dilmellomes a dilu el kmo, “Chedil, bai motebengau e bo ktouch a remekem.” Ng di millekoi e mekiis el merael el mo me ng tmouch a teblo el ulechull el ramek, el chimo a mo remekel me a chimo a mo remekel ngika el mechas. Me ng odak ngii el ramek e tmuchel e te doknge el mo er a mesei.

Te mlo er a mesei e a Dilmellomes a oker er a mechas el kmo, “Chedil, ngar er ker a meklechem el bo mosalo er ngii?” Me a mechas a kmo, “Se kid e rungalek e bechere e ng di sebechek. E bai me mnguu tia el cheluchuk el mo er a omoachel me mosilek er a bdelum e mchielak e bo krekir me ak me e dorolung. Me a Dilmellomes a ulenger el kmo, “Ng diak e chedil, bai motebengau e momes er ngak e bo krellii.” Ng di millekoi el mekiis el mo me ng mo tmaut. Ng mlo me ng dolemii e dokedekii el olab aika el ramek el lullouch, e ng ngmasech el ngomlii a tkul a cheliuis el meliuekl. Me ngika el mechas a di dilengchokl e omes er ngii e kmal mlo ungil a rengul el kmo, ng kmal ngeltengat er a Dimellomes el mla rullii a meklechel. A Dilmellomes a mlo merek e okerir a mechas el mo er a diong me te melecholb e mo merek e ng kmo, “Chedil, bo er a uche e ngak techelii a klebngem el mo ngoderau.” Te mle er a blil a mechas e ng oker er ngii el kmo, “Chedil, ke mo meliokl er a chelechang?” Me a mechas a kmo, “Choi, e bechere e ng mla mo sebechek , e kau morechedau el mo er a bai e a resechelim a mengiil er kau.” E ng di a Dilmellomes a di millemolem el mo el nguu olisall el metir e odebodeb a klab, e mechelechebii e chumlui a ngau er ngii. Ng di chilemlui a ngau er a ngeliokl e

dula er a mechas me ng omes er ngii e ngii lorael el mo er a bai. Me ngika el mechas a dilu el kmo, “Msall e rungalek.” E mekiis el mo tmuu er a blai el mlo el otengelii a oruklel a bechil. (A rubak er a irechar a mle ileakl a oruklir el di ngellitel a ongraol a ngar er a chelsel.) Ng mlo el med a ongraol el smuk er a ta er a oruikl e me el ngmai a uasech me a laok el odak er ngii me a sese el ilaol. Ng tuobed el mo er a orrangel er a iikr el imuchet dekool el odak e msa a Dilmellomes me ng kelel el mo reme er a bai.

A Dilmellomes er a lebo er a bai e a resechelil a mla mong, el oketa di songerenger e di dechudech. A chudel me a llel a kerrekar a berkereked er tir e le ng mla ta el sils el longibes er a beluu el mengad er tir er a ked me a kederang el obengterir a resechelirir el sechal. Te mle ua ise el mechelaod el omibais el milil e a bo lrei a le kebesengei e ng diak a kelir. E a remechesil a beluu er a Ngiwal a di kesib a rengrir er tir el di oldidiu er a beluu e omibais el olengemengamech er a rebechir. Me tirka el mengol se el lebo lolengit a kall er a bek el obliil er a Ngiwal e a remechas a mengreos a ungil el kall e olab a bekngiuk el ongraol me a mekngit el kall el ometech er tir. E tir el mengol a mle medengelii a uchul e te ua ise er tir, me te di ochecherechur e ngmai a kelir e merael. A Dilmellomes se el leme el oba oruklel el mui er a ungil el kall me a dekool e tirka el sechelil a kmal mo mechas a rengrir. Me te oker er ngii el kmo, “Ke ngilai aika el kall er ker? Ka momes aikang. Aika a mera el di ungil el rokui. Ke ngilai er ker?” Me a Dilmellomes a ko er a di mengemkim er a cheril e omekedo er tir el me omengur. A Dilmellomes a millemolem el olturk e obengterir a rebek el mechas er a Ngermechau el mo er a mesei, el mo me ng odak a urerir el remuul el rokui. Ng mle bek el tutau el se el lorael a resechelil el mo milil e ng kudmeklii a chelsel a bai e tuobed el me er a tkul a odesongel me ng dengchokl e melachel er a remechas el melengelakl el mo er a mesei el olturk a obengterir. A mlo uriul el mechas el mla er a omerollel el mo er a mesei e ng tmak ullel a Diltkebui el merreder er a cheldebechellir a remechas er a Ngermechau. A ungil el chisel a Dilmellomes a milrael er a beluu me a Diltkebui a dirrek el mlo medenge el kuk ngodech a blekerdelel er a rebek el sechelil el ledilak el mei.

A remechesil a Ngermechau a di melechedech er ngii el Dilmellomes e le te omes er a resechelil el di milil e mediderurt er a beluu e ngii a di mle ta el ngodech er tir. Ng diak lobengterir a resechelil el mo milil e bai blechoel el mededengchokl er a tkul a odesongel er a bai e melachel er a remechas el mo er mesei. Me tirka el mechesil a Ngermechau a mlo kldibel e kakerker el kmo, ngera a ungil el debo dekemeklii el mo er a Dilmellomes el kmal mla ngosuterir

er a betok el meklou el urerir. E a temel a omerollir tirka el mechas er a Ngeruikl el mo reme a di olekedang. A Diltkebui a mlo olengit er a Dilmellomes me di le kie er a uriul er a lorael a cheldebechel e le ng ngar er ngii a dirk ultab el tekingir el lebo losaod.

A rebek el mechesil a Ngeruikl a milrael er se el belsachel el omerollir el sils. E a Dilmellomes a mlo er a eou el kie er a Bairemechau. Ng mle bek el tutau el lekedmeklii e tuobed el me er a odesongel er a bai me ng dengchokl, e a remechesil a Ngermechau a mo oldingel er ngii e omsa kelel me aike el rokui el ousbech. Ng mlo el mo kmeed a temir a remechesil a Ngermechau el mo meradel er a Dilmellomes er a Ngeruikl. Me te liluut el mo mekideb er a uche er a omerael e a Diltkebui a kmo, “A Dilmellomes a kmal mla kudmokl a betok el ungil el me er kid a remechesil a Ngermechau. Ng mla kudmokl mekleched e dualem a dellomel er ngii, el otirakl el ngiokl a keled. Me ng di delongeled el teruich el mechesil a Ngermechau e ak ochais el kmo, kede mo keboket a udoud. Me ak mo meketii a Klsuk (kot el mle klou a orkemel er aike el udoud el omdasu a mo melechang) el mo er a btil a olbedabel, e a derta er kemu a mo mekekii er a mo er a Mengsang el udoud(mekekerei el orkemel a udoud). E kemu el rokui el mechas a mo oungerachel el mo remuul a kall e okeed aike el rokui el lebo el ousbech a Dilmellomes er a omerael e kede mo ngoderii er a Ngeruikl. Me ng mlo ua ise me a bocha el belsechel a omerael e a rokui el mlai er a Ngermechau a tilobed el mo meradel er a Dilmellomes er a Ngeruikl. Te mo me te bad tir me a Dilmellomes el ta el kesus e mocha merael el mo reme er a Ngiwal.

Cheliteklev a Dilmellomes

Kede kol bedenge re Mellomes er a uchul a bars Mechau
 Me a rengum a betik er ngak me a renguk a betik er kau
 Menge debo metengel a bochel a Tmenganged e iiang.

Ng tech a ngar a Bairemechau e a Mellomes a merekdang
 El di omengbings a bdelul el di merar er ngii er a ngau
 Ng diak lekodall iiang.

Ng diak lekodall e ngii a mlai le bo ltang
 A rechad bo ltak a beluu a kuldiu el me le bo ltak a Mellomes iiang.

Doltirakl a uncial a tekingem e re Mellong.
 Keroi me di dengai ngii el me mekekii a diangel
 Lak le keed a riid iiang.

Note: [Tia el cheldecheduch a ollachitnger el mo er a remekekere el redil. Ng kmal kirir el orrenges er a redemerir me a rederrir, e mo blak a rengrir el ngmai e oreked aike el rokui el suobel me a llach el mo er a rengalek el redil. Ng kmal kirir el mo meduch el ngar er a mesei e ungil el suub a ulekerreuil me a omengedmeklel a blai me a delengchokl. Te mo blechoel el olengesenges e melengmes er a rechad e mo kerekikl er a remechuodel. A lolemolem el meruul el ua ise e ng mo beat a chebechiil e mo mimokl a osisebel a udoud me a klungiaol el mo er tir.]

DIONG ER A IKEAM

A irechar e ng mla er ngii a ta el mechas el kiliei er a Ikeam. Tia el Ikeam a ngklel a chutem er a beluu er a Ongedechuul. Tia el Ongedechuul a ngklel a beluu er a Ngardmau er a Irechar.

Ngika el mechas a mle mesobil e mle kebai me a dimlak a rredellel el ngalek. Tia er a lebocha el mechitechut e ng kmal mlo chebuul.

A ta er a klebesei er a lsal el kmal mechitecheto ngika el mechas e ng mlo er ngii a kemtimt. Tia el kemtimt a kmal mle kemanget a klsel. A bek el olsechall er a ralm er a beluu er a Ongedechuul a kmal di mlo medidirt.

A rechad er a beluu er a Ngardmau a mlo osiik a kuk ngodech el olsechall er a ralm. A lebo er a bek el omoachel e ng kmal el di medirt. Te mlo metik er a diong er a Ngardok el ouralm, me a rengelekel a Ngardmau a mocha omais a ltutau el mo menetakl a ralm er ngii. Ng di tirke el ulungalek a mle sebechir el mo er ngii a imelir er ralm.

Ngika el mechas a kmal mle chebuul e le ng dimlak a ngelekel el mo chotakl a imelel el ralm. Bek el tutau lebo lolengelakel a rengelekel a Ngardmau el mo menetakl a ralm, e ngika el mechas a mo ultom er a tuangel e oureng el kmo, chuleku me te nguu a kualuk el mo ngmai a imelek el ralm. A lebocha el kukuk er a tutau e te lueta el merema engelakl. Ngika el mechas a mocha ultom er a tuangel e melekinga er ngika el kot el medal a omerael el ngalek. “Rungalek me me mnguu a kualuk me a chome e mngai a imelek el ralm.” Ngika el ngalek a dilu, “Mechas mongiil er a ngar er a uriul.” A lemerema ngika el ongeru el ngalek, e ngika el mechas a liluut el dmung, “Rungalek me me mnguu a kualuk el mo ngmai a imelek el ralm.” Ngika el ongeru el ngalek a dirrek el dilung, “Mechas mongiil er a ngar er a uriul.” Tirka el ngalek a di mellekoi er a di osisiu el tekoi el mo er ngika el mechas, e dimlak a dita er tir el ngiluu a kualul el mo ngmai a imelel el ralm.

Ngika el mechas a kmal mlo mechitechut er a ched el reng. A ta el tutau e ng mekisa e melekesakou el mo tuobed er a rebai. Ng tilobed el mo me ng dengchokl er a bebul a chimo el bad. A lomes er a chimo el tengadidik e ng reboreb er a koranges e melekoi e suebek el mo er a delul chudel e lmuut el suebek el me reboreb er a koranges e merrirs a osebekel e melekoi el melekoi.

Ngika el tengadidik a kmal mlo meketeket el di omelekl er a di osisiu el omeruul. Ngika el mechas a ko er a mlo rrau a rengul. Ng millekoi kesuk, “Ngera me ngika el tengadidik a lsebek el mo tmuu er a delul a chudel e a lebe ltobed e ng ko er a dekimes a bedengel?”

Ng dilengchokl e mo el mo e omdasua, ka msall e kbo e kisa se el delul a chudel e ng di bita el ngar er ngii a ralm. Ng mocha melekesako el mo er tia el delul a chudel. A lebocha lomiis aika el chudel e ng ko er a dekmekimes a llel. Tia er a leues a llel a chudel el dekimes e ng ko er a kmal mlo ngodech er a rengul. Ng ulemdasu, “A beluu er a Ngardmau a kmal chebuul er a ralm me a diak a ngodech el olsechall er a ralm, ng di ta el Ngardok, e mekera e mo dekimes a osebekel ngika el tengadidik.”

Tia ikid e ngika el mechas a mlo omiis a chudel. E a lomiis e ng metik er a ralm. Ng mocha dmedesii e mo terrob el melim. Tia er a lolme ralm e ng mlo dobodeb a rengul me a bedengel a ko er a mlo mesiich. A uriul er tia e ng lueta el mo er a blil me ng nguu a kualul me a klekedellel er a omelecholb. E lueta el me er tia el ralm me ng mocha sochesebii a imelel el ralm e melecholb.

A bocha el kukuk, e tirka el ngelekel a Ngardmau a kuk mocha mengetakl a ralm er a Ngardok. A uche er a lebe lengelakl er a blil ngika el mechas e te ulemdasu el kmo ngika el mechas a kuk lmuut el mo olengit a ngeiul a imelel el ralm. Ng di a lemerema lengelakel er a blil e ng dimlak lebe lultom er a tuangel me a ka lulengitengtik a ulitech. Tirka el ngalek a mlo er a Ngardok me te ngilai a ralm e liluut. A lleta el merema engelakl er a blil ngika el mechas, e ng dirrek el ka leko er a mle ultom er a tuangel.

Tia ikid e a ngelekel a Beouch el merredel er a beluu er a Ngardmau a mlo rrau a rengul. A lebocha er a blil e ng ouchisa er a demal er tia el teletelel ngika el mechas el ko er a ngodech. Ngika el ngelekel a Beouch a dirrek el ulemdasu el kmo ngika el mechas er a Ikeam a di bita el mla mad.

A bocha lodenge a Beouch e ng dula er a ngika el ngelekel, “Ka bo me mesang.” Ngika el ngalek e milrael el mo er a Ikeam. A lebo er a blil ngika el mechas el sibeklii a ulitech e ng omes er ngii el dengchokl er a medal a ngau el meseb, e a chiul a blekatel me a bedengel a chedidiich. Tia er a lesa ngika el mechas e ng kmal el mlo mechas a rengul me ng rirurt el mo er a blil.

Ng uluuchais er a demal er a teletelel ngika el mechas. A Beouch me ng dirrek el ko er a kmal mlo rrau a rengul, me ng tilobed el mo er a blil ngika el mechas. Ng mlo me te

chadecheduch me a Beouch a dilu er ngii, “Dirraikeam a beluu er a Ngardmau a metku er a ralm. A lengar er ngii a chobla betik er ngii el osechall er a ralm e mochotii.” A Dirraikeam a ulurrenges a lullekoi a Beouch e ng di dimlak lsoal el olecholt er tia el ralm. A Beouch a liluut el lolengit er a Dirraikeam me tia ikid e ng kilnge e ulochotii tia el ralm.

Tia er a lochotii tia el ralm, e a Beouch a liluut el mo er a blil me ng nguu a debusech e melebusech. A beluu er a rengesii tia el debsechel a Beouch me te di mle mereched el me mekideb. A Beouch a uluchais er tir er tia el ralm el ngar er a Ikeam. A rebek el chad a kmal mlo dmeu a rengrir.

Tia ikid e a beluu a mlo kldibel er a Ikeam e a Beouch a mo a omades a nglat el mo er a Dirraikeam. Ng dilu, “Aike el ultab el idungel me aike el meklou el kukau a mo tenget el me er a blai er a Ikeam, ng mo nglat er a rebeluu el mo er a Dirraikeam.”

A bocha lemerek a omelat el nglat e a Beouch a dula, “kede mo kairirei e a deme e kede chemur a bad.” A lleta el merma a rebeluu e te di chilur a bad e a Beouch a dula er tir me te mlo chodesii a tkul tia el ralm. A bocha lemerek el mengades e a Dirraikeam a dula er a Beouch me a rechad er a Ngardmau,” tia el ralm a mo Ikeam el diong a ngklel.” Me te kilengei. Tia el diong a dirk ngar er ngii me a ngklel a dirk Ikeam el diong.

DIRRABAKERUS

A Milad er a lemerous a rengelekel me a klobak lebocha er ngii me lemetouch a dui e ng milrael el mo er a Ngerdobotar. Ng mlo bechil a Tkedelukl er a blai er a Bakerus. Me ng mlo Dirrabakerus. Ngika el mechas a mlo er ngii a rengelekel el Techatei me a Kautechang.

A Orachel me a Telenguulau a ngar er a Ngerames e ngii a mocha er ngii a omerael er a Ngerames me a Orachel a dmu er a Telenguulau el kmo, “Kid e rrang a mo oltoir er tia el omerael.” Me te ngmasech er a Mesikd e merael el mo er a eanged. A lebo e te mlo oterkii a mlai e a Orachel a dmu er a Telenguulau el kmo, “a rrach, momesiul er a mlid el merael e ngak a mo kmerd el mo oldingel er a Uchelianged.” Me ng kmerd e a Telenguulau a merael.

A Orachel a mlo er a blil a Uchelianged me a lebo e a Uchelianged oker er ngii el kmo, “Ke mle mekerang?” A Orachel a dula er ngii el kmo, “Ak mle milil e oldingel er kau.” Ngika el Orachel a ngelekel a chelid me ng sebechel el merael a blirir a rechelid.

A Uchelianged a merael e dmu er a Orachel el kmo, “Ak merolu e kau a diak bomkie er a kingellek me a diak bo momkais er se el olengobel el kim.”

Tia er a lorael a Uchelianged e a Orachel okor e mo kie er tia el kingellel a Uchelianged el bad e mo mkisii tia el olengobel el kim. A bo lebkisii tia el olengobel el kim e ng omes er a medal a Ngerkeai el mo lmuut er a medal a Ngerdobotar. A lomes e a redil a di dechor er a daob e mengort a reng el mengoit er a daob e di lmangel. Tirka a lmangel er a Orachel el mla mo dibus.

A lleta a Uchelianged el me el mla er a cheldecheduch er a ruchel e lomes er a Orachel e ng di bekerkard a medal me ng okere er ngii el kmo, “Ng ngera chised me ng di bekerkard a medam?” A Orachel a kmo, “ng diak, ak ulelsiu er a ngau.” A lechub e ngika a mekngit a rengul er tirka el redil el luseterir er tia el olengobel el kim.

A Uchelianged a mle medenge me ng dula el kmo, “Ng diak, kau a kmal dengerenger. Me mnguu tia el chimo el meradel me lokuim e morael el mo metengel er a Ngeaur e morael el mong.”

A Orachel a ngoura tia el meradel e mo metengel er a Ngeaur e mo merael aike el chelebacheb el mo bedul a Oreor el omurs a urresel er aike el merach er a chelebacheb.

Chelecha e a urresel Orachel a sebeched el mes er aike el merach er a chelebacheb er a Ulong me a Ngeruktabel el mo bedul Oreor me a Ongelungel.

A Orachel a merael me a lengar er a medal a Imeliik e ng kmal obereda e le risois a mla mail a rsel a ochil e merael el mereku er a bkul a ochil. Tia el risois a uchul me ng di merael el omail er a ochil a orachel a dellebeklel a Orachel e le ng mlo dengchokl er a kingellel a Uchelianged.

A Orachel a merael me a lengar a medal Ngerdobotar e ng kmal mechede a rengul e kmal obereda a ochil e le tia el risois a mla merael el me er a bab.

A Tkdedelukl me a rengelekel er a Techatiei me a Kautechang a tilobed er a Ngerdobotar e meius el mo er a che e a Orachel a mesterir me ng oleker er tir. A lebo e ng okere er a Tkdedelukl el kmo, “E rrang, a lengar er ngii a imelir a rengelekem el ralm e ng diak leme a sese me kngim?”

Me a Tkdedelukl a ngilai a ralm el msa me ng melim. A Orachel a millim a ralm el mo merek a dula er a Tkdedelukl el kmo, “Mnguu tia el meradel el mo dolemii e alii a ldubech e bo lourodech e ng di chimo a redechel e ngar er ngii a klalo el ngar er a chelsel me kenguu e ngak a kmal obereda me ng di kea lsebechek el merael.”

A Orachel a ngiluu tia el meradel el msa Tkdedelukl e ngii a outekagel el merael el mo er a chimo elkekere el beluu el ngar er a medal a Mechebechubel e obult el mo risois me chelecha e ng risois el bereked er se el bkul a chelebacheb. A ngklel ta elkekere el iungs a Orachel.

A Tkdedeluk me a rengelekel a ngiluu tia el meradel el mo er a beluu er a Ngedobotar me te dolemii er a bita er a blai. Tia el meradel a kmal mle mereched el mo klou e mo ourodech el di mle chimo a redechel. A redechel a mlo el mo marek el mla mo kirel el ruebet. E a Tkdedelukl a kuk mocha kirel el mo er a che ngii me a rengelekel me ng dmu er a bechil el kmo, “Aki mo er a che e kau a omes er se el meradel me a lsekum ng ruebet e ke mo nguu el me er a blai me ke kudmeklii me ak mei.”

A Kuii el Dirrengulbai er a Imeliik a ngar er a Ngerkeai e merael ngii me a reteru el ngelekel el mo er a Ngerdobotar el mo omes er a Tkdedelukl el mengeriil er a chelbakl el mo debechelel a Tkdedelukl. Ng merael ngii me tirka el ngelekel el telechull a eru el oruikl el mo el mo ooit er a blai.

Tia diak leua klemengetel a omerael me a ringel el sils me a Dirrengulbai a mechede a rengul e kesbengang me a telil a di mochu e mei. Te di uleiit e ngii a oker er a Dirrabakerus el

kmo, “E rungalek, ng diak a imeliu el ralm e me sesei me kngim?” Me a Dirrabakerus a mo ngma a ralm el msang. A Dirrengulbai a ngmai aika el ralm el me nguim a sesei e kmo, “uleku ta el meradel me ak nguu el kurekrur tia el ralm e kngilmii.”

A ldu ngika el mechas el ua ise, e a Dirrabakerus a kmo, “E a tie kid a meradel,” e mo nguu tia el meradel el msa Dirrengulbai.

A Dirrengulbai a ngoura tia el meradel el me me ng nguu a rудel el melecholech er ngii el meliuekl. Ng melecholech el mo subechii er a medecherecher el ko er a bad el ngar er a chelsel ngii el meradel. Me ng mo mekengii e a lebekengii e tia a chelebucheb el ngar er a chelsel me ng lmuut el mtekii e nguu el sukur er a til e kmo, “A leme a ngelekek er a Tkadelukl ke dmu er ngii el ua se a delam a mle mengeriil er a chelbakl e mengkekea me ng mla lmuut el remiid.” Ng dmu e mocha melemesumech er a Dirrabakerus e lmuut el remiid el mo er a Ngerkeai.

A ngklel tia el chelebucheb el mla er a chelsel a meradel a Meraelked e le ng uleba ngika el mechas el Dirrengulbai el merael er a ked. E tia ikid el chelebucheb a ngar er ngii a lluches el meliuekl er ngii el ultil se el rудel el luleba Dirrengulbai el melobech er a meradel.

Ng oba tia el chelebucheb a Dirrengulbai e a ngelekel el sechal a mo bechiil er a blai er a Ingas er a Ngerubesang me ngii el mechas a nguu ngii el Meraelked el mo rukemii er a Ngerbiduul el dirrek el chelebebucheb er a Rengulbai e nguu el mo rullii a chelsengul a ngelekel.

A Tkadelukl a merema ngii me a rengelekel el mla er a che e a leme e ng omes er a meradel el dibus er a chetebtel e le ng mla ruebet, me ng oker er a Dirrabakerus el kmo, “E rrang ng ngar er ker a meradel?” Me a Dirrabakerus a dula el kmo, “A rrach, a delam er a Dirrengulbai a mle e mlo soal el melim a meradel me ak nguu el msang.”

A Tkadelukl a kmal mlo kesib a rengul me ng kmo, “Kau e rrang a kmal dengerenger. Ak ko er a dilu el kmo ke kudmeklii a meradel e choielak.” Ng dmu el ua ise e mocha melib er a kodellel a Dirrabakerus el oba el mo er a chelmoll el mo omechakl er ngii.

A Dirrabakerus a mlo medengei me ng olsiu a ngau e di lmangel me a Obechad el ingukl a dula el kmo, “Ng ngera me ke lmangel?” A ingukl er a Belau a ngar er ngii a kldei. Se el dechau a ngau e se el ngar er a kadikm a Adebetei me se el ngar er a rebai a Ersoi me se el ngar er a katur a Obechad el ingukl.

A Dirrabakerus a dula er a Obechad el ingukl el kmo, “A Tkadelukl a mo omechakl er ngak er a klukuk er a chelmoll.”

Tia ikid e a Obechad a dula er ngii el kmo, “chere e lak mlangel e ke mo nguu a medal a ulekngall el me me ke locha chab er ngii e ak rullii. E kau a mo nguu a tiul se el cheremall me kobang me se el lebo lechitau e ke ombibechakl el mo er a ikrel a Ngerechur el mo cheroid e mriid aika el chab e nguu ise el cheremall el nguu el diluir e nguu tia el medal a ulekngall el chitutii er ngii me ng mo beluu e ke kie er ngii.”

A bo lekukuk e a Tkadelukl a dula er a bechil er a Dirrabakerus el kmo, “mkedmeklau e kede mo er a che er a chelmoll.” Tia er a ldu el ua ise a Tkadelukl e ngii el mechas a medenge me ng ngmai aika el lullekoi a Obechad el klekedall e te merael.

Te mlo er a chelmoll me a leko te ngar er a che e ko er a lebo er ngii a chetau e a Tkadelukl me a rengelekel a choitii a Dirrabakerus er a daob e meius el me er a beluu e ngii obechakl.

A Dirrabakerus a ombibechakl el mo er a ikrel a Ngerechur el mo el mo cheroid e mo omriid aika el chab el mo el mo e nguu tia el tiul cheremall el diluir e nguu tia el medal a ulekngall el chitutii er ngii me ng mo el mocha beluu e ng kie er ngii. Tia el beluu a Ngcheangel er a chelecha me se el cheremall a ngar er a Ngcheangel er a chelecha el chedaol.

A Tkadelukl a kilie el mo meketeket e lueta el mo er a che ngii me a rengelekel er a Techatiei me a Kautechang. Te ngar er a che e ngii a mo meringel a daob e chull e meses a eolt me te obechakl el ongalek el mo motechakl er a Ngcheangel er a klebesei. Te ngar er a chelechol e a Tkadelukl a omes er a ngau me ng dmu er a Techatiei el kmo, “Bo er se el blai me mongtir a ta er a ngau el me me doseb.”

A Techatiei a merael el mo er a blai me a lebo e ng merereek er a ikr el mo er a tuangel me a Dirrabakerus a kmo, “Alii, ng tech a tiei”? A Techatiei a kmo, “Uang.” Me a Dirrabakerus a dula el kmo “Be mtuu e rungalek.” Me a bo ltuu e ngika el delal a mo ngmai a cheluch el me me ng choididichii ngii el Techatiei e ng mo er a medal a ngau me ng meseb.

A Tkadelukl a mengiil e kmal meketeketa me ng dula er a Kautechang el kmo, “Moutekangel e rungalek el mo mesa Techatiei el kmo ng mekera e mnguu a ta er a ngau el me me doseb e kid a medku er a kerrasem.”

A Kautechang a merola el mo er a blai. Ng mo me ng merereek er a rebai me a Dirrabakerus a kmo, “Alii, kau techang?” Me a Kautechang a kmo, “Uang.” A Dirrabakerus a dula el kmo, “bemtuu e rungalek.” Me a Kautechang a mocha tmuu me a delal a nguu el me me ng choididichii er a cheluch e ng mo er a bita er a ngau me ng meseb.

A Tkedelukl a di kilie e di diak leme tirka el ngelekel me ng merola el mo er a blai. A lebo e ng mo el mo ultom er a tuangel me a Dirrabakerus a kmo, “A rrach, mcheremau e Tkadelong.” Me a Tkedelukl a di ulebult el mo bad. Chelecha e ng di chimo el risois el ngar er a Ngcheangel.

EREALLBTIL ME A RRUSBEDENGEL

(MELUADELCHUR)

Tia cheldecheduch el mo er a beluu er a Beliliou er a Ngesias er a rechuodel. Tia el Ngesias el beluu a ngar er ngii a klou el ii er ngii. Tia el ii a Irirs a ngklel el lekiei er ngii a Meluadelchur el chelid el menga er a rechad er a bek el klebesei. Me tia el beluu er a lsa el kesengei a rechad er ngii e te ulsiik a mo mekodir a Meluadelchur e di diak lsebechir me te mocha osiik a chemiis el mo cheroid el olibngokl a bedengir. Me te mocha mengedmokl er tir me a mlirir e mocha oldiderek el chemiis. E ngar er ngii a ta el mechas el mesobil el mechas er a Irirs el kebliil a mocha kudmokl a klokkel e mocha er a taoch er a Ngebungel el mo melidai a mlai el chemiis, e a loleko a mlai el kmo, “kulikai,” e te di okemetii e meleko a kmo, “Mongiil er a ngar er uriur.” Me ng di mle ua ise me a lekea mlai e ng kmal mekngite rengul me ng lueta el me remei me ng di omerebart er ngii e diak loliokl a kelel. Me ng di olsengerenger e kie e mocha dioll er a ketengel e mechell el sechal me ng mengeklii el Rrusbedengel. E kie el mo meketeket e lueta el mo dioll e mechell el sechal me ng mengklii el Ereallbt. E tia el rrusbedengel el tekoi se el lengasech a rengul ngika el chad me bo loutelloch e ng ko er a orus a bsechel a bedengel. Me a ochellel el Erallbt a ko er a kubiang el ebakl a bereked er a bt il el lengasech a rengul e ng mo medecherecher el ua ebakl. Me te kie tir me a derrir el mlo meketeket.

Tirka el chiliis a chiliis el me er a Oreor er a Miungs el di ullab a dirir el lulluchel me, me te medesii a klobak e kie el di olab a deruchellir er a lengar a belurir, e kie el ungil beserir. E ngii el mechas me a rengelekel el teru a kie e a ta er a klebesei e a rengelekel a okere er a derrir el kmo, “Chedei, tia el beluu ng di kid a chad er ngii?” Me a derrir a kmo, “Rengelekei, ng diak lungil tekoi aki mla er ngii. A uchul me ng di diak donga ngeliokl el kall a medakt er a Meluadelchur e lemei.” Me a rengelekel a kmo, “Bo leklou a rengum e aki mo mekodir.”

Me a ta er a klebesei e te mocha er a taoch er a Ngebungel me te ngar er a did el blechobech el teru el odam el omikel a uloi e mengitakl e a Meluadelchur a mochang. E a Rrusbedengel a klou me ng kmal mlo dmeu a rengul e kmo, “Ak kolemi er a chelechang. Me ng mlo omdechem er a Rrusbedengel e ngii a ngosecha rengul me ng mocha tekokou me ng di mlo diak lemedelodel a bedengel, e ngii a dmu er a Ereallbt el kmo “Murrerii.” Me ng mo mengibechib el morekedii el tuketur el mekedusii. E te ngu a delebekul e loia er a omechidel

e chudechedechar el kmo, “Chobo motechakl er tirke el mla chad er tia el beluu e lomasech a rokui el delebekul a rokui el charm me a ngikel, e ng diak mo bkuuk. E a ldu el kmo ke delebekul a Meluadelchur e ke obkuuk el di momekerekerd er tia el orsachel. “Me ng mlo ua ise me tia el omechidel el oltak er tia el delebeckul a Meluadelchur a ua el ngar er ngii a omekrael er ngii el di ulsiik er tirka el mla chad er tia el beluu er a Ngesias el chiliis e choitii a derrir. Me a lebo lebetik er tir e te mocha nguun el me e mocha oker a ker er ngii. E ng di diak lomkuuk e dongchia tia el omechidel me te ko er a di uluungelakel el kmo, “Ng delebekul a Meluadelchur.” Me tia ikid e ng omkuuk el mo mekerekerd er tia el omechidel. Me te mocha katekoi el kmo, “Ng ungil el dodngelii a beluu el kmo ng ua ngerang. “Me te mocha katekoi e lueta el mo er a Beliliou er a Ngesias. E a lebo e tirka el teru el odam a chomais e mla tometemii a keburs el choimkemkii a taoch me ng diak lsebechir el me tmu er a taoch. Me te ngar er a ikrel a sers e meluluuch el kmo, “aike el mo somiu er a beluu el derchuall me aike el rokui el mo somiu aki bo er ngii leko er kemi.” Te di chiloit a ngelterir el mo er tir el teru el odam. Me a derrir a dula el kmo, “Rengelekei, mereko e dekenge me lebe el siseb e te chebulang.”

Me te merma soiseb e liluut el medesii a delengchokl el mlo ua smechel er a rechuodel. E te di mlo ousbech el ua lulubedul er tirka el teru el odam me a derrir. Me tirka el ongalek a mlo kuoll er a buai e mlo tengetongel er a rokui el omeruul el ngeltir er tirka el tede el ongalek el mlo ua isei.

Me a klechubechubechad me a klaokerreu a tekingel a beluulechad el ietekiil el tekoi.

ILUOCHEL ME A MESEI

A Iluochel a mle ongedei el ngelekel a Latmikaik er a Lukes. Se er a lemechell e a delal a ngiluu el mo mechere er a Ngeaur. Ng kilie er a Rois el ta er a rengedel a Ngeaur. Ng mlo er ngii a ngelekel el sechal el ngklel a Mengidabrutkoel.

Tia el bocha leklou a Mengidabrutkoel e a Iluochel a mocha omuchel el meruul a mesei. Ng uelsisechakl er a remechas er a teletelel a omesalo el mesei. Ng dirrek el ullecholt a bedengel a kerrekar el ungil el ramk. Ngii a milechelii a teletelel a omeruul el mesei er a Belau.

A ta er a klebesei e a Mengidabrutkoel a mlo er a mesei el obengkel a delal. Ng di mililil e mechede a rengul me ng lmangel a ralm er a delal. Tia ikid e a Iluochel a mocha sobekii a bad e ng tuobed a ralm el ko er a bedengel a chemadech e ng di merekos. A Mengidabrutkoel a milengarem er ngii e dimlak lsoal. A Iluochel a liluut el sobekii tia el bad me ng tuobed a ralm. Tia ikid e a Mengidabrutkoel a millim e di kea lemeched a rengul. Se ikid a uchul e a ralm a ua ise el beralm er a chelechang.

A Iluochel a rirellii a mesei er a Rois e mlo omuchel er a mesei er a Ebukel. Ng rirekir a mesei er a Ebukel e kuk mlo meruul er a ta er a Keburs e a uriul e ng mlo meruul er a ta er a Ngeremasech. Tia er a rrekui aika el mesei er a Ngeaur e ng mlo er a Beliliou.

A Iluochel a uelsisechakl er a remechas er a Beliliou el meruul a mesei. Ng ulemuchel el meruul er a mesei er a Ngerkiukl me a Ngesias e a uriul e ng mlo er aike el bek el rengedel a Beliliou. Tia er a lrekui aika el mesei er a Beliliou e ng mlo er a Oreor.

Tia er a lebocha er a Oreor a Iluochel e a ngelekel a mla mo klou me ng di kea el obengkel el merael. A Iluochel a uelsisechakl er a remechas er a Oreor el meruul a mesei. Ng rirekui a mesei er a Oreor e kuk mlo er a Babeldaob.

Ng ulemuchel el meruul a mesei er a Desbedall. Ng mlo er a Ngiwal e mo bechil a chetil el chad me se el lebo er a mesei e ng diak lorreched el me remei. Se ikid a uchul e a mesei er a Ngiwal a kmal meringel a doruul. A Iluochel a rirekui aika el mesei er a Ngiwal e kuk mlo er a Ngaraard.

Ng mlo er a Chol el rengedel a Ngaraard. Tia ikid e ng mlo bechil a soal el chad me se el lebo er a mesei e ng ko er a di diak lungil el mesalo. A lebebil lebo er a mesei e ng di ngmai a llel a kerrekar el melebel a uchul a ditel e dualem me ng beot e mereched. Se ikid e ng mo sebechel el mereched el me er a blai. Ng dirrek el milekngeltengat a mesei er a Chol me ng beot

a omerellel e kot er a ungil a klab er ngii er a chelsel a Belau. A Iluochel a kmal mlo meketeket a delengcheklel er a Chol er a uche er a lebo er a Ngerchelong.

A lebocha er a Ngerchelong a Iluochel e a bechil a di mle kie er a Chol. Ng riruul a mesei er a Ngerchelong el mo merek e kuk mlo er a keiukl.

Ng mlo er a Ngeremlengui me ng remuul a meklechel er a Ngeruuchel. Tia el bocha el merek e ng kuk mlo meruul a mesei er a Ngetpang e a uriul e ng liluut el mo er a Ngeaur.

Tia er a lleta a Iluochel el mo er a Ngeaur e ng liluut el mo meruul er a ta er a meklechel er a Ngetelkou e ulemekedo er ngii el kmo, “Ngerchei.” Ng milekngeltengat a rokui el mesei er a Ngetelkou me ng mlo meklou a klab er ngii.

IUS ME A UEL

A irechar e ng mla er ngii a ta el mechas me a ta el rubak el kilie er a ta el chelebacheb. Tirka mle obekel. Tirka el obekel a dimlak loungalek le mechas a dimlak lomechell. A ta er a klebese e a rubak a mlo er a che e metik er a ngelekel a Uel me ng ngiluu el me remei. Ngika el ngelekel a Uel a kmal mle kekere e ko er a sesmecher a osenged er ngii. A mechas me a rubak a kmal mle blak a rengrir lomeka er ngii. Te ulemekeroul er ngii e mengedecheduch er ngii el di ua longedecheduch er a mera el chad. Ngika el ngelekel a Uel a kmal ulemeka klebese me ng kmal mle mereched el mo klou. A omerolel a klebese el mo e a klebekelel ngika el Uel a merma chemolt. A chelibel a mera el meklou e meaiu. A bedengel a chelibel a ko er a mo mechab eko er a chededekelek. A rubak a dula er a mechas el kmo, "Rrang ngika el cheremed el Uel a diak lengii di el bedengel a Uel e le ngika a ngelekel a ngasech."

Ngika el Uel er a lrengesii a rubak me a mechas el chachedecheduch el ko er a kmal di chotengii a klungiolel me a klebekelel e ng kmal ko er a mlo simang. Ng dirrek el ko er a kmal mlo kedadai a rengul.

Ng mlo chuib a sese el klebese e a bechil ngika el mechas a kuk mlo mengemang. E a omerolel el me reme e ng miltik er a ngelekel a Ius me ng ngiluu el me remei. A lemerema lekeed er a blai e ng di mla er a cheroid e omekedo el mo er a bechil e kmo, "Ngak a miltom me ng dimlak a ta el chemang el knuu. E ng di lusech a locha ngar er ngak me ak miltik er a ngelekel a Ius." Me a ledela el ua ise e a bechil a kmo, "Cherei e ng ngar er ngii a sebeched el meldoim. E kid a kmal ngeltengat me ng bai mla mo er ngii a chelmengel a cheremed el Uel." A bo el kukuk e ngika el rubak a mocha meruul er a mo blil a Ius A omengedmeklir me a ulekerreuir el mo er a Ius a kmal di mle osisiu ngii me a Uel. Me ng bek el klebese el tirka el obekel a omeka aika el cheremir e mengedecheduch er tir el di ua longedecheduch er a rechad. A Uel me a Ius a mlokeroul el ngalek chad. Te kmal mle mekedung.

A ta el tutau e te ulemengur e a Uel a di mla mo merek me ng lodesii e a Ius a dirk ulemengur. Ngika el Ius a kila kelel e dirk mle songerenger. Ng mlo melai a derengel a Uel el me mengang. Me ko er a loderesii a chimal el mo melai e a Uel a kildbengii a chimal a Ius e kmo, Ollei ailecha kelek." Me a Ius a kmo "A renguk ke mla mo merek el omengur." Me a Uel a mekiis el me dengchokl e dula el kmo, "Ak mla mo merek el omengur. E ng di a kelek a kelek

me ng diak morutech." Me a Ius a di mle kea lolai e ngoseklii el mo er a cheroid. Ng mle kekere me ng rirouk er a Uel. Ng blechoel el di ulerenges a mekngit el omelekingel a Uel. A omerolel el me klou e ng mlo klou er a rengul a kmo, "Ngak a kmal kikiongel e kebelung me ng diak ksorir a rebetok el chad." A ta er a klebese er a leklunga a Ius e a Uel a kmal mlo imis el mekngit a blekerdelel el mo er a Ius. Me tia ikid e a Ius a kmal ngilasech a rengul me ng mlo mengesemramr er a Uel. A mechas me a rubak a ko er a kmal mlo ngodech er a rengrir er tir. Te mle mekekere e dimlak lua ise e bai meklunga e kmal di kea el ta a rengrir. Te mlo kakerker el kmo "Kid ng ngara el mekngit a doruul er ngii me aika el cheremed a kmal diak lta rengrir? Ng ngera metemella me a Ius a mocha mengesemramr er a Uel? Cholebo e te menga a di osisiu el kall me a temel a blengrir a kmal di osisiu e ngara a uchul me ng di bek el sils el leko er a di kakerang?" Me a rubak a dula el kmo, "A klukuk e kede kuk mo mesterir a kakerous el kall. Me a temel a blengrir me ng mo kakerous. E kede mesterir el kmo te di ua isei?" Me a bocha leua ise e ng kmal dimlak lemeketeket e a Uel a luumeta el ko er a di mengerar er a Ius. Ng ulemdasu el kmo a Ius a dirk remouk er ngii. Me ng mlengerar er a Ius e omekedo er ngii el kmo "ke tubokl el nguches". Tia ikid se el kmal ulengesechii a rengul a Ius me ng dula er a Uel el kmo: "Chudelei ng klemengetel a taem el mko er a di oltuub er ngak e ngak a kmal di lmuk. Ngera kmal chetim er ngak? A lsekum e ng ngar er ngii a kuruul er ngii el chetim e mdung. Me a lechub e ng kuk di chetim a blebelek e mochib osengem me lak momes er ngak e ngak a diak "kurdechem er a merangd." Me a ldela a Ius el ua ise e a Uel a ko er a chebechebelang. E ng di rengul remel e ng ulemdasu el kmo, "Ng teluingera e ke mla mengedecheduch er ngak el ua isei?"

Me a ta er a klebese e a Ius a kmal mechiuai e a Uel a merael el mo el tmak er a kemril el mo er a ongolel. E di mle telkib e ng lmuut el merael el me el tmak er a Ius el mo meterob. Me a Ius a di milkerokl el kmo, "Ng diak a medam me ke meredered er kid el mo el me? Ke choitii a rael me ng diak mokiu ngii e me merderd er ngak?" A Uel a dula el kmo "Ke kmal olipesongel. Ke choitii a dusall me ng diak bobad er ngii e me er tiang?" A Ius a kmo, "Ngak a di mla me er tiang." Me te mocha kaititekangel. Te di mle kaititekangel el mo el mocha kakoad. Te kmal mlo meringel el kakoad. A Ius a kmal mlo meringel el odecklii a Uel. Ng di ululdechelakl er ngii el mkebkii a ta er a chelibel.

Me a lebocha leua itia a omeruul e a mechas me a rubak a mlo chachedecheduch e dula el kmo, "A Ius a mla mo kirel el merael. Kede lmuut el mo ngodrii er se el mngiluu er ngii." Me a

bocha el kukuk e te ngoura a Ius el mocha meradel er ngii er a okeburs. Me a omerolir el mo e te melekinga er a Ius el kmo, "Ng diak lsebecham el oucharm er kau me a Uel a lsekum ke ua ise el kmal di blechoel el meringel el oldechelakl er a Uel. E bechere e ke mo er a okeburs e a lta e ng se ikid el teletael er a delengchokl a omosiik er ngii." A Ius a kmal di liluk e dimlak ldu ngerang. Ng dimlak leko er a melasem el mesaod er ngii. Ng kmal mlemekngit a rengul er a mechas me a rubak me ng kmal di mle tellatel a btelul er a lolmesumech er ngii.

Me ng ua ise e ng di a Ius a milngedecheduch er a rengul el kmo, "A mechas me a rubak a kmal mle mesaul er ngak. Tir a uchul e ak medengelii a renguk. Me a leua ise e ng ngerchelek el mesa me ng diak a ngodech el mekngit el dubech el mo er tir." Me a Ius a milechelii a delengcheklek el mle kmeed er tia lebla er ngii a mechas me a rubak me a Uel. A Ius a kmal dirk mle mekngit a rengul er tirka el chad er a blil me a ta er ngii er a Uel. Me ng blechoel el di mengkeketa er a bita er a blirir. Ng ulumdasu el kmo, "A lta a mechas me a lechub e ng rubak a mesekak me te lmuut el ngoikak."

A ta el kebesenge e ng mlo me ng milil e omdasu el kmo, a rubak a locha mlo er a che me a leme e ng mesekak me ngoikak. Me ng reboreb e ko er a di diak a chad el me dum e milkelkang. Me a leko ng merolu e ko er a rirengesii a cherrodech. Me ng luueta el mocha reboreb e kmo, "Ng locha rubak el meremang." A bocha el chelellakl e lorrenge e ng beteknga el ngor. A lsa el mocha ungil el orrenge e ng ngerir a rebetok el mekekere el buik. Tirka melib er a mo melai er ngika el ta er ngii er a Uel el mo odimir. Me a Ius a di mle kea lebo el rei. Ng bai ulerreched el merael el mo er a blil a mechas me a rubak. Ng ulemdasu el leko ng mo mesubed er tir. A lebo e te mla mo mechiuai. Me ng mlo er a chemrungel me ng ngar er ngii. Ng mlo otillia a btelul e imiit a medal. E tir a merema rebuik. Te oltetellamet el nguu a Uel e mechib el merael. Me a lorael e a Uel a mlengedib a chimal. Me a longedib a chimal e a Ius a milekar. Me a lemekar e lomes el mo bedul a blil a Uel e ng dibus. Me ng milrekii a osengel e a lomes e ng milsterir a rebuik el omedebed a ocherir el mocha er a cheroid. Me ng rirurt el kmal di ulekedii er tir e otuu a telil e mereko e oteb. Ng kmal mlo klou a tebul me tirka el buik a uleldiu e suchesokl el kmal mlo er a bab e me metilech er iou me te tomir a Uel. A lechisngekl e ng kedelal a Ius me te medebodes el chemiis. A ngerir er tirka el merechorech el buik me a tebul a Ius a kmal mle meklou me ng milkereklii a mechas me a rubak. A lebe el tobed a mechas me a rubak e a rebuik a mla chemiis e ng di Uel me a Ius a ngar er a tkul a mekesokes el kmal kaderouakl.

KAEB ER A OREOR EL LLEL A NGKLEL

A rechad er a Oreor a ulerrenges a chisel a chelechol er a Ollei el meringel el chad. Me te mlo katekoi e otebedii a kaeb e omekekall el mo er a Ollei el omechar er tia el chelechol. Me a lorola e a eolt a mle ongos me tia el kaeb a omesebasech el mo er a medal a Ngardmau. A chad er a Iuet er a Ngardmau a melenges er a Ikebalkmau. Me ng ngar er a ilaot e tia el kaeb a omechero er a chelemoll. E olab el bedul a Ikebalkmau. Me ng ngar er a ilaot e omes er a kaeb el mekekelekoll me ng ngibesa er tia el dirimel a kuteling er ngii el kaeb me a desomel a lolsbek er ngii er a bab. Ng kmal ngibesa er ngii. Me ngika el ngar er a ilaot a merema metengel e loia llach er a tia el bad. Me ng oitii a klemat e ngii oker er tir el kmo ko mo er ker me te dmu, aki mo er a Ollei me ng dmu me kulidai me te otekir. Me ngmasech el mo el mo er a Ollei. Te mocha er a Ollei me te olekerd a rechad er a Oreor. Te oker er ngii el kmo a rrach ke mellidai ngar er ker a sechelim. Ng diak a chelsenguk el me er a Ollei. Ak di mlo nguibus er tia el kaeb a lemekelekoll e lomibiis me ak ngibesa er ngii. E ngii a diak a uchul a omerolek el me er a Ollei.

Tia a mildibech er tia el tekoi er a Belau el kmo “tilak er a llel a omerael.” Me ng tilak er a Llel. Tia el kaeb a Llel a ngklel. Me ngika el chad a di diak a uchul a omerolel e ng ngmasech er ngii me a uchul e ng belkul a tekoi el kmo ng di tilak er a llel a omerael e merael. Tia a milengai er tia el cheldecheduch.

KATUU ME A MENGERENGER

A Ngkeklaau el beluu el rengedel Ngaraard a ngar er ngii a chimo el blai el Katuu a ngkkel. Tia el blai a lekilie er ngii a ta el rubak me a ta el mechas el mle kaubuch el kmal meketeketa e dimlak a ta el ngelekir. Me te kmal di oureng a klengelakel e kmal di diak. E a rubak er ngii el blai a mocha smecher el mad. Me a lemad e te mo doklii. E tia el blai a blai er a kebliil me ng kie er ngii a mechas el di mesobil. Me ng mengkar e kie me ng dirrek el di melekoi kesuk a bo lebad me a lebekiis el kmo, “A kekedel er a kkekere e bo kbechiil e lak a ta el ngelekek. Me a rebek el mekekere el redil a omechella e ngak a mera el mekngit a chelebulek.” Me ng di melekoi e kiei.

E a ta er a klebesei e ng besecha er a rengul el ko er a di merael el mo klou a delel. Me ng di kilie el mocha belsechel a lemechell er ngii el buil, e ngii sochera er a rektel a cheroll. Me ng di mle ngii el ta e omechell me ng mechella e a lemechell e ng mengerenger. Me ng mechellii el mechere e soal el choitii e ng di ngii a milechellii el ngelekel me ng mekngit a rengul er ngii a letkii, me ng di ngiluu el mo er a kederang el mo chemetii e mechere e di oldngedingel er ngii. E ngii a di omeka klebesei el mo klou. Ng diak lomeka er ngii e ngii a di diak lemad. E ngii el mechas a lueta el mo dioll me ng kie el mechucher a bilel e mechellang, me a lemechell e ng mechellii a katuu. Me ng kmal mekngite rengul. Me ng dirrek el kmo, “A rumechell er a rechad el me er a beluulechad me te kaingeseu er a delengcheklir e ngera tia el kerior el kngar er ngii.” Me aika el lolekoi e a ngelekel er a mengerenger a di medengei. Me te kie e a katuu a medengelii a mengerenger me ng merael el mong. Me a lebo e a mengerenger a dmu er ngii el kmo, “A klukuk e ng di tutau e ke me e kede merael el diak dengar er tiang.” Me a bo el kukuk er a tutau e ng mochang. Me a lebo e a mengerenger a dilu el kmo, “Bo mngasech er a ulkek e kede merael.” A katuu a mocha ngmasech er a ulkel e te merael. Me a lorael mo er a Ngeluul el ingsel a Beluulechab, e ng mo el mo bereked er a chelechol e a ochedal er a katuu a kmo, “A kmal songerengerang.” Me a mengerenger a mocha rullii el beng, e dmu er ngii el kmo, “Moutekangel e bo el meched a chei me lemad aika el ngikel el ngar er a remenget e mongang.” Me ng melekoi el ua ise me te mengiil er a ched el chei e a Dedmau el chad er a Ngeluul a melenges me ng ngar er a chetebtel a ilotel lius e a lomes a ngikel e ng kmal omdebud me ng merema metengel e mocha, e a lebo e a mengernger a okisii a btelul. Me ng chiliis me ng dilu el kmo, “Rrach lak komchiis e be mkeed e ng ngar er ngii a tekoi el kulekoi er kau.” Me ng mocha

dechor e ng dmu er ngii el kmo, “Bo mnguu a chimo el lius el kosir e mngai a teblo el mengur el me me knigim me aike el kles el lius me longa ochedak e mokoad aika el ngikel el rokui me lecheldim e bo mungil el mesa tia el teletelek e msubii e mlecha a utibek er tia el teletelek e mchedesii er a bad e moldingel er ngii a bo lemeched a chei. E mokodongii tia el teletael el kmo *beng* er a ngikel. E mnguu ngika el ochedak el eko me moba el chedam e ng di diak momeka er ngii er a tuu e le ng mad e le aki oudelasech a tuu.” Me ng kmal mlo ungil remenges a tekingel. E ngii a mocha mellach er a ochedal er a katuu. “Ke mo me a bo lungil er kau e ke mo ungil el remenges a tekingel. E a bo lemekngit er kau e ke mo mekngit.” Me a lebocha Dedmau e ng milsa imelel me a kelel a katuu e locha utibek er ngii e suubii e rodelii ochedal e nguu el kmal mlo ungil er ngii.

Me aika el katuu a kmal diak longa tuu e le ng oudelasech. Me a katuu el charm a kmal diak longa tuu. Chobo er a rokui el omerellel me ng di diak longang. Me a katuu chomterkeklii e ng mo merechorech. E a chom chelechii e ng mo kedung el diak ldengerenger.

KEDUNGELCHEBUD ME A DENERENGELCHEBUD

Tia cheldecheduch el mo er a Ngerdilong el beluu er a Ngcheangel. Tia bita el beluu er Ngcheangel el kilie er ngii a ta el mechas me ta el rubak. Tirka a mle kaubuch e omechell el mechelii a ketengir el sechal me te mengklii el Kedungelchebud. Ng liluut el mo dioll a bechil e mechell el dirrek el sechal. Ng kmal mle dengerenger e toketok me a demal a mengklii el kmo Dengerengelchebud. Me aika el ngklir a mera el di mlo ua luterkokl el klou el chad a mlo kedung me a kekere a mlo dengerenger.

A rechuodel a kot el suobel a demechell e dengalek el sechal a tekoi er a omelenges me a omengaus el bub e le ng uchul a rokui el tekingel a blai el ungil er a kldemaol me a kldelaol me a klebliled er a kodall. Me a klaiuetoir er a klauchad a mle tekoi er a irechar el ua ise e le irechar e ng dimlak a rokui el klekedall me a lemad a chad e a bekai el ilaot a chelol el merael a chisel er se el blai el debechiil er ngii el dodengesall er ngii.

Me ngika el klou el chad a ulerrenxes er a demal me ng mlo chad er a omelenges me ng melenges e kmal mengedmokl er a demerir me a derrir. E a Dengerengelchebud a di milil e diak lrengesii a ta el tekingel a demal me a delal. E ngii a mocha chesechall a mekemedil Ngirakederang er a Imeliik el kmo, Belau el rokir ak ulengit a ngeso er kemu e kede melai er a Oreor. Me a lebocha tekoi er a Ngcheangel e ng mocha kirir el teru el odam el mong. Me ng mle kirir el mo er a kabekel er a Desbedallechelong el Cherecheroi a ngklel el kabekel. Me te mlo er ngii me a demerir a mlo mellach el omades a rokui el llechul a omerael. Me a Kedungelchebud a melelem el omtab er a rengul e mesechedekl. E a Dengerengelchebud a lolekoi er ngii a demal e ngii a di roibal a tekingel a demal e kmo, “Ak di medenge e meduch.” Me demal a kmal di mo lmuk e diak a ngera el ledung. Me a lrael el merema a omerollir e ngii a dibus er a blai. E a Kedungelchebud a ldu er ngii a demal el kmo, “Rungalek, ke ngmai a teruich el sualo el locha er a ilobech er bita er a ochim, me loltoir e omchiis e mo mes er ngii el merael el me kmeed e kau a derta el melai el omidokl el omechebecheb. E se el ongeteruich er ngii chomnguu el chitutii er a btelum e ridekekl er a daob e oudeluus er ngii e oldengelengel er a daob.” Ise ikid a chomsobel er ngii. Me a lobuda mekemad me loltoir er a Cherecheroi el kabekel el tobeda er a delebechel er a Mechorei er a Irrai e ng mocha dechor a buik er a Ngerbeched e mla er a kabekel er a Ngerbeched el kmo, “Uchellechelid alii a ultirek.” A Kedungelchebud a lomes er a kabekel er a Ngerbeched e ng merema me ng mocha ouderta el

omidokl aika el sualo. Se el mlo ongeteruich el sualo a lengiluu el chitutii er a bdelul e ridekekl e oudeluus er ngii el mo el mocha er a taoch er a Ngetebud er a Oikull. A Dengerengelchebud a mlad er a mekemad e le ng dimlak lorrenge a tekingel a demal.

A Kedungelchebud a mlo er a Ngchesechang me ng kie el mlo meketeket e merola el mo er a Ngcheangel. Ngika el rubak me a bechil a di mle medenge el kmo a Dengerengelchebud a mo mad er a mekemad. Te di mlengiil er a Kedungelchebud.

Te meseked a rubak er a bai er a Bas er a Ngcheangel e a lomes er a bekall e ng omesebasech el merael me bedul a Ngcheangel. A delal a Kedungelchebud a tilobed el mo er a kederang e mengiil er tia el mlai. Ng ulemdasu el kmo nglocha a Kedungelchebud. A leme tia el mlai e ng mera el Kedungelchebud. A Dengerengelchebud a mle dibus e le ng mlad er a mekemad.

KEMEDUKL ME A MAML

Tia cheldechederir a reteru el odam el Kemedukl me a Maml. Tirka buik er a Ongingiang el ngelekel a Dilibereu el mechas er a Ongingiang. A Dilibereu a mechas er a Ongingiang e uluumesei er a Ngerukdabel. Ng bek el lebo er a mesei e ng dmu er a rengelekel el kmo, ng diak kom kaiuekako me a diak kobo er ker. E a lechub e se el letobed el mo er a mesei e tir a mo tmaut el kaiuekako e ketereklii. Ng di mle ua ise el mo el mo, me a ta er a klebesei e a derrir a mo medenge el kmo tirka se el kurael e ng diak lsebechir el mo medenge aika el tekoi se el dollach er tir.

A ta er a klebesei e ng kuk mocha temel el mo er a mesei me ng dula er a rengelekel el kmo, “Rengelekei ak merael el mo er a mesei e kemu a di kie er a blai el diak lsebechiu el mo er ker me a diak kom kaiuekako.” Ko er a lorael e a Kemedukl a mo tmaut el omekako er a Maml e meluchel er a blil el omeu er ngii. Me a Maml a ngosecha a rengul er ngii me ng lmangel e sola e merael el mo osiik er a delal er a Ngeruktabel. Ng merael el mo er a Ngeruktabel me ng reboreb er a uchul a chelebacheb e kmal songerengerang e a lomes er a chimo el rekung el ousaml e ng merael el me metengel. Ng merael el me metengel el mo el mo er a daob el mo melilech a cheritel. Me a Maml a mekiis el mdechemii e kolii. Me ng kolii e dengchokl el mengiil er a delal e ngii a merema a delal. Me a le merema delal e ng dula er ngii el kmo, “Rungalek, kau ke mekera er tiang? Ak ko er a dilu er kemu el kmo ng diak lsebechiu el mo er ker, kom di ngar er a blai e choielak?” A Maml a dula er ngii el kmo, “Chedil, ngak a diak lsebechek el obengkel a Kemedukl el kie er a blai se el sekum ke tuobed. E le se el morael e a Kemedukl a mo tmaut el omriid er a blik e omekako er ngak.” Me a delal a dula er ngii el kmo, “Me a da bo er uche ku e dorael el mo er a blai.” Me ng merola ngii me a delal el mo er a blai. A lorael el me e a Kemedukl a ngar er a blai me a derrir a mocha mellach er tir el terung. Me ng oungeroel er tir e mellach er tir e dula er tir el kmo, “A klukuk er a tutau, e ng di tutau e ko momkokl el mo remuu a lius me a chomei e ak mo kmes a tiuu.” Me a Kemedukl a oker er a delal el kmo, “Aki mo meruu a lius er ker?” Me a delal a kmo, “A chomorael e ko mo er a Bkulsechuul me kom remuu a lius.” Tia el tutau e ng di mle tutau e ng mekisa a Kemedukl me a Maml e merola el teru el odam el mo er a Bkulsechuul me te meruu a lius. Me a le me e a derrir

a mocha kmes a chiltir e dmu er tir el kmo, “Ko mo er a Ngemelis me ko melecholb e runguus a bdelmiu.” Me te remiid el teru el odam el mo er a Ngemelis el mo el mo melecholb.

A lorael el mo engelakl er a ii el Belau, e a le bo e ng ngar er ngii a kldibel er a remekekere el ngikel, e a lomes er a Elbesoi me a Elas e te ngar er ngii. Me te oker er tir el kmo, “Kemiu ko mekerang?” Me te kmo, a rubak a mla mekoi.” Me a Kemedukl a dula er a Maml el kmo, “Ke di ngar er tia e choielak e ngak a mo me ak tuchelii a rubak me ng mo metengel, me ak me e kede merolung.” Me a Maml a dula er ngii el kmo, “Choi, mrael.” Me ng mrael a Kemedukl el mo meluchel er a rubak e a Maml a mocha tmaut el mrael el merik a kelel el chiull. Me ng kirikl a kelel e me me ng dengchokl el omengur el mo el mo merek e ngii a merola a Kemedukl el mei. A le me e ng dula er ngii el ua se, “Dorael.”

Me te mrael el teru me te ngar er a melengel a omerael e a Kemedukl a kmal songerengerang me ng dula er a Maml el ua se, “Ng diak komnga ilecha el tied el me me dekang.” Me a Maml a dula er ngii el ua se, “Ng diak e le ak medakt. A deka tied e bo dolecholb e lak lerrenguus a bdelud e a debo er a blai e a delad a mo oker er kid e choklid.” Me a Kemedukl a kmo , “Oh mada dorael.” Me te kuk mrael el telkib e a Kemedukl a dmu er a Maml el ua se, “mada a lechetim a donga ilecha el tied e mngai el me me debii a tied el terung.” Me a ldela er ngii el ua ise, e a Maml a dula el kmo, “Choi, bechere e kede mii a tied el terung.” Me te mocha omii a tiir el terung. Me a lebii a tiir el terung, e a Kemedukl a okor e ngmai aika el tiel el me me ng kma el rokui.

Te merola el mo er a Ngemelis me a lebo e te mo me te melecholb el terung e a Maml a mo ngmai aika el tiel el me me ng rungsii a bdelul. E a Kemedukl a di kea el sebechel el rungsii a bdelul e le ng di kea a tiel. Me se ikid a uchul e a Kemedukl me a Maml a kakerous a teletelir. A Kemedukl a melaok a chedengal le ngii el kila a tiel me a Maml a kuk melaok a btelul e le ngii el rirengsii a bdelul er a cheluch.

Tia el cheldecheduch a cheldecheduch el chelid, e ng di ngar er ngii a dirrek el suobel el denguu er ngii el ua se, ng diak doleit a tekingir a remeklou el chad me a lechub a redelad me a redemad. Ng kired el olengesenges er tir.

KIM ER A MURÆL

Tia el cheldecheduch a cheldecheduch er a beluu er a Ngeburch er a Melekeok el ngar er a mo bedul a diluches er tia el beluu.

Se er a dirk el oleb el chelid el oleb el chad er tia el Belau e ng mla er ngii a ta el chudela el mechas el Obechadelburech a ngklel er a Ngeburch el di mle mesobil e mo dioll e mechell. Me a lemechell e ng dait a ngelekel me ng oumismisk e kmo, “A rechad te omechell a rechad e ngak a omechell a dait.” E ngoura ngika el ngelekel el nguu el mo dolemii er a ko er a rolel a ralm e mengklii tia el rolel a ralm el kmo bong. Ngika el mechas a ke le ng mlo blingelet oua itia el tekoi, me a kuk le merko a bekord ta el rak me a derengel e ng dilla er a ongerual me a lochellii ngika el ongerual e ng kekere el ngelekel a ngikel, me ng ko er a kmal mlo chetil tia el blekerdelel a cherellel. Me ng uoumismisk e ouuchel er a rebeldekel el kmo ‘Ngak ngera ak tilemelli me ng ua ise a dellebeklek me a chelebulek me ak omechell a dellomel me a ngikel?’ E solae kuk ngoura ngika el ngelekel el mo er tia el bong er a bita er a ketengel el dait me ng dullechelii a chelsel e nguu ngika el ngikel el loia er a chelsel e mengklii el kmo Odidiuarabong.

Me a lorola el me meklou tirka el ngalek e a Odidiuarabong a di oureor el mesab a risel a Dait me ngika el ta er ngii er a Dait a di oltutakl er ngii er a derrir. Me a derrir a di milsumech a delongelir e diak lebo lemesmechokl le Odidiuarabong a di ua ise er ngika el ta er ngii er a Dait. Me a Dait a di mle blechoel el mesubed er a delal a ua aika el mekngit el omerellel a Odidiuarabong.

Me ngika el derrir a mocha nguu a Odidiuarabong e nguu el mo er a taoch e dula er ngii el kmo “rungalek kau a kmal di kea el mechoes a delengerngerem me a blekerdelem me chelecha e ke mo cheroid er a bita er kemam e ngak me a Dait, aki bai kimkaungalek e ng ngar er ngii a budech er kemam.” Tia el ua ise el omeruul a kmal tilemelli a rengul a Odidiuarabong me ng mlo melatk el kmo ngak a cheterochel er a delak me ak cherida er a bita er ngii. Me ng di lilangel e a delal a mo ikrii e remiid.

A Odidiuarabong a dimlak lobes er tia el kngtiil a rengul me ng di merael el di melengetang el ua lak a chad el oba, el me el me metik er a Bengukbachiei me ng ouchisa er tia el omeruul. Me a louchais er ngii e ngika el Bengukbachiei a dula el kmo, “kede rongedii a mekemad e nguu el mo tomotem aike el dait er a beluu el lesa el mengeleoch a delemiu.” Ngika

el Bengukbachiei a mlo remurt er a delongelet a ngikel me a cheled el olekeed er tia el mekemad. Me a recheled a mlo kldibel er a lemau er a Olebsiil e a rengikel a mlo kldibel er a lemau er a Ngesimei. Aika el lemau a ngar er a kerker er a medal a Ngeburch. E tia el kerker a dirrek el ngar er ngii a telkib er ngii el kerker er a Murael e tia ia le mla er ngii a klou el kim el ngar er ngii el mengedidai er a rengul me ng dimlak lemokedo el me er tia el ongdibel er a recheled el mla er a lemau er a Olebsiil. Aika el teblo el lemau a mlo merael a kelulau er a delongelet er a rengikel me a recheled el kirel a ngeiul a dait er a meselech er a Ngeburch.

Me a kot e a rengikel a mlo omenged me ng keberuul a chai me a rebebil el mo koterkokl er a klemedaol e lmuut me ng di mlo mekekoi a rebek el chad. Me kemedukl a mocha el cheltekill er a rebebil le ng ulemdasu el kmo ak bo me le ngar er ngii a bad e ak torakl me ng obriid. E a lechub a lebo e ng mlo kebongch me ng lmuut ngii me a rechedal. E ua ise er a bek el meklou el ngikel el di mlo diak lsebechir. A ulebongel er a rengikel a delebechel el rrull e dirrek el mlo diak lsebechir. Me tia ikid e te luueta el me me te chelebis er a lemau e ng lmuut a kelulau el mo er a recheled er a bita el lemau. Me a lebo e a recheled a kmo “Chelechang e aki kuk mo me ko momes er a recheled.”

Me ng ua ise e a Dait a ngar er a beluu el olengchongch e mesusauch a ulechal el ngar er a deurreng me a lechub e ng osiichereng el mo er a mekemedil a ngikel.

Me a cheled er a letechela tia el klou el ngerachel el benged el mekemad el bla bo lobongch er ngii a rechedal a ngikel e te mlo kldibel e merech a bek el tekoi e dirrek el mlo mesechii a kim, le ng ta er a mle klou e mesisiich el cheled e ng di kim a dimlak lengar er a delongelir. Me tia el omerellel a kim a ko er a kirrekur a rengrir a rebek el cheled me te mlo ngiltii a chesiuch me a chesiuch a mocha bdelul a urrurt. Me ng mocha onging a bek el ikei el kebliil el mo er ngii el ua rrudel me a ngerngiuch me a subuis me a kuk bebil el mekekere me a meklou e te mocha oltuu klubed. Me a lebe lekerd er a taoch er a Ngeburch e a chesiuch me rrudel a mesebesebek er a melidiul me a reua sebus me a ngerngiuch a di olelingatech er a eou el mesab a dai, e a chesiuch me a rrudel a mengeseb. Me tia ia mle uchul a ngeiul a dait er a Ngeburch me ng di mlo cheleleu a meselech er ngii.

Me a le cherechesa a mekemad e te liluut el me reme er a lemau er a Olebsiil e mesbeda el mo er a rengikel er a bita el lemau er a Ngesimei me te mlo medenge el kmo ng chilous a dait. Me te miltir a ngloik me ng di milecherchar aika el lemau me a uet el mo bedul a meteu el

toachel el ngar er a delongelet a Ngiwal me a Melekeok me a lemerko a ngloik e te obuta el mo kairirei.

A kerker er a Murael a mle engelekil er a remerael me a bek el omerael er a ngikel a mle melengelakl er ngii e a kim er a Murael a di dengarech er a deliul a mled el merangd e a lengelakl a ta er a omerael e ng oker el kmo “Sechelei ngera chised?” Me ng ua ise e tir a mle seselk a rengir a remengelakl el ngikel me te di ulekemetii e dimlak louchais er ngii a ngii di el ngerang. Me a nger el mo er a ngika el dengarech el kim a di mle “Ngaukai e moker er a rengar er a uriur.” Me a kim a di mle ua ise el di ulekerker el mo lmuut er a ulebongel er a omerael el lomiur er ngii a rrull el dudek a ngklel. Me a lluueta el oker a kim el kmo, “Errang ngera chised er tia el mekemad.” E a rrull a toucheckla el mocha bedul ngii e kmo, “Kau tia el chetim el teloi er a recheldebechel me ka mngr er a mekemad e di dengarech e okerker a chais.” Me ng ko er dirk melelengeu er a ngerel a kim e a rrull a douur a kemril el me otebedii er a budel a daob e le ng ngoba a orsul e nguu el di rirsur a berdel a ngerel el me otebedii er a omerkolel e choitii e remiid.

A omorkolel a kim a mocha oburk e mocha mededellimes me tia ia ulebult el mo ngisel a kim. Me a ta er a ngikel a mlo kudesir e loia a ubat er ngii me ngika el ngikel a mlo kuling a ngklel. Me se el ubat a dirk ngar er a chelsel a ngisel a kim el me er a chelechang. Me a lungia er a rektel a kim e ng dirrek el melsumech a rengul le ng mlo medenge a kngti el mle ko er korkarm e omtok a tekoi. Me ng dula er a kuling el kmo, “Chelechang e ak mo ungil el mo bekongesenges me ak dirrek el mo locha a chimak er tia el mekemad el mla er ngii. Me chelecha el mo er a medad e ak mo chai el mo omoch e merusech aike el kukau.” Me ng mlo ua ise, a kim el mlo ta er a kesiokel el ngar er a bab el klekedall er a redil el merusech aike el mesisiich el kukau.

Me a dudek el rrull a di becheleleu a rsel a kemril e ngii el rrull a mlo kim a ngklel e le ng rirsur a kim. Tia el cheldecheduch a mlengai er ngii se el belkuk a tekoi el kmo “Ke ko er a kim er a Murael el di dengarech e oker a chais.”

Me a olachitnger a kmo “ a de korkarm el orrenges mengoit a tekoi e kede mo metik er a ringel me a klengit.”

KLENGAR ER A MEDECHIIBELAU

A Medechiibelau a chelid er a beluu er a Irrai

Ta er a klebesei e ng ko er a kmal medeues a beluu le ng mocha diak a odoim me a Medechiibelau a melekoi er a resechelil el kmo sechelei ng diak me debo er a chei? E ng kmal klou a klengerenger me tirka el sechelil a konge el kmo choi debong. Te okor e merael el mo metengel el mo er a Uchulangas e merael el melid er tia el chades el mo er a chelebacheb me te ngmai a engelir el besebes e mereko e merael el mo er a chei. Me te ngar er a chei el mo el mo keriik e mereko e merema ngmasech er a chelebacheb e merael el mo er a uchul a chades. Me te merael el me melid er a did er a Mechorei el me imuul. Me te ngar er a did e ngii a dmu er a resechelil el kmo, ng diak me debii a cheldid? Me te odektak aika el chelderir el rokui e mereko e omii. A lomii e ng mla er ngii a chimo el chai el luldak er aika el chelderir e a lomii e tia el chai a dimlak lebo lecheldil a Medechiibelau. Ng mlo cheldil a ta er a rechad. Me te chemol a chelderir e merko e merael me te di merael el mo er a uchul a kedeb el did e ng dmu el ua se sechelei ng diak deluut el odak aika el cheldid e deluut el omii? Me debong. Me te lmuut el ngmai el odak e lmuut el omii. E a lomii e tia el chai a dimlak lebo el cheldil. Ng kuk mlo cheldil a ta er a chad. Me te kuk chusuch aika el chelderir e kuk merael el mo er a Uchulangas. E ng kuk dmu el ua se sechelei ng diak deluut el odak aika el cheldid e deluut el omii? Me te lmuut el odak e omii. E a lomii e tia el chai a dimlak lebo el cheldil. Ng mlo cheldil a ta er a chad. Me te lmuut el kuk chusuch aika el chederir e merael. Me a lengar er a bdelulacha er a Melengel e ng dmu er tir el kmo sechelei ng diak deluut el odak aika el chelid e domii? Me te lmuut el kodoked er a iengel e ngmai el odekdkak e lmuut el omii. E tirka el sechelil a omdesua el ua se ngika a uchul ng kmal mla mo betok el di domii a ke le ng mengerechir er tia el chai. Me te okor e nguu tia el chai el nguu el mideklili er ngii e dmu ngei, tilecha blingelem, tilecha cheldim. Me ng di mle kea longerchir aika el bebil er a ngikel. Ng di ngiluu tia el chai e orkedii a kemril e nguu el cholngii e kmo mereko ailecha di cheldmiu me di momii e tia a mereko el lodimam e mereko e nguu el remiid el mo er a blil er a Idechedechiil.

A ta er a klebesei e ng dmu er a sechelil el ua se e sechelei ng diak me deruul a keled e debo er a Mechorei e domengur e desa ngike el kot el ungil a kelel. Te kmo choi, me te okor e meterakl tirka el sechelil me ngii el Medechiibelau me ng mlo remei. Tirka el bek el chad a mlo kaiririei e dmu er a rederrir el kmo kemam a mo omengur er a Mechorei el bek el sechelei me kom remuul a ungil el kall el mo kelam. Me a rebek el derrir a rebek el chad a oketa mo er a

mesei me te ngmai a kukau el me me te merusech a belsiich e mengum a ngikel, e meruul a ulei e ometech a miich e omerkerk.

A rebek el derrir a rechad a di mlo meruul a kelir el ungil kall e a Medechiibelau er a be rrei e ng dilu er a delal el ua se chedil ke mo er a cheliuis e ngmai a kelek el llel a dait el me me ngiokl el kelek, me a delal a ko er a di rrau a rengul e ng di ng kuk tekingel a ngelekel me ng di kongei. Me ng okor e mo er a cheliuis me ngmai a llel a dait el me me ngmai el odak e mechull e ngmai el locha er a bebul a ngeliokl e a bocha el tutau e ng dula er a ngelekel el kmo aike kid aike el chelucheb el ngar se me ng kmo choi. A Medechiibelau a ngilai el locha er a sualo e tuobed el mo er a rebai me ng medebdii a imekurs e ngmai aika el redechel a imekurs el mekekii a sualo el odak er aika el chelucheb e oteklii tia el sualo e merael el mocha er a Mechorei. Me te mocha rebek el chad me te reboreb el olengull el mo el mo e katekoi el kmo kid a bai mochu omengur. Me te okor e mo omoket a kelir me a lomoket e a rebek el chad a chelebangel aike el mera el ungil el kall el ua miich me a ulei me a seboseb e diak a ta er a kall el dibus me te mocha omuchel er a blengur e a Medechiibelau a mo omoket aika el kelel el chelucheb me a kemim e di nguu a chelucheb el nguu el milii a kemim e suchesechii e ko er a mengemim a medal me ng ua ise el menga el menga e tirka el sechelil a omdesua el kmo aike el longa a Medechiibelau a locha kot el ungil el kall a uchul e ng ua ise a osengel. Me te mekiis tirka el sechelil el mo merober aika el kelel. Tia er a lomerober aika el kelel e ngii a kuk ridekekl el mo er aika el kelir a resechelil me ng dingesii er a ulei me a ngikel me a belochel e tir a ngmai aika el rengrir e ng kmal ungil el kall. Me te ngmai el me me te olab a chelucheb el omail er a imekurs e mengang e a longang e ng kmalmekemim e diak lekall e a lebelteterir el mo er aika el kelir e a Medechiibelau a mla moreked el ngmilt aika soal e kmang. Me tia ta er a chelbeldil el bla lebesterir a resechelil.

Ng kuk mereko el ta er a tekoi me te mo merek el omengur me te mededereboreb e ng dula er a sechelil el kmo chelecha e kede mo melamech e olab a lemecheled el ometech el mo er a Ngerduais e ngike el metechii a Ngerduais a nguu me ng belual. Me te okor e chemaus a chemelir el bek el chad e melamech e ngii a ideuekl er a rebai el mdechemii aike el bekerekard el chesisebangiau e nguu el otungii er a ngerel e mereko e a rebek el chad a melamech el mo ulemachel a chemelir e mereko e ometech e a lometech e ng di mo moiit er a chelechol me a mo moiit er a belngel a kerekere me a mo moiit er tia el toachel me a kuk di ometech el mo moiit er a tkul a cheldukl e mereko e ngii a sibesbii tia el chesisebangiau er a ngerel e nguu el metechii. E

ngika el chesisebangiau a chollakl a osebekel e suebek. E se el lebo lobutek aika el osebekel e ngii a dmu er a resechelil el kmo e a ng kuk mla mo llemolem tia el ulemachel. E se el loberk a osebekel e ng kmu e a ng kuk mla mo delbard. Ng di mle ua ise el oked er ngii e ngii a chollakl a osebekel e mo reboreb er tia chelebacheb er a Ngerduais. Me ng dmu er tirka el sechelil el kmo a Ngerduais a mla mo beluak.

A ta er a klebesei e ng kuk ngii me a Dachelbai el chelid er a Ngchesechang a kuk mlo katekoi. Kid e rrang a kuk ungil a debo er a belngel a ked e dolasech a klekedelled. Me te mo er a ked e melasech me a lolasech e ngika el chelid er a Ngchesechang a melasech er a Matukeoll. E ngii a melasech er a Tengadidik. Me te ua ise el melasech el mo el mo e ngika el Dachelbai el chelid er a Ngchesechang a melasech er tia el Matukeoll el kmal mla mo ungil e klebokel me se el domes er ngii e a rengud e ng mera el Matukeoll. Ng omes er ngii e kmal sokol e ko er a diak a cheldechulel er ngii. Me ng kmo tia mekerang er ngii? Ng dula er a sechelil el kmo kede dokedek aika el delsecheled e mo er a beluu. E a lsekum kede me me a delsechelem a ngar tie el kngar er ngii e a delsechelek a ngar tilecha e ng diak dongitengtik le ng kuk di mle ngii el mo ua ise. Me a sechelil er a Dachelbai a kmo, choi. A Dachelbai a ulemdasu el kmo a cholebo e aki merael el mo er a beluu e tech a mo mengider aika el mo omtechei. Te remiid el me er a beluu el me er a Ngchesechang me te mo bad. Ko er a bo lebad a Dachelbai el ongelngul e ngii a tuobed el mo er a ked el di oubetetelluut el meruul a ultil a ochil el diak a mo chemau a ked e di chemau a beluu. Me ng merael el di oubetetelluut el mo er aika el desechelir me a lebo e ng mo nguu tia el delsechelel a Dachelbai el matukeoll el nguu el mo er tia el basio er ngii. E kuk nguu se el lullasech er ngii el nguu el mo loia er tia el ngar er ngii a Dachelbai e melasech. E dokedek e merael el me er a beluu. Me ng merael el mo er a beluu me ng oltetellamet mo mechiuaiu el meruul er ngii me ngika el sechelil bo lak lodengelii.

Ng tutunga me te mekisa e merola el mo er a ked e a lorael el mo e a Dachelbai a lebkisii tia el blil a delsechelel e tia a tengadidik el ngar er ngii. E ngii a bo lebkisii tia el blil a delsechelel e tia a matukeoll el ngar er ngii me a Medechiibelau a dmu, ak ko er a dilu elecha aika di mereko el ua ise. E a Dachelbai a di kea a cheldechulel er ngii me ng dmu cherei e ng di mereko el ua ise. Me te ko er a kakerekeler kmo a chobo ng techag? Me te okor e kmo ka hall e domes el kmo ng ngar er ngii a ultil a ochil a chad el milrael el mei. E a lorael el omes a ultil a uach er a kesus er a chelii e ng di chemau a beluu er rokui el diak a chemau a ked. Ng kmal mla mo rrau a rengul a Dachelbai.

E ngii a nguu tia el Matukeoll e nguu lotekir er a reakl er a Idechedechiil. E a delal a omais el mo er a cheliuis me ng dmu er a delal el kmo chedil se el obo er a cheliuis e me e ke olkebotk. Me a delal a kongei e mo er a mesei me ng ngar er a mesei. E se ng di cheroid e ng olkebotk. E se lebo dibus a dela e ng rullii tia el blai er a Idechedechiil el mo toachel a chelsel e nguu tia el chermel el Matukeoll el nguu mecheklii er a chelsel tia el blai el di toachel e mereko e dechor er a ubeng e oteb e melolk er a ubeng e chou huu, huu er tia el Matukeoll el tmurk er a telia e tmurk er a telia e a delal a kuk merema el ngar er a mesei me ng kuk kolkebotk. Me ng kmal di orechedii el rullii el mo diak el toachel. E nguu tia el Matukeoll el nguu el lotekir er a reakl e meselsuld er a ulaol. E a delal a oker el kmo e rungalek tia el ulaol el ko er a di dekmekimes e ngerang? Ng diak e chedei ng milechubel a ralm er ngii. Me ng ko er a meselsuld er ngii e a delal a kuk me tmuu me ng dengchokl.

Ta er a klebesei e a delal a kuk mlo er a cheliuis e merael el me e kmo, e a ngika el ngelekek ngera me ng dmu kolkebotk er se el chomei? Me ng meluchel a klebngel e oltetellamet e me omditm er ngii. E a lomditm er ngii e ngika dechor er a ubeng e tia el ulaol er a Idechedechiil a di toachel el rokir. E ngii a dechor er a ubeng e mla nguu tia el Matukeoll el nguu el mecheklii e oteb er ngii me ng ua blekall er a chelsel tia el blai el tmurk er a telia e tmurk er a teliang. Me ng di mle er a medal a tuangel e oklii. Olekoi, e rungalek kau ke mede el se debo dedibus e ke meruul a kloklem er a chelsel tia el blai. Tia rengum e ng diak lemara el blai. Me ng okor e rullii tia el blai el mo diak letoachel e cholngii ngii el cheremel e ouuchel er a delal el kmo kau kele ke ta er a. dengerenger. E mereko cholngii a cheremel e nguu el metengel er tia el taoch er eou er a blirir el Meruulkik a ngklel. Me ng metengel el nguu ngika el Matukeoll el nguu el mecheklii er a daob e mereko e merurech er a chutem e oteb er ngii. Me ngika el Matukeoll a oderorongii er a chelsel a taoch e remurt el mo tuobed er a kerek. E ngii a merek er ngii e kmo kele ke di mo kelel a uchul a dekel. E mo orekedii el melebeakl er ngii. E mereko e otebur me ng chemiis.

KODELLEL A NGELEKEL A RDECHOR

A irechar er se er a le dirk le beluu a Ngeruangel er a Ngcheangel e ng mle blul el diak lekired el menga deles. A ta er a klebesei, e a Rdechor a mlo er a chei ngii me a ngelekel. A ngelekel a mo lmangel el soal el menga deles, me a Rdechor a mocha dosengii a kelel a ngelekel. E a le merema er a beluu er a Ngeruangel e a rechad er a Ngeruangel a mocha melungel a chimorir. E a lebo lolungel er a ngerel a ngelekel a Rdechor e ng di berech me te nguu a ears el otungii er a chimal a ngelekel a Rdechor e omekall me ngka el buik a di lilangel el mo el mad. Me ng kmal mlomekngit a rengul a Rdechor me ng milrael el mo osiik a mesisich a olai el mo melemall er ngii el beluu. Ng mlo er a Ngetpang er a Ngerdubech me te msa a besos e dmu er ngii el kmo, “Ng diak di morriid er a besos e le ng metemall a beluu. Me ng merael el mo er a Ollei e millasem er ngii me ng di ultungii a medal a besos me ng di ngilelt a Ollei el mo er eou. Me a lebo er a Ngeruangel e ng di ulridii a besos me ng di ririid a beluu. E a Rdechor a mocha er a beluu me ng mengeiung er a ngelekel. A Ngeruangel a di blil a charm er chelechang.

KSAU ME A IUS

A Ksau a mle merreder er a Ngersuul. A Ngersuul a beluu er a Ngchesar el ngar er a btil a Ngerdorech el omoachel er a Babeldaob. Bek el kebesenge el lebo lemerek a blengur e a rengelekel a Ksau a mo mengoit a ulengall. Uche er a ltobed er a blai e a Ksau a mo mengelil el kmo a ius ng ngar er ker le ng mo el tomelleterir a rengelekel. A lsekum a ius a mla er a bita er a ongebitel e ng diak lebo el di merekmo bo el dibus.

A ta el kesus er a bla lebo lemechiuaiu a rebek el chad e a ius a mlo er a rebai er a blil a Ksau me ng oleker. A Ksau a mlekiis e mo mesang. A ius a dula er ngii el kmo, “sechelik ng ko er kmal soak tilecha el decham me bai beskak me ku kubang e lak temeleterir a rengelekem se el lebo longedub er a omoachel.” A Ksau a kolenge me ng ngiluu a belsibs el ulekngellel a ngduul el msa e le tia ikid a lousbech el omes er ngii e omtab er a ulochel. A ius a dula el kmo, “se el lebo longedub a rengelekem e ke dmu er tir me te lmechet a chiklir er a dui me ak mo medenge el kmo te ngelekem.” A rengalek er a Ngersuul a di mlo mengedub er a omoachel el lechotel a chiklir er a dui el leko te di ngelekel a Ksau el rokui. A rechad er a Ngersuul se el leues a belsibs el ulekngellel a ngduul e te medenge el kmo tia a olengchelel a beketaut el ulochel a Ksau.

MATERMELIIK ME A KIUESALL

(NGELEKETBUDEL ME A METECHELSEL)

A Ngeleketbudel me a Matechelsel a cheldecheduch el mlengai er a beluu er a Ngeruikl me a Ngerbechederngul. A Ngeruikl a ta er a beluu er a Ngchesar. A Ngerbechederngul a mle mechut el beluu er a Ngeremlengui el ngar er a delongelet a Ngetpang me a Ngermeskang. A rechisiabal er a leme e te mlo kie er ngii e milengeklii el kmo, “Yamatomura”, el tekoi er a Siabal.

A merredel er a beluu er a Ngeruikl a Techetbos me a kldorolel a Ebil Techetbos. Me a Tmalk a mle merredel er a beluu er a Ngerbechederngul e a mle kldorolel a Uodelchad. A ngklel a bechil a Tmalk a Dilmesekak. A ta er a ngiul a Ngeruikl er a mekemad e te millukl el mo er a Ngermeskang. Me te kie er ngii el chimo el beluu. Me te mla er se e a Ebil Techetbos a mechellii a ngelekel el sechal me ng milengeklii el kmo, Metermeliik. Me a lrengesa a Tmalk me a bechil er a Dilmesekak, e te mle oldingel er a Ebil Techetbos me a ngelekel e oldersa er a keai el merodel er a Materemeliik. Ng mle chetituokel e ng di Ebil Techetbos a kilinge, me te ngiluu a Matermeliik me ng mlo ngelekir. A Tmalk me a bechil er a lengura Matermeliik el me reme er a Ngerbechederngul, te kmal mle ungil er ngii le ng ko er a ulsirs el ngalek e tir a dimlak lomechell. E ng di mle kesai el buil er a uriul, e a Dilmesekak el bechil a Tmalk a dillang. Me ng mlechell er a ngalek el sechal me te mengeklii el kmo, Kiuesall. A Matermeliik me a Kiuesall a dimlak lsa el chacheroid a delongelir, me te mle kaukeroul e kaubeltikerreng er a chelsel tia el delengcheklir. Me a loika el meklunga el chad e te mle blechoel el obengkel a demerir el mo er a ked el mo menguml el ngar er a omesobel a tekoi er a klsechal. E dirrek el obengkel el mo er a chei, me te mengcheheled el dirrek el omesobel a tekoi el klsechal, me a demerir a kmal mle ungil er tir. E ng di klou el bechechelingaol me a klou el mekngit el reng, a mlo kie er a rengul a Dilmesekak el derrir tirke el ngalek. Me ng mlo er ngii a olitechel er a uldesuel, me ng mlo kmo mla er a delel e diak lsa el kmo milrodel ngalek. Me tia uledbechii a omerellel me ng mlo iimis el kakerous el kirir tirka el ngalek er a rolel a ulekeroul er a omengang me a bek el omeruul. Me a bocha le ua ise e se el longuml a Tmalk me a rengelekel e leme er a kebesengei e ngika el bechil a mo orreched er a klengoes el belochel e omechiuaiu er a rengelekel. Me a lemechiua, e ng mo okisii a mla er a delel el Kiuesall el me me ng mo ngiltii a ta er a medemedemek el belochel el nguu el msang me ng omengur e mechere a Materemeliik. Me lebo er a chei e leme a

lekebesengei me ng orreched el melul er a odimel a Kiuesall e mo okisii el me me ng omengur e mechere a Materemeliik.

A ta er klebesei, e a Kiuesall a okerei el kmo, “Chedil ngera me a Materemeliik a diak dolekiis er ngii me lomengur? Me a delal a dula er ngii el kmo, “Rungalek, kau a kulechellau me ke ngeleketchelsel a ngklem er ngak. E a Matermeliik a ngelekel a chimak, me ng ngeleketcudel a ngklel er ngak. Me a uchul me ng diak kulekiis er ngii el me omengur e le ng diak a chellechek el mo er ngii el ngalek.” Ng dirrek el dilu er a ngelekel er a Kiuesall el kmo, “Alii aika el tekoi a diak letekiungel e le ngmekngit a bo lodenge a Matermeliik me a ngii di el chad.” Me a ngelekel a mlo olab aika el tekoi. Tia el omerellel a derrir el mo er a ngelekel a mle berrotel el meketeket. E a ta er a klebesei me lengar er a che el me a Tmalk me tirka el teru el ngelekel, e te mle er a kekesus er a bekord el omesila obliil. Me a Matermeliik me a Kiuesall a ko er kmal mle mererengeringel a bedengir me te di mle mereched el mo mechiuaiu. E a bekord el ngar er a metuda klebese e a Matermeliik a mekekerkar e orrenge er a delal el oldurech er demal el kmo, “Mokisii a Ngeleketchelsel el me me lomengur e ak mla durur a odimel melaok el ngikel.” Me a demal a ulekelekel el kmo, “Ng tech a Ngeleketchelsel?” Me a chedil a mocha ngor el omengelulau e kmo, “Ng Kiuesall.” Me ngika el chedam a di mlo lmuk, e a bechil er a Dilmesekak a mocha olekiis er a Ngeleketchelsel el Kiuesall. A Matermeliik a ulerrenge aika el tekoi e ng di liluk el oumechiuaiu er ngii el mo lmuut er a lemerko el omengur a ochellel er a Kiuesall. Ng dirrek el liliut el rirengesii er a bo lemerek el omengur a Kiuesall el millekoi el kmo, “Mongilt a cheluch me lemengai a bul a bengud er kau. E le ngmekngit a obo bad er a bita er a Ngeleketcudel el Matermeliik el terengur a bum.” Me tia ikid e a Matermeliik a robeta a chiuosech er a medal e le ng mocha medenge el kmo ngak a Ngeleketcudel e a ochellek er a Kiuesall a Ngeleketchelsel. Me ng di rengul remel e melebedebek el kmo ngika el delemam ngera me ng ua ise el ko er a mekngite a omerellel. Ng di millatk el kmo ke le te me olekiis er ngak el mo omengur er a uriul, e a lechub e ng di dimlak solekiis er ngii el mo lmuut er a lemerema a Kiuesall el me er a dukllet el rengesii a nglil el longurs er ngii el nglil a medngedinge e iieta medal chad. E a Matermeliik a di mle mekerekar e ng tutunga el medebdbobd a telil er a klengerenger el ua lemlak el bad er a bita er a delal me demal. A Matermeliik a kmal mlo klou el rrau a rengul er tia el omerellel a delal er a Dilmesekak el mo er ngii me a ochellel. E le ng uluumera el kmo ngak a lulechellak ngika el delak e chelecha ngera me ng ua ise a omerellel me er ngak. Me ng kmal silchedeklii er a rengul tia el omerellel a delal

el mo er ngii el millebedebek er ngii el meketeket. Me ng usiik el kmo, ngera kmal uchul tia el omeruul e ng dubecha er a chelsel a delengcheklam.

Ngika el chebuul Matermeliik a di mle blechoel melebedebek er ngii er a bek el sils. E a ta er klebesei e a kmal klou el kerrior a mle metik er tirka el ongalek. Me ng mlo smecher a Kiuesall el di mle kesai el klebese e ng mad. Me a lengelel a delal a Kiuesall er a Dilmesekak el kirel a betik er a rengul el ngelekel er a Kiuesall el Ngeleketchelsel a mlo meketakl a bebil er tekoi er a rengul a Matermeliik el kmo ng dimlak lengar er a delel a Dilmesekak. Me tia a mlo uchul e a Matermeliik a mlo melasem el osiik er a kmal milechellii me a rekmal chedal.

Me a ta er a klebesei er a lleta el mo er a chei ngii me a demal e ng mlo e rouar a molech. Ngiluu tia el molech el loia er a ulebengelel a ulaol el bambuu er a bluuldang er tia el leblechoel el bad er ngii er a blirir. E mocha ousmecher er ngii me ng diak lomengur e di mechiuaiu er tia el dukllet er a bita er tia el molech. E a lengeo a sese el klebesei me lebedio tia el molech e a demal er a Tmalk me a delal er a Dilmesekak a kmo, “Ngika el bedio a telil el chad a kmeda a kodellel.” E ngii el Matermeliik a diak leblengur me ng mera el ko er a merberab a medal e ko er a dobenga a otengel el ko er tirke el medku el chad. Me a delal me a demal a di mengerdecha el kmo, “Tia el mlomerek el orengodel er a Ongos e ng mlad a ta er a ngeleked. E chelecha el mocha tmur er a Ngebard e ng sochera ngika el chimong, ngera kede tilemellii?” Me ng ua ise e a Matermeliik a di mengkekellau ku el ua lsa el obereda a rektel. Me tia ikid e a Tmalk me bechil er a Dilmesekak a mocha oderchii a chad me ng remurt el mo er a Ngeruikl el mo mesubed er a Ebil Techetbos e melai er tir el mo omes er tia el rektel a Matermeliik el dangesbuadel ku el rakt. Me a bocha lodenge a Ebil Techetbos me a Techetbos e te di mle mereched el kudmeklii a omerael me a kedmeklel a kemeldiil er a badek me a bekai el ilaot me a cheluch, e ng tuobed a klou el omerael er a Ngeruikl el cheldebechel a mle meradel er tir er a Ngerbechederngul. Me a lemerema e a Ebil Techetbos a mlo chelim rakt me ng mo er a bita er ngika el chebuul el smecher el Ngeleketcudel el Matermeliik. E a delal er a Dilmesekak a ua letilak er a mekeald el di ouedikel ku el ko er olecholt a ungil el omerellel me ng di mesisiou kuk kall me a ilumel el ousulecholt er ngii er a Ebil Techetbos me a remla er a Ngeruikl el me, el leko ng kmal betik a rengul er a Ngeleketcudel Matermeliik. A lengeo a ede el klebesei a Ebil Techetbos er tia el blai e a Matermeliik a okere er ngii el kmo, “Mechas, ke mla er mei?” Me ngika el mechas a kmo “ak mla er a Ngeruikl el mei.” Me a ldela er ngii el ua ise e a Matermeliik a kmo, “Mokodongii a delak er a Dilmesekak el me me kulekoi.” Me a lsbedii a

delal er a Dilmesekak e ng di mle mereched el me er a bita er a ngelekel. Me a lemerema e a Matermeliik a dula er ngii el kmo, “ Chedil ng soak el kolii a ta er a ngesur el demok me a kulengit me bom rad a kelek.” Me tia ikid e a delal a di mle mereched el toteklii a oruikl e rikarek er a mesei. Me ng ua besebasech er a chelsel a mesei me a dai a ua chibaselei el mo e me el merad a ngesur el cheberdil a dait el mo demok. Me tia el dibus a delal el mlo merad a demok e ng kmal klou el techall el mo er a Matermeliik me ng mlo ungil el lokerker er ngika el mechas el mla er a Ngeruikl el mei. Me ng uleker er ngii el kmo “Kau ngera me ke ngar er a Ngeruikl e a bo ksecher e ke me el me chelim rakt?” Me ngika el mechas a ulenger er ngii el kmo “Ngak a Ebil Techetbos el kmal milechellau me tirke el kimdilak el me a bebil er ngak me te kmal chedam. E kau a rrodel el me er tia el blai el di mlodars a keai er kau, me ng diak a chedam er tia el beluu.” Me a ldela el ua ise, e a Matermeliik a dula el kmo, “Ngak a diak ksecher. Kom di mo nguu a molech el ngar er a ulebengelel tia el ulaol el kbad er ngii el nguu el mo oitii. A uchul ak uluusmecher er ngak a di soak el mo medengelkemiu a rechedak me a milechellak. Me a klukuk, e ko mengedmokl er kemi e a ngiaos e ko mo remei er a Ngeruikl le ak mla mo mengedei.”

Me te mocha nguu a molech el mo oitii e ngii a merma delal er a Dilmesekak me te orrechereched aika el kelel a Matermeliik el ngesur el demok. E ng merma okisii me ng mekisa ngii el Matermeliik me ng ketengel el omengro el menga aika el demok. E dula er ngika el delal el kmo, “Ngak a mesisichang.” Me ngika el delal er a Dilmesekak a leko ng olecholt er a deurreng er ngii me ng mengedecheduch el chedechedo er a bita er a ngelekel me a Ebil Techetbos. Me tia ikid e a Ebil Techetbos a dula er ngii el kmo, “Ngika ngelekem el ko er mesisicha me a klukuk e aki mengedmokl er kemam e mo reme er a ngiaos. Le tia el rektel a ngelekem a locha di mle rakt bladek, me kid tia el dekasesenge e ng mesisicha a ngelekem.” Me ng mlo ua ise me a lemerema belsechel a omerael el sils e a Ebil Techetbos a mlo reme er a Ngeruikl ngii me a rulebengkel. E a Matermeliik a mesisicha me ng luueta er a smechel e ng di dimlak lobes er tia el tekoi el Ngeleketedbudel Metechelsel.

A bocha el kloulechad e ng mlo chemachel er a cheldebechel el sechal er a Ngerbechederngul. E kmal mle ungil a omerellel e dirrek el kmal mle kerkikl er a rechad er a beluu me ng kmal mlo chetengakl el chad me ng kmal mlo sorir a rechad er a beluu el rokui. Me ng kmal mlo orengesall a tekingel e ng di mla er ngii a tekoi el mle delekull er a rengul a Matermeliik el diak lobes er ngii me ng blechoel melatk er a biil me a lechub e ng biteklel el

kirel ngii el omeruul. E tia el omeruul a se teletelel a ulekeroul el lebla er ngii er a delengcheklel er a lekekerei. Me ngika el Matermeliik a kildur a beluu er a Ngerbechederngul me te mlo dmak e mlengerker me a remlo dmak e melakel a cheluch, me a remlo dmak el mélanges. Tia el ua ise el omengerker a millemolem el ngmai a ede el ulekesiu el biled a Ongos me a Ngebard me ng kmal mlo obdois a udoud er a Ngerbechederngul. E a Matemeliik a mocha oltaut er a uldesuel, me ng milrael el mo er a Ngeruikl el mo mesedem er amekemad el ngiul a Ngerbechederngul. Me a lsa el siiechang, e ng nguu a teliakl el mesterir a recheldebechel er a Ngeruikl. E ngii a nguu a ta el okesiul tia el teliakl el me er a Ngerbechederngul me ng mengedoked er ngii el omechur a klsel a belsechel a mekemad. Me a lekeda belsechel a mekemad, e ngii el Matermiliik el Ngeleketedbudel a melikinga er a beluu el kmo, “Kede ngmai aike el rokui el ududed el mo er a bai el rokui me kid me kede mo er a bai. Me kede ngmai el locha er a chimo el omsangel e somosem e ng ngmai el mechei. Le ak urrenges er a mekemad el me er a Ngerbechederngul e ng di mereched el mo er ngii, me dengai a ududel me kid a debo er a bai e ng mo beot a klekerngel a beluu. Me aki mongkar er a rechad e ng mo beot le te di kldibel er a di telkib.” Me a rebeluu a kilenge me ng dula er tir el kmo, “Chelecha el me el buikruu e kid a ngar er a bai el rokui e somosem a ududed er a chimo el omsangel e ngmai el mechei. E ngar ise e mo imiit a buil er a orakiruu e a lemlak a ngera el dubech e kede kuk mo kairirei.” A Matermeliik a dilu el ua ise e le orakiruu a mle ngii a ulebongel el teliakl el belsechel a mekemad el mo er a Ngerbechederngul.

A rebeluu mlo oumera tekingel a Ngeleketedbudel Matermeliik, me a buikruu e te mlo er a bai el rokui me a ududir a milsemosem er a chimo el omsangel. A Matermeliik a ilsimer a rokui el tungelel a bai e di mlo mechere a chimo el tuangel er a medal a bai el belkul a kmo lak di lebeot el ngoech a mekemad er a bai. A rebeluu mlo oumera er ngii el tekoi me te kilenge el mo ua ise. Me a bocha lekukuk er a kebesengei me lorakiruu e a Matermeliik a di metebetobed ku el mo er rikl e me er a bai e mo rrikil e me er a bai. Tia el tebedel el mo rrikil e me er a bai a oldingel er a mekemad. Me a lemerema mekemad, e a Matermeliik a mocha mengelulau er tir er rrikil me te iueklii a bai e ng kmo, “Se el ktuu er a bai e knguu se el omsangel el tuobed e a kmo kiderii ongurs el kmo, E a chedam, chedil mochotii er ngak ngar er ker a Ngeleketedbudel Metechelsel!! E kemiua metutii a ngau er tia el bai el okngemedii a ngisel a Ngerbechederngul el di mo diak a ta el ngar.” Me ng mlo ua ise el di mlotirakl a tekingel a Matermeliik me tia ia

uchul e ng mlengai a beluu er a Ngerbechederngul el di mlo diak lebeluu el me lmuut er a chelechang.

Me a utebengall el suobel el denguu er tia a kmo: A doungalek er a rrodel me a mla er a deled e ng kirel di ta ulekerreuil a klengelakel.

MECHUTEDIL

A belkul a tekoi el “Mechutedil” a mlengai er a cheldecheduch er a Ngebuked er a Ngaraard. A Ngirchedelchil me a ochedal er a Mechutedil a kmal di teru el ochad el kilie er a Ngebuked. Ngika el ochedal a mlo bechiil el mle telkib el cheroid a delengcheklel er a chelsel a beluu er a Ngebuked. Ng mlo bechil a chad er a omengereel el suld. Te olterau aika el suld e ko er a mengkekedmokl a udoud. A Mechutedil a diak lesa el klebokel el dil, me ngika el ochedal a dimlak lesa el betik a rengul er ngii. E dirrek el ulemdasu el kmo ngika el Mechutedil a chelsengsa a bechil el di omad a suld e di melechotech a chau, ngera ng rullii?

A Ngirchedelchil a kuk melenges a me ng melikik er a ilaoit e olab el omeka a obliil, e diak letkii ngika el ochedal. Ngika el ochedal me a bechil a ko er a di mengebuul, e ng di kmal ko er a meduch a rengul el redil me ng mengedmokl a ududir. A ta er a klebese e ng mla er ngii a seked el mocha subechii er a cheldebechel er a Ngebuked el ngar er ngii a Ngirchedelchil. E tia omengkad el me er a beluu er a Oreor. Me a bocha el belsechel e a Ngirchedelchil a dirkak el betik er a mo bleketelel el udoud. A omerael a metengela el me er a Klebeang e ngii a dirk ua berius er a chelsel a beluu, el ua el tilak er a mekeald el kolekel el mo er a telia el beluu el mo er a telia el omed a udoud e le ng dirkak lebetik er a mo bleketelel me a omerael a di ua ngera me te mocha orreched er ngii. A ochedal er a rrengesa el ua ise el kmo, ng di meklenga er a chelsel a beluu e ng mocha kudmeklii e ngmai a sese el kerrekerengir e merola el mo er a Klebeang. A lebo e ng mocha ulecheuekl er tia el teluo el tang er a diangel er a mo bedul a beluu e ko er a melbedebek el kmo a ochedak a merur er ngak me a bo kcholt er ngii er a seked e kelel sebek a telil.

A Ngirchedelchil a ko er a di ileakl ku er a rechad el di mengeanged a medal e telcholb er a klsib. E a Mechutedil a berrotel er tia el tang el omai er a rengul el omekedo er a ochedal. E a ocheda a ko er a mlo ileakl e chisngekl me a Mechutedil a omekedo er ngii me ng merola el mong. A lebo e ng okere er ngii el kmo, “Ng mla mo ungil besum?” E ngii a kmo, “Ng dirkak.” E ko er a deuall a medal. Me a Mechutedil a dula el kmo “Aika kid a udoud, e ngak a di kikiongel e redil el ochedam.” Me a Idela el ua isei, e a Ngirchedelchil a kmal kildesii a telil e di mle mikoik el lilangel er a deuil a rengul, e mesbeda a rengul er a omerellel. Me a Mechutedil a

mlo belkul a tekoi. Me a belkul a tekoi el mengai er tia el cheldecheduch a kmo, ng diak douketui er a mengelengalek el ochedad me a rechedad.

MEDACHELBAI ME A UCHULACHETIU

Tia cheldecheduch er a Tebelak er a Ngardmau. A Uchulachetiu a ulechell er tia el blai me a Medachelbai a ochell. Kede mo ousbech er a Ngiratebelak me a ngelekel me a ochellel el mo meketeklii tia el cheldecheduch. A Ngiratebelak a ngar er ngii a ngelekel el Uchulachetiu e dirrek el ngar er ngii a chebedel a kesol er ngii el Medachelbai e te dmak el kiei. A Medachelbai a chad er a omelenges e a Uchulachetiu a chad er a omilil, e dirrek el mo er a omenged e mei. Ng cheleoch el ngalek er tia el blai.

A ta er a klebesei e ng dilubech a ta el omeruul el ngar er a chelsel tia el delengchokl el ngika el chedil el milechellii a Uchulachetiu se el lebo er a meselech e leme e loliokl e ng bliongel a oruklir el tedei el ongalek. E aike el ko er a obei me aike el ko er a kllel a uek me a misaker aike a mo er a oruklel a Medachelbai. Aike el ngellitel el kukau aike a mo er a oruklel a Uchulachetiu me a mo er a oruklel a demerir. Ng kakerous a oltekiall el oltak er ngii er a reakl. Me se el lemei a Uchulachetiu e ng mo otengelii a oruklel me ng omengur e kuk merael me a Medachelbai me ng ua ise se el lebe lomengur.

Se el leme a Uchulachetiu e ng omengur el mesisiich a ongulel e le ng ungil el kukau. A Medachelbai se el lekuk leme e lomengur e ng misaker a ongulel me ng chetituokel a omengelel e ngii a orreched el mo mélanges me ng di uluutekangel el kemanget el klebesei.

A ta er a klebesei e a derrir a mileiolkl e riruul a kelel a Uchulachetiu el ungil el kukau el locha er a oruklel e ngmai a kelel a Medachelbai el ike el ko er a ulellitel el locha er a oruklel, e ng di lebo loltak e ng milecheuid. Ng ngiluu a oruklel a Uchulachetiu el loia er a reakl er a Medachelbai e kuk nguu a oruklel a Medachelbai el loia er a reakl er a Uchulachetiu. E tir a merema me a leme e a Medachelbai a millenges el me me ng tucherakl a omilel e mo er tkul a olbed me ng merorem er a olsengel e a Uchulachetiu a merema tmuu er a blai el mo omengur. A lebocha e ng mlo otengelii a oruklel a Medachelbai e a lenguu el me me bo lebechedii e ng obei me ng nguu el subechii er a bita el kboub. “Aika te ngera el chad a menga, aika diak lekelir a rechad,” e a bo lenguu a ta el me e ng misaker el lebetir e ng di mui el ralm, me ng nguu el torakl a ulekngall er a chab e kmo, “Ng tech a menga aikang?” A Uchulachetiu a milechebechebii ngii el chimo el oruikl el mridii er a ulaol e oungerelang el kmo, “Aika a diak lsebechir a rechad el mengang.” A Medachelbai a rireboreb er a tkul a olbed e merorem er a

olsengel e kekere el melekoi el kmo, “Bom cheremii a oruklel a Medachelbai.” E ngika el oktemelel el ngar er a blai a orrenge es er ngii me a lleta er a ongeru me a ongede e ng ua se, “Errang ngera ke melekoi?” Ng diak ak merorem er a olsengek,” me ng mo chelellakl e lmuut el omechederenges er ngii. E a lorrenge es er ngii e ng kmo, “Kau bom cheremii a oruklel a Medachelbai.” Me ng dula el ua se, “Ka me errang me doleko.” E a lebo e ng okere er ngii me ng dmu el kmo, “Tia ikid a teletael er a blengur er tia el blai.” A oumesingd el kerreker el udoud el ngar tia el blai a kerrekerngel a Medachelbai, el ngii el chad er a omelenges me ng mla chitinget a olbedabel el kerrekerngel a uchul. Tia el lebocha lodenge ngika el oktemelel e a bocha el kebesenget me belsechel a belsoil e ng morkedii ngika el Dirratebelak el choklii. Ng dula er ngii el kmo, “Ke le mluut el ua ise er a rengalek el ngar er ngii a ko er a ungil a blekerdelel me a ko er a chomsa el meterkakl er ngii.” Me ng di dilu el ua ise e ngii el rubak e dirrek el lilecha er a rengul. Me a ko er a bocha el dibus a Uchulachetiu me a delal el mo diak a chad er a blai e ng mocha okerir ngika el chebedel a kesol er ngii el me e mo nguu a olbedabel el me e dula er ngii el kmo, “Aika el udoud el ngar er a chelsel a chomngai, kau mekekii er a chidudes.” Me a Medachelbai a mlo er a ked er a Ngetilai me ng remuu a chidudes el me mekekii a olbedabel e tingetii e nguu el mo mecherei.

A bocha el secher ngika el rubak el medei, el nguu a olbedabel a Dirratebelak me a ngelekel er a Uchulachetiu e lollodel er ngii e ng di chidudes er a Ngetilai el diak a ta el mera el udoud er a chelsel. Me te di mle mrotech a ulurir e mengeanged a mederir e kmo, “A uisek er kid.”

Tia belkul a tekoi el kmo, “bom cheremii a oruklel a Medachelbai” A suobel er tia el cheldecheduch a kmo: A doungalek a rechad e ng diak a olitechel a klengelakel.

MEDECHIIBELAU

A ta er a klebesei e a Medechiibelau a ngar er a Irrai e orrenges er a debusech el di mechael. A bo lungil lorrenges er ngii e ng ngar er a Ngerduais. Me ng dmu el ua se, ngak a chelid er tia el beluu e tech a kuk di melebusech.

A ta er a klebesei e ng merola el mo er a Nglong el olekerodel er a Irrai el ngar er a mo bedul a ongos. Me a lebo e ng ngar er ngii a chad el Ngirkosolik a ngklel el melasech er a mlil. Me ng dmu er ngii el kmo errang, Ngirkosolik ng diak me debo er a Ngerduais me desa se el debusech el di mechael. Me a Ngirkosolik a ua se errang chobo e ng ko er a diak a mlid. Me a Medechiibelau a ua se bechere, e ngii di mkengei a lsekum e ng sebechem el mong. Bechere e kede mong. Me a Ngirkosolik a dula er a Medechiibelau el kmo mada msall e bok bechere tia el ebeklek. Me a Medechiibelau a ua se me me bo kliang. Me ngika el Ngirkosolik a chomdesua el ua se cherei e knguu el msang e a lta ng ko er a mereched el merael. Me a lenguu el msa e ng di ngiluu e nguu elトイuelchii. Me ngika el Ngirkosolik a kmo errang tia di teluo el ebeklek e ke choitii e ngak a mekerang. Me ng kmo ng diak, se kid el mla suebek el mo berriked er a chado er a blim. Ng okor e ngika el Medechiibelau a dula er a Ngirkosolik el ua se ak mochu er uchei e kede merael el di merael er a bebul a daob. Me ng diak el sebechem el melodech er a omerolem, ke di omekesi a blekeklek. E le lebo lengodech a ochim e ke ruebet. Te okor e metengel er a daob e merael me a Medechiibelau a okiu uchei me ngika el sechelil er a Ngirkosolik a okiu uriu. E ng merael mese lenguu a ochil e a Ngirkosolik a mo loia a ochil. Me te merael el mo el mo er tia el toachel er a euuchel. E ngii a melias a chimo el meluis el me el me engelakl me ngika el Medechiibelau a mdechemii ngika el meluis el me e chumur a ngerel e nguu tia el chelechedal el choitii e ngii a nguu a ngerel e te merael el mo er a chimo el tkul a chelebacheb el medal a taoch el mo er a Ngerduais. Tia el tkul a chelebacheb a Soskemedukl a ngklel. Me a lebo e ng dmu er ngika el sechelil er a Ngirkosolik el kmo a rrach ke di reborb er tia el tkul a chelebacheb e choielak e ak mo er a beluu me ak mesa ngike el di melebusech el kmo ng techang me ak me e kede merolung. Me ngika el Ngirkosolik a mo dengchokl er tia el uchul a chelebacheb e ngii a merael el mo er a beluu. A lorael el mo er a beluu e ng mo el mo ngmasech er tia el kerodel e meebed er a kebeas el mo ubuu me ng medelii tia el kebeas e dmu el ua se tia

mera el chetik el besebes. E nguu el choitii er a daob. Me chelecha e a Ngerduais a diak a di ta el kebeas el dubech er ngii.

Ng okor e merola el mo er a beluu. Tia el loriael el mo er a beluu e ng ko er a diak lodengelterir a rechad me ng ko er a merael el omes aika el obliil e mocha touchakl er tia el chimo er a obliil. E a lebo e ng ngar er ngii a ta e mechas el ngar er ngii me ng ua se chedei e ng di kau el tang, me ng kmo choi ng di ngak el tang. E ngika el Medechiibelau a mla rullii el kmal mo ko er a besokel e ko er a mekngit el chad. Me ngika el mechas a ko er a omes er ngii e kmo ngika kuk chad er ker el ko er a besekesokel e meremang. Me tia ikid e ng okere er ngika el mechas el kmo, mechas ng diak a ngelekem me ng kmo ng diak, ng diak a ngelekek e rungalek me ak kmal chebuul. Kemam a rechad er a Ngerduais a meruul a kelel a Semdiu e se el lolebusech e aki olab a kles el mong. Me se el kibo e a rengar er ngii a rengelekir a ungil le te olab a klsir el mo e ngak a diak a olab a klsik me ak di oldurokl er a rebek el ngelekel tia el beluu. Me ng ua se chedei ng diak leme me bo kulechang. A rungalek ng bai mera bo e ak chebuul el diak a ngmai a klsik. Me ng okor ngika el mechas a mocha remuul a kall e ngii a lueta el mocha er ngii a debusech me ng mocha ngmai el msa ngika el Medechiibelau me ng ngeoe el merael. Ng mlo el mo teloi er tirka el bek el ngalek el redil er tia el beluu er a Ngerduais. Me a loriael el mo e tirka mo blechobech e ngar er ngii ngike loked er ngii e ng ta ocherir el lomakes. E beldoel aika el kall el belsiochel. Ngar er ngii aike el dedu el kmo ng beldebud el ngar er a bebul el besichel se el du el kmo ng beldebud el lruul el bung me a meolt el lruul el ko er a besiich el ngar er a bebul aika el kall. Me te merael el mo er a blil a Semdiu. A blil a Semdiu a ngar er a bab el kede mo el mo er a uchul a chelebacheb e ngii a ii el ngar er a bab. Ng reboreb er a chelsel e kede mo el mo teleblechobech e merael el mo er a tia el uchul tia el rael el mo e mereko e mo kauderta er tir el mo ngmasech er tia el ko er a terebel el mo el ngmai el otuu er a ii. E kuk me metengel e ng kuk mo ta e kuk me metengel e ng mo tang. E ngika el Medechiibelau a kmal mlo uriul. Ng kmal rirelii el kmal mlo er a btil a omrael. Me tia er a lebo lengasech e ng di ultuu a kall e nguu tia el ngerel a meluis el luleba el nguu subechii er a Semdiu e toteklii e mereko e oterkii el nguu el mdesii er rikl me ngika el Semdiu a ultuu tia ngerel a meluis er ngii e mo moii er a eou. E mereko e ngii el Medechiibelau a tmuu el lmuut el nguu tia el debusech el me me ng melebusech e ngmai aika el kall el me me ng mengang. Ng di milkodir a Semdiu e mereko e omengur el mo merek e me metengel el merael el mo er a blil ngika el mechas me ng mocha melmesumech er ngii el ua se, chedil ngak a merolu el mo er a

Irrai e mla mo diak mluut el meruul a kles e le ng ngike el mulruul a kles el mo er ngii a bla kukodir.

E mereko e me me ng omais el mesarech er tia el beluu e mla obes er a sechelil el dilu er ngii me ng dengchokl er a uchul a chelebacheb. Me ng omais er a chelsel tia el beluu el mesersarech er ngii el mo el mo e lotkia me ng ua se chang a sechelik el kim dilak el me a bla kubes er ngii. Me ng merola e kmo ka hall e kbo me kisa e kibo mrei. A lorael el me e ngika el sechilil er a Ngirkosolik a mla obail er a chuld er a chelebacheb el me lmuut er a chiklel. Me a lorola a Medechiibelau el mo e ng di tia el chiklel el me er a bdelul a ultom. Me ng di milrael me ng e kmo, errang kau ke di reboreb e obail er a chuld e mereko e oreked aika el kirel a uchul a chimal e di milached e otebedii. Me ng di ultebedii e dula er ngii el kmo kau errang a mla mo diak mNgirkosolik. Elecha e ke di mereko el mo Rechuld me chelecha e ng mla mo diak a Ngirkosolik. Te omekeido er ngii el kmo Rechuld. Me chelecha tia ikid el ngakl a ongeua el dui er a Irrai. Me ngike el ongeua el dui er a Irrai a Rechuld a ngklel. E ngike ikid ngike el mle Ngirkosolik e obail er a chuld. Me a Medechiibelau a milengii e otebedii e mokodongii el kmo Rechuld me se ikid e te omdelid er ngii el me lmuut er a chelecha el sils.

MELAMITOI

Tia a cheldecheduch el mo er a Ngchemiangel er a Beliliou er a lemengai er a mekemedil a Metukeruikul er a Ederbei el modorech er a Bungelbeluu el rubak el dil er a beluu er a Ngerdelolk.

Tia el Ngchemiangel er a Beliliou er a lemengai er a mekemad me le meterakl e ng dilanges el me er a Ngchemiangel er a Imeliik el rengedel a Ngerkeai. Me te ngar er ngii el sumechii a delengcheklir e kiei e dirrek el di oltirakl a telbilir el mo mengol er a Oikull el rengedel a Irrai. Me te ngar er a Ngchemiangel er a Imeliik e mo mengol er a Oikull. Me a lebo a klomengelungel er a Oikull el metouch a cherroakl me lebo el mutebechel a remengelngir a reklobak e a delal a Melamitoi el redil er a blai er a Ngesiliong a mlo mengelngel Ngirchoiaol.

Te kie e a lemerko klomengelungel e a delal a Melamitoi a mlongebet el mocha bechil a Ngirchoiaol. Me te mocha kaubuch me te kie el mocha meketeket e ng mocha dioll er a ketengel. Me ng kie el mechucher a bilel e mechell, me a lemechell e ng sechal. Me ng mengklii el Melamitoi. Te kie el mo meketeket e ng lueta el mo dioll. Me a lemechell e ng redil me ng mengklii el Kerungil a ngklel. Te kilie el kmal dmeu a rengrir el teru el lobekel e le ng kmal ungil a beldekkel a cherellir el ulukot er a sechal e a ongerual a redil. Me te omekeroul er a rengelekir me lesa el meklunga el mla mo sebechir a delengcheklir e ng mlo er ngii a ta el kerior er a chelsir el mlo smecher a derrir el kmal di mle mereched el mo er a kodall me te kmal mlomekngit a rengrir e mocha kudmeklii e mo doklii. E tir a kie tir me a demerir el mla mo sebechir el ungil el mengedmokl er a demerir. Me a demal a Melamitoi a ungil besul. E ngii a mocha mecherar a kebel a ngelekel, e le Oikull el beluu a chimo er a oungoao el beluu. Me te kie e mocha ongos el mocha belsechel a remo oungoao, me te okor e mengedmokl a kebir a rebek el chad e mocha tuob. Me a Melamitoi me ng dirrek el mengudel er a kebel e otebedii el mo er a meang el koi, e mengiil er a tekingel a Ngirachitei el merreder er a Oikull, e le ngike ikid a melamioi er a remo oungoao me a lechub e ng diak, e ngike ikid a oltobed a tekoi e te oltirakl er a telbiil e mo er a ngoao e a lak e ng diak. Ng lruul el tekoi er a rechuodel el ua ise el diak lebo el ngodech. Me a lebocha er a belsechel me

Itobed e te di oltirakl er a kaeb el ngar ngii ngika el melamioi, el diak lebo er a uche er ngii me a diak lebo loeak a kedesomel er ngii. E le otaor el osiik a oba ngikel el diak dechelebii e le ng mo diak a ngikel er ngii. Me kid el mlo ounagoao a di mo diak denga ngikel el rokui, e diak a ta el kaeb el mo ungil. Ng lruul el tekoi el ua ise me a rebek el mo ounagoao a klebadel a dingerir el ua ise. A Melamitoi a ketengel mo ounagoao me a rengul a kmo ng ua di omenged el di dekakerous a tebeded el di kid el osiik a cheldid. Ng ngilasech er a kedesomel e remurt el chuelb a otaor me ng di mlo diak a ngikel er a rokui el kaeb.

A Ngirachitei a kmal mlo kesib a rengul me a lemerema e ng kmal mlo meringel el choklii a Melamitoi e dilidichii el kmo, “Ngelekel a mengol er a Beliliou.” Me ng miltord e chotekir a chochedal er a Kerungil el mo er a Ngersuul el mo msa Ngiramoai e kmo, “Ngika ochedak me loderchelem, e ngak a mo reme er a Beliliou e le te mla didichak.” Me ng kilie el milsuub a tekingel a urrurt el mo medenge e mo reme el mo er a Beliliou.

Me a lebo e ng mlo kie er a Iretech el blai el mo soiseb er a kebliil er a Ngesiliong el tia el kebliil er a Ngesiliong a mla kaingemengemed a rochell me te di ulechell el sechal me a redil a klekar er ngii el delengchokl e merekong. A dui el Itbik me ng ulechell el chad a telechull er ngii. E a irechar e ng mle mekudem el tekoi er a rechuodel, ngike el mo tuchelii a kebekuul a mo er ngii olechotel el mo melobech er a bai er a klobak e mo rubak. A Melamitoi a di ngii el medenge el kmo, ngii ochell e diak lesebedeterir, me te di cheleuid er ngii e le ng mlo klou er a ta er a beluu e me me ng diak a medengelii. Se el lemeseked er a bai a reNgarmululau el rubak el melobech er a miich e ngii a kmal chetil a dikesel a Itbik a lenguu el mo er a ulechell. Me ng smaod lidel e merael el mo sibeklii a ubeng e merberii a deliukes e dirrek el diak losubed me a rechad a kmo “Dengerenger el kandidai a rengul,” e a lechub e te diak lodengelii.

Te oske a cheldechulel a kodellel e ngii a milsuub a rolel amekemad me ng meduch. E a Beliliou a ngar er ngii a Ngirakidel me a Edebedangel me a Edemeseb. Tirka el tede el chad a kuk medal a urrurt er a Beliliou el ousbech er tir a reBeliliou el rokir. Tirka el chad a medekda a rengir er ngii e le ng mla tmuu el mektekterir me ng dikea dmu tekingel er ngii. A mechas er a Ngerbeluu a oderchii a oderchelel el me er a Ngerkebesang er a Ngiralulk el meduch er a uloech, me a lemerma otekil e ng mocha ngiltii er a chelsel a ulochel a di mle teluo e nguu e te mocha omekall. Me a lebo e ngika el mechas a kmo: “Rungalek, ng kmal

suebek a renguk e ke nguu a di teluong?” E ngii a kmo, “Ng di ungil e ng di tutau me lebo er a belsechel e a ta er a rengalek a mo otii e ngmekngit a demecheuid.” Me a bo el tutau e ng mocha er ngii a diu er a chemtochet el loleongel er a beluu, e ngii a rirengesii me ng kmo, “Ng meremang.” Me a Ngiralulk a dula, “Mechas ng diak lsebek a rengum e le me ta er a rengalek me bo lochotii.” Ngike kid a chomdak el mong.” Me a mlo olecholt er ngii a di mle cheroid e kmo, “Ngilecha kid.” Me a Ngiralulk a chitutii a uloech er a chetkongel e kmo, “Bo mdu er a mechas el kmo, bo mesang.” Me ngika el mlo olecholt er ngii a kmo, “momoech, mekisang e bo kusubed.”

Me a Ngiralulk a mechii el di silbechii er a uchul a tul me ng di mlo ubuu e dimlak lomadel er a balech e kmo, “Obedelii e ak mad.” E ngii a mocha Itbik me ng di mlo mesang e te mocha kaiueturek a chesols, me te mlochu medengelii el kmo ngii a ochell.

MELUADCHEANGEL

A irechar e ng mla er ngii a ta el chelid el ngklel a Meluadeangel el kilie er tia el beluu er a Ngcheangel e menga er a rechad. E se el lebo el sengerenger e ng me er a beluu me ngmekodir a chad a nguu el mo er se el lengar er ngii e kolii. Me a Isa el beteknga rechad el mengai er ngika el chelid e a rechad er a beluu a mocha omart er tir el diak lekeie er a blirir, me a diak loliokl a kelir e le te bekikl a loues a chat a Meluadeangel. Me te di oumesingd el menga rodech me a chemadech el kall.

Me a Isa el klunga chelebuul me a klengerenger er a rechad e te mocha kaokedo el mokldibel e kakerker er a beluu el lechiis el mo er ngii. Me a rebebil er a rechad el ngar er tia el kldibel a dula el kmo bai di dechiis e ke rdi mochu metik er a debo er ngii, e a dengar er tia e kede nguemed. Me te tilbir el kmo a milkolk er a tutau e kede mo oldiderek e merael el osiik er a debo er ngii.

Me tia el melekinga tutau e a rechad el rokui a mlo er a kederang e mocha oltak er a Kaberruuch e mo meius el mo bedul Belau. E tia el tutau er a lebo loliderek er a Kaberuuch e ng mlo er ngii a klaititekangel er a kmo kede nguu ngika el mechitechut el mechas el Delumumu a ngklel, me a lechub e ng mechoit. Me a rebebil er a rechad a kmo dechitii, e le ng ngika el mechas a mechitechut e di mesobil, me a uchul me te chilitii a kmo ng tech mo mengedmokl er ngii er a Kaberruuch. Me a rechad er tia el beluu a chilitii ngika el mechas e mo meius.

Me a bocha lodenge ngika el mechas el kmo ngak a mechita er a omerael, e ng kmal mlo mekngit a rengul, me ng lilangel e kmo, ngak a ke le ak mocha kelel a Meluadeangel.

E tirka el chad er a Ngcheangel er a bo loius e te mlo er a Belau el luludesbedall. Me te meius el melengelakl a beluu e a lebocha er a Ngchesechang e lomes e ng ko er a sorir ku el beluu me te toucheckla me te kie er a Ngchesechang. Me aike el dui me a beldekkel a klobak me a deruchall a di lullab e kie er tia el beluu.

E ngika el mechas el Delumumu er a lemechoit e ng kmal mekngte a rengul, me ng dektel er a Meluadeangel, e ng merola el mo er a iikr er a Ngedoko me ng kie er a eungel a otaor. Me ng kie e kmal medakt me ng diak longuml a ngau, e di menga chemadech el kall me a berdel a ngerel a mlo cherou er a omenga el chemadech el kall. Tia el chelebuul el le mla er ngii ngika el mechas a milkrolii a lusech, me ng dimlak lebechiil e mo dioll e mechelleterir a rengelekel el

teru el sechal. Me a lemechella er tirka el ngelekel el sechal e ng locha lusech a uchul me tirka el ngalek a di omeka klebesei el mo meklou.

Me tia er a lemeklunga tirka el ngalek, e a ta er a klebesei, e te okere er a derrir el kmo, “Chedei, ngera me ke mekreos er kemam a kibo er a beluu el mo milil, me kid a di menga a chemadech el kall.” Me derrir er a Delumumu a melekinga er tir el kmo, “A rengmiu e rengelekei ng klebokel el tekoi a dengar er ngii?” Kid a uchul me kerdi ngar er tia a milechoit er a omeius er a lechiis a rechad er tia el beluu. Te chilitak e le ng dimlak lsorir el mengedmokl er ngak e le ak chebuul e mechitechut me ng chetirir a kungesa er tir. Me te milechikak e kmo bechere me lekelii a Meluadeangel. E tir rokui el chad er tia el beluu a mo meius a kaberruuch e omekall el bedul Belau.”

E mocha ouchais er tir er a dakt me a chelebuul e le bla er ngii me a blekerdelel ngika el chelid el Meluadeangel. Me a louchisa a derrir e tirka el teru el odam a kmal mlo mekngit a rengrir er a derrir e mocha melib a kodellel a Meluadeangel.

Me a ta er a klebesei e ngika el klou el chad a dula er a ochellel el kmo, kid a mo omngar. Me te omngar er a bek el sils el me mengudel er bita er a Ngerdoko. Me a bek el sils e tia el cheldull el idungel a di merael mo kedadai. Me a lsa el kmal klunga tia el cheldull el idungel, e ngika el klou el sechal a kmo, chelecha e kid a kuk mo olengakt a bad el me mengididai er a delul aika el idungel. Me ng dirrek el mle urrerir er a bek el sils. Me a bocha el lungia er a rengrir a klungel tia el cheldull el idungel me a bad e te ulemkokl er a ta el tutau el chumlii a ngau er ngii. Me a lekerda el ngukokl a chat el mo er a bab e a Meluadeangel a di chilsngekl el mesa e kmal ulecherchur e kmo, “Cholekoi, a kmal songerenger e aika ng ko er a kall el Dirk ngar er ngii.” E oldiu e mo merael el bedul tia el chat. E tirka el teru el odam a mla dmeu ochadu e ngmai me te olab e reboreb er a bita er ngii el ngau. Me a lorael el mo e tirka el teru el odam a mla ngmai a ochadu me ng di mla er a cheroid e te mesang me te mo midokl aika el ngau el bad el mo er ngii. Me se el lebideklia a chimo el mo me ng sosechii a ngerel el medir er a bab el merkeklii. Me ng di omerkakl aika el bad e di olekeed er tirka el teru el odam. Me a lsa el kmeda e tia el delel a kmal klunga e sokol mongkangk, e ngii el Meluadeangel a ko er a chilsngekl, mengika el kekerei a kmo, “Ng medei” e a lechub e ng kolekel el mo er a ikrel a Tngel e ngii a kmalmekeda tia el delel me ng mongkangk a bita el delel. E ngika el chelid a Dirk chad, me ng mengelekel el lmuut el mo er a bita er a Ngerkesol e ng kuk mongkangk a bita, e tirka el buik a di mengelekel el okiu ullel. Me a lebo el mo tmurk e ngika el chelid a

blengkangk el lulekeuad. Me te mocha sodelii a nguu a delebekul e merael el mo er a Dimes el mo mesubed er a derrir.

Me a lochotii tia el delebekul ngika el chelid er a derrir e ng dula er tir el kmo, "Mnguu el loia er a toluk e mnguu el mo er a Bas e mdu aika el tekoi er ngii el kmo, "Morael el oukeiukl e moudesbedall el osiik er a Rdechor me a Obakrusong, me a Spis, se el bo betik er tirka el chad el du er kau el kmo ke delebekul a Meluadeangel e kobsuus, e mnguu el mecheklii." Tirka el ngelekel ngika el mechas a nguu ngii el toluk el ngar er ngii tia el delebekul a Meluadeangel el mo er a Bas e mecheklii.

Me tia el toluk er a lebecheklii e ng nguluu desbedall el mo kirel a taoch er a Ngchesechang e a leme e ng keriik me a dolech a nguu el losisebii er a chelsel a taoch e mecheklii el nguu el mo er a beluu. Me a leme er a beluu e a rengalek a mengedub e mesa el becheleleu el ombibechakl me te okor e mo nguu. E a lebo lenguu e ng diak ledengchii el kmo ngerang e ko er a medekta er ngii e le ng kluk er a toluk. Me te okor e nguu el mo er a bai el le kldibel er ngii a rubak. Me tia er a lenguu el me er tirka el rubak el meseked, e te mocha omasech a bek el delebekul a ngikel me a chelid e ng di diak lobsuus. Me te mocha ko er a melebedebek e a ta er a rubak a dula el kmo, "Ke le ldelebekul a Meluadeangel?" Me te okere er ngii el kmo, "Ke delebekul a Meluadeangel?" Me tia el becheleleu el klalo a di ulubsuus el di mlo kekere a toluk. Me te mocha medenge el kmo ngike el chelid el Meluadeangel a mla mad. E tir a mocha nguu tia el toluk e lebla er ngii e nguu el mo doklii er a Chis er a taoch er a Ngchesechang.

Me a bocha lodenge tirka el chad er a Ngcheangel el kmo ng mla mad a Meluadeangel e te mocha omdasu a rolel a luut er tir el mo er a Ngcheangel. Me ng milekedmokl a mlai me a kall e te lueta el mo ngmasech er a kaberruuch e mo omkall. Me a lomekall e te mlo er a beluu, e a lebong e te di mla er a cheroid e mesterir a teru el chad el dechor er a chelechol. Me te ko er a melangch e melechedech el kmo cholebo e kede ririid e ko er a kmal dimlak a chad el kilie, ng di mle ta el mechas el ko er a kmal mechitechut el locha di durrael e ng mad. E tirka te ngera el dechor er a chelechol. Me te melechedech el ua ise e mocha kmeed. Me a Isa el kmeda er a Bas e ngika el kot el klou a melekinga el kmo "Kom di omak er tilecha e olengull el telkib e osiik er a beluu el bo er ngii e le beluu a belumam.

Me ngika el merreder er tia el omerael a tometii el mo dechor e mocha meluluuch er tir. Me ng ngomasech a betok el tekoi e tirka el buik a di diak lekengei. Me ng dula el kmo,

“Becherei me kimeko mkerd e kemu el teru el odam a ngmai a omerreder er a beluu. Me kau el klou bom Obakrusong, me ngilecha el lochellem lebo el Redechor. Me kau el klou el Obakrusong a mo er a Dilong me a ochellem er a Redechor lebo lorreder er a Dimes. Me a ldela el ua ise e ng mocha ungil a rengrir. Me a beluu er a Ngcheangel a ulebii me a Obakrusong a merreder er a Ngerdilong me a Rdechor a merreder er a Ngerdimes. Me a lengikel e a Obakrusong a klou el chad me ng menga er a btelul e a Rdechor a kekerei me ng menga er a kemril. E a rolel omerreder er a beluu e a Rdechor a kekerei e ng di merreder er a Ngcheangel, e ng di tirka el teru el rubak a ua lteru el merreder er a beluu er a Ngcheangel. Me aika ikid ngii el omerreder er a lemangai er a nglat el me lmuut er a chelecha el sils.

MANGIDABRUTKOOL

Tia a mlengai er a uldelid el cheldecheduch er a Belau er a rechuodel el kirel a cheroll er a Belau.

A kekedeb el omesodel a kmo: a Mangidabrutkoel a mle charm el ko er a chelid e chad el mla er a meduu er a Ngibtal el mle ta er a uades el beluu er a rechuodel el mla nguemed el beluu. Tia el beluu a mla er a delongelet a Melekeok me a Ngiwal e chelemoll er a elecha el sils. Ng mla er ise el me imuul er a Ngermechau er a Ngiwal er a chetebtel a iedel el uleak se el rekodellel a mangidab. E mo el mo, e ng mo er ngii a delongelet ngii me a Turang el redil er a Ngesechei me ng milsur el mo chad e mo bechil ngika el Turang.

A cheroll er a Belau er a irechar a kmal mle meringel e le buldiil er a redioll a mo uchul a kodellel. Se el bocha el kirel el omechell, e te omotk er a delel el olab a lild el oltobed er a ngalek, me ng oumesingd er a remlechell a mad. Tia el omeruul a klou a klekerngel me a osongel er a rebeluu se el lebo lomotk er a omechell. E ng di Mangidabrutkool er a bocha el bechil a Turang, e te di mle ileakl el teru el ngar er a ulengang, el cheridel a di kmeed er a blai er a Ngesechei. E ngika el Turang a kmal di mle mereched el mo dioll, me ng di mlenga a chelleoch el kall er a blai er a Ngesechei le ng kirel a kodall, e ng di Mangidabrutkool a di liluk e uleba a bechil el mo lmuut er a belsechel a cheroll. Me a bocha el lomechell a bechil e ng bekord melekinga tutau, me ng dimlak a ta el chad el mlo medengelii, e le te Dirk chachiuaiu a rechad, e a Mengidabrutkoot a ululsisechakl er a bechil er a tekoi er a cheroll e olengeseu er ngii me ng mechellii a tolechoi el sechal me ng di ta el mle klou a lengelel. Me a llengela a tolechoi er a ulengang, e ng mochamekdekudem a ngerel a tutau e le ng obunga llomes, me ng ulekerengelterir a remchas el mla er a blai el klekerngel a cheroll, me te kileberruul el tuobed el oldiu me a klou el llangel e kmo, “A ngelek tech a ngikang.” me te tobeda a remechas el med a ongeched e oldiu me a rekmeed el obliil me te merema el mla med ongeched, el mle kirir el me oldechelakl er a Mangidabrutkool le ng dimlak lekirel el di ngii el ta el omotk er a bechil.

Me a lebocha er a ulengang, e a Turang a di ngar me a tolechoi me ng di ngar, me tia ngasechereng a ulebult el mo deurreng, me te metir me ng ngloik er a medal a ulengang e quecharou e kmo: “A chedelekiki, a chedelekiki, a delal a di koiei me a ngalek a di koiei”. Tia a mle uchul a semecheklel a cheroll er a Belau, me ng mlo diak lomotk er a redil a bo lomechell.

MERENGEL A SECHESEBAL

Me a bocha loruul e loked er a mo osiik er a mo odimel a mur e te mlo ngoititerir a rechad er a Ngermid. Tirka a Tekiimelab el ngklel a cheldebechellir a Ngararemrumk. Me a reNgararemrumk a mocha otebedii a omenged. Te mlo er a chei er a desbedall el okedongall el kmo Eldukl. Me te sumechii a ruul e dmu er a teru er tir el kmo “Aki mo mechiuaiu e se el kot el uldikel er a chelsel a ruul a diak lungil a dolai er ngii me ng diak molekiis e ng di se el ongeru a ngeiuul me ko molekiis.” Tirka el teru a mengkar, e ngii a mo er ngii a kot el uldikel, e ko er a kmal klou me ng sobeka rengrir me te olekiis. Me te mekiis el mocha olekeed er a ruul e a leme e ng di sang me a dukl, me te muud e lmuut el mo sumechii a ruul er a di osisiu el tenelel a ngikel, e le te medenge el kmo a ngikel el kimolai er ngii a me metengel er tiang.

Tia el ongeru el osumech er a ruul e ng di mle kea a cheliuaiu. Te mengiil el telkib e ngii a mocha ouedikel e melechetuchel a ruul. Te metengela el mocha olekeed a ruul. Me a belekeed e lomes e ngika ikid el ngikel el ulsiik el “Temedokl” me a “Ngerengellecheluu.”

Te ngoeo aika el ngikel e melikes el uluungeluul. E ngika el ngerengellecheluu a merikl e tebelik (a rebibil er a rechad a mengedecheduch el kmo “ngko er a teletelel a mongkii,” me a rebibil a kuk kmo “ng kemedukl.”) me a lekirel a a ngeluul e ng tuchelii a dangeb er a mlai e chemiis el tmuu er a chelebacheb. Me a tekiimelab a mocha oltoir er ngii. Me a loltoir er ngii el du el kmo “ngar er ker?” me a Ngerengellecheluu a kmo, “ngar er ker?, me a ldu el kmo “ngilekong” me a Ngerengellecheluu a kmo “ngilekong.” Te ngar er ngii a rechad el mengedecheduch el kmo ng ngar er a chelebacheb me a rois me a chiechab el di omekesi a medung el tekoi. Te dirrek el ngar er ngii a rechad el mengedecheduch el kmo a tekiimelab a ulemekdirt er a ruul e ng chemiis me te ngmai a chusir el lengel a bambuu e mo kakoad me ng obubouch a chusir, me a uchul e mlo er ngii a belkul a tekoi el “kabubouchechaus.” Me a lemetemea er a ngerengellecheluu e te millikes el mo er a Ngersung el ngii a beluu el mla er ngii a mur. Me aika kid a beluu el mle er a mur er a Secheseball.

1. Beliliou Ngerdelolk---Obak
2. Ngerchelong-- Mengellang -Uong
3. Ngetpang -- Ngerdubech
4. Melekeok -- Ngerubesang
5. Oreor -- Ngerbeched

6. Ngaraard -- Ngeteluang

7. Irrai -- Ngerusar

A rubekul aika el beluu el ngar er a bab a merma e ngii a mocha ta el Sangdei el lolengoes er a Temedokl e dirk chad. Te mocha katekoi a rubak e melekoi er a Obakerdelolk el kmo dolengit er a kemedengelem me lrusii tia el odoim. Me a mad er a Obak a mo e mkisii a dengelolekang e a Temedokl a kmo “ke mekerang,” me a mad er a Obak a dongebii a olekang e me dmu er a Obak el kmo, “ngak a ko er a smecher el diak lsebechek el rousii a odoim.” Me a rubak a olengit er a mad er a Ibedul, me a lebo e a Temedokl a dmu a osisiu el tekoi. Me nguk mo ta er a mad el di osisiu. Tirka el rubak a ulemdasu el kmo a Ngerchelong a rsel a beluu el diak lorous er a odimel a Belau. A lekea sebechel el rousii tia el odoim e tirka el rubak a mocha melekoi er a Uong me a kemedengelel a Uong el ongetiu el Uchelruchulsiang a mochang. Me a lebo me lenguu a dengelolekang e a Temedokl a kmo, “ke mekerang?” me a ongetiu a dmu er ngii el kmo “mkedmeklau e a rubak a dirkak lomengur e a sils a mocha er a eou.” Me a Temedokl a dula er a Ongetiu el kmo, “ lemetengel a chimam el kibngar a medak e mnguu el otungii er a ngerem, e kau a merous er tia el chelechedak er a rubak el rokui e se di lebo el bdeluk a medechel e ke kiderii tia el olekang el mo er medal a Uong. Me a bocha lulebongel er a omerous e a ongetiu a kiderii a olekang el mo er a medal a Uong.

A lemerko a blengur me bocha lekasmesumech a rubak e a Uong a ngoura tia el udoud el sukur er a til e dmu er a ongetiu me ng nguu tia el tungd el bdelul a Temedokl e te merael. A lorael me lengar er a ked er a Irrai e a Uong a dmu er Ongetiu el kmo “mchitii tia el tungd er a ked.” Me a Ongetiu a nguu el choitii me ng tungd el chelot e dmu er a Uong me a Ongetiu el kmo, “kemiu kom choitak er tiang e mekerang?” Kemiu a kmo chomchelid e ngak ng diak chelid?” A Uong a dula er ngii el kmo, “cherei e ke di ngar er tia e a kerrekar a dubech er a bita me a bita el mo omderngem er a sils.” Se el chereomel er a chelecha a ngar er ngii a mera el ngklel e ng di rechad a di omekedo er ngii el kmo “Uchul a Chebdui.” E a rechad er a Ngerchelong a omekedo er ngii el kmo “Ongebitel Elong.”

Tia el cheldecheduch a ochotii a mle kot el mur er a Belau. Me aika kid el omeruul a mle uldimukl er a chelsel a beldekkel a kall el mle ruikl er a rubak.

1. Eromel -- ngii di el kall

2. Did -- Chedeng

3. Kingall -- Rrull

- | | |
|-------------|------------|
| 4. Debechel | -- Mesekiu |
| 5. Olbeluul | -- Uel |

Me aika kid a omesodel aika el ngar er a bab el tekoi.

1. Eromel --- tia a ngii di el kall el kot el mo merael er a delongelir a rubak el longarem er ngii el kirel omengedmeklel tia el mur.

2. Did --- uleld el bleob el teletelel a chedeng el didil me a lechub e ng rolel a chad el mo soiseb er a klobak.

3. Kingall --- uleld el bleob el teletelel a rrull el kingellel a chad el mocha soiseb er a klobak.

4. Debechel --- uleld el bleob el teletelel a mesekiu el olechotel a medebecha el dui el lebo el chellungel er ngii ngika el mocha rubak.

5. Olbeluul --- uleld el bleob el uel el olechotel a kmo a mur a merekong me a rubak a mereko el omengur me te melebal me a lechub e te meriso a chimorir.

Aika el ngar er a bab a beldeklel a doruul er a mur.

Note: A chad el ngii a mo rubak a diak loruul a kall. Ngike el melanges er a dui a meruul a kall.

MERUK ME A BECHARS

A Ngerdobotar a rengedel a Imeliik el beluu er a mo bedul a diluches er a Imeliik. Tia el beluu er se er a irechar er a kmal rechuodel er a Belau a mle obtois a rechad er ngii. Te mle ungil beserir e le ng meklou e betok a cheled er a cheleched er ngii me a choremelel a meklou. Me a omoachelel a klou me a bo el kemtimt me ngii a diak lebo lak a ralm er ngii. Me ng diak a ngodech el lebo el metacherbesud er ngii. Ng kmal di blotech a rengud a dekie er ngii. Me ng di ureor er a buai er tia el beluu a chelsang el chosengkid e diak a ngodech el ureor el debo demechesa er ngii. Me se el ledubech a ureor el buai e a Bechars el merreder er a Ngerdobotar a ouchais er a rechad er a beluu. Ngika el chad a meteet el ngar er ngii a deruchellel el merreder er a Ngerdobotar me ng ktekudel. E kmal diak omelengmesil er a remechebuul a loked a ureor me a rokui el tekoi er a buai, el di ua lolekoi er a rengelekel er a blil. Me a rechad er a Ngerdobotar a kmal diak a ta el oldeu a rengrir er a rokui el omerellir er a buai er tir.

E a Meruk el ongeru el chad er ngii a kmal chebuul a blekeredelel e ngar er a eou a rengul el meaiu a ngerel. Ngii me a bechil a di osisiu a blekerdelir. Me a blirir a betok a kall me a chemachel me ng chimo el beluu er a Ngerdobotar el oililaol er ngii e omengur e ousueleb e omesoil er ngii er a bek el klebesei. A Meruk me a bechil me a rengelekel a kmal di osisiu a blekerdelir el kmal bekokuui e bekerurau er a rechad. Me ng di blechoel el ongdibel a blil a Meruk er a bek el klebesei.

A blil a Bechars a oliangel el diak a remo er ngii el chad er a buai me a di rechederir kung. Me a lekedur a ureor er a buai me lebo e a Bechars a di ngii el ta el merael el mong. E a Meruk a lorael er a beluu, e te kaokedo el mo dmak er a telkib e merael el bechob ruk el mo er a ureor. Me a bo el merek me lebo rrei, me te mo dmak e merael el mo er a blil a Meruk. Aike el mlo diak er tir a ledak el mo me te ngmai e mo kairirei. Me te di mle ua ise me a Bechars a kmal di mle ngii el mo merur er a blekeredelel e le chederderel a di merael el mo diak lsebechel e le ngerel a meringel me medal a chebecheb el diak a ko er a botechereng el delii el kirel a deleuill er a rechad. Me a delengcheklel me ng mlo ongengael er a rechad er a belual.

Me te kie e a ta er a klebesei e a Bechars a mocha er a blil a Meruk e melekinga er ngii el kmo, “Rrach, a Ngerdobotar a obiteklang, me a kulengit er kau me deluut el mo dmak e de kedur a beluu e deluut el sumech a delongeled el mo ungil el mo ua irechar.” E a bo lolekoi a Bechars

el mengideb er a beluu e a rechad a bai chemoit a tekingel e oketa mo er a chei e diak lebong. Me ng liluut a Bechars el mo er a Meruk el di mle ngii el oderchelel el mong. Me ng di Meruk ngii el ta a ngilsenges a tekingel e tia el chimo el beluu er a Ngedobotar a diak a molab a tekingel. Me ng dimlak a mo me ng di mle ngii el mocha medengelii el kmo tia el kngar er ngii el tekoi a locha chetirir a rechad ngak me a tekingek me a iltetek a di iltetel a blik el diak lebo er a buai. Me ng mocha meluluuch er a Meruk el kmo, “Rrach, ak meskau a ngerachel me ke mo ungerachel er a beluu. Me ke ongeru el chad e ng di ke di mo oba a beluu. Me a dui, ak telechull er ngii e ng di kau a mo menga a dikesel a kot. E ngak a ngmanget el mo menga er a dikesel a ongerung. Me ak mo menga dikesem.” Me ng di mle ngii a Bechars el ngiltii a kelel, e a dial a dimlak. Ng di mla ua ise el tekoi er rechuodel el me er a chelecha el beluulechad. Me ng belkul a tekoi el kmo, “ke ko er a Berchars er a Ngedobotar el di mo becheleleu”. Me a demeteet e ng diak dedu el kmo ngak a meteet me di lekid el mengull er kid. A demeteet e a medad a mo ungil me a ngered a me er a eou me a rechad a kullid.

MESUMECH E DMANGES

Ng mla er ngii a reteru el chad er a Ngermchemai er a Oreor el kmal mle kausechelei. Tirka a mle blechoel el dmak el omub er a chelebacheb. Se el le ngai a chelderir e ngika el ta a di kie er a chelebacheb e a ta a ngmai a chelderir el me er a Ngerchemai el mo merous.

Ng mle ua ise a blekeradel el mo el mo e ng di ngika el sechelil el olab a ngikel el me reme a mlo mengemull er a bechil a sechelil. A le bebil e ng diak a chelderir e ng di ngii el chad a di soal el omekall el me reme el leko ngar er ngii a ngerrach el tekoi el bo loruul. Ng mle ua ise el mo el mo me ngika el sechelil a omdesua el kmo, ngika el chad el ko er a kmal di soal el mo remei, ke le lengar er ngii a tekoi el loruul er ngii. A ta er a lebe lrei er a Ngerchemai tirka el teru el sechelei, e ngika el chad a dula er a bechil el kmo, “Errang, ke ko er a socherang me a uche er a kimorael el mo er a chelebacheb e ak mo remuul a kerum.”

Ngika el chad a ngilai a chesengel a luut el mrachem er a cheluch e smuk er a ongilotel e ngmai el msa a bechil e dmu er ngii el kmo, “Ke oba tia el mengilt er kau.” E tir a mo er a chelebacheb me te kie ngii me a ruchellel me ngika el sechelil.

A ta er a lengai a chelderir, e ng dula er ngika el sechelil el kmo, “Mngai aika el cheldid el mo me mrous.” Ngika el sechelil a kilenge me ng ngilai a chelderir e omekall el mo remei. Me a lebo e ng mlo me ng bad el obengkel ngika el bechil a sechelil. Se ikid e ngika el redil a nguu tia el chiltel el chiltii ngika el chad. Me te bad el teru e ngika el chad a di mle milkolk e ng mekiis el kudmeklii e omekall me a le me er a chelebacheb e ng mellemesang. A sechelil a lomes er ngii e ng di bechachas a bedengel me ng mocha medenge el kmo ngika el chad a oudengerenger er a bechil.

Te ngar er a chelebacheb el omub e ng kuk ngmai a chelderir el msa a sechelil e kmo, “Mngai a cheldid el mo er a beluu me mrous.” Me tia er a lomekall a sechelil el merael e ngii a dobechii a kesiil el kerrekar er a chelebacheb e dormii a medal el mo kedorm el ko er a biskang, e mocha omekall el oeak ullel a sechelil. A sechelil er a leme e ng mle el mo mechiuaiu el obengkel a bechil. Me te chachemull e a bechil ngika el redil a meremang. Me a leme e ng ngilasech er a blai el mo mkisii a odangeb e nguu tia el biskelengel el kesiil el mrechii ngika el sechelil el odekiar er a bechil me te chelsuch el teru el chad e medei. E ngii a ngmasech er a mlai e omekall el mo er a chelebacheb.

Ng ngar er a chelebacheb e ngii a merema a mlai el me mesubed er ngii el kmo, me e debo er a beluu e ng mla mo er ngii a secher. A le me er a Ngerchemai e a blil a dirk chelsimer e a rasech a mla omaoch el me tuobed er a chemrungel. E a lebkisii a chesimer e ngika el sechelil me a bechil a berruchel el teru el mla mad. Ng di milsterir el mo merek e te mengai el teru el mo medakl. A rechad el ulemes a mlo medenge el kmo, ngika el chad a milekodeterir e le tia el kerrekar el mle delllemakl er tir a kerrekar er a chelebacheb el kesiil. E ngii a di mle ngii el ta el chad er a Ngerchemai el mla er a chelebacheb.

Ng tekoi er a omengesmachel. A bechiil el chad a sebechel el mekodir a ta er a chad a ltaut er ngii.

Suobel: Ng kirel el ngar er ngii budech me a beltikerreng er a chebechiil me ng diak
lebo ldubech a kerrior er a delongelir a rebechiil el chad.

MLECHEI

Ng mla er ngii a ta el mechas er a Ngetbong el beluu er a Ngardmau el kmal ngklel a Techod e a dui el lulluchel er ngii a Mlechei. Ngika el mechas a lulurengor er ngii a chelid el Sechaltbuich. Me ng kilie el mlo meketeket e ng mocha bechil a Sechaltbuich. E a Mlechei a mocha dioll me ng kie el mechucher a bilel e mechella el sechal a ngelekel. Me ng mengeklii a ngelekel el Ulecherungel. E te kie el mocha klou el chad el mla mo kirel mo bechiil e le klungel a mla mo sebechel el lileakl el blai. E a Mlechei el mle bechil a chelid e mocha dengerenger er a chad el Elibiong a ngklel. Me te ulemart er tir e a chelid a di mla mo medengei. Me se el lebo el kebesengei e ng oungeroel er a bechil el kmo, “Molatk er a Ulecherungel el klunga el chad me ng chebuul a le ngar er a blai e de kaungeroel e lorrenge er kid.” E a Mlechei a kmal outekangel. Me a Uchel a kmo, “Lak moutekangel a tekoi a dolekoi e di morrenge e moruul.” E a Mlechei a di outekangel. Me a ta er a klebesei e a Mlechei me a Elibiong a bad er a ongebitel er a blai er a Lmii, e a Uchel a mo me nguam a medal a Mlechei e lochotii er ngii e merael. Me se ikid e ng mlochu diak loutekangel a Techod e di mlo lmuk. E se ikid el beluulechad e a Ngeraard me a Ngardmau a ua leble el chimo el beluu. Me a ngeiul a Ngardmau er a mekemedil a Oreor e a Urdmau el bita el beluu er a Ngetbong a dimlak lebo e ng di uriul e te mlong. Me tia ikid a cheselsel a Arbedul el lulelturk er a Beouch el kmo:

“A di de ngar er a bai e rubak e ak didil a kelulau el mo er a Ngeruau e Beong, e chad er a Rudimech el bita el bai er kau me a lo maiuai a kelulau e ng robeta sese er ngii me ko mo kadiuid. A di dengar er a bai e rubak e ng dimlak mocholt er ngak a meteu el kelulau me kliluk el mourard. Me a be demesumech e doruul tekeungel.”

Me aika ikid el leru, e se ikid e te merema mesumech el ko er a mekngit a delongelir.

Me te kie el mlo mekeketeket e a Mlechei a melekinga er a Elibiong el kmo, “Kau se el di blechoel dmak kau me a Ulecherungel el ngar er a chei e chelecha e komo kakerous. Ng diak mdak.” E ngii me a rechad er a Ngeraard a telbiil omengederir el moudirekorek er a toachel er a Iuekako. Me a rechedal Ngardmau a mlo mengesiau er tir e le Iuekako a toachel el omibiongel

er a Ngaraard me a Ngardmau. Me a Mlechei a mlengelechel er a Elibiong el kmo, “Ng diak ko bo er a chei kau me a Ulecherungel.” E tir a mle medenge e urael chelid me ng tilobed el kllolem el mlai el mong. Me a lebo e te mo kakoad er a chelmoll. Me te milekodeterir a Elibiong me a Ulecherungel. Me a le mede me lometitechakl a mlirir e aika el eua el sakt el mlai er a Ngardmau a mocha mriked a uak er ngii e cheltekill er ngii el me tmuu er a taoch er a Emuul el me er a Iuekei e mocha mesubed er a Mlechei me ng lilangel e mo er a taoch er a Metemetang.

Me aika kid a cheliteklel er se el beluulechad er a lemad a Ulecherungel me a Elibiong el mlengai er ise e medechel me er a chelecha el kmo:

1. Ng uoi kebesengei me ak melouch er a bab er a kedrekall e okiu a rael e oldiu el chemat el di diul a blelau me ak dechero me ak mengelekel ku chais e te kmo aike eua er a mlai me aike cheru el omeekella er a ngeraol mo melengel er a di tela el bikel Ongedechuul.
2. Ng kol ngak me tech a di choruakl cherul langel mo er a Iuekei er a di terul soilekelam el di medei.
3. Kele di kau a melemed a tekoi e Elibio me a ta me debad er a ongebitel er a Lmii me dollach er kau el kmo kele bochur olikar a Uchel a mle er a kebesengei el di kodengak e oker er a Elibiong.

NG DI RENGUD E NGUSEK

Tia a cheldechedechal a redil er a Elechui er a Imeliik me a sechal er a Ngerchol er a Beliliou. A chad er a blai er a Uel er a Ngerchol er a Beliliou a Ngiratekedoi, e ker dirrek el omekedo er ngii el kmo, Ngirauel e le ng ngkkel a blai. A Ngirauel a mle bechiil er a Elechui er a blai er a Meteolechol, e ngika el bechil a Dirrauel. A bocha el bechiil e ng kmal ungil a delongelir, me ngika el Ngirauel a ngiluu a delengcheklel el me er a Imeliik, me ng telkib el olengeseu er a mechas er a omeruu el miich me a riamel, e le te blechoel el ometech a miich e mengort a riaml e olab el mo er a blai er a Uchelkiulk. Tia urrerir a rechad er a Elechui er a Imeliik. Te ngar er ngii el mo el mo e a lsa el merka ongos e a Ngirauel a dula el kmo, “Ngak a kuk mo er a Beliliou el mo oldingel e mei.” Me te rirellii a telkib el omerael e ng mo doiderekli a Ngirauel e omekall ngii me a ruchellel el mocha er a Beliliou. Tia el omerollir el mo er a Beliliou, e ng silumes a ngisel a teblo el meklou el meringel el chad el uel er a chelebacheb. Me a le bocha er a Belililiou e ng ulemdasu el kmo, se el kluut el mo er a Babeldaob e ak me el me mechero ngii el uel e ngmai e omekall. Me te mlo er a Beliliou me te mla er ngii el sesei el klebesei e a luut er tir el me remei er a Imeliik, e te mle tuab er a chelebacheb el mle oldingel aika el chelngir el uel. Me te mla er a chelebacheb el bekord eru el klebesei e mechero aika el uel. E a eolt a milrael el mo mad er a dimes. Me a lomekella el me er a Imeliik e te di ulemekall e ng mocha klebesei. E ng di ngika el Ngirauel a kmal mle dmeu a rengul le aika el uel a kmal mle meklou e meringel chad me ng mellatk el kmo a bo leues a Dirrauel e ng kmal mo dmeu a rengul. Le ngika el Dirrauel a kmal di ta el redil el lolatk er ngii a Ngirauel. Me te omekall el ombebebesebasech me a lemerema er a taoch er a Ngertong e ng mechiu beluu. Me ng dula er a ruchellel el kmo, molekerd a cheldid e mongedmokl er a mlai e kbo er a blai e kisa me te ngar er ngii a rechad e kngiteterir el me me dekaingeseu. Me a ruchellel a mengedmokl er a mlai e olekerd a chederir e ngii a merola el mo er a blai, el merael e mle klim a cheril e le ng kmal blak a rengul el mo ouchais er a Dirrauel er aika el meringel el chad el chelderir el uel.

A Ngiramelelchedui a chad er a blai er a Uchelkiulk er a Ngerkeai. Ngika el chad mla er ngii a teletelel el blechoel el outingaol er a redil er aike el metaiou el beluu me a obliil. Me tia el teletelel, e ng mle ua ise el merema er a blai er a Meteolechol er a Elechui el ngar er ngii a Dirrauel el di ngii el ta er tia el kesus. Me ng ngar er a blai el mengedcheduch el ko er a outetingaol ku er ngika el mechas e melekoi a tekingel er ngii. Le ng medenge el kmo a Ngirauel

a mlo er a Beliliou me ng dibus er tia el blai. A Dirrauel a kmal mle medemedemek el dil me ng mengedecheduch el melmesumech er ngika el meteet el chad e ko er a kmal olengongaok a chedechedechal. E tia ikid e ng merema a Ngirael e kmal mle kellechakl a beluu me ng silal rongesii a ngor el sechal el ngar er a blil, me ng ko er a mlo mekedeb a ochil e outekangel el merael el mocha kmeed er a kboub er a rebai. E a lomechederenges er a ngor e ng dongchia el ngerel a Ngiramelelchedui el melekoi a tekingel er a Dirrauel, e a Dirrauel a di liluk el meketeket e ko er a olengesenges. Me tia ko er a rirdelii er a bedengel a Ngirael a kmo ng ngera me a chiul a ko er a di decherong. Me ngii a kmal mlo suebek a rengul el kmo a Dirrauel ngera mo kmu, le tia ikid e ng di mlo kodall a lolebedebek er ngii e merekong. A lechub e ngika el medemedemek el dil el Dirrauel a dula er a Ngiramelelchedui el kmo, “Ke kmal mesula e morael e a kmal chebuul el di ngak me a ngusek e a bechik a dibus el mlo er a Beliliou, me ak mengiil er ngii.” Ngika el rubak a okere er ngii el kmo, “Ng tech a ngusem?” Me ng dula el kmo, “E a ng di renguk, ng di renguk e ngusek, me bai morael e ng kmal diak kengei er kau le ng kmal chebuul a Ngirael.” Me a bocha el ua ise, e a Ngiramelelchedui a oumismisk e tobeda er rikl e merolang.

Tia ikid e a Ngirael a mocha ultom er a blai e merkerukem me a Dirrauel a oumisk e kmo “Ke kuk luueta el mermang? Ak ko er a mla dmu tekingek er kau e kau a di mei.” Me tia ikid e ngii el bechil a kmo, “Ng ngak el Ngirael!, e sibeklii a ulitech e tmuu. Me ng kmal mlo dmeu a rengul a Dirrauel e le ng merema ngike el kot el lolatk er ngii el bechil. Me a Ngirael a dula er a bechil el kmo. “rrach bai morael el me e ngak a mlo ungil besuk me ng ngar er ngii a teblo el uel el ngar er a taoch.” A bechil a mocha omekedo er tirke el chedal el kmeed er ngii me te mocha er a taoch me te ngmai ngii el uel. A Ngirael a dilul kmo, “aika odoim e chesuchem le kau a kot.” Se ikid e ng milterakl tia el belkul a tekoi el kmo: Ng di rengud e ngused, el belkul a kmo, ng di rengud e mengkerenged. Tia ikid a belkul a tekoi el lousbech er ngii tirke el medekung el dil el bechiil.

NG MERA EL DI UA ULEKERDEUIIL ME A CHIBASEEL

Ng mla er ngii a ta el rubak el kilie er a ii el ngklel ngii el ii a “Ngebekuu.” Tia el ii a ngar er a bebul a ked er a Ngeremlengui. Ngika el rubak a mla er ngii a reteru el ngelekel el sechal. A klou a mle Ulekerdeuiil a ngklel e a kekerei a Chibaseel. Ngika el rubak a ko er a mle chelid e chad. Se el mellomes e ng di mechiuaiu er a chelsel tia el ii e a le klebesei e ng merk a chimal el momekemangel e mo tmaut el olecheteckl a rokui el obliil er a Ngeremlengui se el lebla bo lebad a rechad. Ngika a ochetekl e ngmai a ngrekill me a klengoes me a ilaoit me aike el bek el bedengel a kall el me me te menga ngii me a rengelekel. Ngika di mle ua ise el kmal mlo meketeket el rak me a rechad er a Ngeremlengui a di bek el sils el lechacherodech a kelir e di diak lebo lodenge el kmo ng techai melai. A ta er a klebesei e a ta er a rubak a okor e mocha mertii er a chelsel a blil e mocha omditm el kmo ng techai ngika el di blechoel el me merechorech a kelam. Ngika di mle berrotel e a reblai a mocha chachiuaiu. Ng dimlak lsa el mo meketeket e a lomes er a chimal a chad e ng merma tmuu er a chelsel a blai el kuk mocha melai a kall. Ngika el rubak a kmal medekta e le ng di omes er a chimal a chad e diak a chad el lesang.

Ngika okor e kmal diak longerodech e a lomes er tia el chim e ng mekekokil mocha tuobed er a tuangel el olab aika el kall. Ngika el rubak a mocha okikiuelel tia el chim e omditm er ngii. A lomes er ngii e ng mocha er a Ngebekuu me ng mocha medenge el kmo ng chimal a rubak er a Ngebekuu.

Ngika el rubak a luueta el mo er a blil me ng mo bad. Tia el bo el tutau e ng mocha mengideb er a rebeluu me te mo kldibel e ng mocha ouchais aika el lules er a klebesei. A rebeluu a mocha melib er a kodellel ngika el rubak er a Ngebekuu. Tirka el sechal a mocha er a chei me te ngmai a osul a telebudel el mei. Te ngilai el mulech er a chelsel a bekai el blil a ilaoit e ngmai el mo meche er a rekeblirir.

Tia el bocha el kebesengei me bo lemechiuaiu a rokui el chad e a rubak er a Ngebekuu a kuk mocha lodesii a chimal e mocha tmaut el merreuaech aika el blai. Ng ngilai aika el bekai el ngar er ngii a ilaoit el me me te melim ngii me a rengelekel. Te di millim e ko er a ngedechea me ngika el rubak a dula el kmo, “A rengud me a chodabl, tia rengud ker di melim e omengur el di ungil e a lechub e kede metemellang.” Ng di dilu el ua ise e obitelek el mad ngii me a rengelekel.

Tia el bo el kukuk e a rebeluu a merola el mo oldingel er ngika el rubak er a Nggebekuu me a rengelekel e a lebo e te di blitelek. A lomes er a mekesong e aika a oruikl el mle blil a kelir me a bekai me a kual el mla er ngii a imelir me a olekang el mle blil a odimir el di berriid. Me tirka el beluu a di mlo mrotech a ulurir e me melengarech e kmo, “Ng mera el di ua Ulekerdeuiil me a Chibaselel aika el klalo er tiang.”

Tirka el chad a milenbeklii tia el ked el kmo, “Merechorechebekuu.”

NGELEKETBUDEL ME A NGELEKETCHSEL

Tia el cheldecheduch a cheldecheduch er a beluu er a Imul el ngar er a Imeliik el cheldechedechal a Ngeleketcudel me a Ngeleketchsel. Tirka el chad er a kebliil er a Bartekuu a mlo er a ked el mlo omekdudek, e le se er a irechar e ng dimlak Isa el ngar er a che le te mle medakt a mekekmad. Me te di ngar er a che er a ked. Me te merael er a chelsel oreomel e a ta er tir a doibechakl er a ta er a rael e melengeta el mo er a Ngeraod. Me ng mesechesoch a medal el omditm a dudek e ngii a lmangel a ngalek me ng dmu el kmo, “A chedil a ngelekek” e mocha merael el kirel ngika el ngalek el ngar er a uchul a kerrekar.

Me a lekeda er ngika el ngalek, e tirka el chelid a kmo, “Mngam a medal ngilecha e ng tmak er kid.” Me te nguam a medal me ng di mlo meterob e ko er a rrau a rengul. E te dmu er ngii el kmo, “Bo mdebesii a ta er a kaiul a buuch e mnguu el me me mskur a ngelekem e mnguu el mo er a beluu.” Me ng mocha dobesii a kaiul a buuch e mocha nguu ngika el ngalek el loia er a chelsel e nguu el mo er a blil.

Me a lenguu el mo er a beluu e ng mlo me ng omekeroul er ngii el mo el mo klou ngii me a ngelekel el lulechelii a bechil. Ngika el ngelekel a chelid me ngika el ngelekir el lulechellii a mlo kaukeroul el mo meklou.

Omorolir el me meklou e ngika el demerir a blechoel el lobeteterir el mo er a chei. A ta er a klebese e te di kilie tirka el teru el ngalek. E ngika el rubak a mlo er a che e kmal ulekngemedii a ngikel e a leme e ng klebese me a rengalek a mla mo bad me ng dula er a bechil el kmo, “Bo mdul a eru er a ngikel e molekiis er tirka el ngeleked me lomengur.” Me ngika el mechas a mocha ngmilt a teblo er aika el ngikel e dmul me a le merkang e a bechil a kmo, “Ng di kea molekiis er a rengalek?” Me ng ngika el mechas a kmo, “Msall e kukisii a Ngeleketchsel me lomengur e bechere a Ngeleketcudel me lemechiuaiu.” E diak lodenge e ngika el Ngeleketcudel a mla mekar me ng orranges er ngii me ng kmal mlo mekngit a rengul me ng omdesua el kmo ka msall e kbad e kusterir el kmo te melekiis er ngak. E a lechub e ngika el mechas a imiu er ngii e molekiis er ngika el ta er ngii el mechiuaiu, me ng mocha ko er a melechedech er a chelsel a rengul el kmo, ngak ng techal delak. Me ng di ngar er a rengul el diak lolekoi e okor e dilmuk.

A ta er a klebese e ng mlo er a che ngii me a resechelil e ng rouar a molech e mertii e nguu el mera blai me ng loia er a ulebengelel a ulaol el bambuu er tia el leblechoel el bad er ngii.

E ngii a mocha ousmecher er ngii. Me a bo el kukuk e ng diak lebo loilil e di mechiuau. A chomerolel a klebese el mo e ng di merael tia el molech el mo bediu. E ngii el buik a di bad el ousmecher er ngii. Me a lsal kmal mengetelakl a bul ku e a demal me a delal a sobeka rengrir el kmo ngika el Ngeleketbudel a kmal socherang. E ng di diak louchais, e a redelal el chelid a di ulerenges e kmo bo bechere e ng ko er a diak losubed er kid. Me a lsal kmal klunga a bul tia el molech me lemeterakl er a beluu a chisel a secherel ngika el buik e te mocha tirka el delal el mocha oldingel er ngii er a ta el klebesei. Me ng ngika el delal chelid er a lebo e ng dilu er ngii el kmo, “Ngak tia el mle omes er kau,” ngika el buik a okere er ngii el kmo, “Kau el me mes er ngak ke keskelek?” Me ng dula er ngii el kmo, “Ngak a mera el delam.” Me a ldela el ua ise e ngika el buik a kmal mlo ungil a rengul e dula er ngii el kmo, “Ngak a diak meral smecher me a klukuk e ak nguu tia el molech el mo oitii.”

Me a bocha el tutau e ng ngulemkokl el mekiis el nguu tia el molech el ngar er a ulebengelel a ulaol el nguu el mo oitii e mekiis e le ng diak lsecher. Me a rechad er a blil me a beluu a ko er a kmal mlo mechas a rengrir e le ngika el buik a kmal mesisiich el diak a meringel er ngii.

E te kie ngii me tirka el chad er a blil e diak a louchais el kmo ng mla mo medengelii a mera el delal. Ng kilie el obengterir me a lsal klunga e ng dula er a demal er a ta er a klebese el kmo, “Chedam, ngak a kmal soak el oumlai me mdesechii a mlik.”

Me a ta er a klebese e ng ngika el demal a mocha kudmeklii e merael el mo er a ked el mocha melobech er a kerrekar el mo mlil ngika el buik. Me ng dilebechii a kelel a charm e mocha tmaut el oureor er ngii. Me se el tutau e ng mo er a ked e a lekebesenge e ng me remei. Me ng me reme e a lebo er a bo el kukuk e ng mla mengai a bita e le tirka el obekul ngika el Ngeleketbudel olengeseu er ngii el omachel er ngii. Me ngika rubak a di mo me ng di nguu a telkib e a lebo er a bo el kukuk e ng kuk mla mengai a bitang.

Me te dosechii el mo merek e a Ngeleketbudel a oker er a demal el kmo, “Chedam, tia el mlai ng ungil a lemengai er a oingerang?” Me ng dmu er ngii el kmo, “Ng ungil a lemengai er a ikrel eru el klebesei.” Me a bo lolecha a sueleb er tir e ngika el mechas e ng oker er a ngelekel el kmo ng tuobed a mlai er a oingerang. Me a Ngeleketbudel a subedii er aika el tekingel a demal. Me ngika el mechas a okere el kmo ngar er ker me ker chobo molengull er ngii. Me a locholt ngika el rubak e ng mocha er a beluu e mo tmaut el ngar er a mesei el mesab a kukau e mocha mengedmokl a kall el kirel tia el sils el lebo el longurs er a mlai. Me tia er a leme tia el belsechel

a omengurs e ngika el mechas a mibii aika el kall el mo er aike el lebo lolengull er ngii a rechad. Me a ltaut ongurs e te mengurs er tia el mlai er a chelsel a chereomel el me er a taoch. Me lengar er a melengel a rael e ng suelebang me te olengull e ng medechel a kall me te omengur el bek el chad e kuk lueta el mo mengurs. Me a lluut e lorael te di milrael el mo er tia el kmal moded e ng mo diak lorael e le ng mla moreked. Me te mo ouengemek tirka el chad el mengurs el kmal di diak. Me tia el chimo beluu er a Imul a di mlo turk ongersir. Me a lsa el kmal ko er a di kea cheldechulel e te mocha ko er a kedekedechor el rrau a rengrir. Me ngika el rubak a ko er a di ulureuachel el kmo, “Rungalek, ka me me kuk mongurs.” Me a lebekiis el mo el mo orekedii tia el mlai e kmo, “Chedil, Chedam, ka mochotii er ngak, ngar er ker Ngeleketbudel, Metechelsel.” Me a ldu el ua ise e tirka el chad a kaichichiis e le tia el mlai a ko er a silebek e obengbangl el mo er a taoch. Me a loltirakl er ngii el mo er a taoch e ng bliou a kall. Me te mo dengchokl e ng mocha er ngii a blengur.

Me a lemerko blengur e ng melmesumech er a demal el kmo, “Ngak a merolung.” Me ngika el demal a momades a ngeltel e ngii di kmo, “Ng diak ak di merael.” Me a lorola e ng millebeakl er tir el kmo, “Kemu se el bo meklou, e kom kmal mo meringel chad, e ng di kom di mo mekerior, e merechorech a rengmiu er a kall.”

Me chelecha e ng ollachitnger e mo er a redil me a rechad el kaubuch e merodel er a rengelekir a resechal el kmo, chomoungalek er a ngelekel a ochedam el mrirdelii e ng kirel bai klou el betik a rengum er ngii er a ngelekem el mla er a delem.

NGERA ME A CHUM A NGAR ER A KAI

A irechar e ng mla er ngii a ta el meteet el rubak me a rechedal. Ngika kmal mle ungil er a rechedal me a rechedal a kmal mle betik a rengrir er ngii e kmal mle blak a rengrir el olengeseu er ngii. A ta er a klebesei e ngika el meteet el rubak a omdesua el kmo, ngera ko el bo krellii el kirir tirka el chedak el ko er a kmal mesulang. Ng okor e me e mo omdasu a bail el lengai el mesterir a rechedal e ng mo diak lemetemall er a recheraro.

A ta er a klebese e ng dula er a rechedal el kmo, “ko mo meruul a kall e mengideb er a rokui el chad le ng mo er ngii a mur er kid.” Me te okor a rechedal e mocha olekeeed a kall e mengideb er a rechederir e ng mocha er ngii a mur. Tia el bo lemerek a mur e ngika el meteet el rubak a mocha merous aika el bail el mo er a rechedal me ng mo diak lemetemall er a recheraro. Ngiluu a biled a ketat el msa e mo tmaut el merous a bail el mo er a rua cheleched me a rekung me tirka el bebil er a rechedal. Tia el lluut ngika el rubak el nguu tia el ta er a bail e a chum a kmal mlo soal. Ng kmal mlo bekikl er ngika el rubak a lenguu el msa ta er a rechedal. Me ng okor e ridekekl el mereberii er ngika el rubak e nguu el me e mocha olsiseb er ngii er a chelechedal. Tia el lolsiseb a ochil er ngii e tirka el bebil el mla er tia el mur a kmal mlo merur er ngii e le ng diak lolengmes er a merreder er tir. Me te mekiis el ngmai a kerrekar e mo tmaut el mebib a chum. Te di milengelebed er ngii el chomcham a chiuesel a ulkel me ngika a chemiis me te tmak ullel. A lrurt el me er a kederang e tia kai el cheloit, e ngii a kmal tobeda delebengel me ng soiseb er a chelsel. Se ikid el me er a chelecha e ng dirk ngar er a chelsel tia el kai. Me a chokmo kede kursii el otebedii, e a ulkel er a chelsel a kai e ng di medodook le te di mlorekedii el mebib.

NGERCHOKL

A irechar e ng mla er ngii a ta el rubak me a ta el mechas el kilie er a Ngeteluang. Tirka a mla er ngii a reteru el ngelekir el sechal el kmal mle mekedung. A ngklir a mle Kellilekei me a Delmesoi. A demerir me a derrir a kmal mle betik a rengrir er tir. A ta er a klebese e a demerir a dilu er tir el kmo, “Rengelekei, kid a mo mengaus a bub e le kede mo omub.” Me a rengelekel a dilu er ngii , “Chedam, ke di kie e kemam a mo smiik a raod me a bambuu me a kime e dongaus a bnged. A demerir a kilenge er tir me te merola el mo merad a bngir.

A uriur er a lemechaus a bngir e tirka el teru el odam a mlo omais el omub. A ta er a klebese er a lleta el mo omub e lolikes el me er a taoch e te ko er a kmal songerengerang. Me ngika el klou a dilu er a ochellel, “mei me dokur a mlai e dederur a ta er a cheldid e domengur.”

Te milekur a mlirir e ngika elkekere a mocha ngmai a sengsongd el me me ng chumlii a ngau, e uleker er a obekul, “Ngera el ngikel a derur?” Me a obekul a dilu er ngii, “Ka momes el kmo ng ngera a ko er a mekngit el ngikel er a cheldid me mderur.” Ngika elkekere a ulemes er a chelsel a chelasir e mocha nguu a ta er a chelbesoi el loia er a ngau. Tia a di mlo mengerdochel le ng kmal melaok. Me ngika el klou a dilu er ngii, “Mnguu el mechere me lodimel a demad me a delad. Me ngika elkekere a mocha nguu el mechere, e ngii a lmuut el nguu a chimo el loia er a ngau. Tia a dirrek el kmal di mlo mengerdochel er a laok. Me ng luueta el nguu el mo mechere, e mocha nguu a chesengel. A bo el lia er a ngau e ng dirrek el kmal di mlo mengerdochel. Me ngika el klou a dula el kmo, “Ka mnguu el mo mechere e ng dirrek el ungil el odimel a demad me a delad, e mnguu a chimo er a bsukel el durur.” Me ngika el ochellel a mocha nguu a bsukel el loia er a ngau. E a lia e ng dirrek el di mlo mengerdochel er a laok, me ng mocha nguu el mo mecherei.

Tirka a dilul a cheim el ngikel e kmal di mle melaok me ng di mlo medechel el mo odimel a demerir me a derrir. Te di mle kea lomengur e mocha choteklii a chelasir e mo remei.

A lebocha er a blirir e a demerir a kmal uluutkeu er tir. Ng mlo nguu a chelasir el mo mechere e dilu er tir me te mo melecholb. Tia er a lorael el mo er a diong e a demerir a mocha omes a chelderir. E a lomes e ng ngar er ngii a delul. Me ng uleker er a bechil, “Aika ng ngera me ng di delul?” Me a bechil a kmo, “Ka bechere me a leme a rengeleked e doker er tir.” A lemerema el millecholb e a demerir a okere er tir er a chelderir el di delul. Me ngika el klou a

uluchais er a demal me a delal er a lengar er a taoch e lolul a ngikel. Tia er a louchais e a demerir me a derrir a kmal mlo mekngit a rengrir.

Tirka el ongalek a kilie el mo chuib a ede el klebese e a rubak a mocha melekoi er a mechas el kmo, “Ke mo tungot a okumam e le aki mo melikes er a klukuk.” Me a mechas a uleker el kmo, “Ko mo melikes el mo er ker?” Me a rubak a kmo, “Aki mo melikes el mo osiik er a beluu el beluu er a ngar.” Tia ikid e a mechas a mlo tungot a okurir tirka el ongalek.

A bocha lekukuk e tirka el tede el ongalek a mocha melikes. Te millikes el omecherechur a beluu el mo bedul a Ngerkedam. Me a lekeda e lomes e ng di mengchat a beluu me te mlo medenge el kmo ng diak lebeluu er a ngar. Te liluut el melikes el meliuekl el mo bedul a Irur, e a lebo e ng dirrek el mengchat a beluu. Me te liluut el melikes el mo bedul a Ikaidong, e a lebo e ng dirrek el diak lebeluu er a ngar.

Tia ikid e te mocha suchesii a ears e omekall el mo bedul a Ngerdekus. A lebocha er a medal a Ngerdekus e ng di miltiu a resir el mo mrael er a chelianged. Tia a demerir a dula, “Tia ikid el beluu a debo er ngii.”

Me te mocha ilii a ears e melikes el mo tmuu er a taoch. A lebocha er a kerodel e ngika el klou a ngiluu a dekel el mo olturk er ngii er a cheldukl el mo melkakl er a mlai. E a loterkii er a cheldukl e ngoldiu a chad, “Alii ke tomellid.” Tia a beluu er a ngar me a rechad a mla mo timdall a uchul me kede kmo ke ko er a Buklbeluu. Tirka el ongalek a milekur a mlirir e milrael el mo er a beluu.

Tia er a lorael e a rechad el mla er a taoch a uleker er tir, “Kemiu ko mo er ker?” Ngika el rubak a ulenger, “Aki mo er a blil a merreder er tia el beluu e le ng somam el mo omes er ngii.” Me tirka el chad a dula er tir, “A merreder er tia el beluu a Beachedarsai.”

A lorola el mo er a blil a Beachedarsai e te mlo el mo soiseb er a blai el mo dengchokl. Me a Beachedarsai a uleker er tir, “Ngera a chised me ko mdumiang?” Me ngika el rubak a uluchais er a mle uchul a omerolir el ongalek. Tia er a louchais el mo merek e ngika el merreder er a beluu er a Ngerdekus a kmo, “Tia a kmal beot el tekoi. Me me domesoil e debad me a klukuk e morael.” E dilu er a mechas me ng mocha meruul er a belsoil. A lemerek el meruul a kall a mechas e ng milechobech a kelir tirka el tede el ongalek er a mederir. Me a kelel a Beachedarsai me ng dirrek el lengilai el mo er a medal.

A lechisngekl a ngika el rubak el omes a kelel e ng ko er a kmal mlo mechas a rengul. Aika el kall el ngar er a chelsel a ongall a di telbached el kukau me a telbodech el ngikel me a

teluchemochem el blulech el ilaot. Me ng di rengulremel a kmo, "Aika ng mekera a donga e bo demedinges?" Me ng ko er a dirk omdasu el ua ise e a Beachedarsai a kmo, "Domesoil." Me a lebocha lomesoil e se el lenguu a telbached el kukau me ngii a mo medechel a telbached. A odoim el ngikel me a ilumel el ilaot me ng dirrek el mle ua ise. Tirka el ongalek a di ulemengur me te medngesang e dirk ngar er ngii a kall. Me te dula er a Beachedarsai , "Kemam a merkong. Aki mekerang?" Me ng dula er tir, "Mngai el di ocheuekl er a ulliu e lenga a rengalek. " Me a lenga el ocheuekl er a ullir e ng mlo diak aika el kall. Tia ikid e tirka el ongalek a mlo medenge el kmo a Beachedarsai a sebechel el meruul a kmal meklou el tekoi.

A bo lekukuk e ng kmal di mle tutau e a Beachedarsai a olekiis er tir. Te milekiis el mo dengchokl e a Beachedarsai a nguu a sis el msa ngika el rubak e kmo, "Mkedmeklii tia el sis." Ngika el rubak a ngiluu tia el sis el milii er a chelucheb e nguu el kmedii er a medal. A Beachedarsai a uluchais er ngika el rubak, "Tia el sis a chomnguu el mo me ke mesa telkib er a chutem er a tkul a diong me ke dolemii. Tia el sis a mo rullii se el ralm me a ongeuid el sils e bo mtechelbakl er ngii e be mdum e kom mla ngma a bedengiu er a diak a ulebengelel el klengar." Ngika el rubak a kmal mlo ungil rengul me ng kmal mlo kerekikl el di menguum er tia el sis.

Tia el tutau e te ulemengur tirka el ongalek el obengkel a Beachedarsai. E a lemerek e te millemesumech er ngii e mocha melikes. Me a lolikes e te di mle melemalt el mo remei. Te mlo er a blirir me te bad el mlo bo lekukuk er a tutau e a demerir a kmo, "Kid e rengelekei a mochu er a bab el mo osiik er a diong." Te ngilasech el mo er a Kemokem e mesarech el mo metengel er a Ngerchokl e se ikid a leblo ldelemii tia el sis er a tkul. Tirka el ongalek a childesii a tkul tia el ralm e milak a teliakl el mo euid e mocha remei. Me a lengar er a blirir e ng bek el sils el longedoked a teliakl e le te kmo se el mo me ng ongeuid er a sils e tir a mo melechelbakl er tia el diong.

A lekedoked el mocha medechel a di ta el teliakl e a mechas er a Ngkekklau a mla er a Ngardmau e milrael el me engelakl el chelebill er a ngelekel. Ngika el mechas er a lorael e ng kmal mle meringel a sils me a chereomel a kmal mle mekeald. A lengar er a Kemokem ngika el mechas e ng kmal ksbengang me ng dilu er a ngelekel, "Rungalek, me me debo desa se el ralm ngar er se el dellas me detecholb a bedenged e ngak a kmal mla mo mengeald a renguk."

Me a loldengelengel el mo e tia el ralm a kmal ungil el cheldukl a tkul. Me ng ngiluu a ngelekel el mekedecherur er a bad e kmo, "Bo ktechebakl me bo lemekelekolt a bedengek me ak me e dorael." Me ng mocha medebedii a cheritel e tuchelbakl el mo duum er a bitang. A lorael

el me e ngika el ngelekel a lmangel e merreturech a ochil e kmo, "Kau a diak mdelak! A delak a mechas." Me a delal a kmo, "Rungalek, lak mlangel e kid a ungiang. Ng kmal di kea a ulebengelel el kdelam. Ak mla ngma a bedengek er a klengar." E ng di ngika el ngalek a di lmangel e kmo, "Ng diak! Mcheridau e kau a diak mdelak! A delak a mechas." Ngika el mechas a kmal mlo chetil e di kea cheldechulel me ng liliuut el mo tuchelbakl. Me a lebe ldum e ng mla lmuut el ngma a bedengel er a irechar. E dula er a ngelekel, "Rungalek, kau a kmalmekngit! Elecha e ng di kesai el sils e ng mo diak dekasoes!"

Tirka el teru el ongalek a ririid el mo er a Ngkekklau. E a bocha el kukuk er a ongeuid el sils er a kmal dirk tutau e tirka el tede el ongalek a ulemkokl el mo er tia el diong. Te mlo me te reboreb er a tkul el kaititekangel. Ngika el rubak a dilu el kmo, "Rengelekei, kom mo tuchelbakl me ko di ngar el diak a ulebengelel e ngak a diak." Me tirka el ngelekel a kmo, "Chedam, ng kmal diak! Kau me kemam a di du el mo tuchelbakl me kede di ngar e di kasoes el diak a ulebengelel." A Idela el ua ise e ngika el demerir a mesbeda a rengul me ng mlo ridekekl. E a lebe ldum e ng dirrek el dirk rubak. Me ng kmo, "Olekoi! Tia ng mla mekesakl el ralm? Rengelekei, ka bo mridekekl." Me ngika el klou a mle kot el mo ridekekl. E a lebe ldum e ng dirrek. Ngika el kekere a kuk mocha medebedii a usekerel e mo dechor er a tkul tia el diong e oldiu, "Beskak a bedengek er a diak a ulebengelel el klengar." E rirdekekl. E a lebe ldum e ng dirrek me tirka el ongalek a ko er a mlo kasoues e di mle du el kmo, "A Beachedarsai a mera el cheblad el rubak." Tia ikid e te milrael el mo remei el kmal di kesib a rengrir er a Beachedarsai er a blulekngel.

Te kilie el mocha chuib a sese el klebese e remenges el kmo a mechas er a Ngkekklau a tilemellii se el ralm. Ngika el rubak me a rengelekel er a lrengesii tia el chais e ng kmal ngilasech a rengrir er ngika el mechas.

Elecha e aike el sis el lengilai er a Beachedarsai a okedongall el kmo "Sisureomel." E aika a kmal dirk blechobech er a tkul tia el ralm. Me a ultil a ochil ngike el ngalek el lilangel e merreturech a dirk ngar er ngii er aike el bad el ngar er a tkul a Ngerchokl.

Tia el ralm a kmal dirk omaoch. Me a diong a olsesiseb e se el btil a ko er a "Taki" el omaoch el mo meliod er eou.

NGERENGELLECHELUU

A ta er a klebesei, e ng mla er ngii a ta el chad el ngklel a Tudalong. Ngika el Tudalong a chad er a Dimes el kot el kmal mle ungil el chad. Tirka el redil er a Dimes a kmal ulsiik a rolir, e a bo lolekoi a tekingir er ngii e ng di chetil, a lebo ta er a redil me ng di chetil, me a lebo a tang. Me te merema e mocha chadecheduch tirka el redil er a Dimes el dmu el ua se. E a ngika el Tudalong a uchul me ng ko er a di chetil aika el tekinged a kele ng osiik er a redil er a Euidcheluel me ng ko er a mengchechiil e ko er a kmal mocha medenge el kmo, a redil er a Euidcheluel a locha kmal ungil el redil.

A ta er a klebese e sola e ng mocha kudmeklii e mocha er a taoch el mocha otebedii a mlil e melikes el mo er a taoch er a Euidcheluel el mo me ng mocha kmerd e mo mekur a mlil e nguu a til e merael el mo er tia el bdelulachang me ng mo me ng reboreb e ngika el redil er a Euidcheluel el kmal ungil el redil a merola el me engelakl e le ng ngar er a oderuchel er a blil el mo er a ta er a blai. Me ng merael el mo er a ta er a blai el mo me ng dmu a tekoi e merael me me ng omes er ngii e merael el mo er a blil e ko er a omdesua el kmo, “Cholebo ngika ng chad er ker el beluu el merema el ko er a kmal ungil el chad.” Ng okor e lmuut el di diak a uchul a tekingel e lmuut el merael el mo engelakl er ngii el mo er tia el blai me ng ko er a di mededechor e lmuut el me el mo er a blil. Ng luueta el mocha me ng okere er ngii el kmo, “E a kau e rrang ke ko er a locha diak mchad er tia el beluu e reboreb er tia el bdelulachang, kau ngar er ngii a omosiik er ngii?” Me ngika el chad a kmo, “Choi, ngak a chad er a Dimes e me er tia el Euidcheluel el mle e le ng ngar er ngii a kusiik er ngii.” “E chobo e ng ngarang.” “Ng redil.” Me ng dmu el kmo, “Ng tech a ngklel ?” Me ng dmu el kmo, “Ng redil er a Euidcheluel.” Me ng dmu el kmo, “ngak ingii.” Me a ldela el kmo “ngak ingii” e ng dula er ngii el kmo, “cho ka mei.” Me ng merema kmeed er a bita er ngii me te melamech e doknge el teru el mo er a blil a redil er a Euidcheluel me te mocha kaubuch. Me te kie el mlo betok el buil el mo el mo e ngika el Tudalong a dula er a redil er a Euideluel el ua se, “Kid ng kuk diak debo er a beluak er a Dimes me kuk dodngelii e demei.”

Me a ta er a klebese e te mocha mengedmokl er tir el mo er a omerael. Me te mekiis er a tutau e mocha er a taoch me te otebedii a mlirir e mo doiderek el teru el obekel e melikes el merael el mo er a ta el olekerodel, me a lebo e sola e ngika el Tudalong a dulang “E rrach tia kid a debo dekerd er ngii e le ngar er ngii a diosech me ng ko er a checherd a rengum e mkerd e

molecho me a chome e dorael.” E ng ua se “Bechere e deluut el melikes.” Me ng lmuut el melikes el me er a ta er a olekerodel a bo lolekoi er ngii e ng dirrek el dmu el kmo, “Ng diak.” Me te lmuut el melikes me a bocha lolikes e te millikes el mo er a ta er a olekerodel e a lolekoi er ngii el kmo, “Ng diak bo mkerd e molecho me a chome e dorael.” E ng dula el kmo, “choi, ngak a mera el ko er a checherd a renguk e rrang, ng diak mokedii e bo kkerd?” Me ng mocha okedii me ng mo kmerd. Ng mlo kmerd e merael el mo el mo er a diosech me ng mocha nguu a cheritel el mechere e ngii a metengel el mo me ng melechong.

E ngii a merema ngika elmekngit el chelid me ng di miles aika el cheritel e ngmai me ng oucheriut e ngmai aika elmekngit el cheritel el ngmai el meche e ngii a merael. A leme e ng di ngilasech er a mlai el mo chemau a kuteling e di dmu e kmo “Molikes, mereko e dolikes.” Me a Tudalong a mocha melikes el melikes e ngii el redil er a Euidcheluel a lebe lengasech e lomes aika el cheritel e ng diak lecheritel me ng ko er a kmal ngedecka er a rengul me ng mo orreched el mo ngmai el mo mereked er ngii e merael el me er tia el ble lekerd er ngii. A lomes er tir e te melekesa el telkib el cheridang, me ng dula el ua se, “Tudalong, Tudalong, ak milekera er kau er a de ngar er a beluak er a Euidcheluel me ke melai er ngak el me mengoit er ngak er tia e rrang.” E ngika elmekngit el chelid a ua se, “E a ngii molikes ngii molikes aike daob el me obuu er a chelebacheb e rrang, e ngii molikes.” Me ng kuk mo melikes el melikes e ngii a mocha dechor ngika el redil er a Euidcheluel e kmo, “Tukalong, Tudalong ak milekera er kau er a dengar er a beluak er a Euidcheluel me ke melai er ngak el me mengoit er ngak er tia e merael.” Me ng ko er a kmal mocha mtebengii a ngerel e sola e ngika el chelid a lueta el kmo, “A ngii molikes, ngii molikes, aike a daob el me obuu er a uchul a chelebacheb, e rrach ngii molikes.” Me ng kuk mo melikes el melikes me ng ua ise e ngii a kmal mocha bleketakl a tekingel ngika el redil kmo, “Tudalong, Tudalong, ak milekera er kau er a dengar er a beluak er a Euidcheluel me ke melai er ngak el me mengoit er ngak er tia, e merael.” A Tudalong a kmal mocha mtebengii a ngerel me ng mocha otebengii a dekelel e a lomes er ngii e ng dechor er tia el blo lekerd er ngii el cheldukl me ng luueta el melekesa el me melai er ngii. Me a lengasech ngika el redil er a Euidcheluel e ng di ngilasech e ngmai a cheritel ngika elmekngit el chelid el ngmai el midokl er ngii e ngii a ngmai cheritel el oucheriut e mereko e mo chebecheb el osiseb a chimal er a chebesal ngika elmekngit el chelid e nguu el mideklii er a uchul a chelebacheb e tir a melikes. A lolikes e ngii a blechakl er a uchul a chelebacheb e dula el kmo, “Elecha, e a kubult el mo ngerengellechelu. Me se el molekoi e ak melasem er kau er a rokui. Chomolekoi a ungil el tekoi me ak melasem er

kau me a chomolekoi a mekngit me ak melasem er kau.” Elecha e se el debo er a chelebacheb e se el dolekoi e ng mesuub er kid.

NGERMELEI

REDIL ME A NGELEKEL EL ULEBULT EL MO BAD

Tia el cheldecheduch a cheldecheduch er a Ngermelei el beluu er a Ngermid el ta er a beluu er a Oreor. A irechar e ng mle betok a mekull el tekoi. A ta er a mle mekull a dimlak a chad el sebechel mo er a bai el di bul a berech a bedengel.

A ta er a klebese e a ta el chad er a Ngermelei a mlo er a chei. Ng mla er ngii a cheldil me a leme e a bechil a mlo meruul. Tia el blil ngika el chad a mle kmeed er a bai. Ngika el redil a meruul aika el ngikel e di orrecheda e le omeloik a mla omuchel er a bai. Ng ulerreched el mo merek me ng ulebes el remiso a bedengel e oblii a ngelekel e merael el mo er a bai. A lebo e ng mla omuchel a ngloik me ng di dilechor er a tkul a odesongel e omes a ngloik. Ng omes a ngloik e a rebeluu a mocha melungel a berech me te kakereker el kmo ngera a berech. A le belteterir el melungl el bedul tia el bau e te mesa ngika el redil me a ngelekel el obelta el mo bad.

Ng ulebult el mo bad le ng rirellii a mekull el tekoi me a rechelid a milelsii. Ngika el redil a ulebult ngii me a ngelekel me chelecha e tia el bad a ngar er a Ngermelei. Tia el bad a redil me a ngelekel. A rechad a di mesa e medenge el kmo tia a olechotel a lak doltirakl a mekull el tekoi.

NGEMELIS

TEMEL A UEL EL OMECHELL

Tia cheldechedechal a ta el buik er a Beliliou me a ta el dil er a Ngerkebesang el kmal mle kaiuetoir me te blechoel el mo kebetech er a Ngemelis. Aika el beluu a chacheroid me se el lebo lekasoues e te tibir a belsechel a lluut er tir el mo kebetech el ousbech er a klungel a buil el olengchelel a temir.

A ta er a lebo lekebetech e ng mle tab el buil. Me te chadecheduch el mocha metuda klebese e mocha mechiuaiu. Te bad el mo tutau e a lebekiis ngika el ekebil e ng dibus a bita el cheritel. Te mocha osiik er ngii el cheriut e diak lebetik er ngii. Te osiik er ngii el cheriut e a lluut el mo er se el lebla er ngii e te miles a ultil a ochil a uel. Ng kmal di kea lebetik er itia el cheriut me ngika el dil a lueta el mo mengaus er a cheritel. A lebocha el merek e te mocha kasmesumech e tilbir a lmuut el mo kasoues er a orakiruu.

Te ririid el mo er a rekebelurir e mengil er a belsechel se el lluut el mo kebetek el mle orakiruu. Tia er a leme tia el belsechel a lebo el kebetech, me a bocha el kebetech e ng mle orakiruu me ng kmal mle klou a buil. Te dilengchokl er a chelechol el chadecheduch e milsa a chimo el uel el merma ngmasech er a beluu. Ngika el uel a mle ngmasech el me omechell. A lebocha el ungil el omes er ngii e te milsa tia el cheritel ngika el dil el telichekl er a ochil. Tia ikid e te mlo medenge el kmo ng uel a ngiluu tia el cheritel ngika el dil. Tia ia mlo uchul e a rechad er a Belau a mocha medengelii a temel a uel a lebe lomechell. A subeled a ua se a domtab a rokui el tekoi e ng betok el telengtengil a klengar a sebeched el suub.

NGIBTAL

Tia el Ngibtal el beluu a ngar er a dimesungos er a Belau el delongelet a Melekeok me a Ngiwal. Tia el beluu a ta er a ulungoaol el beluu, me a chedeng el ngikel a kmal kelir, e oterullir er aike el diak loungoaol el beluu el kmal meringel a cheral. E sorir a rechad el omechar me a loungoaol e leme e lengemedii me lebo lolterau e ng kmal mo ungil el mochar el mo udoud e le ng kmal kengbokl e le ng diak di lengar er ngii er a rokui el klebesei. Ng ta er a elolet el buil e te mo oungoaol, el di se el lebocha el bleketakl el kmo a eolt a mla mo ongos el diak lorael a uchul. Se el lemeringel a eolt e ng di tirke el chellimosk el chad el medengelii e mekudem el oungoaol a okiuche el mo oltobed a mlai el mo er a meang el koi. E ngii a mo dongesii a ngoaoi e me, e a lsebechel e ng meterakl er a beluu el kmo, moltobed a kaeb el mo er a meang el koi e kede mo tuobed er oingerang. E se ikid e te mengedmokl a kaeb a rebek el chad el kerous melasech a tet, el mekekere el ko er a bai, el mo meluluuch a chederir er a rebek el keblirir el olengit er a kmo, ak bo er a ngoaoi e lak metemall. E momeklusech er kemam me kimereched el metik a otaor er a ngoaoi me kimereched el ngomedii. Me tia el nglunguuch el delsachel el ko er a bai a ngklel a di tekoi er a debo er a chei er a ngoaoi e merekong. E le ng ktekudel el omenged, e ng di se el beluulechad e ng mle lechechisakl a mlai, el tekoi er a rechuodel e dimlak lechitel, ng di mla ua iseit.

A ta er a klebese, e ng mocha ongos me te tobeda el mo oungoaol, me te oketa chudela a kaeb e mochu belsechel a mochu er a ngoaoi, e a reteru el odam el chad er a Ngibtal a dirk el mildasech a kebir me ng dirk oberaod e mle ketengir el mo melanges er a resel a kebir, me te mlo teloi er a remo oungoaol. Me te milrael teru el odam el mo e kerior e te milkedii a oiu me ng kmoll a kebir el mo chebecheb. Me te ulebechakl. E a obekul a kmo, “Ak obngii a desomel el meskau me ke oba, e bo dekakerous e ngmekngit a dedak e demad. A bo dekakerous e a lta ta er kid a suobel.” Me ngmai a totau el mekur er a chelechedal e mak el osiseb er a cholotoang er a desomel e le obekul a meringel a rengul er a kaeb, me ng di blengodel er a kaeb.

Me te mocha kebii el mlo diak lekaodengei. Me a ochellel a lenguu a berius el mo ieuekl el mo otungii er a taoch er a Ngerdekus el kmal di sese a telil me a chimal a di obedebedeckl er a desomel. Ng di ulak me ng diak lriid me ng omtitechakl er a taoch e a ngalek er a Ngerdekus el redil a merema melai er a daob el mo er a odimir e mesa me ng mocha me ng dokuii e okisii a btelul el lodoseb a telil me ng mesa, e ngii a mo remei e subedii a demal. Me a

lebo demal e ng mocha nguu el me er a blai me ng mesurech er ngii e omeka er ngii me ng mocha mesisiich. E a loker er ngii e ng ouchisa el ua isei. E mesisicha e mocha bechil a ngelekel ngika el rubak, me te kie el mocha meketeket e ng mocha melekoi a mo reme el mo er a Ngiwal ngii me a bechil. Me a delal me a demal a ulekebai er tir el kmo, “Ng kmal cheroid me ng diak a mo sebechel el otireklau e kau a di mo kau el tang.” E tir a di merecheda er a omerollir, me a delal me a demal a mocha nguu a selibech el sis e rullii e msa e kmo, “Tia omoba el ua el ochedam e lengusem me se el bo er ngii el beluu e ke mesa teluk el rechelel a ngii di el kerrekar me ke nguu a ulseuechel kim e locha ralm er ngii e silekii tia el ditmechei er ngii, e loia er a cheungel, e aike el molengit a di me er kau. E diak mosubed er a bechim.” Me ng mlo ua ise e a lebo e a blirir a ngar er ngii a meduu el telkael a rechelel me ng milsa e mo meruul di ultirakl a tekingel a demal me a delal me ng mle tuobed aike el rokui el soal el lolengit.

Me tia ikid e ng mlo er ngii a cheldechedechal a Meduu er a Ngibtal el ourodech a ngikel. Me tia ikid e a remlo klechedaol er a beluu er a Ngibtal a mlo mecheche er ngii. Me a remlo mecheche er ngii a rechad er a Ngermechau me a Ngebedechal me a Ngerbekuu. Aika mlo dmak e mo oumekemad er a Ngibtal e tukur tia el meduu me a daob a soiseb el nguu tia el beluu. Se ikid e tia el beluu a di mlo daob e mlo diak lebeluu.

NGIRAILYMESANG

A Ngirailemesang a chad er a beluu er a Ngkeklaau er a blai er a Imeong. Ngika el Ngirailemesang a ko er a kmal mle bedektall el chad e dirrek el mle meringel a ochil me ng dimlak lsa el sebechel teloi er a resechelil el ngar er a urretel a Ngkeklaau. Ng di mle mesisiich el di mededereboreb er a blil e okerker a chisel amekemad. E tia el urretel a Ngkeklaau a omais el oumekemad er a Ngiwal e le ng mle soal melai er a klisiich. E ng di uleba medal a urrurt er a Ngiwal a Ngirngemelas el merael a chisel er a blekeu me a klisiich. Me a urretel a Ngkeklaau a di mo obenged e lmuut el cheraches.

Me a ta er a klebese er a leta el cheraches a mekemad me lekaiderurt a resechelil me, e ngii el Ngirailemesang a reboreb er a medal a tuangel er a blil e okere el kmo, “Ngera chised e sechelei?” Me a ldela el ua ise e ngika el ta er a rechad a toucheckla el mo e dula er ngii el kmo, “Kau ngera ke di dengarch er ngii e a rebikel Ngkeklaau a ngomeda er a tekingel a beluu, e kau a di mededereboreb e di korir a dmanges me a metengel. Mtobed el mo er a mekemad.” Me a lrengesa aika el kmal ko er a meseked er a dingal el tekoi e ng metichekla er a rengul e ko er a kmal chetikol.

A ta er a klebese e ngii el Ngirailemesang omdesua el kmo, ak bai nguu ku udoud e mo er a Ngiwal me kusiik a cheldechulel Ngirngemelas. Me ng melebedebek er a rengul el ua ise, e mocha kudmeklii e nguu tia el udoud el sukur er a til e mocha er a Ngiwal. Me a lebo e ng mechiuu beluu me ng omerebart er ngii el mocha er a blil Ngirngemelas. Mo me ng reboreb er a medal a tuangel e olekiis el kmo “Ngirngemelas, Ngirngemelas, udelek bekiis e ng ngar er ngii a tekoi el kulekoi er kau.” Me a Ngirngemelas a mo omkais er a chesimer me ng dula er ngii el kmo, “Bekiis e ng ngar er ngii a tekoi el dekatekoi.” Me a ldela el ua ise e a Ngirngemelas a omdesua el kmo ng milkolk me ng diak dengchii ngika el chad, me ng liluut el ulekerker er ngii el melangch er a ngerel. A Ngirailemesang a di ngar er rrikl e kmo, “Tia udoud.” Me ng mocha mekekokil Ngirngemelas el longchengchii a chesimer. Me ng Dirk melai er ngii e a Ngirailemesang a osisebii a chimal el nguu a udoud el loia er a chimal Ngirngemelas. Me a llia er a chimal e ng mocha rulii besul e mocha nguu tia el chesimer el mo klou e lueta el okere er ngii el kmo, “Ngera chised?” Me ng kmo, “Ngak e chudelei, a uchul me ng di klebese e ak merema a kmal soak el me mrechau me lmeruul a chisek er a rebeluu er a Ngkeklaau.”

Me a Ngirngemelas a dula er ngii el kmo, “Me a da klukuk me lemei amekemad, e ngak a ngar er a olechelbelek er a nglas er a Bkulatab, e a lsekum me ng mesngerekl a mekemad e ng di kau a mei.” Me a ldela el ua ise e ng kmal mlo ungil a rengul a Ngirailemesang me ng merola el mo er a Ngkekla.

Me a lebo e ng di mlo el kudmeklii a lidel e nguu a udoud el sukur er a chelsel a lild. Me a lebo el kukuk me ltebda urretel a Ngkekla el mo oumekemad e ng nguu a lidel e remurt el lokiuche el mengetakl er tia el urrurt er a Ngkekla. Me a lebocha er a Bkul Ngerair e ng mesenge a Ngirngemelas el reboreb er tia el olechelbelel er a Bkulatab me ng remurt el bedul ngii. Me a lrurt a Ngirailemesang e ng mo er a chelemoll e me remel, e mo er a chelemoll e me remel el merael el me kmeed er ngii. Me a lekeda e a Ngirngemelas a dula er ngii el kmo. “Mokedau e ke mo limiit.” Me ng liluut el merael lokedii me a lsa el kmeda e a Ngirngemelas a odersii a ochil e mo er a bab e kmo, “Momurch er tia e alii ng mo ngodech a lidem.”

Me a ldela el ua ise e a Ngirailemesang a kodekedii a lild er a chimal e mrchii a chereuel a ochil el tmoech er a bitang. E ngii el Ngirailemesang a kmo, “Ordilem er a kar a ngar er a rsel a lild e ngak a merolung.”

Me a Ngirngemelas a kmo, “Me a da di le kau el ngoikau.” Me ng obult e mo remurt e le chotoir a meremang. Me a lekelekel el me er a Bkul Ngerair e ng meseked a chesched, e a loker er ngii el kmo, “E rrang ngera chised?” Me ng kmo, “Ng diak, ak ko louchisu, a chais a merael.” e di remurt. Me a leme er a chelechol e ng dirrek el meseked, e te oker er ngii me ng dirrek el kmo, “Ak ko el louchisa, a chais a merael” e di blekall el mo er a blil.

Me a lmetat a chais el me er a beluu el kmo Ngirailemesang a milrechii a Ngirngemelas e a ta el mechas er a remeteet a metengel el me el lotkikii a bechil, e ngii a mo bechil a Ngirailemesang.

NGIRAMELENGOES

A Ngiramelengoes a chad er a Melekeok. Ng kmal mle bekeu el chad. A ta er a klebese e a Melekeok a kmal mlo soal el melai er a beluu er a Oreor. Tia ikid e a Reklai a mocha oldurech er a Ngiramelengoes el mo ouerabek er a Oreor.

A Ngiramelengoes a mlo otebedii a mlil e meius ngii me a reteim el chedal el me er a Oreor. A Ngiramelengoes a ullab klekedellel er amekemad. Ng mle sorir el omes el kmo ngar er ngii a techellir a rechad er a Melekeok el me nguu a Oreor.

Tia ikid el loius el kmeda er a Oreor e te milsterir a retede el chad el ngar er a chei. A Ngiramelengoes a mleius el mo bedul tir me tirka chiliis el mo bedul a ta er a chelebacheb. Tirka el chad er a omenged a milkur a mlirir e kmerd el mo ngmasech er a chelebacheb. A Ngiramelengoes a di uluutekangel el meius el mong. Ngii me a rechedal a mle sorir el omes er tirka el chad. Ng ko er a di mle dertelkib el mederir tirka el chad a chemolt. Tia ikid e a Ngiramelengoes a okor e mocha mdelemii a bosel er a ta er tir e omes. Ng kmal di mle ta el lomoes e ng ruebet a ta er a rechad er a daob. Tia ikid e a Ngiramelengoes a dilu er a rechedal me te dobesii a bdelul e te nguu el merael.

Ng kmal di mle mereched a chais el mo er a Ngermid me a rechad a mlo medengei. Te ulemdasu el kmo a klou el mekemad er a Melekeok a mla soiseb er a Oreor.

Tia el bocha lodenge a Ibedul e ng uldercheterir a rechad el mo oltoir er a Ngiramelengoes. Tia el letebeda a rechad er a Oreor e a Ngiramelengoes a kmal mla mo cheroid. Tirka di uluutekangel el oltoir er ngii.

A Ngiramelengoes a ko er a omdesua a le mudechem me ng okor e mocha meldelodech er a rolel. A lebebil e ng meius el mo bedul a desbedall e kuk mo bedul a keiukl.

Tia el sa el kmeda tirka el chad er a mlil a Ngiramelengoes e a ta er a rechedal a Ngiramelengoes a medekta me ng mocha omritel er a chelsel a mlai. Ng di ulemritel e dula er a Ngiramelengoes el kmo, “mereched el omdasu e tirka el chad er a Oreor a kmal kmeda e ngak a diak Isoak el mad er tiang.” A Ngiramelengoes a dula er ngii el kmo, “lak komedakt e kid a mla mo mesisiich.” Tirke el cheraro a dirrek el kmal medakt el di ua ikau.

Tia ikid e ngika el chedal a Ngiramelengoes a bai kmal mla imis el medakt. Ng di ulemritel me ng mocha lmangel. Tia ikid el llengelang e a Ngiramelengoes a kmal ngosecha a rengul, me ng oldiu e kmo, “bom luk e lak mlangel el ko er a ngalek e ak bai mosau me ke mad.”

Tia ikid el loldiu a Ngiramelengoes e ng kmal mlo klou a ngerel me te remenges tirka el cheraro. Te rirengesii el ko er a kmal mesisiich el ngor. Tirka ulemdasu el kmo a Ngiramelengoes a mo omoes er tir el mo er a kodall. Te kmal mlo medakt me te okor e omitokl e chemiis el me er a Oreor. E tir a sobela me merael el me er a Melekeok.

NGIRATUMERANG

Tia a cheldecheduch el mo er a Imul er a Imeliik. A Imul el rengedel a Imeliik a mla er ngii a Ngiratumerang el chad el mo soiseb er a Uchelkeiukl el chad el mo er a Rengulbai. Me ngika el chad a ochell me ng ngar er a bades er a mo Rengulbai el chad e mlechell el diak a ungil el chad el ua ngii. Me ng ngalek e te di kaiuengamech er ngii a rebek el delal a Imeliik. A ta er a klebese e ng kmal mle klou a che el ched el cheldecheos e ched el ngebard me a Ngiratumerang a ulebengterir a remlo er a chei. Tirka el ledilak el chad a uleker er ngii e ng kmo kau ke techang, “me ng kmo, ngak a Ngiratumerang.” Me te otekir el nguu el me er a Oreor e mocha subedii a Ibedul me ng dilu el kmo, “Mnguu el mo er a Bailiuaiu me loba remengol.” Me ng mlo ua ise me ng mlo er a Bailiuaiu me te uleba remengelngir a reNgarametal el cheldebechel er a Oreor. E ngii a ungil el sechal e dirkak lebo el sechal me ng di obengterir a remengol. E tir a kie e mocha dungetngii a ilamrokl el ngikel er a ochil a Ngiratumerang el ulekekltkir er ngii. E te kie el mocha meketeket el klebese e a Ibedul a mocha nguu a chelebucheb el osisobel er a Imeliik e dmu er a recheldebechel el Ngarametal me ng tilobed a kabekel e te otekir a Ngiratumerang el mo okerdii er a Imeliik. Me ng kmal mlo ungil a rengul a Rengulbai me a kebliil er a Uchelkiukl el ua lemlad e lueta el me chad el ngiluu a chelebucheb el osisobel er a beluu er a Imeliik. Me tia el chelebucheb a kmal diak lecheleuid a rolel e le ng merael er a ulekerreu el ungil budech er a delongelet a Rengulbai me a Ibedul. Tia tekoi er a rechuodel el me er a chelecha el diak lebo lengodech.

Me ng kie a Ngiratumerang el dirrek el di kie a blirir a remengol er a bai. Me a lebo lomenged amekmad me lengar er ngii a urrurt e ng semeriar el soal el mong. E a remengol a meringel a rengrir er ngii me te di mo obuut er ngii el omart er ngii er a resechelil a Ngiratumerang e kmo ng dibus el chetirir a lebong. Me tirka el sechelil a Ngiratumerang a ko er a kmal mecheche a rengrir er ngii er a klungiolel el lorekodel er a remengol el diak lebo el cheroid er a bai er a remengol el diak lechitii. Me tirka el sechelil a mo oumekmad e a le me e ng kmal mlo chetirir er a lesa me te mlo melitech er a remengol el mo kursii el me e tucheir a katerul a chimal el kmal di mlo bertemitem er a decherir a resechelil. Me ng kmal mlo mekngit a rengul me ng tilobed er a delongelir a remengol el mo reme e mo nguu a kaiul a dalem el buuch el me cholbii e milii tia el miltechui el chimal e mesebesii el mo diak lemakedoked e remiid el mo er a Ngersuul el mocha mesuub a tekingel a urrurt er a Ngiramoai. Ng kilie er a Ngersuul el

kmal mlo meketeket el dimlak a ta el tekoi er a mekemad el lechoit e di ngilai el rokui. Me a olsemel er a mo melai a tekingel a urrurt el di meluluut er ngii a reme melai a di luldak el ngmai el dimlak a lluut er ngii. Me a Ngiramoai a kmal dileu a rengul e dilu er ngii el kmo, “Chochellek ng kmal di kau el ta a ngoeo el okngemed. E a rebek el chad a mla me melai e ngar er ngii a ulekebesel. E kau a kmal ngoeo el okidang. Me a ulochel chomngeo el tekingel a urrurt. E a mekemad eko er a Imeliik er se el me tuab el klou el chei er a llomes. Me molau a lidem e lomech er ise el lekong. E a uche er a ta el klebese er a leko e ke ouked el me e echiku, me ak mengiil.” Me a Ngiratumerang a mlo remei me ng remuul a lidel e ng mocha medechel a eru el klebese e ng mocha omes er a Ngiramoai. Me a Ngiramoai a dilu er ngii el kmo, “A leko e ng di meterakl er a tochel a Imeliik me ke di oltaut el lmuut el osiuekl er aike el klubed.” Me ng silemecheklii el mlo ua isei. Me kot el tuu el diur er a Okerduul me ng otaut e te odiur me ng ngmasech er a uchul a miich me ng oltaut e ngmasech e te odiur er a Ngerdesaol me ng oltaut e a mekemad a cherechesang.

E a chais a kmo ka mosiik er a uleltaut el kmo ng tech a te kmo, “Ngiratumerang.” Me a remengol a osiik er ngii e ng mebeabed el ko er a remurt el omukrengukl er a chelsel a beluu er a Imeliik el rokir er a blekengel me a klungiolel. Me a uriul er tia e te dula el kmo, “ko milechere me ng kuk di chad er a redil, aika ngodeknge el rokui a chetengakl el mo er ngii e kemi a mekerang.”

Me a ulengoklel a Ngiratumerang el rebetii el odengesel a blekengel me a siichel a kmal betok el ngii ochotiii el kmo ng mera el merrutech el ua isei.

1. Telbenged el mekemad a kibis el ngar er a lbengele me a Okerduul ak meremech a kar er a chimak e mulumk er kau er a rongel a cheos e Ngiratumerang. E koba brotoch me tengadik e llild el merirt er ngii er a kerekerekl er a lebong e kladikm er a lemei el ungil bisaol.

2. Telbenged el mekemad a kibis el ngar er a lbengele me Okerduul ak meremech a kar er a chimak e melumk er kau er a rongel a cheos e Ngiratumerang. Ngdo el cheluch a mechebel a belngel a ulkum er a temlengel a taoch, a kirekir me a diu me a blotk er kau e bekekeouei mesiich.

3. Telbenged el mekemad a kibis el ngar er a lbengele me Okerduul ak meremech a kar er a chimak e melumk er kau er a rongel a cheos e Ngiratumerang. Ng dos ng chelid a merema metel melamuch e merderd er kau er a belngel a kerker, kirekir me a diu me a blotk er kau e bikekeouei merikl.

4. Telbenged el mekemad a kibis el ngar er a lbengele me Okerduul ak meremech a kar er a chimak e melumk er kau er a rongel a cheos e Ngiratumerang. Ng dos milngakl el kelat a lidel Ngermid er a bedengem me a kmo bike bomdechor lokokau loiu loiit a lidir a rengaramengai e bem mngai aile limelem.

NGIRENGCHESAR ME A ODALMELECH

A Ngirengchesar a mle chelid er a Ngchesar. A Oldalmelech a kuk mle chelid er a Ngermelech el beluu er a Melekeok. A Odalmelech a di mlo el mo ko er a chelid beluu er a Melekeok. Ngii me a reteim el kldemel el chelid a kilie er a Ngermelech. A Ngirngchesar me a Oldalmelech a kmal mle kmes a delongelir el teru el sechelei. Te mle blechoel el meruul a urerir e dirrek el kaukledem er a omenged. Te mle blechoel el dmak el mengereel.

A Odalmelech me a rechedal a mle sorir el mo mengades er a Roismelech el mo metongakl. Ng mle sorir el mengauechit aike el rois el kmeed er tir. Ng dirrek el mle sorir a bo lemetongakl me lebo er a bebul e lomes er a beluu er a Belau el rokir.

A ta er a klebese e te mlo mengereel el teru el sechelei. A Odalmelech a ouchisa er tia el uldesuir er a sechelil er a Ngirengchesar. Ngika el sechelil a rirenges e di liluk. A lorola el mo reme e te tilbir a temel a omenged er tir. Te rirelili el mo er ngii er a ta el klsus er a oidudul. A lemerema tia el belsechel me lluut el mocha er a chei e ng di mle chimo el tekoo a chelderir. Tirka a uluaol a chum. Aika el olir a mle seluk er a chelsel a chelais. A Ngirengchesar a mle meiko me ng di dengchokl e a Oldalmelech a melikes e kuk mo meius.

A lemerema er a Ngchesar e a Odalmelech a uleker er ngii el kmo, kau te ngar er ngii a me melai er kau. Me ng kmo, chochoi. Te ngar er ngii a rengalek el me olsuekl er ngak. A Odalmelech a ouchisa a chelderir el di erung. Ng dilu el kmo ng chimo el tekoo me a chimo el chum. E oker er ngii el kmo, ke menga er a chum a da ke menga er a tekoo. Ng killungii a ngerel er a lolekoi er a chum, e kilkekeringii a ngerel er a lolekoi er a tekoo.

A Ngirengchesar a milecheblad er ngii me ng ngileltii a chum. Ng ulemdasu el kmo a chum a locha melaok e klou el ngikel. Ko er a lorael a Odalmelech e tir a merma a rengalek el me melai er ngii. A lebocha er a blai e ng ouchisa er tir er a cheldil el chum el ngar er a chelais. Tirka el ngalek a lenguu a chelais el me e ng diak a ngikel er a chelsel. Ng di aika el mle olir el chum a ngar er ngii. A Ngirengchesar a mlo medenge el kmo a sechelil a mla obeldir. Ng kmal mlo chetil e di liluk. Ng dula er tirka el ngalek me te ngmai aika el chum el mo mriid er a uchul a Roischesar. Se ikid a uchul me ng mlo betok a chum er a Roischesar.

A Ngirengchesar a mle medengelii a mle soal a sechelil me a rechedal. Me ng ulemdasu el kmo ngika a kmal kedadai a rengul. Ng soal el mengedidai er a Roismeletech el mo er a bab e

mo er ngii e omes er kemam el ngar er eou. Ko er a bo ltaut el oureor e ng dmu er tirka el ngalek me te mo rouar a ulengchidel el me msang.

A Ngirengchesar a ngiluu tia el ulengchidel el osiur er a ngau. Me ko er a lebo el bekerekard e ng rullii mo sechal malk e ng ngu el mekderberpii e odiur e dmu msebek e kmo a chomsebek e ke mo er a Roismelech e merros. A rechelid er a ngar er a mo el taem a dimlak lourreor a lemellomes. Tia el rois a di lulengades er ngii a le klebesei.

Te kmal mechesa el oureor e ngii a suebek a malk el mo e merros. A kot el lorros e te di mlo ngemuu e ua se ng ko er a mla merros a malk. E ngii a lmuut el merros. Me tia er a lluut er a ongede e te choitii a ureor er a Ngermelech e le ng mellemesang.

Ng di milterob a ureor er a Roismelech. A Odalmelech me a rechedal a ulebult el mo bad. Me chelecha e te bleob el btangch el dechor er a Ngermelech. Tia ia uchul e a Roismelech a dimlak lebo kedidai el rois.



ROISCHESAR

NGIRNGEMELAS ME A OBIRRIR

Se er a irechar e te kmal mle betok a rechad er a Beliliou e ng di resechal er se ikid el taem a kmal mle mechitechut me se a uchul e te mlo mechitechut er a mekemad. A kuk Ngeaur a mla er ngii a reteuid el kmal mle mesisiich e bekeu el chad er a mekemad. A ngklir a Ketord el di blechoel el se el leme er a Beliliou el me oumekemad e te di mesisiich me te melai a bterrir a rechad el mo er a Ngeaur. Ng ko er a diak a mo ungil rolel e bo el sebechir a rechad er a Beliliou el mo mesisiich er a mekemad.

A rechad er a Beliliou a rirenges a chisel a Ngirngemelas el kmal mle bekeu el chad er a Ngiwal. Me a Obirrir el redil er a Beliliou el ngar er a kebliil er a Ngesiliong a dula er a rengelekel me te otekir el mo er a Ngiwal el mo osiik er ngika el chad el mo olengeseu er tir er a mekemad. Tia er a lebocha er a Ngiwal e te milsa chad el dengchokl er a chelechol el meruul a kereel. Me ngika el chad a oker er a Obirrir el kmo, “Ke mla er ker el mei.” Me ng ouchisa er ngika el chad. Me tia ikid e ngika el chad a dula er ngii el kmo, “Hall e bo kriso a bedengek e dorael el mo er a beluu me di siekii a Ngirngemelas.” Me te di milrael el telkib e ng ua se, “Tia kid a blai e ngak a Ngirngemelas.” Me tia ikid e te mocha er a blai me ng ouchisa er ngii a blekerdelir a rechad er a Beliliou. Me a ldu me ng mle omes er ngii a soal a lebo lolengeseu er tir er a mekemad. A Ngirngemelas a bechiil, me ngii me a bechil a mle chadecheduch er a omerollel a Obirrir el me er a Ngiwal. Tia el kebesenge e te mocha remuul a berrir e mo bad er a blil a chelid el terung. Te mlo e liliuut el chadecheduch er a di osisiu el blekeradel. Tia el tutau er a leme e a Ngirngemelas a dilu er a bechil me ng remuul a kelir el mo er a omerael. Ng uluchais er a bechil el kmo, “Ngak a merael el obengkel a Obirrir e le ak mo olengeseu er tir er a mekemad.

Tia ikid e ng mocha kudmokl a klekedellel er a mekemad e te merolang. A tekoi a di mla mo er a Beliliou el mo mesubed er a rechad er a beluu. Me a rubak a mlo er a btelulachang er a Ngetkouang e mengiil er tir. Tirka el rubak a kmal mlo mechas a rengrir er a lekerd ngika el chad e le ng melechedoi e chebedes a chochil e di omekiae. Ngika el chad a ngiluu a chemadech el ngikel el lochetii er a chochil. Tirka el chad a ko er a oumededenger el kmo ngera uchul me a Obirrir a melai er a rubak e diak lenguu a kekere el chad.

A bocha el kukuk e tirka el teuid el chad er a mekemad el Ketord a ngklir a merema er a Beliliou, e a Ngirngemelas a ngar er a kederang el melecholb e mengilt a cheluch el

mengididiich a bedengel e mesterir tirka el teuid el Ketord el meremang. Tirka el Ketord a ko er a kmal mlo kaseues e ko er a rrau a rengrir le ng kmal dirkak a ta lesa ngika el chad.

Tirka el chad er a beluu a mla me me te berrotel er a dulul a chudel er a chelechol e omditm er a Ngirngemelas. Tia ikid e ng mocha merek el melecholb me ng ko er a kmal beches a bedengel e kmal chedidiich. E tirka el Ketord a mirrechii a biskang el mo er a Ngirngemelas me ngii el Ngirngemelas a kmal mle merched el nguu a ta er a biskelengel el lild el leuetel el nguu a chimo er a biskang el mrechii a ta er tirka el Ketord el lmuut er a ongeru me ng mrechii. Ng milekodeterir a reteua er tirka el Ketord me a rebebil er tir a ulebult e obekall el chemiis el mo er a Ngeaur.

Tirka el chad el mle blart a kmal mlo mechas a rengrir me te ulemdasu el kmo ngika kmal dirk kekere el chad, me ng kmal mlo ungil a rengrir e ng di lmuut el kmal mlo ungil a rengul a ngika el redil. Ngika el chad a ngiluu tia el ta er a biskelengel el nguu el dulmeklii er a chelechol e dmu er tir el kmo, “Tia el basio a bo domekedo er ngii el kmo Ngiwal.” E chelecha e te dirk medengelii a ngklel el kmal dirkak lobes er ngii.

A Ngirngemelas a mlo bechil a Obirrir e dilu er ngii el ua se, “ Chelecha el bla bo dekaubuch e ng soak chobo modengelii tia el kmal klou a belkul el tekoi. Ng diak lsoak a chomousekool me a lechub e moungelakel er ngak a kunga uasech me bo el bechesechusem a chesemek.” Tia ikid, a uriul e ng mocha dioll a Obirrir me ng ulemdasu el kmo chelecha el bla kbo kdioll e a Ngirngemelas a diak lsebechel el choitak. Me a ta er a klebese er a lomengur e ng dilibek a bebil er a uasech el mo er a chesemel, me tia ikid e ng dula er ngii el kmo,”Ke dirk medenge, ng diak lsoak a chomousekool er ngak el ua ise.” Me tia ikid e ng mocha ngmai aika el biskelengel el mechei e ngii a dmu er a bechil el kmo, “Aika el biskang a biskelengel a ngalek. A lemechell e a ngklel a mo Termeteet. E ngii a mo ousbech aika el biskang el mengkerengir a rechedal er a belual.” E sola e ngii a remiid el mo er a Ngiwal.

OKIUAMECHUU

Tia cheldechedechal a chelid el Okiuamechuu el chelid er a Ngercheu. Ngika el Okiuamechuu me a merrengel a chad er a Beluulechab el ulebechakl el me er a Belau el mo er a Ngercheu.

Te mle kie el meketeket er a Ngercheu e a remeklou el chad el ledilak a omdesua el kmo, kid a di dengar er tia el beluu e ng diak a rechad el desterir me bai dorael el mo bedul a Beliliou el mo osiik er a rechad me a delengchekled.

Te milrael el mo er a Beliliou e ng di Okiuamechuu me ngika el merrengel a di mle kie er a Ngercheu e le ngika el Okiuamechuu a dirk mlechell me ng dimlak lebo er a Beliliou.

A ta er a tutau e a lebekiis ngika el redil el ta er a Okiuamechuu e ng kmal betok a odimir el meklou el ngikel el telecherakl e a loker er a Okiuamechuu el kmo, “Aika el odimed ng tech a ullab el mei?” e ng kmo, “Bechere el lak moker e di bo moruul e dongang.”

Tia el omeruul a mle ua ise el mle betok el klebese e a lluut el ta er a tutau me lebekiis ngika el merrengel a Okiuamechuu e ng dibus a Okiuamechuu, me a ngelekel el tolechoi. Me ngika el merrengel a mocha osiik er ngii el meliuekl er a Ngercheu e diak lebetik er tir me ng merola el mo er a Beliliou el mo mesubed er tirka el meklou el chad.

Te dirrek el rokui el mlo er a Ngercheu el mo osiik er a Okiuamechuu me a ngelekel. Me ng mle ta el Sangdei el losiik e kmal di diak lebetik er tir e a mocha ongeuid el klebese e ngika el merrengel a Okiuamechuu a ngar er a bebul a otaor e a Okiuamechuu a nguabek a medal e dmu er ngii el kmo, “Ngak tia el dirkak mad e mla mo bechil a chelid er a daob er tia el beluu el ngklel a Ngirchotuut me ak kie er a beluu el ngklel a Roisulngang. Me bo e budii a siik e msbedeterir rechad el rokui el kmo, a lsekum me ng mo er ngii a secher e kom kudmeklemiu e me er tie el di taoch e se el ome e ko melebeb e mo mengituuk er a mekesong el dmu el kmo ngerdebuu bo er a ongos e bo e leme a rebuluulechab me loliloik er a mekesong me bo el mengubet a smecher el metemellang. Se ikid e a resmecher a mengubet el mo ungil el diak lemad.

Tia ikid a omesodel a chelid er a Ngercheu el ngar er a Roisulngang er a Ngercheu er a Beliliou.

OLBED E KALL

A irechar e ng kmal mle meringel a mekemad er a delongelet aika el bek el beluu er a Belau. A rechad a dimlak lsa el sebechir el ngar er a chei e le te mle medakt er a remekemad.

A ta el rubak el kilie er a Tmelobech el chutem er a Irrai a mle bek el sils el di lebo er a chei. Ngika se el lebo er a chei e ng diak a techellel e lebeu a bad e lengai a oruer. Ng mle bekikl a lebo lemechesa el omeu a bad el toeck a remekemad me lokodir. Ngika di omes aike el bad el betok a oruer er ngii e mengider el oltak er a berrul. Se el leme er a taoch e ng chemol aika el bad el mo er a blil me ngmai el chodesii a olbed. Se el lsekum a ngelekel a mo songerenger e lmangel a kall e ng dmu er ngii el kmo, “di mnguu a ongulem e mtobed el mo er a olbed me momengur e tilecha a di olbed e kall.” A ngelekel a mo me ng omeu a oruer er a olbed e omengur.

Se a uchul e tia el chutem a mlo Olbedekall a ngklel.

OLCHIAOL

Ngika el Olchiaol a ngar er ngii a ochedal e ngii a kot el klou. A delal a Olchiaol a mle cheseches. Te kmal mle chebuul. Te di mle mekekere e ng mad a demerir. E tir a di kilie e kmal chebulang. Me ng mecheto tia el blirir. Me a derrir a dula er tir el kmo, “Rengelekei, me me doutekangel e kulekesako el mo er a tkul a mesei e domdor a llel a brak e kede kmal chebula le ng mla mongkangk a blid.” Me te mo me te kie e rullii a blirir el delidui e olab a llel a brak el mengado. Me ng klteketele a taem e a Olchiaol a mocha teruich me a eai rekil e ngika el redil el ochedal a bekord el teruich me a eru a rekil. Te kmal di mengebuul me te di menga redechel a titimel me a demok. Tirka mlo ngeltengat me te mlo kie er a bita er a uchul a iedel. A rechad a ko er a metetoech a mederir er tir e le te ko er a kmal chebuul. Se el lebo leche a rechad e te mo tuo er a oreomel e ngar er ngii tirke el ko er a kmal dengerenger el chad el diak lechubechubechad.

A ta er a klebesei, e ng ngar er ngii a ta el chad el mlo cheme er a oreomel e mesa a Olchiaol me ng oleker er ngii el kmo mei, mei. Ngika dirkak lebo loungakl er a Olchiaol, me ng di kmo mei. A lemerema e ng dula er ngii el kmo, “Ak melechui aika el tebaringel a ochim me ng diak kobo mcheseches el ua delam.” E a lechub e ng omulak er ngii. Ng kmal mlomekngit a rengul me ng mo er a blai me ng lmangel e melekoi er a delal kmo “Te melechui a tebaringek e dmu el ua se ng diak chobo mcheseches e a ngklek a mo Olchiaol.” Me a delal a ua se, “chere e rungalek e ng diak a cheldechulel e kede chebuul, me ng metetetoech a mederir a rechad er kid.”

Ngika el ochedal a Olchiaol a di blechoel el mo meruu a iedel. A Olchiaol a dirrek el mlo me ng dmu er a ochedal el ua se, “ng soak el mo er a eanged me ke mo er a uchul tia el iedel e se el kurrebet a mengur el iedel e ng belkul a kmo, ak mochu er a eanged.” Me ng mocha ngmasech e orrebet a meduch el iedel el mo el mo me ng mocha orrebet a mengur. Ng melemiakl el mo klebesei, me ng mo mechiuai e mekiis e melemiakl el merema er a leko ng bdelulachang. Ng milsa blai e a lebo e ng ngar er ngii a ta el mechas. Ngika el mechas a oleker er ngii el mo el leko ng ngelekel. Ng merema me te kie el mo el mo e a ta er a klebesei e ng dula ngika el mechas el ua se, “rungalek ak mo er a mesei e kau a diak bomorutech er a kim.” Ko er a lorael ngika el mechas e ngii a kmal soal leko di lebo lesa tia el kim. Me ng mo me ng mkisii tia el kim e a lomes e ng mesa ngika el ochedal el ngar er a uchul tia el iedel el di lmangel me ng kmal mekngite a rengul me ng lmangel. A lemerema ngika el mechas el mla er a mesei e a

lomes a medal a ngelekel e ng bekerekard. Me ng okere er ngii me ng mocha ouchais me ng dula er ngii el kmo, “Ke mo me ke mesa a delam. Ngar er ngii a cheremek el delerrok a ngklek. Ngika a chobo mngar er ngii el mo omes er a delam.” Ngika el mechas a dilu er a cheremel el kmo, “Ke mo e mengert a udoud er a deterir tirke el rubak el ngar er a bai e ng di ngike el kot el mo btil a chomchertii a til el mechadilii el diak ludoud. Me ng mo me ng mengert a deterir tirka el rubak e mo er ngika el kot el btil el rubak e chortii a til el diak longert a udoud. E ngika ikid ngika el millechui er a Olchiaol. Me ng ngosecha a rengul ngika el rubak me ng mekiis el nguu a ongeched el nguu el subechii er ngika el charm. Me ng telilech el leko ng mla mad e ng di mlo el mo dibus. Tia a olechotel a kmo ng diak lemetetoech a medemiu er a chebuul e moudebsochel e le ke mo delebeakl. Ke bai ngosuir a chebuul.

OLIK ER A IDABELUOCHEL

A Olik er a Idabeluochel a ngklel a olik el bekord el tereu me a tedobech a bita el osebekel me a lechub e ng oikab el olengesonges. Ngika a kilie er a Idabeluochel el ked er a bebul a Ngkeklael mo bedul a Ngerchebetang. A oreomel er ngii a meklou e mellekulek a oterriil er ngii. A Olik er a Idabeluochel a kilie er ise. Tia el cheldecheduch a ulekuak el me er a beluu er a Ngeburch el ngklel a beluu er a Melekeok el ngar er a mo bedul a diluches. A lmuut el kmal ngar er a mo bedul a diluches a Blisang el di mla beluu er a Ngeburch.

Tia el cheldecheduch a cheldecheduch er se el ongeru el blai er a Ngerurikl. A mechas er a Ngerurikl el Obechad a ngklel a mengelaod er a kekere el ngalek el redil el locha ngar er a euid el mo bedul a eai el buil e dikea el sebechel el chemolodii e le ng kmal bekililangel el ngalek. Me ng di uleba er a blai el dikea me ng tobeda er rikl me ng mengelaod er ngii. E dmu ngera el tekoi a silchesechii a ngerel me ng omekeko el kmo “Olik, Olik, Olik be mnguu a ngelekem, Olik, Olik, Olik, be mnguu a ngelekem.” Me ng ua ise el omibais er a olbed el mo er a bita el me er a telia e ngii di mle mereched el mo milkolk a eanged. E sola e a chimo el Olik a meremang. Me a leme e ngika el mechas a kmal tilobed a delebengel er ngii e ngii sibesbii ngika el ngalek e nguu el remiid. Ngika el ngalek a tolechoi el redil. Me ng nguu el remiid el mo er tia el bebul a ked el belual er a Idabeluochel me ng kie e nguu el loia er a oterriich e omekeroul er ngii. Me a kot e ng millengot el osiik a bodes me a ngera el ko er a olsobel er ngika el ngalek me ng ng oltut er ngii er a bodes. Ngika el ngalek a di mle bles el rengul a kmo ngar er a mera el belual me a lechub e ng mera el blil me a lechub e ng ngar er a eungel a mera el delal e le ngika el Olik a kmal mle kerekikl e ungil el mesiou er ngika el ngalek. Tir a medenge a charm a charm me a chad me a charm a diak lsebechir el dmak el kaukeroul. Me a omerolel ngika el ngalek el mocha klou el dil e sola e a Olik a metitero er ngii e le ng merael el mocha ngodech el diak lsebechel el suebek el obengkel a Olik me a ka longa bodes me a ka longa budel a miich me a lechub e ng budel a keam me ng mlo merael el mo chetituokel er ngika el Olik. Me ngika el Olik a ulsiik a bek el rolel me a ongelodel a ngelekel me a rolel a blengur er ngii e kmal dimlak lemereched el metik. E ng di ta er a klebese e ng mlo medenge ngika el Olik el ua se ngika a kirel el omengur el chad el menga a kall el kukau me a ngikel me a lechub e ng kuk bebil er a bedengel a kall. Me tia ikid e ngika el ngalek a ua lulderchii ngika el Olik me ng robeta er a klou el klengit. Ngika el Olik a kilmeklii a uldesuel el mocha kirel el osiik a cheldechulel a kelel ngika el ngelekel me ng

mlo merechorech. Tia el lomerechorech er ngika a Olik a milrael el kmal mesisiich. Me se el lorael el omoch a obliil e ng merechorech a kliou el ua chelbakl, urrekerk el miich me a uleld me a kukau me a ngikel el me er tia el ked me ng omeka er a ngelekel. Me ngika el ngelekel a kmal milrael el mo mesisiich a bedengel e merael el mo el mocha kirel el ousebech a bail. Ng mocha kirel el lak loucheriut e ng metacher besul el le ng klunga el dil. Me ng kuk mocha mechesa er ngii el ta er a tekoi. Me ng ulsiik a rolel me ng dirrek el mlo omoch a obliil e mocha diak di lekall a lorechorech, e chelecha e ng mla imuul er a cheriut me a klalo me a chesiuch el lolengakt el mo er a belual er a Idabeluochel el kirel ongedmeklel a ngelekel. Ng mlo klou a cherredechel er a Babeldaob ngika el Olik er a Keiukl me a Desbedall me ng omechederenges e kmo tia el teletael el klunga a cherredechel a diak lokor el dubech ta er a tekoi el mo ko er a kengaol el omeruul el mo er ngii me a ngelekek. Ng okor e mocha suebek ngika el Olik el oleong a bek el beluu me a chelebacheb el mocha er a Ngeaur. Me ng mlo omoch a blai er a beluu er a Ngeaur el melai a kall me a klalo el mo lmuut er a udoud me ng ngmai er a chelsel tia el beluu. Ngii el Olik a ua ise el se kuk me me te kie el el mo diak a kelir e ng kuk mo suebek el mo er a Ngeaur. Me a beluu er a Ngeaur a milrael el mo klou a cherrodech me a nglemuu er ngii. E mlo medengelii el kmo ng Olik er a Idabeluochel. Me se el lebo temel a Olik el mo e tir el rokui el beluu el meriim el mo tmuu er a chereomel el mo er a cheungel a meklou el kerrekar me a lechub e te mo tmuu er a ii e le te mle medakt er ngika el Olik er a Idabeluochel e le ng di mechengii a blai el nguu el me er a eou e sola e ngmai aike el lolai er a chelsel e remiid. Me ng dirrek el mlo klou el chelebuul el mlo er a beluu er a Ngeaur. Me te mlo ngemuu a rechad er a Ngeaur el kirel ngika el klou el Olik. E ngika el Olik a millemolem er tia el omerellel e le ng ua lengika el ngelekel a uchul. Me a ngika el ngelekel a kmal mlo betok a klokkel el uldimukl er a tiel me a reng el longilt me ng mlo mechelaod el kie er tia el bebul tia el loterriich. E a chelebulel ngika el ngalek a diak lodengelii a kmal milechellii me a blai el blil me ng diak lodenge el kmo ak mla er ker el mei. Tia ikid a chelebulel ngika el dil, me ng kie er a chetebtel a oteriich e mocha melebedebek el ua se ngika el kmal di chimo el delak a kmo ng mad e ak mo mekerang. Ng diak lodengelii a lebo er ngii e diak lesterir a rengodech el chedal el olik me a lechub e te chad. Me tia a mle meketeket el mla er a rengul, e ng melebedebek el ua se ngika el delak a bo lsecher e ak mo klsakl? Ng mle blechoel el melebedebek ngii er a bek el sils.

A ta er a klebesei e a delal a dula er ngii el kmo, “rungalek a lsekum e ak suebek el mo e mo diak kme el mo meketeket e sola e kau a me tuobed a rasech er a chereuel chimam e ke mo

medenge el kmo ak medei. Me se ikid e ke kudmeklau e mo er a beluu.” Tia ikid a lulechotii er ngii a delal. Me a lechadecheduch ngii me a delal e sola e ngika el ngalek a kmal mlo chelellakl e orrenges er a delal a lolekoi aika el tekoi. Ngika el Olik er a Idabeluochel a ua lulemlaoch el mo bedul a uche er ngii er a teletelel a mo ulebongel er ngii me a ngelekel me ng milemesumech er a ngelekel e dula er a ngelekel el kmo, “A lsekum e ak mo meketeket e diak kme, e ng me duum a rasech er a chereuel a chimam e se a cholechotel el kmo a medei me se ikid e ke mo kudmokl a kloklem, aika kid el klalo el mlo sebechek el korker e chemudel el meskau, e ng ngmai el mo remei.”” Ngika el ngalek a mle rrau a rengul me ng kmo, “chedei ak mo reme er ker?” Ngar er ker a blik el bo kie er ngii?” Me ng ua se, “Rungalek kau a redil er a blai er a Ngerurikl el ongeru el blai er a Ngeburch. Tia er eou er tia el beluu el dengar er ngii el Idabeluochel e ke oldengelengel el mo el mo duum er a beluu er a Ngerchebetang. Ke ngar ise e sola okereker e merael el mo bedul a taoch e diak mokor el mo metik er a mlai el merael el mo bedul a Eouldaob me ke longir me te okerdau er a Ngeburch e le ng diak lsal cheroid el me er tia el beluu e tia el Ngeburch a rengedel a beluu er a Melekeok.” Me ngika ngalekel a kmal silechedekl er a rengul aika el tekoi e sola ngii el delal a liluut el dmu er a ngelekel me ng mocha ngmai aika el udoud el ngmai el me me ng mades er ngii el ua se, “Rungalek a lsekum e ng mo er er ngii a ungil chad el otekau el mo okerdau er a Ngeburch e tia kid el udoud el okak el diak lsu mesisiich el kluk a mo melimet a ngklel e ke nguu el msa a melimet e sola e tia el chimo a chomnguu el msa a melikes me ng mo klikes a ngklel.” E mades er ngii aika el udoud e oterkokl er ngii aika el klokkel. Te ngar er tia el oteriil el ta el cheldecheos el mocha bekord el melekinga a dechedech e a delal a melemesumech er ngii e sobeka e le a Olik a blechoel el loureuachel a le klebesei.

A kuk klemengetel a chelebulir a rechad er a Ngeaur er a blirir el di lomecheboch ngika el klou el mesisiich el Olik e te kmal di kea lodenge el kmo te mekerang. Te di mlo medenge ku belsechel a leme er ngii. Te di omtab a sils el di me kmeed e te kuk mocha chetituokel tir el chad er a beluu el osiik a chedechulel e kuk mo er a oreomel e a lebe ltobed e te me merenged a blai. Me te kuk mo kaingeseu el rongedii a blil a ta e kuk mo rongedii a blil a ta e sola e kuk omekeroul er a delengcheklir. Me se bo el lomuchel er a delengchokl, se loikab kuk el mocha ungil a delengcheklir e ngii a kuk me, a Olik el me omoch aika el blai. Me a rubekul Ngeaur a mocha kldibel e sola mocha osiik a cheldechulel, ngika el klou el ua el chelid, ngera ngklel el melemall er a Ngeaur. Ngika ng Olik er ker me a lechub e ng chelid er ker el beluu el melemall

er kid. Me te mlo mengelil e olturk chelid e osiik a cheldechulel a kodellel ngika el Olik e kmal dimlak lebetik er a mo ngosuterir.

A ta el kekere el chad el diak lekekere el chad e ng di ko er a mesesechebuul el chad, el ngelekel a ta el mesobil el mechas er tia el beluu a ulochotii a chimo el tekoi el ko er a tekoi el llomes er tir. Ng dmu el kmo, “Kemiu el rubak, chelecha a leme a Olik e lorael me bo dorenged aika el blai e kede duorem a seches er aika el blai e sola e ngmai el lodars e chodeuui a blid me a lemei ngikel klou el Olik el me omoch aika el blid e ng mechesuches er aika el seches e a lta se a mo uchul a sebechekel a beluu er a Ngeaur.” Te ko er a mle rrau a rengrir er ngii el omeruul e ng di a rebebil er tir a mlo oumera er ngii. Me a lemerema a ta er a temel ngika el Olik me letemellii a blil Ngeaur e lorael e tia ikid e te mlo olab a tekingel ngika el buik me a lebocha lorenged a blai er a Ngeaur e te milsang a seches el merorem el mo ua deremellel aike el ungil a deremelel el ongeched e sola e merenged a blai. Me te remenged a blai e chemado el di slang e klengobel a chetebtel a seches er ngii.

Me tia el ua ise el omelekoi el lomelekingel ngika el Olik el mo er a ngelekel a ko er a uluueling er tia ikid el teletael. Me tia el sebeka a Olik e ng silebek el ko er a di cheloit bedengel el ua leberredel a kodall a obang me ng blebechakl er a eolt er a melidiul e ko er a mesaik a bedengel sobeka el merema er a Ngeaur. Me a lemei er a Ngeaur e ng mocha meliud el meleliuekl el me, te oldiu el ua se ng kuk merema me a rengalek a kaidelengelangel me a remechitechut el ngar er a ulaol a olingatech me a rengalek el kolekel el mo omart er tir er a chereomel, me a remengurs er a rechad el mo oltuu er tir er a chereomel e ngii a merchokl el mei. Me a kot e ng milchengii a chimo er a blai e ko er a milchesuches a telkib er ngii e ng di uluutekangel. A lengar er a ongeru el mocha er a ongeua e ng kmal dikea el sebechel e le ng kmal mla mechetechat, me a ongeim e ng di mlo moch el obengkel tia el blai. Itia a mle ulebongel er ngika ikid el Olik er a blechengel a blai er a Ngeaur. Me ng cheloit ngii el Olik el mengoit a telil e melebedebek er a ngelekel el cheloit er a Idabeluochel el di kea lebo lesa e le te kmal chacheroid a deluill e ngii a sobeka telil er bita er a Ngedeloch er a Ngeaur.

A ngelekel a mlo bad er tia el kesus e a lebekiis er tia el mocha tutau e ng ko er a dirkak leme a delal. Me ng reboreb el ko er a di mekikngit a rengul, e ng me duum a rasech er a chereuel a chimal. Me tia ia ko er a kmal chilsechesii a rengul ngika el ngalek el ko er a kmal mlo meringel a ulul e kmal mlo mekngit a rengul er a kodellel a delal. E ngika el delal a mede er a Ngeaur. Me ng rireboreb el ua longiung er a chetebtel a oteriil e melebedebek el kirel a

kodellel a delal e mocha dobedebek aika el tekingel a delal el ua se, ak mede e ng tuobed aika kid el rasech. Me ke mechere a klengitelreng e kau a kudmeklau e merael el osiik er a rechad e mo reme er a beluam er a Ngeburch me a blim el blai er a Ngerurikl e kau a ngalek e ourot er se el blai. Me ng mocha kudmokl a klokkel e mocha oldengelengel er tia el metongakl el oterriil el me er a eou e mocha nguu tia riamel el ngii a mle ulebongel el blo lenguu a delal el nguu el me el cheriut e nguu el mo mecheritii e mo tuchelii tia el omsangel el mui er a toluk me a bebil er a ilekemellel e oldengelengel el me el me er a beluu er tia el Ngerchebetang. A lebe ldum er a beluu er a Ngerchebetang e ng ketengel el mesterir a rechad me ng ko er a mekelmolm a bedengel e ng di klebokel a cheriut el loucheriut er ngii me ngii a ungil el dil e le ng di milenga bodes me a rechad a ko er a mechas a rengrir er ngii. Ng di teleteu a ngerir er ngii e ngii di omais lokererker er a rechad el kmo, “Ngar er ker a taoch? Me te meltelutk er ngii me ng oldengelengel el merema er a taoch er tia el beluu me ng reboreb er a diangel el diak a rechad el mekereuii e le ngika a ko er a ngodech a blekerdelel. Ng ketengir el mesa a rechad me te melechedech er ngii el kmo “Ngika ng ngalek er ker el dil?” Me ngii me ng diak lodengelterir a rechad me ng reboreb er tia el taoch e a mlai er a Ngersuul a merema olekerd er tia el beluu e mle kirel el di olekerd e lmuut. Ng okere er tir el kmo, “Kemiu kom mla er ker?” “Kemam a mla er a Idubech. Aki di mle olekerd e lmuut er a chelechang.” Me te okere er ngii el kmo “ kau a mo er me ke ngar er a taoch?” Ngak a mo er a Ngeburch me a uchul e ak ngar er a taoch. Ng sebechek el se el bo merek me a omrekui a chelsengmiu e kubengkemu e mokerdak er a Ngeburch?” Me a ldu el ua ise e ngika el mereder er a mlai el oumlai el chad a kmal mle ungil a tekingel me ng dmu el kmo, “Ke di ngar er tia e choilemam e aki mo er a beluu me a kime e kede kudmeklid e le kede omech er a dolech e melikes.” Me ng rireboreb er tia el taoch e choilii ngika el chad er a Ngersuul me te mo kudmokl a chelsengrir e meremang. Me a lemerema e te otekir e mocha melikes. Te melikes el lodengelengel el me el me er a Ngemelakel er a Ngiwal e oldengelengel merema er a Ngeburch. Me a leme e te mocha okerdii er a Ngeburch e ngii el dil a mocha nguu a chimo er ngii el udoud el nguu el msa melimet e dmu “Tia melimet a ngklel e ng ududem.” E mocha nguu a chimo er aika el kluk el msa ngika el melikes e dmu er ngii el kmo, tia a ududem e ke kmal mlo mesaul el melikes me ng klikes a ngklel.” Ng kmal mlo ungil a rengrir er ngii e ngii olkerda er a taoch e mo nguu tia el omsengelel el tuchelii e diak lodengelii a bo lebedul ngii. E le ng dirka a ta lorael er a chelsel a beluu er a Ngeburch. Me ng mererorael el bedul a beluu e a sils a kebesengei me ng merael el mo el mo er a chimo el iliud el kmeed er a diong me ng

olengull e mecherie tia el omsengelel er ngii e ko er a omechderenges el ua se ngar er ngii a rechad el mo dulii a ngklel a blai er a Ngerurikl ng diak. Me ng ko er omechederenges e diak a me ko er a dulii a ngklel a blai er a Ngerurikl. Me ng reboreb el di rireborb el mo el mo me ng mechebela ilkolk. E a rebebil el ngalek a merema el cheltekill a chetilroal er tir el me melai a ralm. Me te me me te mesa e ng okere er tir el kmo, “E rengeleke kemu kom mla ‘r?’” Aki mla er a Ngerurikl el me melai a ralm.” “E rengeleke a omngai a lmiu e morael e ko mochotii a blai er ngak e le ng soak el mong.” “chochoi” E sola e socheseb aika el chetilroal er tir e chotakl e ua se “Aki merolung” Me ng mocha tuchelii tia el omsengelel e okiu ullir. E a ta er tir a ma kolekel el mo er a blai el mo me ng ngouchais er a obechad el dmul kmo, “Ngar er ngii a ngalek el ngar se er eou el merael el me, el telechull er a omsengelel e soal el me er a blai.” Me te ua se “Ngika ng tech a dil?” E kmu, “Ng ko er a kmal teletelel a meteet el redil e le ng kmal lungil a teletelel.” Me te ko er a medekta tirka el chad er a Ngerurikl me a remechas el ua se olebo ng tech a meteet el mechas el telkib, e ng dumiang. Ng toachekla er a chelades e merael el me er a blai. Me te melengdangch er ngii. E ngii a me el me tmuu er a berandang el mo sumecheklii a delengcheklek e dirrek el ua el ko er a kmal songerenger me ng ua se me sese er a ralm me kngim. Me te mocha ngmai a ralm el msa me ng uim e ng ngouchisa e dmu, “Ngak a ngelekel a Olik er a Idabeluochel.” Me tia ledu el ua ise e tia el blai el rokir a kmal mlo lotkii tia el taem er a lebo el dibus ngika el ngalek e kmal mlo medengelii el kmo ng ngika ikid el kuk lueta el meremang. Me te uluutkeu er ngii me a relilangel me a reko er a di mlo melaiu a bedengel. E okere a chisel me ng nguluuchais. Me ng ngika ikid el mechas a kiltmeklii tia ikid el blai er a Ngerurikl el mo merael a chisel e ngar er ngii a udoud er ngii e le ng udoud er a bek el beluu a blo loribab ngika el mlad el Olik el ngmai el me me ng kloklek. Me ng mlo medechel er a blai er a Ngerurikl e ngii a mlo medechel el ourrot el mo lmuut er a ulebongel er ngii.

OLIK ME A BEAB

A Olik me a Beab a mle teru el odam. A ta el tutau e ng ko er a kmal mle ungil a eanged me a Olik a dula er a Beab el kmo, “Chollei, kid ke le lungil debo er a chei?” Me a Beab a dula el kmo, “debong.”

Tirka el teru el odam a mocha nguu a suika el me me te mocha meruul er ngii el mo mlirir el mo er a chei. Tirka rullii el mo merek e mocha meruul er a resel. Te dirrek el mlo dobechii a orrekkel el bambuu el me e mocha otebedii tia el mlirir el mo er a daob. Tirka mocha kudmeklterir e mocha omekall el mo er a chei. Tia el omekall me le ngar er a belngel a kerker e a Beab a mocha tmaut el menga er a ilobech er tia el mlirir. A Olik a dula er ngii el kmo, “Beab, lak monga er a ilobech er a mlid e ng mo el meling me kede ruchorech.” E a Beab a kmo, “Ak di kolii a di telkib me ng diak lemeling.” E a lechub e ng di milenga el mo el lingir a mlirir. Tia el lemeling a mlirir e ng mocha rresors me a Olik a nguu a iars e mo mengikai me a Beab a nguu a olrakl el mo mengikai. Tia el lebo lengasech er a medirt e a Beab a ngiluu tia el olrakl me ng mlo kemril, e a Olik a nguu tia el iars me ng osebekel e suebek el remiid.

ONGAEL ER A NGERCHEMEL

Ng mla er ngii a teluo el ongael el dilechor er a Ngerchemel el ngar er a beluu er a Irrai, el kmal mle berikt me ng mesesusauch a rechelel me a bek el ouesebek el charm a mlo el mo oldingel er ngii e a lebo e ng dirk mengur el dirkak lebo lmark. Me ng mlo er ngii a klou el cheldecheduch er a delongelir e te milingii tia el kerrekar er a delongelir el kmo ngera el charm a mo er a ngera el rachel me a ngera el charm a mo er a ngera el rachel me a bek el charm a mlo ua ise el mlo chemur a blingelir er tia el kerrekar. E a chetebtel a kerrekar a mlo blingelet a laiib. Me a bocha el mark tia el ongael e ng mlo mark a blingelir a rebek el charm me te mlo menga me te medngedinges e a blingelet a laiib a dimlak lebo lmark me ng di mlengerem e mengiil. Me ng di mlengiil e ng kuk mereko a sim, me ng di mle kea lebo lemark e ng mo merek a sim. Me ng meterakl a bek el charm le ng mereko a sim, e a laiib a di mlengiil. E ua ise tia el blingelet a laiib el diak lebo lmark e kuk choielii a ta er a sim. Me a lemei a ta er a sim e ng dirrek el mlo mark a blingelir a rebek el charm e a blingelet a laiib el chetebtel a ongael a dimlak lebo lmark me ng dirrek el di mlengiil. Me a rebek el charm a kma a blingelir e ngii a di mlengiil. Me tia el ua ise el teletael a mle ua ise el eua el besechel a sim el diak lebo lemark a kelel a laiib me ng kmal mlo chebuul.

Me a laiib a mlo metitngot er a bebul a chutem, me aika el bek el charm er a lesenge e ng luueta el mocha er ngii a klou el cheldecheduch e te okere er a laiib el kmo, “Ngera chised me ke metitngot er a bebul chutem?” Me a laiib a onger er tir el kmo, “Sechelei ng mocha er ngii a eua el mo bedul a eim el sim el diak lebo el mark a blingelet el chetebtel a ongael.” Me a ldela el ua ise e a rebek el charm a kmal mlo chubur me te dilu el kmo “Chelecha el me el sim e a lsekum ng diak lebo lmark se el blingelet e ke me me ke melai a ulus er a omenga er delongelam.”

Me a suobel el mengai er tia el tekoi a beltikerreng me a klechubechub er a omerous el mo er a chebulang. E se el blekerdelel a laiib a mlo belkul a tekoi er a Belau el mo er ngike el chad el ua le meketeket el mengiil a belsechel a tekoi e ngii el belkul a tekoi a kmo ‘Errang, ngera a ke mengiil er ngii, ke mengiil er a rekel a ongael.’”

OSILEK ME A ORENG

A Osilek a ta er a milrael a chisel el mle merreder er a Ulong el beluu er a chelebacheb. Ngika a kmal mle betok e meklou a ududel, e dimlak lebechiil e di kie ngii me a rengengelekel a ochedal. Tirka el ngelekel a ochedal a kmal ungil el mengedmokl er ngii me ng kmal di ungil besul.

Ngika el Osilek a kmal chedal a chei me ng klmochel a ukedel er a cheleched el Biduul a ngklel el ngar er a Klou el Toi. Me ng di klmochel a derekengel er a rokui el klebesei el kerreel suld, me ng diak lolengull el omekoad a meklou el uel me a chedeng e olab el omeka er ruchedal me a rechad a kebliil er ngii.

E mla er ngii a ta el redil el ngklel a Oreng el ngelekel a ta el rubak me a ta el mechas el chad er a Ulong. A Osilek a kmal mle soal redil a Oreng, e meteet el chad me ng oba a iltetel el ko er a di omecheracheb er a rechad. Me ng ouderek er a Biduul e a lemad el chedeng me a lechub e ng uel e ng melekoi er a ruchedal el kmo, “Kom ngmai el mo er a blil a Oreng e le ng mo bechik.”

Ng kmal mlo diak el sebechel el motngakl e di mle ua ise me a demal me a delal a Oreng a dula er ngii el kmo, “Rungalek, chomko ngera el tekoi e ng sebecham el ngubetau er ngii, e ng di tia a lak lekau e ng diak a chiolel er kemam.”

A Oreng a mle kekere el redil me se el lebo lbuil e a rengel a Ulong a mengemedaod a omilil buil er a rengalek er a Metukrikull me te di blechoel el mo me te milil. E sola e mla er ngii a ta er tir el lekaisisiu a meklungir el ngklel a Mariar el mlo sechelil a Oreng.

Me te tilbir a tekingir el mo kaubuch. Te kmal mle meringel el kaiuetoir me se el lolekoi a demal me a delal a Oreng e ng dilmuk e diak a ngera el ledu el kmal melatk er a delongelet ngii me a Mariar el kmal chetil el mo cheroid.

E a Osilek a diak lomart er ngii e di chemolt a chebul el uel me a chedeng el mo er a blil a Oreng. Mo el mo e a Mariar a mocha medengei e medekta el di kea el mekdekudem el mo omes er a Oreng. Tia er a bocha el orakiruu el belsechel a omilil e a Oreng a mo e a Mariar a medakt me ng diak lebong. Tia ikid e a Oreng a mesumech er tirka el rekebil er a Metukrikull el kmo:

Rikebe chobom riid er a metang er a Oikull e ke me ngma klmecham el mo dmu e mkerir ngii el Mariar er aiker rukeuid e leko er a Ulong a Mariar leme mlodingel a rodel e rrad a bngel e ngii aike el bedul er a maml.

Me tia ikid a Mariar a milretii el mo e dmu er ngii el kmo, “uriul er a eru el klebesei e ke me tuobed er a kederang e a chomesa a bekall el me tuobed er a Metukeruikull el terechokl a resel e ke meius el osiueklii e nguu a tiem el cheluch el ngar er a chelsel a ulengchidel.”

Uriur er a eru el klebesei e a Mariar a nguu a udoud el sukur er a chelsel a ulengchidel e dmu er a ruchellel el kmo, “Kom omekall el di merekmo omesa a mlai el me tuobed er a Ulong e mo kmeed e mecheklii tia el ulengchidel er a daob e kemi a omechereu el me remei.” Tia ikid el udoud a mlo ua lolmesmechel a Oreng er a Mariar.

E a uriur er a sese el klebesei e a Mariar a liluut el mo otii er a Oreng e dmu er ngii el kmo, “Oreng ak mad er a chesebreng e ke me doklak.” Tia ikid e a Oreng a kmal mlo mekngit a rengul er a rengesa aika el tekingel a Mariar me ng mocha mengitakl el kmo:

“Mariar me ngak a diak kbo kbechil a Osilek el mo meketeket e ngii Osilek a mle melat a ngeltel er ngak el kmo kau bo monga cheldik el ngikel er a moloachel er a Biduul lulengesall el olechit er a Mariar.”

Te kie el sese el klebesei e ng mad a Mariar me a Oreng a olterka er a bechil el kmo “Bo modengelkak e kbo er a kemeldillel a Mariar.” Tia ikid e ng kmal mlo ungil a rengul a Osilek er a kodellel a Mariar el kmal loltoir er ngii a bechil. Me ng kilengei er ngii e dmu er ngii el kmo, “Bo mdeklii me chomei.”

Uchei er a lebo e a Oreng a chilsuch a bngal a kelau el lolab el mo mengabs er a dingal el telul. A bocha el merek e lebo e ng meketeketa er a lebo lebelsechel a omelakl me rechad a di mengiil er ngii el me mesa a bedengel a Mariar e mochu melakl er ngii. E ngii a mo me ng kie e di lmuk e a lolekoi er ngii e ng dmu el kmo “A kulengit me bo kbereked er a Mariar e mnnguu a ta er aike el bar el choimkemkak el telkib me ak bekiis e lomeluoso kung.” Me ng mlo ua ise, e ng di tia er a lebo lebad e ng ngiluu a isngel el mo osecheschii er a chebesal a Mariar me ng medeb a telil el mad el obengkel a Mariar.

Tia ikid e te mocha mesubed er a Osilek er a Ulong me a demal me a delal a Oreng, e mlo moterkokl el di mlo chimo a debellir.

OUNGOAOL

Tia chedechedechal a ta el rubak er a Ngkekla el lulungerachel er a delengcheklir er a bek el sils e bechiil el ko er a kmal ungil a chebechielel. A ta er a klebessei e ng mocha kudmeklii el mo dmanges me ng okerir a ochelel e te doiderekl e tobedang. E ngika el mechas el bechil ngika el rubak a ngar er ngii a sechelil kuk ta er a sechal. Se el lebo er a che a bechil e ngii me ngika el sechelil sechal a kuk mo er a ked me te milil. Ngika el rubak a kmal dimlak lodengei. Tia ikid er a lorael ngii me a ochellel el mo oungoaol e ngika el mechas me a sechelil a kuk merael el mo er a ked me te milil. E ngar er a ked e omes er ngika el rubak er ngii a leme remel e meterakl. Ngika el rubak me a ochellel a omekall el tuobed er a chelemoll e a ltobed e a chedeng a remurt el me er a kuteling er a mlai el di mle el mo dengarech me ngika el rubak a mesa tia el ngisel a chedeng. Me ng mlochii tia el chedeng e dula el kmo, ollei bo bechere e deluut e tia telemall. Me a ochellel a ko er a di rrau a rengul e mocha omechereu. E merma el di ua blekall. Me tia el omilil er a ked a mechese rengrir. Tia ng ngera metemella me ng lueta tia el mlai. Me ngika el mechas er ngii a mlo er a meselech. Me ngika el rubak el sechelil a me er a taoch me ng teloi er a rengalek er a chur me a melechotech a suld. E ngii a merret el merema el di bleuechel tia el mlai. Me a lorumk el tmurk er a cheldukl e ngika el chad a di ngiluu a biskelengel e mo suchesokl e kolekel el sochelii tia el biskang el di bedul tia el cheldebechel el mla er a taoch. Ngike el dengerenger er a elecha, e kau a medei. Kau ke ngelekel tech a el meruul er kau el meketeketa el ua ise a teletelem. Me a lekelekela el me el di klechall er tia el biskang e di lotebteb e ngika el sechelil a bechil a tilobed a delebengel e le ng omdesua el kmo ngika el rubak a medel el medengelkak e ngak a diak kudengei. Me ke torakl aika el klekedellel e mo ridekekl e mo chemau a benged ngasech el chemiis e ngika el rubak a kmo, ngii kau ingii. Le ngar er a klengit el chad a di bekikl e reboreb. Se a mle uldesuel ngika el rubak, el mekreus el uldasu, me a uchul e se er a leme e ng milruul er ngii el ua ise. Me ng okor e kodekedii a biskang el di tiluu er ngika el chad el me er a ordomel. Me ng medei. Me ng mlo belkul a tekoi el kmo ngika el chad ngera ng medengei e ua se. Ng di diak a chad el ngar er a klengit e klou a rengul.

RECHULUCHEL

Tia cheldecheduch el mo er a Ngermasech el beluu er a kmal rechuodel er a blai er a Ngerebkes. Tia el Ngermasech el beluu a ngar er a delongelel a Ngardmau me a Ngeremlengui. Me ng ua el teliud el bita el beluu er ngii a mo er a Ngeremlengui me a bita el beluu a mo er a Ngardmau, el di mla ua ise er a rechuodel el me er a chelechang. Me ng ulekedmokl er a ked el mo er a daob el mo lmuut er a chelmoll el oliochech el a Ngeremlengui me a Ngardmau, el rruul el ua ise er a kmal rechuodel me a remla chad el rubak er a Ngeremlengui me a Ngardmau. Me ng medechel el tekoi el me er a chelecha el beluulechad me te di medenge a remeklou me a rengalek el kmo a blai er a Ngerebkes a le kilie er ngii a ta el rubak me a ta el mechas el mle kaubuch el meketeketa e milechellii a di ta el ngelekir el sechal me te milngeklii el Rechuluchel. Ngika el ngalek a kmal di mle ngii el ta me ng kmal mle cheleoch er tir el teru el obekel. E te kie el kmal ungil mengedmokl er ngii el mocha klou el mocha sebechel el lobengkel a demal ngar er a chei. Ng kmal mle ungil beserir e le ng kmal kedung er a blai me a beluu. Me a rechad a kmal chemat er ngii me a resechelil me te dirrek el kmal smau er ngii le ng ungil el chubechubechad e bekokuui el ungil a tekingel. Me te kmal smau er ngii a resechelil me ng blechoel el ongdibel a bita er ngii er a resechelil er a di omilil er tir, moiuaiu a ngerel el ungil a tekingel. Me te kie e a demal a mocha smecher me ngii me a delal a di kie el oba demal me a blirir a kmal di meseked er a resechelil el osiik er ngii er a di omilil er tir. E ngii a diak lsa el tuobed e di oba demal ngii me a delal e a kerior er tir e ng mede a demal. Me ng kmal mlo mekngit a rengul ngii me a delal me te kie e mocha siungii e mo doklii e di ngii me a delal. E te kie me a resechelil a di oumesingd el mo el mengelim er ngii. Me te kie el kmal mlo meketeket el mocha sebechel mo er a chei. Ng mla mo klou el chad me a resechelil a me mesedem er ngii el mo er a chei el di oltirakl a omerellel a demal er a lekiei.

Me aika el mla er ngii a demal a di loltirakl el ngar er a che er ngii. Me ng kmal melemed er a ngikel me se el leme e ng omeka obliil el di oltirakl omerellel a demal. Me ng mlo blechoel el mo er a che e meoud el me me a delal a lorael el mo dibus e ngma ongulel el locha er a bub el lomech er ngii. A leme el ngar er a che, e a irechar e a blil a kall a rruul el

bub el ua bub er a ngikel e ng di bkeikl bebul el domkais e melecha a kall e melai. Me a delal a medengelii el di blechoel el tuobed e diak lsbedii a delal e merael me a delal a kmal suebek a rengul a lak okouil a lrael. Me a delal a meruul okouil e melecherakl er a orecheklel er a blai el derorom er a blirir. Me ng blechoel el melai me ng mlo bleketatkl er ngii el orecheklel a kelel a ledibus a delal. Me ngii a di kldmokl el telecherakl el mengiil er ngii. Me a loilil ngii me a resechelil e se el leme e ng mo imuchet okouil e mo melikes el mo er a chei. Me ng blechoel meruul e ua ise me ng ko er a uleksau ku er ngii, me ng milil e a leme e ng di kldmokl a okeuil me ng di me el mo melikes.

A ta er a klebesei e ng ngila okouil e mo tuobed el mo er a che er a klebesei el di mla er a medal Ngermasech. E a eolt a mle dimes el di chilitii el meringel el lochelched okul me a lolikes me ng diak. E a rechuodel a bek el mlai el rokui a di ngar er ngii a derse teluol tebechel el omech a bechoel el tekoi er a rechuodel. Me ng mo nguu a tebechel mo me ng mecham me ng dellemakl a uchul e chelemuul er a melengel. Me ng di uleba me ng dikea e ngii a remiid.

Me a loske er ngii e te mocha metik okul el lloched me a tebechel a cheretuk el dellemakl e ngii a ririid. Me a leme el sbedii a delal e ng kilo ng mad er a klengitelreng. Me a remechesil Ngermasech a ulenging el mo er a Ngerebkes me te kie el mengelim er a delal a Rechuluchel. Me a resechelil a Rechuluchel me te mlong.

A le ngar er a medal a demal me a delal e ng kmal mle kedung. Me a lekldibel e bocha el olturk er a sis e ng mlo bleketakl el ua isei.

Me aika ikid a ulengoklel a Ruchuluchel el cheselsel:

1. A rikebil Rebkes a melngoeoch a klebngir e di ourureng er kau e Rechulong, a Rechuluchel ng mlor ker. Aika chusel odimel el di telecherakl er a blai el me ngiil.
2. A dilak lemei Rechuluchel e ngak a smecher me a kmo milak er a lemetat e chemetii a ingukl el di melatk er a Rechuluchel a lak el lluut.
3. A dilak lluut el me ngma chusel odimel di ngar er a bub el mo bekngiuk.
4. A Rechuluchel e rebang a di tangerkoi el di diak a titiul e mocha er a omrael.
5. Me a kbo kengelakl er aike el ongdibel er a Rechulong e te meseked er ngii a resechelim e doroakl mo er bab e ngukokl me er eou e diak rengesii a ngerem me ng di mekngite renguk e orreched el merael.

6. Me a bo kengelakl er aike el loremuul er a Rechulong e te meseked er ngii a resechelim a dorouak mo er bab e ngukokl me er eou e diak rengesii a ngerem me ng dimekngit a renguk e orreched el merael.

7. Te liriu er kid me a dik me a oak el meloched me a tebechel di mecheseb me a koll er kid me a bengedakl me a chelebuul.

8. Chelebuul e melecheda oak el ngurd lokul a kesulab me a lemengo tebechel er a mereched el kodall.

9. Mereched el kodall le ng melechesulik a debel me a ngar er a kedesimal a me me a ngar er a kederaol a mei a mei me ngosiu kesebakl me a renguk a rokerek.

10. A renguk a rokerek e ngii a sils a mochu er eou me a dolech a mesmesei me a tebechel ngar er a orebakl el eruol chelemuul e a uchul a ngeliil me ak mochu melecha er a tebechel chelebuul.

11. Me a lemengo tebechel er a medal Ngeremasech e Rechulong a kmo dioi bom dechor me mocholt er ngak obeduul el blil a oak el kebesei el kmo ngar ker me ker el meched a mo er ngii a medal a okuk e ng mo mellomes.

REDIL EL MLO MESEKIU

Tia el cheldecheduch a cheldechedechal a ta el mechas me a ngelekel el redil el kilie er a Kerdeu a ngklel el blai er a Ngerieleb el chimo er a kekere el rengedel a Oreor. Tia el beluu a ngar er a eou el beluu e kmeed er a daob. Me te kie er ngii el teru el ongalek e kmal mengebuul a delengcheklir e le ng diak a mo omekerreu er a delengcheklir.

A beluu er a Belau er a irechar a kmal mle mekull el diak a redil el mesobil e mo dioll. E ng di kerrior a mlo choisisii a chelebulir tirka el ongalek, e ngika el ngelekel ngika el mechas a mlo dioll. Me a bocha el dioll e ng kmalmekngite a rengul ngika el delal me ng melekinga er a ngelekel el kmo, “Rungalek, kau tia el dillang e kid a kmal chebuul a delengchekled er a chelsel tia el beluu me ke kmal mo ungil el mengedmokl er a kdiull er kau. Ke mo ungil el omekiai aike el delsechel a kldiull me a cheroll me ng diak bo msecher e kede chebuul el diak a me mekerreuid a bo desecher.”

Me a ngelekel a kmal kilenge aika el lullekoi a delal. Me ng ulemekiai aika el delsechel a kldiull me ng dimlak lebo lsecher e mechell. Me a lemechella e ng melekinga er ngii el kmo, “Rungalek, kau a kmal soam el menga a keam, e aika el keam a diak lekelir a rumechell e le ng ngomkuuk a diil me ke outekangel me se el mesisicha e ke menga kung.”

A ta er a klebesei e a delal a mlo er a meselech el mo mela a kelir, e ngii el ngalek a oba a ngelekel el ngar er a blai e kmal sokol el menga keam. Me ng ulemdasu el kmo ng dibus a delak me ak bai kolii ku a chimo er a keam e ng diak leserek a delak. Me ng mo nguu a chimo er a keam el me me ng metechii el mo erbitang. E mocha nguu tia el klou el bita el me me ng mengard er ngii, e ngii a dumia delal.

Me ng ko er a kilebetiek e choitii a ngelekel e tuobed er a iikr e merael. Me a delal a oleker er ngii e ngii a dilmuk e merael. Me ng mocha kiuekui a ngelekel e oltoir er ngii el mo bedul a taoch. E ng di ngii er a lorael mo e ng di iliu el mo ridekekl er a daob. Me a delal a longela e omekedo er ngii e ngii okor e di melechelbakl el mo cheroid. Me ng mocha er a tkul a cheldukl e melekinga er ngii el kmo, “Rungalek, kau tia el dikea morrenge a tekingek e merolang, e kemam a kmal chebuul.” E a lluut ngika el ngelekel el me duum er a bab e ng mla obult el mo Mesekiu. Me ngika el delal a melekinga er ngii el kmo, “Kau tia el dikea morrenge a tekingek e merola, me ke di mo ocheraol er a kluk. E a cheram a mo orul a mo bechiil el

redil.” Me ngika el Mesekiu el ngikel a lemad e ng ngeiuul a olecholl er ngii el mo klilt el ocheraol er a kluk el mo kltir a remecheleoch el ngalek er a remeteet.

Ngika el Mesekiu a lemekesokes er a irechar e lenguu el me longesechii er a beluu e lolekoi a kodellel e ng lmangel el mereberebet a iuechel a medal. Me a iuechel a medal a diak lekakerous ngii me a iuechel a medal a chad. Me a omsouel el ngerel a bereked er ngii tia el kelel el lulenga er ngii e mo suchesokl er a daob. Tia ikid a cheldechedechal a Mesekiu el ngikel el mle chad e mo Mesekiu.

RUEBET ER A OKEDIUL

Tia tekoi el mlengai er a cheldecheduch er a Kiok. A Kiok me a Reaos a beluu er a Ollei. A Ngirmelenges a mle chad er a omelenges e le ng siluub a omelenges er a Tellames. Se el lebo lolenges e ng chemars a ilotel me ng mekeek a betok el oltall. A Ngirmelenges el chad a ko er a sersuul a uldesuel e teleuadel a rengul el chad, me ng ua el teblo a blil el mo bedul a kldei. Me ng melenges, e a lebebil e ng mo er a ta er a blai me te oitel a omilel e metir a oltall, e ngii a kuk mo melenges el mo er a tang. Me ng millenges el mediderurt er a delongelet aika el blai el ngar er a Reaos me a Kiok el mo el me el diak luterkokl a blekerdelel. A Ngirmelenges el chad a mle meses el oureor el ua ise, me te mocha kausisbech aika el blai me se el lebo ldum er a ta er a blai el songerenger, me lechelechaet a delel e te kmo, me bo mngai omilel ngika, me te mo ngmai e di lmuk er ngii er a rolel a blengur e le te ousbech el kmo, ng mla omengur er se el ta er a blai me ng medinges. Me ng me tmuu me ng di reboreb e di kea el sodii e a le mla er ngii omerusel a kebui me a buuch e ng mla metom. Me ng reboreb e omdasu el kmo bechere e kbo er se el ta er a blai e a lta e ak omengur. Se el letobed el mo melenges e a lekelekel el me er a Kiok e te kmo nglocha a mle meketeket el ngar er a Reaos me a lta e ng mla omengur. Tia ikid e ng di mle ua ise e kmal mlo metacherbesul er a klengerenger e le ng di killekel er a delongelet aika el blai. Se ikid a mle teletelel a omelenges er ngii el chad. Me a bocha le ua ise a blekerdelel e ng di mle chellungel a omilel e mengai el me obiou el ruebet er a did er a Kiok e le ng mede er a kall. E le te mlo kausisisbech el ua ise el kmo a lta e ng ulemengur er se el ta er a blai me a ta er a blai me ng ousbech el ua ise. Me ng mlo belkul a tekoi el kmo, ng kired el oterkokl a uldesued me a rengud me ng diak derebet er a okediul el ua Ngirmelenges.

SECHOU ER A KEANGES

Tia cheldecheduch er a Ngetkib er a Irrai. A sechou er a Keanges a mle blechoel el bad er a ked er a Ngerikiil me a Metengalakumer e mo melngot er a Keanges e kuk mo reme er sei. A Remeschau a rubak er a Ngetkib er a blai er a Ngermangrang el kilie ngii me a bechil e dimlak a rengelekir. A ta er a klebesei e a Remeschau me a bechil a mlo kakengesakl a delongelir. Ng mla er ngii akekere el uchul er a klebesei e te mlo kaungeroel e mlo ketord, me ng mlo meketeket el diak lechadecheduch. Ng dimlak a ngelekir el kuk cholaod a uldesuir me a lechub e loungeroel er ngii me lemesumech a delongelir. Tirka se el lengar er a blai e a ta a ngar er telia me a ta a kuk ngar er a teliang. Ng mle meketeket el diak lsebechir el katekoi.

A ta er a klebesei e ngika el sechou a kuk ngar a ked er a Ngerikiil e mocha belsechel el mo melngot, e le ng mocha ouiaml a kerekere me ng suebek el me engelakl e kmal di mo kirel a uchub er a blirir e ouchoch! Choch!. E remiid el mo er a Keanges me ng melngot a kelel e lmuut el mo remei.

A ta er a tutau e ng kuk mocha ouiaml a kerekere me ngika el sechou a luueta el merma, me ng merrechokl el mo kmeed er a uchub er a blai e ouchoch! Choch! Tia ikid e ngika el mechas a kmal kilurs a ochil er a ulaol e oungerela er a sechou el kmo, “Morael el mo er a Keanges me molai a kelem el chulad e lak mouchoch er kemam, e le ng cherrad a ulolam me ng di kemam el mesmechokl er ngii.” Tia ikid e a rubak a dula el kmo. “Errang, ng diak moungeroel er ngak e oungeroel er a sechou?” Tia ikid e ngii a mlo ungil a delongelir me te luueta el mo ta el ongall e mo teluo el chiull e le ng mesmecha a delongelir. A utebengall er tia el cheldecheduch a kmo: Lak moleau a tekoi a lak letekingem.

SECHOU ME A DEROECH

A Ngerberuuch a beluu el mo er a Imeliik el ngar er a delongelet a Ngchemiangel me a Elechui. A Sechou a ngar er a derberbellel er a ta el tutau e a lomes er a sechelil er a Deroech e ng dirk tutau e ng melechelbakl el omereberek a osebekel el merrau a ngikel, me ng oker er ngii el kmo, “Rrang tia el kmal dirk tutau e ke merrau me aika medam el ua derse chimo el olechesobel. Ke oungalek?” E a Deroech a kmo, “Rrach ng diak ng klengerenger a uchul.” Me ng dula er ngii el kmo, “Rrach ng diak kome me di el ta el kurrael er kid el mo er a debo er ngii me di donga e lak dolechelbakl el ua kau er a chelecha el ko er a olechesobel a medam. E a kumdasu e ng diak a ngikel.” Me a lolekoi el ua ise e a Deroech a kmal kilenge e kmo, “Ng kmal mera e rrang. Me ng ko el mo ungil besul er a oingera e kede mong? Ng di kau obang.” Me a Sechou a kmo “Mada debo er a klukuk. Me ker di me kasoes er tia e merael.” Me a bo lekukuk e te mocha kebeteck er tia el ledillii, e a Sechou a mocha melekoi er a Deroech el kmo, “A debo e lebo el betok, me kid a di sobechid me ker di chachelechel me ng diak debo deksakl.” Me a Deroech a dula, “Ng diak e rrang, ngii di demereched el mo me desang. Chelecha e tir a sobeka el mo er a chelmoll me a lebo e te mlo reboreb er a chiloil e ngii a mocha mengerobt a chiloil. A Deroech a sokol el mo melechelbakl. Me a Sechou a kmo, “Rrang, msall e kau a kmal mereched a rengum. Kau bo mkilmeklii a rengum e bo leblengkangk e di doruu e ng mo medeel er kid.” E ngii a di mle telkib e ng kmo, “Rrang, ngak a ma mochu er a di bita er kau e le ak meduch el merrau.” Me a Sechou a dula el kmo, “Ke mo merrau, e a bo lemeched a che me di doruu e ke le bo mongoit. A domekbat e ngmekngit er a di doruu.” “Ng diak, bai ba kbong.” Me a Sechou a kmo, “Mada ng di kau.” Me ng metengel el mo merrau. E ngii a obengkengka a che me ng di mlo berriid me ng di ulisur a omengang. E a Sechou a kmo, “Ng diak lungia me bai boderei.” E ngii a kmal meringel a rengul er aika el ngikel el di cheloit me ng di mlenga me ng di ultom a kemril a ngikel er a ngerel e kmo “Dorael.” Me te sobekang. Me a lsebek e te ngar er a medal a chiloil e ngii omudech e mocha blechakl er a daob. E a Sechou a mlo reboreb er a chiloil e dula el kmo “Ke ongellau, e kau a oba a omerolled.” Me te kuk sobekang, e a Deroech a liluut el ruebet me a Sechou a mocha meliuekl er ngii e kmo, “Ak mo er se el debla er ngii e oilau.” Me ng mo me ng reboreb e mengiil. E ngii a merema el di milludech a kllel el mo diak

me ng di mle el songerenger. Me ng mochu ngmelt a sils e ngii a lueta el mo melechelbakl el merrau er a di kelel er se el kesus.

Tia el cheldecheduch a cheldecheduch el olachitnger er a kmo, moserechii a rengum e bo mongirou e ng ngar er ngii a belkul.

SECHOU ME A TUKIDOLECH

Tia el taoch er a Ngerdorech a mla taoch er a kmal rechuodel el me er a chelecha el diak el delbochel el taoch. Ng btil omoachel el omebaoch el me metengel er tia el beluu el ngar er a Ngersuul me te melim e melecholb er ngii. Me a lebo er ngii a chull el eim el klebesei, me a lechub e ng ta el Sangdei. e ng mo medeel a ralm er a chelsel me ng me tuobed a ieleb. Me a ltobed e ng oumesingd el merael el me tuobed er a Ngerdorech me a bek el tenegelel a ralm el ua Ngerdorech er aike el letuu e me metei er ngii a ralm el beluu me ng kmo taoch e le mlai me a bilas a tmuu e tuobed er ngii. E ngii a dimlak lolemotem el mo taoch. Ng baoch a mengiut me te outaoch a rechad.

Tia el taoch a kie er ngii a ta el kekemangel el Tukidolech a ngklel el ko er a kesebekuu er a kerekker. Aika kuk di chermel aike el btil a omoachel me a uchul me kede kmo Tukidolech, a di oba ngerel el ultom er a bebul a dolech el lebo el blengkangk e ng ngobeet e a leme a dolech e ng me tuobed. Ng di oba ngerel el di mengiroir er a dolech. Ngika el Tukidolech a kie e rullii a blil er a eungel ongedukllet a Sechou. Me a Sechou a bek el klebesei el lebad er ngii e le ng dukllet. Me a lechei e ng kmal ungil tmuu er a ngerel ngika el Tukidolech. Me ngika el Tukidolech a di kea el osiik a kelel e kmal di kie el menga el kmal ungil a rengul e smonga er ngii. E mocha medengelii a belsechel a leme er ngii me ng kmal di mengiil er ngii.

A ta er a klebesei e a Tukidolech a meluk er a dolech e mengiil er ngika el Sechou. Me ng kie el songerenger e mengiil e ieta er a belsechel el kmal mocha ngodech er a rengul me ng tuobed er a blil e mocha merael el mo er a Ngesechisau el melkesokl. E a lomes er a Sechou e ng kmal mochu meieleb er a dolech el rosngung. Me ng dula er a Tukidolech el kmo, “Me e moluluuch er ngika el kim me lechitii a ochik e a kmal rosngung.” Me a Tukidolech a mocha meluluuch er ngii e ngii a kmal di klikmechur e kmal diak lechitii. Me ng di milluluuch e a lekea e ng dula el kmo, “ Bechere, e a bo dekakngit e ng di ungil.” Me ng dochercherii a kemril e nguu el titir a ulechel a ulkel me ng obok. E a Sechou a nguu a ochil e te riedang.

Me tia el “chullukel” el belkul a tekoi a mlengai er tiang. Me ng belkul a tekoi el kmo, “Ngosecha rengud me kede melekoi er kau e kau a di ocherechur, koucharm?”

SIANGELDEB ME A KEONG

Tia a cheldechedechal a Siangeldeb el buik er a Blisang, me a Keong el ngalek er a blai er a Ngermechuu er a Ngersuul (Bungelkelau). Ng klechedaoi er a delongelet aika el teblo el beluu a uchul me tirka el teru el ngeasek el chad a mlo kasoes e mo kaodengei e kmal el mlo kaiuetoir.

Ng mlo ta rengrir el sorir el mo kaubuch me te mlo olturk er a rechad er a blirir. A rechad er a blil a Siangeldeb a di mle ungil er a rengrir, e ng di a demal a Keong er a Obakeremechuu a dimlak lekenge e le ng meteet e a demal a Siangeldeb a diak. Ng kmal milecham a rengrir e ng di dimlak a cheldechulel.

A uriul er tia e a Keong a ko er a di mlo sesmecher, e diak lorael el mo ungil e bai di merael el mo mechitechut. Ng locha di ngii el omadesua er a rektel me ng mesumech el mo er a Siangeldeb me lebo lesang. A lekasesengei e a Keong a di dilu er a Siangeldeb el kmo, "Ke mo e se el mrenges a chisek el kmo, ak mla mo smecher, e ke choielii a orakiruu e me kiesii a cheklechek e nguu el mo er a Blisang." Tia el rektel me a tekingel a Keong a kmal mle meringel er a Siangeldeb a oltekau e ng di ngii a di lilecha er a rengul e di kilenge a tekingel a Keong.

Ng mlo reme me a Keong a kie el rektel a ko er a kmal di merael el mong. Ng di mle kesai el klebesei e ng mede el ke le ng mlad er a chesebreng. A Siangeldeb er a rrenges a chisel a Keong e ng chilielii a orakiruu e melekoi er a ochellel e te omekall el mocha er a Ngersuul. Te mo me te ulak er a tkul a keburs el omechiuau er a beluu e mo melai er a bedengel a Keong.

A lemetuda a klebesei me lebedenge a rebeluu e te merael el mo er a olbed er a Ngermechuu. Te mlo me te kiesii a debellel a Keong e otebedii tia el mla mo bediu el chesulech e lmuut el domedemii a debull. E sola e cholngii el mo er a taoch el ongesechii er a mlai. Te omekall me te ngar er a melengel a chei e a lomes a rsel a ochil a Keong e ng ko er a mocha mengitengtik el mo el mong e ko er a mocha outeliil el mocha omisebusech a medal el mo el obok e ng mekiis me ng dengchokl. A dektel me a chesil a rengul a Siangeldeb a di ririid e le deuil a rengul a kmal mlo imis. A Siangeldeb a bo el loreked a chimal e ng kmal chimal a Keong. Me te kaiuereked chim e ng okere er ngii, "Ke mlekera e mad e lmuut el me chad?" Me a Keong a ulenger er ngii el kmo, "Se er a kmad e a delebengek a mlo ileakl er a bedengek. E ngak a kmal el Dirk mle soak el kie el obengkem, me ak deleb e di mla er tia el beluulechad e

choielau el me nguu a bedenek el mo cheroid er a rechad er a blik e ak lmuut el soiseb er ngii e me ngar."

Te mlo er a Blisang me te kie er a blil a Siangeldeb el mocha obekel. A chebechielir me a delengcheklir a kmal mlo klou a beltikelreng er a chelsel me ng kmal mle budech e mui er a deurreng. Ng kleteketel tia el modoades el delengcheklir me a kngtiil a rengul a Keong er a belual me a blil a ko er a mechebsang, me ng ua leko er a di chemau ku blil er a Blisang

Te kie el mo chuib a betok el rak, e a rechad er a Ngersuul a kuk lueta el mo ouklechedaol er a Blisang. A rubekul me a remechesil me a rengalek er a Ngersuul a di mle sokedii a beluu me te kilie er a bai e a Rechiblisang a menges a kelir. Tia el kebesengei me lemerek a belsoil e a Obakeremechuu a ulderechii a ngelekel el kekere el sechal el mo olengit a mengchongch el mo bilel a derengir. Ng dilu er a ngelekel el kmo, "Se ikid el blai el di dengar er tia e omes er ngii a sebechem el mo olengit a keai er ngii."

Ngika el buik a mlo me ng ongtir a mengchongch e a leme e ng ngelmangel er a demal el kmo, "Chedam, bo mokur ngike el redil er se el blai me lebo lochedak e ng kmal el soak el redil." A Obakeremechuu a di ulekemetii a ngelekel e le ng omdasu el kmo ng mengesengsang. A bo le kukuk me loderechii e ng mo me ng nguu a mengchongch e me me ng ngelmangel er a demal er a di osisiu el tekoi. Ng rro rengul ngika el rubak me ng ngoura a ngelekel e te merola el mo er a blil ngika el redil. Te mo me te mo tmuu er a blai e ngika el rubak a mocha ouchais er ngika el redil er tia el urungulel a ngelekel. Tia er a louchais e a Keong a kmal di mlo terrob e lmangel e le ng mla dongchii a demal me a ochedal el Dirk mle bad er a keai e a Keong a mo er a Blisang.

Ng terrob el kmal medideklok e dula er a ngika el buik el kmo, "Becherei e a demam a diak bo lomak er kau el mo ochedak e le ngii me a chelid me a delad a di mla mekur me ng kmal kldmokl el ulak el ka el sebechel el mekedoked me a ka el sebechel el medort."

Ng mlo doseb a rengrir e a Keong a mlochu sebechel el ouchais a chisel er a lemad el lluut el me ngar. Tia ikid e te mocha kaodenge el ongalek. Ngika el rubak a kmal mlo mekngit a rengul me ng kmal mlo ouuchel er a rengul er a omerellel el mo er a kmal betik er a rengul el ngelekel. Ng dilu er a ngelekel er a Keong el kmo, "Tia ikid el desiil er a klukuk me ak mo e a ngiaos e aki mengedmokl e ko mengil er kemam er a ngiosel me ke mo subedii a Siangeldeb me ng mo subedii a demal." Tia el klebesei e ngika el buik a di mle kea lebo er a bai e di mle bad er a blil a ochedal e ng di demal a mle kirel el mo er a bai e le ng rubak.

Tia el bocha el kukuk el belsechel a omerael e ngika el buik a ulelturk er a demal el kmo ak di kie el obengkel a ochedak e kungiil er kemu er a ngiosel me a demal a kilengei. A lebo er a Ngersuul a Obakeremechuu, me louchais er a bechil e ng kmal el mlo mechas a rengul e kmal mlo dmeu a rengul. Ng mera el diak a mo mekesiur tia el deurreng el mlo er tirka el ongalek el milecheseb el telkib er a rengrir el mo dibus e liluut el mo obech. Ng di mle se ikid el sils el mo bo el kukuk e ng mekedmokl a siungel a omerael el mo melecha a ngederel a Keong.

Tia el sils er a omerael e a Obakeremechuu me a ruchedal me a bechil me a rechedal a mlo doiderek el mo omelecha aika el ngederel a Keong. Ng kmal el mle klou el omerael me a kall a kmal mle betok. A lebo er a Blisang e a Keong me a Siangeldeb me a rechad er a blil a di mad el dmuil el mengiil er tir. A Obakeremechuu a mocha mechelii a cheldecheduch, "Tia el chebechielir a rengeleked a mlo ua ise el telemellek a uchul, me bechere e di deruul a uncial a tekoi me a aika a ngederel a Keong."

A ldela el ua ise e a demal a Siangeldeb a mocha meketii a kluk el orul a ngelekel e kmo, "Kemengetel el kmal di kumdasu er tia el teletael e ng di ak kmal di mle metitur el kmo ngar er kau. Chelecha el bla bo dekaodenge e elecha el mo er a medad e kede kmal mo blechoel el kaiuedingel."

A rebek el chad a kmal mlo dmeu a rengrir me a Obakeremechuu a dula er a demal a Siangeldeb el kmo, "Ng diak kuleit a rolel a tekoi me a diak kulecholt er a iltetek e ng di ak mo meketii tia el ongraol el oltebidel tilecha el orau el di ua ingii, e le rengum el mo er a Siangeldeb me a renguk el mo er a Keong a kmal di osisiu." Tia ikid e ng mlo ungil a rokui el tekoi.

TEB ME A LUK

A Teb me a Luk a ngelekel a Dam me a Dirraibar er a Ngeruchob. Tirka el teru el odam a mla er ngii a teua el ochederir el mle meklou el redil me te bechiil me te ngar er a obliil. Te di mle mekekere tirka el teru el odam e a demerir a mad.

A ta er a klebesei e a Dirraibar a dula er tir, “Rengelekei, kemuia tia el meklunga el chad me ng mla mo kiri el oldingel e mengedmokl a chelsengrir a ruchedemiu. Me ng ungil a chobo mesa a Olengkoi er a Ngerderar me losisecheklemiu er a tekoi er a klechad e a lak e ko mo chebuul.”

Me a lebocha el kukuk e ngika el klou el ngelekel er a Teb a ulemkokl el mekiis e melekoi er a delal, “Ngak e chedei a mochu er a Ngerderar el mo melai a tekoi er a Olengkoi.”

Tia er a lebo er a Ngerderar e ng dirk tutau me a Olengkoi a reboreb er a cheldeng. A irechar e ng mle mekull a dorael el melobech er a olbed er a obliil. E a Teb er a lorael mo e ng di milrael dobechii a olbed e merael el mo el lochedii a kul a ulitech e tmuu er a blai. Me a Olengkoi a okere er ngii, “Ng ngera chised e rrang?” Me ng ua sei, “ Ngak a mle e le ng soak el me mesuub a tekoi er kau. Ng dirrek el soak a chomosisecheklak er a teletelel e ng mo sebechek el ngmai a betok el udoud er a ruchedak.”

A Olengkoi a lomes er ngii e ng ko er a diak lultebechel a osengel me ng okere er ngii, “Ng mla ngar er ngii a omelium er a udoud er a ruchedam e diak mngai?” Ng kilenge a Teb. Me a Olengkoi a lueta el oker er ngii, “Se er a chomorael el me e ng mla er ngii a chelseklked el bambuu el mules.” Ng kilenge a Teb. E dilu ng kmal betok. Me a Olengkoi a dula er ngii, “A chomorael e ke mo er aike el chelseklked me ke dobechii a telmedeu er ngii me ng chelebedem. Me a chobomrei e lebo er ngii a mechesengul a udoud er kau e ke nguu el mo er a blil a ta er a ruchedam e melai a udoud. E a lsekum ng diak lebeskau a udoud e ke nguu ngii el bambuu el cholbedii me ng mo medakt er kau me ng meskau.”

A Teb er tia er a ldu er ngii aika el tekoi e ng kmal mlo ungil a rengul me ng milrael. Ng mle er a ked me ng dobechii a chelbedel el chelseklked e merael el mo remei.

A lebe lrei e ng uluchais er a Luk aika el tekoi el lenglai er a Olengkoi. A Luk a di ulerenges e ko er a kmal metacher besul er a rengul. Se el lebo lomtab aika el lolekoi a obekul e le ng ko er a mo metengchokl el tekoi a lebo longelebed er a ruchedal a lolai a udoud.

Me tia er a lebo el kukuk e ng di mle tutau e ng mekiis e diak louchais er a obekul er a omerolel e merola el mo er a Ngerderar. Me a lebo er a blil a Olengkoi e ng mlo mo okiu a rsel a orengodel el mo sibeklii a btil a ulitech e mekokil el mo soiseb er a blai. Me a Olengkoi a di ulemes er ngii e omadesua el kmo ngika a kmal kedung el buik. Me ng okere er ngii, “Ng ngera chised e ochellei me ng dirk tutau e ke dumiang?” Tia ikid e ng dula er ngii, “Ngak e udelei a ngar er ngii a reteua el ochedak el bechiil me te ngar er a obliil. E ngak a di mle kekere e ng mad a demak me ng diak a osisecheklak er a tekingel a klechad me ng soak e udelei a chomosisecheklak me bo kmeduch.

Me a ldela el ua ise e a Olengkoi a okere er ngii, “Ke bechiil?” Me a Luk a kilengei. Me ng liluut el oker, “Ng ngar er ngii a meklechel a bechim?” Me ng kilengei. Me a Olengkoi a lueta el oker er ngii. “Ke meduch el ngar er a chei?” Me a Luk a ua sei, “Ng diak ksa el meduch el ngar er a chei. Ak di kmal meduch el mengemang.”

Me a Olengkoi a dula er ngii, “Chelecha e a chobo er a che e ke dmu er a bechim me ng mo er a mesei. E se el chome el ngar er a che e komrullii a chimo el ongraol e nguu el mo msa ngike el kot el klou el ochedam. Me a chomluut el mo er a che e me e ko mo mesa ngike el ongeru el klou el ochedam. E ua ise el mo lmuut er ngike el kot el kekere el ochedam. Se ikid e se el lebo er ngii a mechesengum e a ruchedam el rokui a di mo kudmeklii a mechesengum el rokir.”

Me a lebe lrei a Luk e ng mocha oltaut aika el osisecheklel a Olengkoi. Ng milrael el oldingel e omeka er a ruchedal er a bek el klebesei.

A ta er a klebesei e ngika el kot el klou el ochedal a Luk a mocha katekoi ngii me a remerrengel e kmo, “Kede ko er a kmal mechitecheto er aika el omerellel a Luk. Ke le lungil a bo loumur a bechil. “ Me te kilengei. Me a lemerema tia el sils el belsechel a merengel a bechil a Luk e a ruchedal me a rechedal el rokui a mlo kldibel e ulemoket a udoud el kmal mlo betok me ng mlekdedoked a belsei.

A Teb a di ulemes er tia el omeruul e ngosecha rengul. A Luk a dula er a ruchedal me te kodur a merengel a bechil a Teb.

Tia er a bocha el merek a mur e ngika el obekul a mlo medenge a omerellel a ochellel el mle kekere e ua lebocha lorreder er tir. Me se el lebo lomngar e lebe loleiit er a blil a Luk e ng kmo, “Kuietii a idungel e ochellei-okdemang.”

TEBANG ME A DEMAL

A irechar e ng mla er ngii a rubak er a Ngiwal el ngklel a Rekesiuall. Ngika el rubak a mlo er a Ngeruikl el beluu el rengedel a Ngchesar. Ng mlo bechil a Merderad el redil er a blai er a Onguikl. A Merderad a mlo dioll e mechell er a ngelekir el sechal. Te milengeklii el Tebang.

Ng di mle kekere a Tebang e a delal a mlo smecher el mad. A Rekesiuall a di millemolem el kie er a Ngeruikl e omekeroul er a ngelekel er a Tebang.

A leklunga el chad a Tebang el mocha sebechel el bechiil e ng mlo bechiil. Tia er a lebo lebechiil e tia el chebechielel a mlo rullii el mlo diak lebetik a rengul er a demal. Ng mlo mekngit a omerellel ngii me a bechil el mo er a demal. A Rekesiuall a miltord e mlo reme er a belual er a Ngiwal. A lebo e te mla nguemed a rechedal me a blil a mla mo mechut. Ng mlo kie er a bai. A chelitechetul a uchul e ng mlo diak lsebechel el smiik a kelel, me ng di olengit a kelel er a rechad.

A remekekere el chad er a Ngeruikl a mlo kaingeseu el melasech a mlirir. A ta er a klebesei e a Tebang me a resechelil a mlo er a oreomel el mo omukel er a kerrekar el mo mlil. Uriul er a lenguu a delues me a ilebechel, e te mocha mengurs er ngii el me er a beluu. Te mlengurs er ngii el me er a ked er a Ngerbusechemelal e olengull. Tia el ked a ngar er a bebul a meselech el Ilruul a ngklel.

Tia er a lebo el merek el olengull e te liluut el mo mengurs er tia el kerrekar. Tia er a lekersii e ng rirebet el me medesum er a chelsel tia el mesei. Te millasem el oltobed er ngii e di dimlak el sebechir el kursii. Te mlo osiik a bek el cheldechuul e diak lsebechir el kursii. Te milechire me ng dellemakl er a mesei.

A Tebang a mocha osiik er a chad el meduch el mengelil. Ngika el chad er a ongelil a mlo ochotii el mo er a Tebang el kmo ng kngtiil omerellem el mlo er a demam a uchul me a kerrekerum a dikea el sebechel el tuobed er a mesei. Tia diak el sebechel tuobed a lak bo mnguu a demam el mei. Tia a kelebsengel e le ng mlo mekngit er a demal.

Tia ikid, e a Tebang a mocha omekall el mo er a Ngiwal. A lebo e a demal a kmal mekngit a chelebulel er a klengerenger. A Tebang a di mlo ngellomel e mocha meluluuch er a demal. Ng uluchais er a demal a teletelel a mlil er a bo loltobed er ngii. Tia ikid e a demal a

dula er ngii el kmo, “Tebang, kau a klunga el chad. Ng mla mo sebechem el di kau. E ngak a mechitecheto me ng diak lsoak el mo chosengkau.” A Tebang a dilu er a demal el kmo, “Chedam ngak a mle cheleuid. Ak meluluuch e olengit me mluut el me me dedak el kie. Chelecha el mo er a medad e a rokui el ungil me a klungiaol a mo biongel er a delongeled.”

Chelsel a betok el rrak el longebuul a Rekesiuall e ng lueta el mo er a Ngeruikl el mo obengkel a ngelekel kie. A lebo er a Ngeruikl e te di mlo el omak er a taoch e merael el mo er a mesei el ngar er ngii tia el kerrekar. A Rekesiuall a kmal mle mechitechut e ng di uluutekangel. Ng dilu er a rebek el chad me te orekedii a ongurs e ngii a oked er a rerel ongurs. Ng mlo dechor e rullii besul e mocha mellach er a Tebang. Ng milellach el kmo, “A dolekoj er kau e Tebang e kede meked me kolloi, a kerrekar bekiis e ngak a Rekesiuall me ke kmal mo ungil e kerrekar.” Tia ikid e tia el kerrekar a mocha merael diak loumekaduch a longurs er ngii. A Tebang ulemes er a demal e longelang, e le ng kmal mlo dmeu a rengul. A Rekesiuall a uleba ngerel a ongurs me ng rirellii tia el kerrekar el ko er a kmal mo kebekakl. Tirka el mlengurs a kmal di mle mereched el kursii el me er a taoch. A Tebang me a demal a mocha ungil a delongelir e a Tebang a mocha mesiou er a demal el kmal mechitechetong.

TEBRUCHEL

Tia el Ngerkeam el beluu a rengedel a Ngermetong el beluu el mo er a Ngerchelong el lekilie er ngii a ta el rubak me a ta el mechas el mle kaubuch e mechellii a ngelekir el ta el sechal me te mengeklia el Tebruchel. Te kmal mle ungil mengedmokl er ngii er a lekekere el mocha klou el chad. Me ng kmal mle ungil beserir. E a Tebruchel er a lebocha leklou el chad el mocha medengelii a rengul e ng mocha bechiil er a ta er a beluu er a ta er a blai. A lebo e te kmal mlo ungil er ngii er a rokui el omeruul el mo er ngii. Me ng di ulebult el mo chemau a bechil, e mechudo er a demal me a delal, el rengul tia el lengar er ngii a ungil el tekoi. Me ng melemolem er a rengul e obeso er a mo oldingel er a demal me a delal.

E tir a kmal mechitecheto me ng kmal mekngit a chelebulir er a delengchokl. Me a blirir a chemersang me te melabek er ngii er a keai. E di oliiu a durech e diak a idengelir me te di olsiu a ulaol er a teliang, e tir a di kie er a telengodech el ulaol e a telia a mla mongkangk me kmal mekngit a chelebulir.

E ngii a kie e a bechil a dillang me ng kmal kosenga rengul er a bechil me ng kmal di kea el letkii a mo er me er a blil a demal me a delal. E a ta er a klebesei e a bechil a kmal mesengsengchang e kmal klou a che, e chederriich me ng tilobed el mo er a chei. E kmal ngilemedii a ngikel. Me ng dibus e ngii a mechell a bechil el sechal a ngelekel, me te chobtii e a bechil a mo er a chebill. Me a lemerema el mla er a che e a delal a bechil a kmo, “Bo mriso a bedengem e me mesa ngelekem e ng mlechell el sechal. Me ng mlo melecho e a leme e bo el ngu a ngelekel el me e ng kmal di ulemes er ngii e longelang. E dimlak lolekoi e lmuut el ngu a chelasel el tuobed e mocha reme er a blil a demal me a delal. Me a lebo e ng kmal mlo mekngit a rengul er a lesa chelebulir me ng kmal meluluuch er a delal me a demal e mocha mengedmokl er tir el mlo er a ulebongel er a kodellir. Me ngika el Tebruchel a ngiluu a llechul a rengul er a lesa ngelekel er a lemechell el kekerei.

TUCHELIAUR

A Tucheliaur a ngelekel a ta el mechas er a Ngeaur el kilie er a Ngerchelong. E a omerolel ngii el mechas el mo er a Eouldaob e ng milechellii a Tucheliaur me ng tiluchakl er a Ngeraard. Me a el tuchakl er a Ngeraard e ng mlo er a blil a ta el mechas el ngklel a Techur. Me ngika el mechas el Techur a ngklel a ngoura ngika el ngalek me ng ounaglek er ngii. Ng milengeklii el Tucheliaur.

Me a Tucheliaur a kilie e ouchedil er ngika el mechas el Techur. Omerollel el mo klou el mocha sebechel el omtab tekoi e ng omes er a rechad el blechoel el lebo er ngii a kldibel me a omerous el kall er a bai e te olab a dikesir el me er a blai. Me ng di ulemes e omtab, e a ta er a klebesei e ng okere er a delal el kmo, “Chedei, ngera me ke rubak e diak kobo er a bai?” Me a delal a dula er ngii el kmo, “Rungalek, ngak a mechas me ng diak lsebechek el teloi er a rubak el ngar er a bai. E diak a klou el sechal el sebechel mo tuchelii a dui el Techur, me chelecha e kau a mo Techur.” Me a ldela er ngii el ua ise e ng mocha mesubed a rengul.

Me ng di mle kekere e mo tuchelii a dui el Techur. Me a lebo er ngii ongdibel me a cheldecheduch er a rubak e ng mo er a bai e le ng mla mo ta er a rubak. Ng dirrek el mla er ngii a ta er a dial el dui er a beluu er a Ngesang el Recheuir. Me ng kilie er a Ngesang el meluchel er a dui el Recheruir.

Tia el delengcheklel er a Ngesang e ng miltebengii a ta el blekeradel el mla er ngii. A rechad er a Ngaraard a blechoel el melenget el mo er a Ngiwal. Me ta er a klebesei e ng kuk mocha belsechel a omelenget el mo er a Ngiwal. Me a rechad er a beluu a mocha kudmeklterir e tobeda el mocha er a kederang el mo oldubech a otaor el tenget el mo er a Ngiwal. Me a Tucheliaur me ng dirrek el mla er tia el omerael. Ng mle telkib el ko er a metacherbesul er a rengul a blekeradel el mla er ngii e le tirka el chad a dibard otaor e oldubech me ng kmal meringel e meoud. Me a Tucheliaur a dula er tir el kmo, me me dolemolem aika el otaor e doldubech me a debo er a Ongiil e dedibard e doldubech el mo er a Ngiwal.” Me tirka el chad a ko er a di medakt e mocha oltirakl aika el lolekoi a Tucheliaur.

Ongede er a kuk belsechel a bo lolenget er a Ngiwal e a rubak er a Ngiwal a dilu er tir el kmo, “Ko moltak er a rubak el mo er a chei.” Me te ulteketerir tirka el rubak el mo er a chei, e tirka el rubak er a Ngiwal a dula er tir el kmo, “Msiik a desengeliu e domengur e dorolu el mo er

a beluu.” Me a rebek el chad a ngmilt a desengelir e mocha omengur, e a Tucheliaur a dmu er a sechlil el kmo, “Ngak a meles er a smuuch.” Me tirka el rubak a rongesii me te dula er a sechil el kmo, “Msikii a smuuch el msa e ng kuk soal.” Ng milles er a smuuch el milteklii e nguu a kemril e oba el merus er a ngerel. E a uldesuel a Tucheliaur a kmo, a lsekum me ng diak kuldiu er a ringel e ak nguu a Ngiwal e le tia el omelenget a kmal merengelang. E a ltir el me er a beluu e ng kmu er a sechelil el kmo, “E rrang, kau chomlingir tia el mlai e molikes el di kau el tang e ngak kulimet e ng diak derechorch e mo er a beluu.” Me te mle kaititekangel el mo el mo e a ta er a rubak a kmo, “Mlingir e rrang.” Me ng okor e ngika el sechelil a mekiis el lingir e a Tucheliaur a mocha reboreb el melimet e a sechelil a melikes. E a uldesuel a di osisiu el kmo, a lsekum ng diak lrechorech tia el mlai e aki mo er a beluu e ng sebechek el nguu a Ngiwal. Ng dimlak a ta el rechorech a mlai e te me er a beluu.

A leme er a beluu er a Ngaraard e ng mlo olengull er a ta el bad el ngar er a medal a bai. Me ng dengchokl e a ta el mechas a mengelakl e mesang me ng omides er a btelul. Me ng mekiis el mo e okere er ngii el kmo, “Ngera me ke omides er a btelum?” Me ngika el mechas a kmo, “Tilecha lebilekodir a obekum er a Recheked er ngii.” Me ng kuk mtebengii el ta er a tekoi el ko er a metacherbesul er a rengul. Ng ultebedii a tekingel el mo er a rebekl el rubak el kmo “Ng mo er ngii omelenges e le kede mo osiik a udoud.” Me te tuobed a rubekul a Ngaraard el mo melenges er a bek el tutau. E ng dmu er tir el kmo, “A lebo er ngii a udoud e kede melecha er a chelsel a ulaol el bambuu.” A ta er a klebesei e te milekiis er a tutau e ng dmu er a resechelil rubak el kmo, “Ko mo oldingel aike el lius el ngar er a cheroid e ngak a di ngar er a kmeed e le ng ko er a mechitechut a bedenek.” Me a resechelil a kongei, me a lorola resechelil, e ngii a ngmasech er a lius el kmeed er a blai me ng nguu a omail e mereko el lmuut el me metei, e dimlak lluut el mo er aika el bebil er a lius. Me a be lemetei, e ng mla mo diak a rechad er a beluu e ng soiseb er a chelsel a bai, e mechederiib a ulaol e ngmai a udoud, e solang e mtutii a ngau me ng meseseb a bai. Me a rebeluu er a lesengei tia el ngau e ng tmaut a diu me tirka el mlo oldingel omail el rubak rurta el me er a beluu. A leme er a bai e a ngau a mla milii a bai. Me a ledu Tucher el kmo, a udoud a ngar er a chelsel a ulaol, ng mla mo diak lsebechir el mo ngmai.

Ngika el Techur a kilie el mo meketeket er a Ngaraard e mocha melasech a kesol el mo teletelel a udoud. A ta er a klebesei e ng dula er a bechil el kmo, “Ak mo er a Eouldaob ngak me a ngelekek er a Ruchellidel.” A omerollir el mo er a Eouldaob e a lsebek a charm el me engelakl

e ng nguu a ta er aika el udoud el metechii e kmo, “Tilecha a uduudem e kede melai er a Ngiwal.” A luut er tir er a Eouldaob e te mle er a chelebacheb, e ngii omdesua el kmo ngika el kmal betik er a renguk el ngelekek a kukodir e ak nguu a Ngiwal. Ng okor e mekiis el mekodir a ngelekel e chotur. Me a lebocha er a Ngaraard e a bechil a okere er ngii el kmo, “Rrang, ngar er ker a ngeleked?” E ngii a kmo, “Ngile kid” e melutk er a reakl. Me a ledela el ua ise, e a bechil a ko er a rrau a rengul me ng lueta el oker er ngii, me ng mekiis el nguu a chelais e kmo, “Ngika kid.” Me bechil a dula el kmo, “Ngera me a ngeleked a ua isei?” E a Techur a kmo, “Ak milekodir e le ak melai er a Ngiwal.

A ta er a klebesei e ng mlo omes er a sechelil er a Tmekei el mle merreder er a Melekeok. Me lebo e ng diak louchais a chisel e mo tmuu er a blai e mo er a tuangel e di dengchokl el chemau a Ngiwal. A Tmekei a ngedecka er a rengul me ng dmu er a bechil el kmo, “A tutau e ak mo er a chei, e kau a mo olengit a chemelem er ngii.” Me a Tmekei a dula er a sechelil el kmo, “Ke di kie e ngak a mo er a chei.” Me a lorola a Tmekei el mo er a che e a bechil a mocha olengit a buuch er a Techur. Me a Techur a mides a chimal e nguu a til e suchesokl el mo er a odesongel me ng di kilie er ngii el choielii a Tmekei el me er a kebesengei. Me a leme a Tmekei e a bechil ouchisa er ngii el kmo, “Ak ullengit a buuch er ngii e ng mides a chimak, ngilecha kid er a ledengchokl er tilecha el odesongel er a tutau el me er a chelechang.” Me Techur a dula er a Tmekei el kmo, “Ngak a merael er a tutau me ke mo ngoderak er a ked e kede mo kebii me ak merael.”

A bocha el tutau e ng nguu a cheremel malk e te merolang. Te milrael el mo er a ta el ked el ngar er a Ngiwal e mocha kie e a Techur ouchisa el kmo, “Ng diak lebo lengodech a cheokl el ngar er a renguk. E le bek el sils e ak di omdasu er a Ngiwal.” Me a Tmekei a dula el kmo “chelecha el me el orakiruu e kau a ngar tilecha el me, me ngak a ngar er tie el lekong.” Me te mocha mekodir ngika el malk e durur e mocha omengur. Tia el ked a mlo “Ollaol Malk” a ngklel. Tia er a lebo er a Ngaraard e ng omdesua el kmo a lsekum ak mukelii tia el ukall, e chusuch a llel, e ak nguu Ngiwal. Ng okor e mocha mukelii tia el ukall e chusuch a llel.

Ng rirenges a chisir a reteru el odam el Klasekl me a Kladikm el kmo te kmal beketaut er a burech. Me a ta er a klebesei e ng mocha nguu a ta er a kmal klou el ududel e merael mo er a Ngertuker el beluu el ngar er a delongelel a Ngaraard me a Ngardmau. Me a lebo er a blai e ng di ta el mechas el derrir tirka el teru el odam a ngar er a blai, me ngika el mechas okere er ngii el kmo, “Ngera e Techong me ke meremang?” Me a Techur a kmo, “Ak me melai er a rengelekem

el mo omekoad er tir. Me tia kid a bedengir a rengelekem e ak melai er tir. Me ngika el mechas a kmo, “Tirka a dibus el mlo er a che e dirkak lemei. Me te ko er a dirk chadecheduch e ngii a kosebakl a biskang e merderodech el mo soiseb er a blil, me ngika el mechas oldiu e kmo, “Rengelekei, ngile Techur e lak mongerodech.” E tir a kmo, “Ng techa el chad a Techur?” Me a lebe lsiseb er a blai tirka el ngalek, e a Techur a mocha nguu a chelasir el mocha meruul a chelderir. Me a mechas a dula el kmo, “Becherei e Techur e ak mo meruul.” E ngii a kmo, “Ng diak, bechere e ak remuul. Me a Techur a kmal mlo mechas a rengul er aika el chelderir tirka el teru el di ike el melechesokl el ngikel el ua bolobel me a sekos el di blurech a btelul el rokui. A derrir a mocha ouchais er tir el kmo, “A Techur a melai er kemi el mo er a mekemad.” Me a louchais a derrir e te kmal mle semeriar el mo er a mekemad. Me a derrir a mocha nguu a tetuk el blabuk e ngoura el mesterir e kmo, “delongelet a Ngiwal me a Ngaraard a ngar er ngii a Kesebekuu, me se el bo e be lultom a kesebekuu e ko mnguu tia el blaluk el tukeklii e mrechii me ng mad.” Me a bo el tutau e te ngoura tia el blabuk me a lidir e obengkel a Techur el me er a Ngaraard.

Me a lebo er a beluu er a Ngaraard e te mocha omesebes er a mekemad. Me a lebocha el mekedmokl a urretel a Ngaraard e ng touta mekemad er a bo lekukuk. Me a Klasekl me a Kladikm a mle keldmokl el mo oba medal a urrurt. Ng ulemuchel a mekemad er a daob el merorael el me el me er a beluu. Me a leme er a beluu e a Tmekei a kuk mla er a ulebengelel a beluu e oumekemad el melsiuekl er a rechad er a Ngaraard. Me be lekebetech er a belngel a beluu, e te mechitecheto a rechad er a Ngiwal. Me a Tmekei me a Techur a mocha omii er Ngiwal me ng mlo diak a beluu er a Ngiwal. Me a le mesisicha Techur me lebo er a Ngaraard e ng dula er a rubekul Ngaraard el kmo, “A lsekum ak mad, e ng diak bo kmechiuai er a debull. Ak di mo dengchokl el chemau a Ngiwal. Me aika el klekedellek er a mekemad a di mo delekull er a bita er ngak.” Me ng mlo ua iseit

TULEI ME A SURECH

A Tulei a chad er a Ngaraad er a Ngebuked e chad el mo soiseb er a Madrengebuked el merreder er a Ngaraard. Ngika el chad a kilie er a Ngaraard e orrenge a chisel a Surech el redil er a Ngiwal er a bita el beluu er a Ngercheluuk. Ngika el Surech a di mlechell e diak a redil e ua ingii er a klungiolel me a rebek e bikel a Ngercheluuk a kmal di blechoel e nguibes er ngii. Me ng dimlak a ta el chad er a beluu er a Ngiwal el rokir el diak lodengelii. Ta er a klebesei e a Tulei a dirrek el di oba ngakl el kmo Surech er a Ngiwal er a Ngercheluuk e kot er a ungil e redil; me ng ulumekekebese e merael el me er a Ngercheluuk me ng bad er a Bai er a Belod. E di mle tutau e ng mekiis er a bai me ng reboreb, e ngii a tobeda er a kederang e merael er a chelechol, e a lesa e ng di milsa e ng kmal kltukl el ungil redil a osenged er ngii. Ng diak a chetid er ngii. E a loker e te kmo ngika ikid a Surech. Me ng mera el mlo diak lekilmeklii a rengul me ng me er a chelechol a lorael. Me a Surech er a lesenge e ng kmal mlo chubur e le ng mera el mlo er ngii er a rengul me a bedengel a chad el oltoir er ngii, me ng di me ua ise e a uriul e a Tulei mocha melekoi a tekingel er ngii e kmal melat a ngetel er ngii. Me a Surech a kilenge me te mo dmak e tibir el mo kaisiuekl er a ked el lolab a kelir. Te kie er tia el ked el mo diak a kelir e kuk tuib a telbilir e me reme e melngot a kelir e mo kaisiuekl er a oilolir er a ked. Me a lrengese a Madrengebuked el obekul a Tulei e ng kmal mlo mechas a rengul er a Surech el merael a chisel e a Tulei a mocha ousechele er ngii, me ng klou el chais. Me a ta er a klebese e a Madrengebuked a okere er a Tulei e kmo, “Aika e kurrenges el tekoi ng mera el tekoi?” Me ng dula el kmo, “Choi, ng merang.” Me a Madrengebuked a dula er ngii el kmo: “Chomluut el mo e ke nguu el me me ak mesang.” E a Tulei a rengul a kmo ng mo mekodir e nguu a bdelul el mei. E a lechub e a Mad a ulemdasu el kmo ngika el Surech el kmal merael a chisel ng ua ngera el redil. Ng mle soal el mesang. Me a bocha losiu er a ongedukllir er a ked, e te kie el ngoeo betok el klebesei. Me a kelir a ngomeda me te di menga redechel a chersachel, el meringel er a rengul a Tulei el dulii tia el tekoi er a Surech. E kmal di kea a cheldechulel me ng mocha subedii. Me a lochotia tia el tekoi e te dengchokl e a Surech a dula er ngii e kmo, “Olekoi, tia ng kleteketel ngar er a rengum e di lmuk el me er a chelechang?” Bo mdobech aike el llel a demailei el me e khusii a chelasem e ke mo merserasech.” Me ng mocha duobech a llel a demailei el me msa me ng mengaus er ngii e mesebech er ngii er a bdelul el mo merek, me ng doiir e mocha mengitakl el kmo:

Ngera ko merael er ngii a retelingolel Ngiwal el melechel oacher er a medal a Belod, e Tulei me ke roteria a renguk e ng cheluib a tengetengel a klsau me a kleald a tour me a kelekolt a duchar, e ng kau el ta el chad ng diak mchub a di dongerem e debad er a ked el di ousesechelaod a redechel a chersachel. E Tulei ng chelebuul.

Ng di chilteklii tia e mo bad el ouchiull er a risel a kelel charm e a Tulei a nguu a bdelul el sukur er tia el lulengaus er ngii a Surech el chelais, e merael. Me a lebo e a Mad a chileklii el kmo, “A kumes er a ngar el chad. Ng diak kumes er a ulekoad. Mnguu el chordau.” Me ng ngoura el chemiis el remiid.

TUTAU ME A REMERANG

Tia a cheldecheduch el mo er a Ngerbechedrengul er a Remerang me a Tutau. Tia el Ngerbechedrengul a beluu el mo er a Ngeremlengui. A rechuodel e a rechad a ousikero a ochaeo el melai el mengang. A ta el tutau e a Remerang me a rulebengkel a mlo ousikero. Te mlo ousikero e mereko me te luueta el mo remei. Te mlo okiu a beluu er a Ngerbechedrengul.

Te merael el Dirk Cheroide a lorrenge er a ngerel a chimo el Tutau e ng oldiu. Ng ngar er a eou e kmal di oldiu el olsesengerenger ku le bersoech a mla melebelii. Ngika el bersoech a mocha oltamet e olengimes er ngii me ng mo sebechel el kolii ngika el Tutau.

Ng kmal klunga ngerel ngii el Tutau e le ngika el bersoech a diak lsebechel el remekeklii me ng kmal di oldiu e le ng medkung. A rebek el chad a orrenge er ngii e di okor e di merael. Ng di ta el Remerang a mocha meche a klekedellel e toucheckla el mo omes er ngii.

A lebong e ng mesa a bersoech el mla melebelii ngii el Tutau. A Remerang a mocha melubet er ngii. Ng kmal kmes me ng outekangel el melubet er ngii el ngubetii el rokir. Ng milekodir a bersoech e ngoura ngika el Tutau el me me ng mengedecheduch er ngii.

Ng milengedecheduch er ngika el Tutau el kmo, “Ak osebelau me kau a mo osebelak me kerdi kaiuesobel el mo cherechar.” Tia ikid a di ldillii el telkib el tekoi e nguu ngika el Tutau el ko er a sirars a bedengel e ossekii me ng suebek.

A Remerang a mocha cholngii a ukedel me a aika el bebil er a klekedellel e merola el mo remei.

Ng mlo reme a Remerang e kie el mo meketeket e socherang. Ngika mle danges buadel a rektel me ng merael a skel a rektel e diak lebetik er ngii. A kltekete tia el rakt e ng dumia a burek er a uchul a delel. Tia ikid a mle uchul a rektel. Ng merael el kmal mo meringel me tirka el chedal a di ulsiik a cheldechulel e lemukar. Ng di kmal dimlak a rolel er tir.

Te kie el kmal meketeketa me ng mocha merael a chais. Ng merael a chais el kmo ng mla mo er ngii a chebill er a Remerang. A rechad a dirrek el di kldibel ku el omes er ngii.

Tirka el chad a di kldibel er a Remerang. A lomes er a chimo el Tutau e ng suebek el merema reboreb er a Ditmechei. A Ditmechei a ta er a bedengel a sis el dechor er a ngelong er

tia el blai. Ng reboreb ngii el Tutau e melekoi el kmo, “Remerang, Remerang, ngubetau, ngubetak.”

A lechisngekl a rechad el ngar er a blai e ngii el Tutau a ngmai a ochil el mo mudech cheru el llel me a cheberdil tia el sis. Ng miludech e odak el mo edei. Ng di uldak el mo edei e suebek el mo er a iaech.

A bo lak lomes er ngii a rechad e ng lmuut el melekoi el kmo, “Tutau, Tutau, Remerang, Remerang, ngubetak, ngubetau.” Aika ikid el omelekingel ngika el Tutau a mocha bleketakl. Tirka el chad a mocha ngmai a llel tia el Ditmechei. Te ngilai el smilek er a ralm e msa Remerang me ng melim.

A bocha el debobed a rengul a Remerang e ng ouchisa el kmo, “Ngike el Tutau a kulsebelii er a Ngerbechedrengul.” Tia ikid e a rechad er a blai mocha medengelii el cheldecheduch. Ngii el Tutau a di oututau el di mengelekel a lolekoi.

A ongeru er a sils e ng lmuut el me ngii el Tutau me ng melekoi. Ng melekoi e suebek el mo reboreb er a ulitech. A Remerang a dula el kmo, “Becherei e lak morriik er ngii e ng mla mo bleketakl a omerollel.” Ng reboreb er a ulitech ngii el Tutau, e omes er a Remerang. A lomes er a Remerang e ng mechiuaiu e mla mo kltukl a medal tia el burek er a delel. Ng okor e suebek el mocha reboreb er a delel. Ng di mlo reboreb e sicheci tia el mla mo meriokl el burek me ng di tilobed a lalech er ngii. Ng di mle telkib e ng kuk suebek ngii el Tutau el merael. A bo lekukuk e a Remerang a mocha omechebuchel el merael el mocha ungil. Tia el ungia ngii el rubak e ng mocha melibech er a cheliteklel el mo er a Tutau. Tia kid ngii el cheliteklel el di kedeb.

Tutau er a Ngerbechedrengul a dmu el kmo me ng kuk ngilbetak ngak el kuk ngilbetii. Aki mousikero a ochaeo er a bab er a Bechedrengul. Aki bo e a bersoech a mla melebelii e a kturka me ng kmo, Chudelei, mereched el ngubetii tia el besebes el melechet er a chiklek.

TUTERNGERAOD

Ngar er ngii a ta el rubak el kilie er a Imul. Ngika el rubak a bek el se el lebo er a chei e leme e ng ngotechii a mlil e ngomedii el kmal mo ungil e merael el mo remei. Ngika se el lorael e a rechelid er a Ngeraod a me me te rucherechii tia el mlil el kuk mo er a chei. Tirka se el lebo er a che e bo el merek e te di me el nguu tia el mlai el kmongii e diak lengetechii e remiid. Se el lekuk lebo el tutau me leme ngika el rubak e tia el mlil a di chelechol e di berriid a cheleuel a ngikel er ngii. Me ngika el rubak a kmal ko er a blosech er a rengul e kmo, “Tia el mlik ak ko er a kmal ngiltechii el mo ungil e merael e ngera me ng ua ise?” Me ngika kuk mo ngotechii e mo remei. E a bo el kukuk me leme e ng dirrek el kuk mla lmuut el mo chelechol e di berriid a cheleuel a ngikel er ngii.

Ng okor e me e mocha omditm el kmo, “Ng techa oba tia el mlik el ngar er a che se el bo kdibus?” Me tia el lebo el kebesenge e ng mocha dmul a ulechouch e ngmai el kuabs er a dingal e tmuu er a ilobech er a mlil el mertii. Ngika a berrotel er a ilobech e a lorrenge e tirka el chelid er a Ngeraod e te chacherodech el meremang. Me ngika el rubak okor e kmal di chelellakl e tirka di mle e mocha ketokl le te melungengel er a bul a ulechouch. Te kmu, “kngong, kngong ngera ko er a ungil a bul?” Te mo tmaut el olechetekl er tia el mlai el osiik el kmo ngera ungil a bul el ngar er tia e a lebkisii a dangeb e ngika el rubak a mekiis e kmo, “Cho, kemu itia el blechoel el me merechorech er a mlik el oba el ngar er a chei.” Tirka el chelid a melulucha er ngii e dula el kmo, “Me aika el telum me kimka e bo dedak el ngar er a chei.” Me se el debo demerek el ngar er a che e bla lebo lemechut aika el uuked e mngai aika el orremkel me le kloklem. Me ngika el rubak a meltii el omes e a lomes aika el orrumk el rokui a di udoud me ngika el rubak a kmal sokol me ng kmo, “Choi, bechere e kede mo dmak el ngar er a chei.” Me tirka mlo dmak el ngar er a chei. Se el lebo er a che e ngika el rubak a kmal di omditm er tia el orremkel a uuked le tia kmal klou el udoud. Tia kot el klou er aika el rokui el udoud el orremkel aika el uked. Tia ikid el orremkel a btil aika el uuked a lomekedo er ngii el kmo Tuterngeraod.

Tia el klteketele a lengar er a che e tirka el chelid er a Ngeraod a mesika el olab aika el uuked el mo er a blirir me te dula er ngika el sechelirir el kmo, “di debriked aika el uuked er a dingalem me di momes melak lomeksaul er kemam el mengol el mo remei.” Ngika el rubak a dula el kmo, “Choi, beche me di debriked er a diangel e ng diak lemokesakl.” Tirka mriked e

merola el mo kairirei. Ngika el rubak a di mlo reme e a lomdasu er tirka el chelid er a Ngeraod el kmo te mla mo reme e ng lmuut e me el kimdii tia el orremkel a btil a uuked e nguu el mo mertii er a omsangel el ngar er a reakl er a blil. Tia el lebo el kukuk me le kuk merema tirka el chelid e te kuk merola tir me ngika el sechelirir el mocha er a chei. Tia el lebo er a che e te mocha mesumech aika el uuked el rokui e ng di me bduu a btil a uuked er a bab me tirka el chelid a ko er a ngedecka er a rengrir me te mocha kursii a btil a uuked el me bedul bab. A le nguu el me bedul bab e ng dibus tia el klou el orremkel. Me tirka mocha oker er ngika el sechelirir el kmo, “Kau ke ngiluu a orremkel a btil a uuked? A chomngiluu e bo nguu el me me doba el ngar er a che e ng mochu mechut aika el uuked me ng mo kloklem aika el rokui el orrumk.” Tia er a ldu el ua ise e ngika el rubak a dmu, “Ng diak, ng kmal diak kudengelii.” Tirka el chelid a lmuut el kmal mocha meluluuch er ngii e ngii a di kmo, “Ng diak kudengelii.” Me te okor e luueta el me er a taoch me a leme er a taoch e tirka el chelid a dula er ngika el rubak el kmo, “Ke kmal mlo mereched a rengum e choblo mchelleklau e ng mo kloklem.” Te di dilu el ua ise e mekiis el merael. A lorael e toleker el kmo, “Tuterngeraod! Tuterngeraod! be mtobed el me me dorael.” Tia el ledu el ua ise e ng ridekekl a Tuterngeraod el tuobed er a omsangel e merdekekl el obengterir me aika el rokui el orremkel a uuked a mengubet e merdekekl el obengterir el remiid.

Ngika el rubak a ko er a debsechelang, me ng dechor el nglengael. Ng di kea lengai a olengil a mil me a cheral a sulel er a di recherechel a rengul a uchul.

UCHELBELUU ME A NGETNGOD

Ng mla er ngii a ta el beluu el lulemekedo er ngii el kmo “Uchelbeluu.” Tia el beluu a kmal mle klebokel el beluu. Ng dirrek el mle meklou a meklechel me a kerekere a di iluekl er ngii me ng kmal mle medinges el beluu.

A rechad er ngii a mle ngodech el meklou a bedengir er a rebek el chad er a irechar. Tia el beluu a kmal mle mesisiih a rechelid er ngii. Kede omekedo er tir el kmo, “Uchel.” A rechad se el lorael e beltab e te kmal mo sorir el beluu le rechad er ngii a kmal klamiokel e kmal bekerurau.

Tia el beluu a mla er ngii a ta el kmal ungil el redil el kilie er ngii. Ngika el redil a lomekedo er ngii el kmo, “Ungilreng.” A rechad a kmal mlo sorir el redil me te millibech a chelitakl el mo er ngii. Te dirrek el mlo melekoi a chebechiil er ngii e ng di dimlak a ta er tir el mlo sebechel mo bechil. Tia ikid e a ta el kekere el chad er tia el beluu el lomekedo er ngii el kmo, “Uchelrak” el mle Oleb el chelid e Oleb el chad a omdesua el mo bechil a Ungilreng. A Uchelrak a ulemais el mo melekoi a chebechiil er a Ungilreng e dirrek el dimlak lsebechel mo bechil le Ungilreng a di uluuntingaol er ngii.

A chisel a Ungilreng a mla oberek el mo er a bek el beluu me a rechad a mla mo sorir el mo omes er ngii. A ta el chad el kilie er a Ngetngod a kildmeklii e mlo el mo omes er ngika el redil. Ngika el chad a ngklel a Sokok. A Sokok a kmal mlo soal ngika el redil me ng mlo melekoi a chebechiil er ngii. A Ungilreng a mle soal le ng orrenge a chais el kmo a rechad er a Ngetngod a melngod er a rechad me ng kmal ungil el belsiochel a bedengir. E ng di Ungilreng a dirrek el dimlak di lemereched el kongei el mo bechil a Sokok.

Tia ikid a Sokok se el ta el be lomes er a Ungilreng e a rechad a obengkel el olab a kall. Tirka el chad a kmal ungil el delngod a bedengir me a Ungilreng a kmal sokol. Tia ikid a Ungilreng a mocha kongei el mo bechil a Sokok. Ng mle soal mo belsiochel a bedengel el ua rechad er a Ngetngod.

A Uchelrak a kmal mlo mecheche me ng mocha melekoi er a rechelid er a Uchelbeluu me lebo Itemellii a Uchelbeluu me a Ngetngod. Ng mle soal a lemad a Sokok me a Ungilreng me a lechub e lebo lechacheuid. Tirka el chelid a mocha chubur a Uchelrak me te ongesechii a daob

el tomall aika el beluu me ng di mlo daob. Chelecha e a debo er ngii e ng di daob e diak a ta el beluu.

UEL ER A NGELLIL

Ng ngar er ngii a Ngellil el chelebacheb el ngar er a Irrai el mle beluu er a irechar. A ta er a klebesei e a ta el melenges a millenges me ng ngar er a chetebtel a lius el melenges e omes er a uel el me ngmasech er a chelechol el melebek el osiik er a lebo lomechell er ngii. Me ng okor e me metengel e kolekel el me er aika el obliil e dmu el ua se, e a morael el me me bo desa uel el ngar er a chelechol.”

Me te mocha kolekel tirka el chad el mo e a lebo e ng melebek ngika el uel me te mo el mechere me ng mechell el mo merek e mereko e te mo dmak el rokui e mecheruui. Me te mecheruui e mereko e kursii el me er a bita er aika el blilir, me te mocha omes er ngii e mekodir e mocha mesodel er ngii el mocha odoim. Me te sodelii el mo el mo merek e mechemii e mereko e nguu el loia er a klou el olekall e nguu el metir er a ingukl.

Me te nguu el metir e mereko e mocha chumlii a ngau. E dmu er a ta el kekere el redil me ngolsiu er a ngau. Ngika el ngalek a cheterochel el ngalek er tia el blil ngika el merredel er tia el Ngellil me te ousibai er ngii.

Me te mo kabedebad el rokui el chad er tia el blai, e dmu er ngii el kmo, “Molsiu er tia el ngau el omeckmarek er tia el klengoes.” Me ng olsiu er a ngau e mereko e diak a kmal ungil el idungel me aika el idungel a kmal chetuul me ng mo meringel a medal me ng metebetobed a iuechel a medal.

Me ng ua ise el meselsuld a chiuosech er a medal le ng meringel er a chat e mereko e ngika el uel a ngordii a chiklel er a olekall e okere er ngii el ua se, “ngera me ke lmangel?” Me ng kmal mlo medakt ngika el ngalek me ng kmal di lmuk e ngii a lmuut el oker er ngii el kmo, “ngera me ke lmangel, ngmekngit a rengum er ngak?” Me ngika el ngalek a dula er ngika el uel el kmo, “choi, ngmekngit a renguk er kau a uchul me ak lmangel.” Me a uel a dula el ua se, “mada molsiu er a ngeuim e se el bo kmarek me bo longa er ngak, ke di olechebechib er kau.”

Ng okor e olsiu er tia el klengoes el mo el mo mark e mocha olekiis er a reblai. Me a reblai a mekisa e mo olekiis er a rebeluu. Me te mocha ngmai a ongulir e mocha kldibel e menga er ngika el uel.

Tia el bo longa er a uel, e te mlenga el bek el chad e dmu er ngika el ngalek el kmo, “ng diak be mnguu a odimem e kuk momengur?” E ngika el ngalek a dmu el ua se “ng diak, mchielak e ngak a ko er a kmal meringel a delek, me bo ktong me ak me e kumengur kung.” E mereko e ko er a di mererorael er a cheroid el lolechebechib er ngii er tia el blengur.

Me te menga a rebeluu el mo el mo merek e mocha kudmokl a kall e mereko e me me te dengchokl el kmal ungil a rengrir e le te mla menga er tia el kmal melaok el uel. Me te di kilie el mocha bedul a kebesengei, e mereko e mocha kuadersta er tir el mad. Te mad a rebebil el telkib e te kuk mad a rebebil el di mle ua ise, el mo el ngomeda el chimo el beluu el di mlo diak a chimo el chad el kiei. Te di mlad el rokui e di mlo ngika el ngalek a kiei.

Me ng kie ngika el ngalek el redil, e ko er a kmal medekta, e le ng di ngii el ta kung. Me ng omdesua el ua se ngak a bai mochu osiik er a rechad. Ng ko er a diak a mlai me ng ko er a rrau a rengul e kmo, “ngak ak mo er ker e ng sebechek el metik er a rechad.”

Me ng mocha nguu tia el ukebel a uel, e outekangel el kursii el nguu el mo er a daob, e a lebo e ng blechakl el kmal diak a daob el mo tmuu er ngii. Me ng mocha nguu a dekelel e mereko e mo doiderekl er tia el ukebel a uel, e a lebo e ng kmal sebechel el otekir.

Me ng melikes el di mengeblabel er a chelebacheb el me ieuekl er a Bkul a Bngei, e melikes el me el me okiu a Cheludoud e melikes el me el soiseb er a taoch er a Ngerusar.

Tia er a lebe lsiseb er a taoch er a Ngerusar e ng mle el kmongii a mlil er se ledu el kmo, Taoch er a Deleb, e mereko e kmerd. Me a lekerd e ng kmerd e osiik er a rechad e mlo metik er a blai er a Klai. Me ng mo me ng ko er a mededechor me a rechad er tia el blai a ua se, “A kei, kau ke ngalek er ker?” Me ng ua se, “Ak mla er se el mei.” “Morael el me er a blai.” Me ng merola el mo er a blai me ng ko er a di dengchokl e le ng ko er a merur le ng dirk mlei, me ng diak lodengelterir a rechad. Tirka el chad er tia el blai a olderedurech er ngii, me ng ngar er a oderuchel el mo el ko er a kmal smonga er a rechad er tia el blai, me ng mocha kie el ua lengelekir.

Me ng di kilie el mocha klou el redil el ua lengelekir ku el kmal mocha smau er tirka el blai. Me tirka el blai a kmal mla mo sorir ngika el ngalek me te mocha nguu el mo ta er a ngelekir.

UNGILRENG ME A MEKNGITERRENG

A Ungilreng me a Mekngiterreng a mle teru el odos. Te kilie el obengkel a derrir. A Ungilreng a kmal mle ungil a rengul e a Mekngiterreng a kmal mle mekngit a rengul. Se el loilil e a Mekngiterreng a di blechoel el okoad er a Ungilreng. A Ungilreng a kmal di blechoel el meluluuch er ngii.

A ta er a klebesei e te mlo er a che el terung. E a Mekngiterreng a ngmasech a rengul e mo okoad er a Ungilreng. A Ungilreng a di milluluuch er ngii e ngii a di diak lebo lungil a rengul. A Ungilreng a kmal medekta me ng oko e chemiis el me er a blil er a beluu.

A leme a Ungilreng er a blil e a delal a dengchokl er a medal a tuangel. A Ungilreng a dmu er ngii el kmo, “Chedil, mereched el mekengii a ngerem e bo ktuu el mo mertak er a omarkolem e a kmal medakta er a Mekngiterreng.” A delal a mekengii a ngerel e ng tmuu er a chelsel.

Ng di mle telkib e a Mekngiterreng a meremang. Ng di mle el kmo, “Chedil ngar er ker a Ungilreng?” Me a delal a kmo, “Ak mla merkeklii.” A Mekngiterreng a kmo, “mereched el mekengii a ngerem e bo ktuu er a chelsel.” A delal a okor e mocha mekengii a ngerel e ng mocha soisseb er a chelsel el mo er a omarkolel. Se ikid a uchul me se el lengasech a rengud e ng di telkib e ng kuk mo ungil e le Ungilreng a ngar er chemel.

BELKUL A TEKOI

B	
1. Bechobech ruk	-- Ta meklemengetir el blechobech
2. Bechoel	-- Di blechoel el ngar er ngii a omech a dubech el teko
3. Beng	-- Cheldukl el bad el omub a ngikel
4. Bengadakl	-- Chelebuul
5. Bikei	-- Rebuik
6. Bisaol	-- Osengel, Ues
7. Bkeikl	-- Sebechel el obkais
8. Blotk	-- Omerdekek
9. Bluchel	-- Teletelel
10. Botech	-- Ke rdi oldeu a rengrir
11. But	-- Btil a cheriut
C	
12. Chebedes	-- Mekngit el rakt
13. Chebill	-- orars el melenget er a smecher el chad
14. Chebul	-- Mengub
15. Chemetii	-- Mengaet
16. Cheos	-- Sils
17. Cherroakl	-- Cherrouir
18. Chetkongel	-- Chimad er a uloech
19. Chobeduul	-- Aike el meched el betbeduul el ngar er ngii a bad
20. Cholbii	-- Oeak a diak lorreall el mo er a otaor
21. Choruakl	-- Ongeru el omelekoi
22. Chotekill	-- Me a leme chad el mo oltak er ngii
23. Chusel	-- Ongulel, ongraol

D	
24. Dalem	-- Kekerei el buuch
25. Danges buadel	-- Smecher el di dengarech el mechiuaiu
26. Deldalech	-- Esberberel a uingel el bechachas
27. Deleukes	-- Dikesel ngike el meluchel er a dui el chad
28. Diak utul	-- Diak kulekoi
29. Didil	-- Rolel
30. Didiul a bellau	-- Oldiu el ko er a omelau a teko
31. Dik	-- Ng ua luleldik
32. Dikesel	-- Blingelet a kall er a chelsel a klobak, Se el blingelet
33. Diklongang	-- Kloi
34. Dikukereng ku	-- A di kulebedebek
35. Dilidichii	-- Se el dolidiich er a chad
36. Di ouketui	-- Ngke el soal e meruul er ngii e lekong diak el soak
37. Di tangerkoi	-- Di chimo el ngalek
38. Ditmechei	-- Sis lolebes er a rsmecher
39. Dongesii	-- Omuchel el mo mesang
40. Duchar	-- Mukdechar, rullii el mo mesisiich
E	
41. Esesel muk	-- Me di kluk. Diak longedecheduch
I	
42. Iaech	-- Llel a lius el melekau a ralm el mo er a ollumel
43. Ilamrokl	-- Ngikel el ko er a tungch
44. Ilbelbii	-- Liueklii
45. Iratел	-- Aike el besebes el omart er a rechad me ng diak lemedangch
46. Irretii	-- Mengeuid er a bedengel el mo diak el medangch
47. Itnger	-- Kede ngmai a llechud er ngii
K	

48. Kaeb	-- Kot el bekerurt el mlai er a Belau
49. Kaiul	-- Keai
50. Kebekuul	-- Kingellel a klobak
51. Kebir	-- Kaeb er tir
52. Kebudu	-- Kakerous el osiik
53. Kederael	-- Se el bita er a mlai el diak loudesomel
54. Kemechesur	-- dibechii
55. Kengbokl	-- Soad el mo e le kede ko er a nguibes er ngii
56. Kerreomel	-- Chad el metmedium er a blil a delal el omes er ngii er aike el bek el lousbech
57. Kesebakl	-- Suebek a rengul
58. Ketord	-- Ngklir a rebekeu el chad
59. Keuoi	-- Ke kot
60. Kibis	-- Betok el chad lomes a osongel
61. Kirekir	-- Diu er a mekemad
62. Klbadel	-- Mla mo medenge el tekoi el ua isei
63. Kldalluked	-- Ng ua lluked
64. Klekerengel	-- Mengkar er ngii
65. Klomengelungel	-- Tekoi er a remengol el redil
66. Kelulau	-- Aike el llach er a beluu
67. Kodauid	-- Ko mokodir a olbidel
68. Koll	-- Kmoll
69. Krousuchokouid	-- Merous a okouid
70. Ksichedekla	-- Ngmai locha er a btil a cheritel me lak lobes
71. Ktililem	-- Ng ua ia telechemakl a ngerek
L	
72. Lled	-- Roled
M	
73. Meangel koi	-- Koi el daob le ng tobedung

74. Mebeabed	-- Diak lsa el blektakl osenged el mesang
75. Mecheseb	-- Milsibech a titiul a kerrekar
76. Mechucher	-- Omchur
77. Mekatongel	-- Omekeek a telongelet
78. Mekngosii	-- Selumech el llel a kerrekar
79. Melai	-- Cholkerekil er a klalo el ngar er a ulebongel er a blai
80. Melalemioi	-- Mengelekkel se el omenged
81. Melat a ngeltel	-- A lak le ngii e ng metacherbesul
82. Melechesulik	-- Etau me a eolt el mo kaisiuekl a debel
83. Melitech	-- Oltitech
84. Melulau	-- Bai el beluu er a Beliliou
85. Meluluut	-- Soal mo meduch e medakt a rengul
86. Melumk	-- Omditm
87. Mengetobt	-- Se el blabo el dum a dersechimo el bad er a kereker
88. Mengiro	-- Melebodeb
89. Mengol	-- Mengereker el redil. Oba klalo er a ongelngelel
90. Merirt	-- Remurt
91. Merrars	-- Aike el omekouad a techebel a cheualech el cheluikl el bambuu
92. Merrau	-- Se el dolab a derau el ngar er a chei
93. Metouch	-- Omtang er a beldekkel a cheldecheduch
94. Milngakl	-- Di melta el rokui el ridekek
95. Mlengeul	-- Mo mekikngit a rengul
96. Mlongebet	-- Di kilie le ng mlo bechiil
97. Moiuaiu	-- Budech
98. Momtori	-- Diak a mo sebelii
Ng	
99. Ngliil	-- Kerrekar el mla mo nglangel
100. Ngeriakl	-- Diak el sebechel er a chelitechetul

101.Ngesechelem	-- Se el bo mngasech er ngii el mo er a blai
102.Ngirreau	-- Ng uai a kdilu er kau
103.Ngukokl	-- Kileberruul
104.Ngusem	-- Bechil ochedam el bechil el redil
O	
105.Obei	-- Ngkel a diak el ungil kukau
106.Oiu	-- Chetau
107.Okerduul	-- Kekere el iungs er a medal a Imeliik
108.Okouil	-- okau
109.Oktemang	-- Rubak er a blai el kmeed er a demad
110.Oleongel	-- Delongelet a beluu
111.Oletongel	-- Aike el belsibs er a desomel
112.Olikar	-- Ngkel a direkork el mela ngikel
113.Oliongel	-- Se el diak lsa el lebo er ngii a rechad
114.Olsomel	-- Bo mesemau
115.Oltall	-- Olekall el chutem
116.Omaiuauiu	-- Ungil budech
117.Omibiul	-- Ng omibii er a biul el kob
118.Omekrengukl	-- Ngkel a kot el klebokel el charm
119.Orebakel	-- Blil a dekel me a besos
120.Oteiil	-- Ngke el doltoir er ngii el chad
121.Ourengor	-- A chelid a soual me ruebet er ngii
122.Ousikero	-- Oba uuked el mela charm el kall
R	
123.Rokerk	-- Sebekreng
124.Rongel	-- Didichel
125.Ruetengel	-- Tirke el delal a blai el sebechir el mo kldorolel a blai
S	
126.Sob	-- Ongeluluul

127.Soilekelam	-- Somam
T	
128.Tangadik	-- Delsachel el biskang el ko er tengadidik el charm
129.Tekeiungel	-- Tekoi er a deleuiil
130.Telbenged	-- Ta el lebo er ngii
131.Telengtengil	-- Beldekkel a tekoi
132.Telmukl	-- Aike el ngar er ngii a mo ultutelel er a ngar er a medad el klebesei
133.Teliriu	-- Ko meterekokl el chelebuul
134.Temetat	-- Bar el ko er a mechut
135.Temlengel	-- Belngel
136.Tengetongel	-- Ngke el dolenget er ngii el chad
137.Tet	-- Mekekerei el ko er a blai el blil a chedul a chad
138.Tichiau	-- Udoud el lechudel a ruerrot el outkeu er a chad el mo tuchelii a klobak
139.Titiul	-- Ngelekel
140.Tmanges	-- Omtok
141.Tmuil	-- Se el lebe el dum a medad er a blai
142.Totau	-- Kerreel el orreked er a desomel
U	
143.Uka	-- Omechelel a tekoi
144.Ulechechisakl	-- Berrotel el teletelel
145.Ulekebai	-- Ng diak kobong
146.Ulitech	-- Eleuikl el llel a lius el klebikl er a tuangel el omart er a rechad el ngar er a blai.
147.Ulochel	-- Omlaoch er a ngar er a medad el tekoi
148.Ulongoklel	-- Ultebengel me ng diak dobes er ngii
149.Ulseuechel	-- Bita el ulekngellel a kim
150.Uluungoaol	-- Mo er a che er a ngoaol

151.Utang	-- Uchelel a tekoi
152.Utibek	-- Tebechelel a teletelel